


Библия пэ влахицко
романи шыб



Eastern Vlakh Romani

Библия пэ влахицко романи шыб Eastern Vlakh Romani

copyright © 2021 Pioneer Bible Translators

Language: Romani

Dialect: Vlakh

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 25 Aug 2024 from source files dated 15 Apr 2023
ab46a001-b22a-5879-ae4a-27ace52a2042

Contents

Руфь	1
Иона	6
Лукастар	9
Рындоря	61

О лил палай Руфь

О Элимелехо и лэско йири пэрэлдэн андо Моаво

1 Андэ кола деса, кала хулаинас э сындолмаря, андэ кодыя пхув тердяпэ бок. Ех мануш анда Вифлеемо, кай андэ Иудея, пэрэжыля андэ Моавицко пхув екхтанэ ла ромняса тай дуе шавэнца.

2 Кадылэ манушэс акхарэнас Элимелехо, лэстерья ромня — Наоми, ай лэстэрэ дуе шавэн — Махлоно тай Килионо. Вонэ саслэ аракхадэ андо Эфрато — анда Вифлеемо, кай исын андэ Иудея. Вонэ авилэ андэ Моавицко пхув, кай тэ пожувэн хотэ.

3 О Элимелехо, о ром ла Наомияко, муля, ивой ашыляпэ екхжэни лэ дуе шавэнца.

4 Вонэ линэ пэсти ромнян моавитянкэн — екха акхарэнас Орпа, ай авря Руфь. Кала прожылэ паша э дэш бэрша,

5 о Махлоно тай о Килионо кадя жэ мулинэ, э Наоми ашыляпэ би ромэсти и би шавэнди.

Э Наоми рисайвэл андо Вифлеемо

6 Кала пэз Моавицки маля э Наоми угангия, со о РАЙ сгындолсардя пала Пэсти мануша тай дя лэнди хамос, вой закамля тэ рисайвэл андай Моавицко пхув черэ. Ласа жылэ и лати дуй боря.

7 Э Наоми мэкляпэ андо дром, и лати боря жылэ ласа. Па дром андэ Иудея

8 Э Наоми пхэндя пэстерэ дуен борянди:

— Рисайвэн черэ каринг тумарэ чяче йири! Мэж о РАЙ авэл тынгуно каринг тумэндэ, сар и тумэ саслэ лашэ важ тумарэ рома, савэ мулинэ, и важ мандэ.

9 Мэж о РАЙ дэл зор кожнонати тумэндар тэ аракхэл бах андо чөр аврэ ромэско. Вой чюмидэлас лэн, сар ля тэ жалтар, ай вонэ заголосусардэ, заровлэ

10 и пхэндэ лати:

— Амэ рисайвэса туса каринг терэ мануша.

11 Э Наоми пхэндя:

— Щеялэ, рисайвэн черэ. Пала со тумэ тэ жан манца? Мэ со, анава инке шавэн, савэ авэна тумэнди ромэнца?

12 Рисайвэн чөрэ, мэрнэ щея, мэ сым пхури, кай тэ жав пала ром. Кала мэ и гындоя, со мандэ инке исын надежда, — сар кай андэ кадыя ряят мэ тэ совав ромэса, ай тунчэ тэ аван шавэн, —

13 сар тумэнди трэбүй тэ аштэрэн, кала вонэ вибарёна? Трэбүй ли тумэнди тэ ашшнэ ся кадыя времяя би ромэнди?! Най, мэрнэ щея. Мэрни грижа фартэ пхари важ тумэндэ, о РАЙ шутя пэр мандэ Пэсти холи.

14 Вонэ упалэ заголосусардэ и заровлэ. Э Орпа чюмидя ла сасуя, сар ля тэ жалтар, ай э Руфь отпхэндяпэ тэ жалтар.

15 Э Наоми пхэндя:

— Дикх, тери ятровка рисайвэл каринг пэстерэ мануша тай каринг пэсти дэвэла. Жа и ту ласа.

16 Ай э Руфь пхэндя:

— На манг ман тэ ашавав тут и тэ рисайвав. Мэ жава инчя, каринг жаса ту, и ашавапэ котэ, кай ту ашэсапэ, терэ мануша авэна мэрнэ мануша, торо Дэл авэла мэрно Дэвэл.

17 Кай ту мэрэса, котэ и мэ мэрара, тай котэ мэж ман и прахона. Мэж кадя тай кадя тэ марэл ман о РАЙ, кати ехк о мэримос розашавэла амэн туса!

18 Э Наоми поля, кай э Руфь саастэс приля андо ди тэ жал ласа, и парашыла тэ отбишалэл ла.

19 Вонэ жанас дужэнэ жы каринг о Вифлеемо. Кала вонэ авилэ андо Вифлеемо, андо форо тердялэ бари дума.

— Када э Наоми?! — пушэнас э жувля.

20 Ай э Наоми пхэндя лэнди:

— На акхарэн ман Наоми, ай пхэнэн Мара*, пала кода со о Майзорало тердя мэрно жувимос кэрко!

21 Кала мэ жылэмастар, мандэ сас ся, ай о РАЙ андя ман палпалэ ни соза. Пала со ж тумэ акхарэн ман Наоми? О РАЙ сындосардя ман, о Майзорало бишалдя манди грижа.

22 Када рисайля э Наоми, и ласа андай Моавицко пхув авиля лати бори, э Руфь моавитянка. Вонэ авиле андо Вифлеемо, кала авиля время тэ стидэн о ячмэно.

2

Э Руфь дикхэллэ лэ Боазоса

1 Кай о ром ла Наомияко сас родо, савэс акхарэнас о Боазо. Вов сас мануш ашундо, андай кодыя жэ порода, сар и о Элимелехо.

2 Э Руфь моавитянка пхэндя ла Наомияти:

— Мэй ман, мэ жава андэ маля тэ подтидав э колосуря пала колэс манушэс, андэ кастерэ якха аракхава тынгимос.

Э Наоми пхэндя:

— Жа, мэрни щей.

3 Э Руфь жыля и ля тэ подтидэл палай жнецууря э колосуря, савэ пэрэнас пэ мал. Тердялэ кадя, кай кадыя мал сас лэ Боазости, саво сас анда порода лэ Элимелехости.

4 Андэ кодыва жэ дес екхжэнэ о Боазо авиля инчя анда Вифлеемо.

— Тэ авэл о РАЙ тумэнца! — пхэндя вов лэ жнеционэнди.

— Бахтало ту сан лэ РАЕСТАР! — пхэндэ вонэ лэсти.

5 О Боазо пушля кай о бутярно, саво сас барэдэр пэ жнецууря:

— Кастери када щей, кадыя тэрни жувли?

6 О бутярно, саво сас барэдэр пэ жнецууря, пхэндя:

— Када моавитянка, сави авиля ла Наомияса андай Моавицко пхув.

7 Вой пхэндя: «Мэй ман, мэ лава тэ подтидав палай жнецууря э колосуря машкарай снопуря». Вой авиля тэсара и ашыляпэ катэ жы кала времятэ; кати найбут отчиеля андэ вушал.

8 Тунче о Боазо пхэндя ла Руфяти:

— Щей мэрни, ашун ман. На жа тэ подтидэс э колосуря пэ авэр мал, на жатар катар, ай ашпэ мэрнэ бутярняса.

9 Дикх, кай терэн бути э жнецууря, и жа палай бутярнэ. Мэ припхэндэм мэрнэ манушэнди, тэ на цыпин пэр тутэ. Сар закамэса тэ пэс, поджа и пи андай кхорэ, савэ пхэрдэ мэрнэ бутярнэ.

10 Вой пэля тэлэ, тэлия лэсти жы ла пхуята и пхэндя:

— Пала со мэ аракхлем тынгимос андэ терэ якха, состар ту терэс кацаво лашымос манди, мэ жэ авря пхуятар?

11 О Боазо пхэндя лати:

— Манди роспхэндэ пала ся, со ту тердян важ тери сасуи, кала муля теро ром: сар ту ашадян ла да и лэ дадэс, ашадян о тхан, кай аракхадилян, и авилян каринг э мануша, савэн ту на ганэсас данглал.

* **1:20** Пхуррано еврейско алар «Наоми» исын «драго», ай алар «Мара» исын «кэрки».

12 Мэк о РАЙ дэл тути бах пала кода, со ту стердян, и мэк пхэрдо дэл тути о РАЙ, О Дэл лэ Израилеско, каринг Саво ту авилян тэ гарадёс тала Лэсти пхака.

13 Вой пхэндя:

— Тэ авав мэ и майанглэ тэ аракхав тынгимос англа терэ якха, мэрно рай. Ту улан ман, тेरя копэльница, пхэндян манди лашэ алава, хоть мэ жэ и най терэ копэльнициэндар.

14 Кала авиля э времяя тэ хан, о Боазо пхэндя ла Руфяти:

— Поджа кардэ, бол о котор марно теро андо шукло чехыри и ха.

Кала вой бэшля пашай э жнечура, вов дя лати прыжымэ ворзо. Вой халя, чаядлия, и латэ инке ашыляяпэ.

15 Тунче э Руфь жыля тэ подтидэл э колосуря, ай о Боазо припхэндя пэстерэ манушэнди:

— Мэквой тидэл и машкарай снопуря, на цыпин пэр латэ.

16 Ай инке отшон важ латэ э колосуря андай снопуря тай ашавэн лати, мэк подтидэл, ай тумэ на дошалярэн ла.

17 Жы каринг о вэчэро э Руфь подтидэлас э колосуря пэ мал. Кала жэвой обмардя э колосуря, стидяпэ каринг йипаш гоно^{*} о ячмэнно.

18 Вой ля лэс, андя андо форо, и лати сасуи додикхля, сар бутвой стидя. Тунчевой дорэсля кода, со ашыляяпэ латэ лэ хамастар, и отдяла Наомияти.

19 Э сасуи пушля латар:

— Кай жэ ту тидэсэ? Кай ту тердян бути адес? Тэ авэл бахтало кодыва мануш, саво шутя тут сама.

Э Руфь ростхэндя ла сасуяти, каастэ пэ малвой тердя бути.

— Лэ манушэс, пэ мал каастэ мэ адес тердэм бути, акхарэн Боазо, — пхэндявой.

20 — Мэк РАЙ дэлэ лэсти баих! — пхэндя э Наоми пэстя боряти. — Вов на ашадяби тынгимаско ни лэ жундэн, ни лэ мулэн!

Ай тунче инке пхэндя:

— Кадыва мануш — амаро пашэ родо, во екх амарэ фиримарэндар.

21 Э Руфь моавитянка пхэндя:

— Вов жэ пхэндя манди: «Ашпэ екхтанэ мэрнэ бутярнэнца, жы кай вонэ на злэна ся мэрно ворзо».

22 Э Наоми пхэндя ла Руфяти, пэстеря боряти:

— Мэрни щей, драго, сар кай ту авэса лэстэрэ бутярнянца. Тунче нико на цыпия пэр тутэ пэ авэр мал.

23 Э Руфь ритярдёлас екхэтанэ лэ Боазостерэ бутярнянца и подтидэлас э колосуря, жы кола времятэ, кала ся постидэ о ячмэнно тай э див. Ай жувэласвой тунче ла сасуяся.

3

Э Руфь и о Боазо по гумэнэ

1 Э Наоми пхэндя пэстеря боряти:

— Мэрни щей, мэ камав тэ подродав тути лашо састо тхан.

2 Гэн акэ, амаро родо о Боазо, савэстэ лэ бутярнянца ту санас андэ мал, адесувэчери лэла тэ вужарэл о ячмэнно по гумэнэ.

3 Ту халадю, макпэ, вурядю и жа по гумэнэ, ай лэ Боазости на сыкадю, жы покэвов хала и пэла.

4 Роздикх, кай вов пэрэла тэ совэл, тунче поджа, розушарав лэстэ катар э пернэ о дияло и пэр. Вов пхэнэла тути, со тэ терэс майанглэ.

5 Э Руфь пхэндя:

— Мэ стерава ся, сар ту пхэндян.

* **2:17** Пэ пхурано еврейско шыб «екх эфа». Екх эфа — пашай 22 литра.

6 Вой жыля по гумэню и стердя ся, сар припхэндя лати э сасуи.

7 О Боазо халя тай пиля, и пэля тэ совэл катар э куча лэ ворзоса. Э Руфь полокорэ поджыля, розушарадя лэстэ катар э пэрнэ о дияло и пэля.

8 Андэ машкар рят вов ля тэ мишкпэ, обрисайля и додикхля, со катар лэсти пэрнэ пашлёт жувли.

9 — Ко ту? — пушля вов.

Вой пхэндя:

— Мэ э Руфь, тери копэльница, — пхэндявой. — Лэ ман пала пэстэ*, ту амаро фирмими.

10 Вов пхэндя лати:

— Тэ дэл о РАЙ тути баих, мэрни щей! Ту иксхатар терэс майбаро лашымос колэстар, саво сас данглал: на лян тэ родэс тути тэрнэс — ни чёрэс, ни барвалэс.

11 На дара, мэрни щей, мэ стерава ся, пала со ту ман мангэс. Андэ кадыва форо саворэ ганэн, кай ту лашы жувли.

12 Када чячес, мэ тумаро родо, но исын инке родо, майпашэ мандар.

13 Ашпэ пэ рят катэ, ай тэся, сар вов закамэла тэ авэл тумаро фирмами — драго, мэк авэл. Ай сар вов на закамэла, тунче, солахав лэ РАЕСА, када терава мэ. Сов катэ жы каринг э тэсара.

14 Вой сутя катар лэсти пэрнэ жы каринг э тэсара, и ушия жы колэстэ, сар ехж мануш тэ додикхэл аврэс. О Боазо гындояс: «Мэк нико на ганэн, кай жувли авилясас по гумэню».

15 Вов пхэндя лати:

— Дэ теро косно и подритьяр лэс.

Э Руфь ростэлисардя о косно, и о Боазо шутя андо косно баро гоно[†] о ячмэню. Вов тходя лати пэ пхикэ о ячмэню и жылятар андо форо.

16 Кала э Руфь авиля каринг э сасуи, э Наоми пушля латар:

— Сар ту, мэрни щей?

Э Руфь ростхэндя пала кода ся, со тердя лати о Боазо.

17 И инке пхэндя:

— Вов дя манди баро гоно ячмэню и пхэндя: «На рисав каринг тери сасуи шушэ вастэнца».

18 Э Наоми пхэндя:

— Аканы, мэрни щей, подаштэр, йито уганэса, соза э дила стерэлапэ. Кадыва мануш на улэлапэ, покэ адес жэ на стерэла сяй дила.

4

О Боазо лэл ла Руфь пала пэстэ

1 Ай о Боазо жыля и бэшля катар лэ форости вудара. И дикхэл: жал кадыва родо, пала кастэ вов пхэнэлас. О Боазо акхардя лэс и пхэндя:

— Поджэ кардэ, амал. Прибэш.

Кадыва поджыля и бэшля.

2 Андэ форо о Боазо акхардя дэшэ барэдэра манушэн и пхэндя лэнди:

— Бэшэн катэ.

Вонэ бэшлэ.

3 О Боазо пхэндя колэ родости:

— Дума жал палай мал лэ Элимелехости, амарэ родости. Э Наоми рисайля андай Моявицко пхув и битинэл э мал.

4 Мэ погиндосадэм, кай трэбуй тэ пхэнав тути пала када. Ту трэбуй тэ витинэс катая мал англа саворэ, ко бэшлэл, и англа э барэдэра амарэн манушэн. Камэс,

* **3:9** Пэ пхурено еврейско шыб алава: «Ваздэ тери э пхак пэ тери копэльница». † **3:15** Андо пхурено еврейско лил тердён алава: «шов (паясля) ячмэню».

витин, ай на камэс, пхэн манди, кай мэ тэ ганав. О чячё витинимос ашэллпэ пала тутэ, ту англуно, ай мэ тунче пала тутэ.

— Мэ витинава, — пхэндя кодыва.

5 О Боазо пхэндя:

— Сар кай ту тинэса э мал кай э Наоми, ту кадя жэ трэбуй тэ лэс пала тутэ ла Руфя моавитянка, ла пхивля, соб латэр бэяцэ тэ авэн хулая пэ лэско хаббэ.

6 Тунче кодыва пхэндя:

— Най, мэ на витинав кадыя мал. Мэ дарав, со кадя римосарава мэрно хаббэ. Витин фэдэр ту, мэ на витинав.

7 (Андэ пхурани времяя кай э израильтняуря сас обычаё, кала пэрэдэнас по чячё витинимос, соб тэ састирэн о допхэнимос, о мануш излэлас пар пэстэ э сандали и отдэлас аврэсти. Кадя э израильтняуря састирнаас о допхэнимос.)

8 — Тин ту, — пхэндя о родо лэ Боазости и изля о сандали.

9 О Боазо пхэндя лэ барэдэрэнди тай саворэнди, ко бэшэлас:

— Адес тумэ дикхэн и шунэн, икхатар мэ тинав кай э Наоми ся, со сас кай о Элимелехо, Килионо и кай о Махлоно.

10 Кадя жэ и ла Руфя моавитянка, ла пхивля лэ Махлоностеря, мэ лав пала мандэ, кай э бэяцэ лэ Махлоности тэ авэн хулая пэ лэско хаббэ, и кай тэ на пэрэшындэл лэско родо анда амаро форо. Адес тумэ екхжэнэ дикхэн и шунэн када!

11 Тунче саворэ, ко сас катар э вудара тай э барэдэра пхэндэ:

— Кадя амэ дикхас и шунас! Мэж о РАЙ дэла кала жувляти, сави зажал андэ тери чөр, бут бэяцэн. Сар Вов дя бут бэяцэн ла Рахиляти тай ла Лияти, савэндар аракхадилэ ся э израильски мануша! Зорало ав андо Эфрато тай гангло андо Вифлеемо!

12 Мэж чөрээ э терэ бэяцэн, савэн о РАЙ дэла тути кала тэрня жувлятар, тери порода авэла, сар э порода кай о Парэцо, савэс э Тамар аракхадя лэ Иудости!

Э порода лэ тхагарэсти лэ Давидости

13 О Боазо ля пала пэстэ ла Руфя. Вов сутя ласа, ай о РАЙ дя лати тэ авэл пхари, и вой андя шаворэс.

14 Э жувля пхэнэнас ла Наомияти:

— Бахтало о РАЙ, Саво дя тути фиримарес! Тэ ашарэллпэ вов машкара израильтняуря!

15 Вов рисарэла тути э лош тай подиртирэла тут андэ пхуранэ бэрша! Э бори тери, сави камэл тут, андя лэс! Вой важ тутэ фэдэр ефта шавэндар.

16 Э Наоми пхираавэлас лэ бэятос пэ васт и дикхэлас пала лэстэ.

17 Ай э жувля, савэ жувэнас котэ, пхэнэнас:

— Шаворо аракхиляпэ кай э Наоми.

Вондэ динэ лэсти о алаб Овидо. Вов ашыля дад лэ Иесёйско, саво сас о дад лэ Давидоско.

18 Акэ э порода лэ Фарецости: о Фарецо ашыля дадэса лэ Хецроноско,

19 о Хецроно ашыля дадэса лэ Рамоско, о Рамо ашыля дадэса лэ Аминадавоско,

20 о Аминадаво ашыля дадэса лэ Нахшоноско, о Нахшоно ашыля дадэса лэ Салмнооско,

21 о Салмно ашыля дадэса лэ Боазоско, о Боазо ашыля дадэса лэ Овидоско,

22 о Овидо ашыля дадэса лэ Иесёйско, о Иесёй ашыля дадэса лэ Давидоско.

Лил лэ Ионастар

О Иона нашэл Дэвлэстар

1 Кариk о Иона, лэ Амитайско шаво, сас о алав лэ РАЕСТАР:
2 — Ущи, жа андо баро форо Ниневия тай роспхэн котэ о алав. Мандэ дожыля дума пала лэндерэ холятерэ дилэ.
3 Ай о Иона тидяпэ тэ нашэлтар лэ РАЕСТАР андо Таршыши. Вов авиля андэ Яфа, тай аракхля э барка, сави жаластар андо Таршыши. Вов потиндя важ о дром, взгляпэ пэ барка и лаггятар лэнца па паи, соп тэ нашэлтар лэ РАЕСТАР андо Таршыши.

4 Тунче о РАЙ бишалдя холяти балвал по баро паи. Вагляпэ кацаво зорало штормо, со э барка сас гата тэ розмардёллэ.

5 Саворэ морякуря пэрэдараильэ, вонэ линэ тэ мангэнпэ кажно пэстерэ дэвлэсти. Вонэ пошутэ пай барка ся о паримос андо баро паи, соп тэ авэл майвушэрэ.

Ай англа када о Иона упран змэкляпэ тэлэ, пэля и саастэс засутя.

6 О барэдэр ла баркако авиля каринг о Иона и пхэндя:

— Со ж ту совэс? Ущи, акхар терэ Дэвлэс! Сар Вов шола пэр амэндэ само тай на дэла амэнди тэ хасайvas.

7 Тунче э морякуря пхэндэ ехк эххэсти:

— Шам э врэжа, кай тэ ганас, пала каств пар амэндэ авиля кадыя бида.

Вонэ шутэ э врэжа, ивой пэля по Иона.

8 Тунче э морякуря пхэндэ лэсти:

— Пхэн, пала каств пар амэндэ авиля кадыя бида? Соза залэспэ? Катар ту авилян? Савя пхувятар? Тай савэ манушэндар?

9 О Иона пхэндя:

— Мэ сым евреё, тэлював лэ РАЕСТИ, о дэл лэ нэбоско, Саво стердя о баро паи тай э пхув.

10 О Иона роспхэндя лэнди, кай вов нашэлтар лэ РАЕСТАР. Калэ алавэндар вонэ фартэ пэрэдараильэ и пхэндэ лэсти:

— Со ж ту када тердян?

11 Ай о баро паи ся ваздэласпэ майфартэ и майфартэ. Тунче вонэ пушлэ лэстар:

— Со амэ тэ терас туса, кай о баро паи тэ улэллэ?

Вов пхэндя лэнди:

12 — Ваздэн ман и шон андо баро паи, тунче вов улэлапэ. Мэ ганав, со када баро штормо авиля пэр тумэндэ черээ мандэ.

13 Э морякуря линэ анда ся зор тэ примардён каринг э риг ла пхувяти. Ай пэ када на хутилэлас лэндэ зор, пала кода со о штормо фартэ ваздэласпэ.

14 Тунче вонэ линэ тэ мангэнпэ лэ РАЕСТИ:

— РАЙ, на мар амэн пала кода, со амэ умараса калэ манушэс. На стов пар амэндэ э дош, кай умарас найдошалэ манушэс. Ту РАЙ, тай Ту терэс кода, со Ту камэс.

15 Вонэ линэ тай шон лэ Ионас пай барка, и о холяко баро паи уляпэ.

16 Барий дар авиля лэндэ англа РАЙ, вонэ андэ жэртва и динэ РАЕСТИ алав.

2

О Иона мангэллэ Дэвлэс

1 О РАЙ бишалдя барэ машес, тэ накавэл лэ Ионас. О Иона сас трин дес и трин ратя андо йило лэ машеско.

2 Андо йило лэ машестар о Иона ля тэ мангэллэ лэ РАЕСТИ, пэстерэ Дэвлэсти.

3 О Иона пхэндя:

— Пала мэрни бида акхаравас мэ лэ РАЕС,
и Вов ашундя ман.
Анда машкар лэ мулэнго тхагаримос цыпияс,
и Ту ашундян мэрно гласо.

4 Шувидян ман Ту само тэлэ,
андо ди лэ барэ паеско.
О пай заболдя ман,
понадэ мандэ прожылэ саворэ Терэ волнэ.

5 Гындояспэ манди:
«Витрадян ман Терэ якхэндар.
Но най, мэ саекх дикхава Теро свынто Храмо».

6 О пай ушарадя ман,
дур сым андэ барэ пая,
тай э чяр лэ паести заболдя манди о шэро.

7 Само тэлэ, катар барён э плая, ужылэмтар мэ,
о засовуяя ла пхувяти запхандадилэ пала мандэ пэ ся времяя.
Ай Ту РАЙ, мэрно Дэл,
вилян ман жундэс андай могыла!

8 Кала мэрно жувимос мудардёлэс андэр мандэ,
мэ гындояс пала РАЙ,
тай мэрно мангимос дожыля каринг Тутэ,
андэ Теро свынто Храмо.

9 Кола, ко патял лэ хохавнэ дэвлэнди,
хасардэ о тынгимос, саво саслэ тэ лэн.

10 Ай мэрни жэртва Тути — мэрнэ диля,
савэнца ашарав тут.

Мэ ся стерава, андэ со солахаем.
О РАЙ анэл фиринос!

11 И припхэндя о РАЙ лэ машести, тэ вишункардэл андар пэстэ лэ Ионас пэ пхув.

3

О Иона пхэнэл о алав лэ Дэвлэско андэ Ниневия

1 И сас о алав лэ РАЕСТАР каринг о Иона до дуйто:

2 — Ущи, жа андо баро форо Ниневия тай роспхэн котэ о алав, саво Мэ дэм тути.

3 О Иона жыля па дром андэ Ниневия кадя, сар припхэндя лэсти о РАЙ. Э Ниневия сас баро форо кай о Дэл, соп тэ пэрэжал лэс анда екх риг андэ авэр, сас трэбүй пэ када трин дес.

4 О Иона зажыля андо форо и ся о дес пхирэлас и роспхэнэлас лэ манушэнди:
«Черээ э саранды деса о форо Ниневия авэла росшую».

5 Э мануша андэ Ниневия патял лэ Дэвлэстерэ алавэнди. И саворэ вонэ, лэ цыкнэндар жы каринг э барэ, линэ нисо тэ на хан и тэ пэн, тай саворэ линэ пэр пэстэ лэ гонэстери йида.

6 Кала дожыля о алав каринг о тхагар ла Ниневияко, вов ушия па пэско троно, изля пар пэстэ э тхагарицко йида, ля пэр пэстэ лэ гонэстери йида тай бэшля по прахо.

7 Тунче о тхагар искрисардя лил и розбишалдя лэс па ся форо Ниневия.

«Припхэнэн о тхагар и лэстэрэ барэдара:

Мэж э мануша нисо на хан и на пэн. Кадя жэ и гуруня, бакрэ тай э бузнэ, тэ на пхирэн пай маля, тэ на хан и тэ на пэн.

8 Саворэ мануша тай сако хулаимос трэбуй тэ лэн пэр пэстэ лэ гонэстери йида. Мэй какжно анда ся зор мангэл лэ Дэвлэс. Мэй какжно обрингэ пэстэрэ найлашэ дромэндэр тай тэ на терэн холятерэ дила.

9 Ко ганэн? Можэ, о Дэл улэла Пэсти холи, тай потынгоя амэн, тай на домэкэла тэ похасайвас.

10 Сар о Дэл дикхля, кай вонэ парудилэ тай отжылэ пай пэсти бэзэхалэ дрома, тунче тынгосардя лэн и на бишалдя кодыя бида, сави пхэндя тэ бишалэл.

4

О Дэл сыйярэл лэ Ионас

1 Ай о Иона холяйлия, и лэсти када фартэ на чялиля.

2 Вов ля тэ мангэллэ лэ РАЕСТИ:

— О РАЙ, най пала када ли мэ пхэнавас, кала сымас инке черэ? Важ када мэ и нашлэмастар андо Тарышшо. Мэ ганав, кай Ту Дэл тынгуну и лашо, Ту бут тэрпис, най йито холяйвэс и барвало сан по камлимос тай на камэс тэ бишалэл э бида.

3 РАЙ, ай акана залэ мандар мэрно жувимос. Фэдэр мэ тэ мэрэв, сар тэ жував.

4 О РАЙ пхэндя лэсти:

— Трэбуй ли тути кадя тэ холяйвэс?

5 О Иона вижыля анда форо и бэшля каринг о востоко лэ форостар. Вов стердя пэсти катуна, бэшля андэ вушал и ля таштэрэл, со терлапэ лэ фороса.

6 О РАЙ Дэл стердя кадя, кай вибариля бари чяр, сави вазглияэ понадэ Иона, соп э вушал понадэ лэско шэро тэ улэл лэсти холи. Вов сас фартэ лошало кала чярятти.

7 Ай каринг э тэсара пэ авэр дес о Дэл бишалдя лэ чермэс. О чермо потхала э бари чяр, ивой заштутила.

8 Кала ушилия о кхам, о Дэл бишалдя пхабарди восточно балвал, тай о кхам ля тэ пхабарэл о шэро лэ Ионаско кадя, со вов замэгнисайля. Вов закамля тэ мэрэл и пхэндя:

— Фэдэр мэ тэ мэрэв, сар тэ жував.

9 Ай о Дэл пхэндя лэ Ионасти:

— Трэбуй ли тути кадя тэ холяйвэс палай бари чяр?

— Трэбуй, — пхэндя о Иона, — най кати тэ холяйвав, ай и тэ мэрэв.

10 О РАЙ пхэндя:

— Тути тынг э чяр, пала сави ту ни на дикхлян, ни на барядян. Вой важ екх ряят вибариля, тай важ екх ряят и хасайла.

11 Манди ли тэ на тынгой о баро форо Ниневия, кай бут ското тай майбут, сар шэл биш пханглия мануша, савэ на полэн, кай о лашымос, ай кай о вырыто?

Радосаво Лав Лукастар

1-3 Пативало Феофило, бут мануша линэ тэ стидэн и тэ запистросарэн роспхэнимос пала кода, со сас. Када роспхэндэ амэнди мануша, савэ майяглал дикхэнас вся пэстирэ якхэнца тай ашыле бүтэрнэ Лавэстирэ. Важ кода мэ тховдэм андо води мишто вся тэ ужанав, со сас майяглал, и екх пала авэр тэ запистросарав тути.

4 Тунчи ту полэса: кода, со ту ашундян, исин чячимос.

Ангело пхэнэл Захариясти, со бэяндёла лэстэ шаво

5 Андэ деса, кала андэ Иудея сас тхагараса Иродо, сас мануш, савэс акхарзнас Захария, андай рашая Авиястирэ стидимастар, и лэстэ сас ромни андав родо Ааронско, акхарзнас ла Елизавета.

6 Онэ лэдуй сас жужэ англав Дэл, жувэнас пав всаворо запхэнимос Раеско бидошако.

7 Лэндэ на сас бэяцэн, колэстар со Елизавета сас бибэяцэндири, и онэ лэдуй сас андэ бэрша пхурэ.

8 Ехквар авиля врьяма рашаенди лэстирэ стидимастар тэ терэл бути англав Дэл.

9 Сар сас прилито машкар рашая, онэ шутэ жребиё, и прижыляяпэ Захариясти тэ зажал андо храмо лэ Раеско тэ пхабарэл ладано.

10 Андэ кодъя ж врьяма, кала вов пхабарэлас ладано, всаворэ мануша мангэнаспэ Дэвлэс аври.

11 Тунчи вов удикхля ангелос Раестириэс, саво тэрдёлас пай право риг лэ жэртвеникоско, кай пхаболас о ладано.

12 Захария сар удикхля лэс, бари дар авиля пэр лэстэ, и вов на жангля, со тэ терэл.

13 Ангело пхэндя лэсти:

— На дара, Захария! Ашундя о Дэл мангимос тиро. И ромни тири, Елизавета, бэянэла тути шаворэс, и акхарэса лэс Иоано.

14 Авэла тути баро радомос, и бут мануша авэна тэ радонпэ, кай вов бэяндиля.

15 Вов авэла баро англав Рай, на авэла тэ пэл ни мол, ни матимаско пимо и пхэрдёла Свяントо Духоса майяглал, сар вов бэяндёла.

16 Бутэн Израилёстирэ шавэн вов рисарэла паллпала кав лэнго Рай о Дэл

17 и авэла тэ жал англав Лэстэ андо духо и зор Илиястири, кай тэ рисарэл и водя лэ дадэндирэ кай лэнди бэяцэ, и найкандунэн кав гындо чячимастирэн манушэн, кай тэ гытосарэ манушэн, кала авэла о Рай Дэл.

18 Захария пхэндя ангелости:

— Сар мэ ужанава кода? Мэ пхуро, тай ромни мэрни найтэрни.

19 Ангело пхэндя лэсти:

— Мэ Гавриило, саво тэрдюваванглав Дэл, бишалдо тэ дав дума туса и тэ пхэнав тути кадва радосаво лав.

20 Акэ, ту авэса муту и на дэса дума кай кодва дес, кала кода вся авэла, важ кода со ту на патийлян мэрнэ лавэнди, савэ терэнапэ андэ пэсти врьама.

21 Андэ кодъя врьяма мануша ажутярэнас Захарияс и дивонаспэ, состар вов бут врьама на выжалас андав храмо.

22 Кала Захария выжыля котар, вов на дэлас дума, и мануша полинэ, со вов андо храмо варисо дикхля. Вов сикавэлас вастэнца лэнди и ашэласпэ муту.

23 А сар прожыле кола деса, кала вов терэлас рашаендири бути, тунчи рисайля пэстэ черэ.

24 Прожыля връяма, Елизавета, и ромни лэстири, ашыля пхари. Панч шон вой гарадёлас манушэндар и пхэнэлас:

25 — Акэ, со стердя манди Рай Дэл андэ кадэла деса, кала Вов обрисардя мандэ пэстирэ якха, кай тэ злэл пар мандэ о лажавимос мэрно англай мануша!

Лав, со бэяндёла Иоано

26 Кала Елизавета сас шов шон пхари, о Дэл бишалдя ангелос Гавриилос андо форо галилейско, саво акхарэлпэ Назарето,

27 кай щиёры, сава акхарэнас Мария. Вой дя лав тэ жал палав ром палав Иосифо, саво сас андав родо лэ Давидоско.

28 Ангело авиля латэ и пхэндя:

— Тэ авэс бахтали! Тути дяпэ мищимос! О Рай Дэл туся!

29 Мария на жанггя, со тэ пхэнэл, и гындолас, важ со вов кади пхэндя.

30 Ангело пхэндя:

— На дара, Мария! Ту аракхлян мищимос кав Дэл!

31 Акэ, ту авэса пхари, и бэянэса Шавэс, и акхарэса Лэс Иисусо.

32 Вов авэла баро, и Лэс акхарэнна Шаво Майбарэско. Рай Дэл дэла Лэсти троно Давидоско, лэ прапапос Лэстирэс.

33 Вов по вако авэла Тхагараса англав родо Иаковоско, и тхагаримос Лэско никала на пэрэашэла тэ авэл.

34 Мария пхэндя ангелости:

— Сар када авэла? Мэ инке на сымас палав ром!

35 Ангело пхэндя лати:

— Свэнто Духо сжала пэр тутэ, и зор Майбарэско ушарэла тут, и свэнто Бэято, Саво тутэ бэяндёла, акхарэлапэ Шаво Дэвлэско.

36 Акэ Елизавета андав родо тиро, палай сави пхэнэнас, со латэ на авэна бэяцэ, подицх, вой шовто шон пхари. Андо пхуримос лако бэяндёла латэ шаво.

37 О Дэл терэла вся, со Вов закамэла.

38 Пхэндя Мария:

— Мэ бутярни Рае Дэвлэстири. Мэк авэла манди, сар ту пхэндян. И ангело отжыля латар.

Мария авиля кай Елизавета

39 Андэ кадэла деса Мария вшилия и сыго жыля андо форо, саво сас андо плаенго тхан Иудеяко.

40 Вой зажыля андо чер кав Захария и пхэндя ла Елизаветати:

— Тэ авэс бахтали!

41 Кала Елизавета ашундя лава Мариятирэ, подхукля о бэято андэ Елизавета, и пхэрдиялвой Свэнто Духоса.

42 Вой зацьписайля фартэ гласоса и пхэндя:

— Тут авэна тэ лашарэн майбут аврэ жувляндар! И лашарэна тирэ Бэятос, Савэс ту пхиравэс!

43 Сости манди када, со мандэ авиля дэй мэрнэ Рае Дэвлэстири?

44 Кала мэ ашундэм, сар ту пхэндян манди, тэ авав бахтали, подхукля андэр мандэ о бэято радомостар.

45 Бахтали кодъя, сави патаядя, со терэлапэ кода, со пхэндя лати Рай Дэл!

46 И пхэндя Мария:

— Лашарэл о води мэрно лэ Рае Дэвлэс.

47 И радосайля о духо мэрно палав Дэл,
Фэрисаримари мэрно.

48 Вов удикхя, со мэ цэкни бутярни Лэстири.

Акала връяматар всаворэ родоря
авэна тэ акхарэн ман бахталяса.

49 Со зорало Дэл тердя манди барорындо,
и свэнто алав Лэско!

50 Тангимос Лэско андэ всаворэ родоря,
ко пативаса дарал Лэс.

51 Вов тердя барэрындоря Пэстирэ зоралэ вастэса,
рострадя колэн, савэ пхутярдэ годяса и водеса,

52 Сшута раен пай лэндирэ троноря
и вазглыа упрэ цэкнэн машкар мануша.

53 Бокхалэн пхэрдярдя мищимаса
и барвалэн отмэклия нисоса.

54-55 Вов сэрэсардя, со пхэнэлас лэ дадэнди,
лэ Авраамости и лэстирэ бэяцэнди,
тэ авэл тангимаско по вако,
и подритярдя Израилёс, Пэстирэс бутярнэс.

56 Мария сас лэ Елизаветаса варикай трин шон и рисайля андо пэско чер.

Сар бэяндия Иоано

57 Кала авиля врязма, Елизавета бэяндя шаворэс.

58 Ашундэ мануша, савэ жувэнас паша лэндэ, и о родо лако, со дя Рай Дэл о тангимос Пэско лати, и радонаспэ ласа.

59 По охто дес онэ авиile тэ обшийнэн лэ бэятос и камле тэ акхарэн лэс, сар акхарэн лэсти дадэс – Захария,

60 а лэстири дэй пхэндя:

– Нат, акхараса лэс Иоаноса.

61 И пхэндэ лати:

– Никаас на сас андо родо тиро, савэс акхарэнас кадя.

62 И пушэннаас, сикавэннаас лэ вастэнца кав лэско дад, сар вов камэл тэ акхарэл лэ бэятос.

63 Захария манггя каштуни сандёры и пистросардя лэнди: «Алав лэско – Иоано!». Всаворэ дивосайле.

64 Андэ кодья ж врязма отпхэрнэпэ лэстирэ ушта, и вов ля тэ дэл дума и тэ лашарэл Дэвлэс.

65 И сас дар пэ всаворэ, ко жувэлас паша лэндэ, и роспхэнэннаас пала када пав всаворэ плаенирэ тхана Иудеятире.

66 Всаворэ, ко ашундя када, тховдэ андо води пэско и пхэнэннаас:

– Каса авэла када бэято?

И о васт лэ Рае Дэвлэско сас лэс.

Захария пхэнэл лав Дэвлэстар

67 О Захария, дад лэско, пхэрдия Свэнто Духоса и пхэндя лав Дэвлэстар:

68 – Бахтало исин Рай, Дэл Израилёско,
со авиля кай пэстирэ мануша и вытиндя лэн.

69 Бишалдя амэнди зоралэс Фэрисаримарес
андав чер и родо Давидоско, бутярнэс Пэстирэс,

70 сар бут бэрша паллпалэ пхэндя
уштэнца свэнтонэ пророкэнца Пэстирэнца,

71 со фэрисарэла амэн лэ вражымарендар амарэндар
и вастэндар кодэлэндар, савэ амэн на камэн.

72 Вов тангосардя амарэ дадэн
и сэрэсардя Пэско свэнто завето,

73 сар Вов солахадя амарэ дадэсти Авраамости,

74 со Вов фэрисарэла амэн лэ вастэндар амарэ вражымарендар,
кай амэ бидарако тэ терас бути Лэсти,

- 75** тэ жувас англав Лэстэ свэнто и жужо всаворо пэско жувимос.
- 76** И тут, бэято, акхарэна пророкоса Майбарэстирэса,
колэсти со ту авэса тэ жас англав Рай Дэл,
кай тэ гытос о дром Лэсти,
- 77** тэ роспхэнэ Пэстирэ манушэнди,
со фэрисаримос дэлпэ,
кала авэна эртисардэ лэндирэ бээзэха.
- 78** Амаро Дэл камэл и тангол,
и Вов бишалэла амэнди дэнзорутно удууд упран.
- 79** Вов дэла удууд колэнди, савэ жувэн андэ калимос,
и миринос пхирэл паша лэндэ,
и тэ тховэл пэрнэ амарэ по дром кав миро!
- 80** Бэято барёлас и терэлласпэ майзор духоса, и жувэллас андэ мал жы кола
врятматэ, кала сикавэла пэс манушэнди Израилэстирэнди.

2

Сар бэяндя Иусос

- 1** Андэ кодья врьама выжыля припхэнимос императоростар Августостар тэ
пэрэбинэн и тэ запистросарэн манушэн пай всавори римско пхув.
- 2** Када сас англуну запистросаримос манушэн, кала андэ Сирия сас рай
Квириний.
- 3** И всаворэ жыле тэ запистросарэнпэ андэ пэстирэ фороря.
- 4** Иосифо жыля андай Галилея, андав форо Назарето тэ запистросарэлпэ андэ
Иудея, андо форо Давидоско Вифлеемо, колэсти со вов сас андав чер и родо лэ
Давидоско.
- 5** Вов жыля тэ запистролпэ екхэтанэ ла Марияса, сави дя лав тэ жал палав ром
палав Иосифо. Андэ кодья врьама вой сас пхари и дожутярэлас лэ Бэято.
- 6** Кала онэ сас андо Вифлеемо, авиля и врьама тэ бэяндэл о Бэято.
- 7** Вой бэяндя пэстирэс англатунэс Шавэс и андэ пхарнэ тховдя Лэс андэ пусын,
колэстар со на сас лэнди тхан андо чер.

Ангелоря пхэнэн пасымаренди Радосаво Лав

- 8** Надур котар андэ мал сас пасымаря, савэ дикхэнас и рят палай бакрэ.
- 9** Акэ, лэндэ авиля ангело Рае Дэвлэско, и боро удууд сар слава Рае Дэвлэстар
авиля пэр лэндэ. Онэ фартэ дараийле.
- 10** Нэ ангелоря пхэндя лэнди:
— На даран! Мэ андэм тумэнди радосаво лав, саво авэла всаворэ манушэнди.
- 11** Адес андо форо Давидоско бэяндиля тумаро Фэрисарими, Саво исин
Христосо Рай.
- 12** И акэ тумэнди шпэра: тумэ аракхэна лэ Бэято андэ пхарнэ, саво пашлёла
андэ пусын.
- 13** Акэ авиile лэ ангелоса фартэ бут ангелоря пав болыбэн, савэ лашарэнas лэ
Дэвлэс:
- 14** — Слава лэ Дэвлэсти упрэ по болыбэн! И пэ пхув миро манушэнди, савэн Вов
тангосардя!
- 15** Кала ангелоря ужыле лэндар по болыбэн, пасымаря пхэндэ екх екхэсти:
— Авэн андо Вифлеемо, дикхаса, со тэргиля котэ, пала со амэнди пхэндэ о Рай
Дэл.
- 16** Сыго жыле и аракхле лэ Иосифос лэ Марияса и лэ Бэятоса, саво пашлёлас андэ
пусын.
- 17** Кала онэ удикхле Лэс, тунчи роспхэндэ лэнди вся, со ашундэ палав кадва
Бэято.

18 Всаворэ, ко ашундя, дивосайле колэсти, со роспхэндэ лэнди пасымаря.

19 А Мария гаравэлас кала лава андо пэско води и гындолас пала лэндэ.

20 Пасымаря рисайле, лашарэнас и фалисарэнас лэ Дэвлэс пала кода, со дикхле и со лэнди сас пхэндо.

Исусос андярдэ андо Храмо

21 По охто дес, кала авиля връяма тэ обшынэ лэ Бэятос, акхардэ Лэс «Исусо», алавэса, саво ангело дя Лэсти, инке сар Мария на сас пхари.

22 Кала прожыля връяма жужарэмости пав Законо Моисеёско, Мария и Иосифо андэ Лэс андо Иерусалимо, кай тэ свэнтон Лэс лэ Рае Дэвлэсти.

23 Колэстар со запистросардо андо Законо лэ Рае Дэвлэско, кай англuno бэяндо бэято муршоро трэбуй сас тэ свэнтолпэ лэ Рае Дэвлэсти.

24 Лэнди трэбуй сас тэ анэ жэртва пав Законо лэ Рае Дэвлэско, дуен бакрэн или дуен цэknорэн голубонэн.

Симеоно и Анна пхэнэн лав Дэвлэстар

25 Андо Иерусалимо андэ кадья връяма сас мануш, савэс акхарэнас Симеоно. Вов сас жужо дэвлэкуно мануш, ажутярэлас, кала о Дэл поможысарэла Израилёсти, и Свэнто Духо сас пэр лэстэ.

26 Свэнто Духо пхэндя лэсти, со вов на удикхэла миримос, жы кала на дикхэла лэ Христос Раес Дэвлэстирэс.

27 Духо андярдя Симеонос андо храмо. Кала дад и дэй андэ Бэятос Иисусос тэ терэ пэр Лэстэ кода, со трэбуй сас пав Законо,

28 Симеоно ля Лэс пэ васт, лашардя Дэвлэс и пхэндя:

29 — Иххатар отмэкэс Ту, Хулаё Дэвла,
пэстирэ бутярнэс лэ мироса, пав лав Тиро.

30 Колэсти со мэрнэ якха дикхле фэрисаримос Тиро,

31 саво Ту гытосардян англай якха всаворэ манушэндирэ.

32 Вов — уудув важ всаворэ мануш
и слава народости Тирэсти Израилёсти!

33 О дад и дэй дивосайле, со сас пхэндо пала Лэстэ.

34 И бахталисардя лавэса лэн Симеоно, пхэндя Марияти, дати Лэстирияти:
— Акэ пашлёт Кодва, пала Саво бут мануша андо Израилё пэрэнэ и бут ваздёна.
Вов авэла шпэрраса, сави бут мануша на прилэнэ.

35 Тунчи отпхэрнавэлапэ кода, со онэ гындонас андэ водя. И тути ежэяти прожала шури андо води.

36 Котэ сас пхури манушни, савяти сас охтодэш тай штар бэрш, и сави пхэнэлас лав Дэвлэстар. Ла акхарэнас Анна, щей Фануилостири андав родо Асиростиро. Вой выжыля палав ром тэрноря щиёрраса и прожудя пэсти ромэса эхта бэрш,

37 нэ тунчи ашыля пхивли и прожудя ежэи. Дес и рятвой терэлас бути важ о Дэл, сас андо посто и мангимос, и на отжалас лэ храмостар.

38 Вой андэ кодья връяма пашыля колэндэ, ко андя лэ Бэятос, ашыля тэ лашарэл лэ Дэвлэс и роспхэнэлас пала Бэято всаворэнди, ко ажутярэлас фэрисаримос важ Иерусалимо.

39 Кала онэ вся тердэ пав Законо Рае Дэвлэско, онэ рисайле андэ Галилея, андо форо пэско, Назарето.

40 Бэято барёлас зораса тай годяся, и мищимос лэ Дэвлэско сас пэр Лэстэ.

Исусо андо храмо, сар Лэсти сас дэшүдүй бэрш

41 Кажно бэрш, по свэнко Патрадятиро, о дад и дэй лэ Иисусостириэ пхирэнас андо Иерусалимо.

42 Кала Лэсти сас дэшүдүй бэрш, онэ, сар сас прилито, жыле по свэнко.

43 Кала прожыле деса свэнкостиирэ, онэ жыле черэ, ай шаворо Исусо ашыляяпэ андо Иерусалимо. О дад и дэй када на жанэнас,

44 онэ гынданос, со Вов жал аврэнца пав дром. Сар прожыля дес, онэ линэ тэ родэ Лэс машкар пэско рodo и машкар кола, савэн онэ жанэнас.

45 Кала на аракхле Лэс, жыле палпалэ андо Иерусалимо тэ родэн Лэс.

46 Прожыля трин дес. Аракхле Исусос андо храмо. Вов бэшэллас машкар сыйтряимаря, ашунэлас и пушэллас лэндар.

47 Всаворэ, савэ ашунэнас Лэс, дивосайле Лэстири годяти и лавэнди.

48 Кала дад и дэй дикххле Лэс, онэ кадя ж дивосайле. И дэй пхэндя Лэсти:

— Бэято! Со ту тердян амэнца? Акэ, дад Тиро и мэ грыжаса родасас Тут.

49 Вов пхэндя лэнди:

— Пэр со тумэнди тэ родэ Ман? Сар тумэ на жанэнас, со Манди трэбуй тэ авав хотэ, со исин Мэрнэ Дадэско?

50 Но онэ на полинэ, со Вов пхэндя лэнди.

51 Вов жыля лэнца, рисайля андо Назарето и кандаэлас лэн. Лэстири дэй гаравэллас всаворэ кадэла лава андо пэско води.

52 Исусо барёллас, терэлласпэ майдодявэр, и барёллас лэстэ мищимос Дэвлэско и манушэндиро.

3

Иоано Болдзмарё гыттол о дром важо Исусо

1 Кала Тибериё дэшупанч бэрш сас императороса, Понтиё Пилато сас баро рай андэ Иудея, Иродо сас рай тетрархо андэ Галилея, о Филипо, пхрал лэско, — рай тетрархо андэ Итурея и Трахонитско пхув, а Лисаниё — рай тетрархо андэ Авилиния.

2 Андэ кодья връяма сас барэ рашаенца Анас и Каиафа. Сас лав Дэвлэстар кав Иоано, шаво лэ Захарияско, андэ мал.

3 Иоано прожалас пай всавори пхув пашав Иордано и акхарэллас манушэн тэ каисавэн и тэ болэнпэ, кай о Дэл тэ эртисарэл лэндирэ бэзэха.

4 Сар запистрасордо андо лил пророкоско Исаяско:

«Гласо цыписавэл андэ мал:

Гытон о дром Раести,

врата терэн дрома важ Лэсти!

5 Всаворэ оврагоря пхэрдёна,

всаворэ барэ и цэнэз плая тэлёна,

бангэ дрома тернапэ врата,

нагладосавэ дрома гладосавэна,

6 и всаворэ мануша дикхэна фэрисаримос Дэвлэско».

7 Иоано пхэндэллас манушэнди, савэ авэнас тэ болэнпэ:

— Родо сапано! Ко пхэндя тумэнди тэ нашэн холятар, сави жал пэр тумэндэ?

8 Сикавэн рындонэнца, со тумэ каисайле, и на гындон: «Дад амаро исин Авраамо». Пхэнав тумэнди, со Дэл ваздэла андай кадэла бара шаворэн Авраамости.

9 Акэ, товэр пашав корнё дрэвоско пашлёт: всаворэ дрэворя, савэ на анэн лашо плодо, пхагэн товэрэса и шон андэ яг.

10 Пушэнас лэстар и мануша:

— Со амэнди тэ терас?

11 Вов пхэндя лэнди:

— Касть исин дүй гада, мэк отдэл екх кодлэсти, касть нинай, касть исин хамос, мэк дэл епаши кодлэсти, касть нинай.

12 Авиле лэстэ тэ болэнпэ стидэмаря налогонэндирэ и пушэнас лэстар:

— Сыйтряимаря! Со амэнди тэ терас?

13 Вов пхэндя лэнди:

— На лэн лэ манушэндар майбут колэстар, со трэбуй тумэнди тэ лэн.

14 Пушэнас лэс и халавдэ:

— Со амэнди тэ терас?

Вов пхэндя лэнди:

— На залэн манушэндар зораса. На хохавэн лэ манушэн, жувэн пэ кола ловэ, савэ тумэнди потинэн.

15 Всаворэ мануша ажутярэнас и гындонас андэ пэсти водя пала Иоано, чи на вов о Христосо.

16 Иоано пхэндя всаворэнди:

— Мэ болав тумэн паеса, нэ авэла Кодва, Ко майзорало мандар. Мэ на ашав тэ роспхандав Лэсти тэраха. Вов болэла тумэн Свэнтонэ Духоса и ягаса.

17 И андэ Лэстирэ васт ганавди, вов жужарэла пэско токо и стидэла ворзо Пэско андэ пусын, ай шэлуха спхабарэла андэ яг, сави на пэрэашэла тэ пхабол.

18 Кала и авэр будэр лава пхэнэлас лэнди Иоано, кала пхэнэлас лэнди Радосаво Лав.

19 Иоано ля тэ ужылисарэл раес тетрагрхос Иродос, важ кода со вов ля палав ром Иродиада, ромня пэстирэ пхралэстия, и колэсти со вов терэлас найлашэрындоря.

20 Тунчи Иродо тердя инке екх вырито рындо — пхандадя лэ Иоанос андо баруно.

Иоано болдэл Исусос

21 Кала всаворэ мануша болдэпэ, кадя ж сас болдо и Исусо. Тунчи Вов мангляпэ Дэвлэс, и отпхэрнадяпэ болыбэн.

22 И Свяントо Духо, сар голубо, сжыля по Исусо. Сас гласо упран, саво пхэнэлас:
— Ту Шаво Мэрно, савэс Мэ камав! Ту — Мэрно радомос!

Родо лэ Исусоско

23 Кала Исусо ля тэ терэл и бути важ о Дэл, Лэсти сас варикай трянда бэрш. Вов сас, сар гындонас, шаво Иосифоско. Андо лэско родо сас: Илиё,

24 Матфато, Левиё, Мелхиё, Ианаё, Иосифо,

25 Матафиё, Амосо, Наумо, Еслиё, Нагеё,

26 Маафо, Матафиё, Шымьё, Иосифо, Иодаё,

27 Иоханано, Риса, Зоровавелё, Шэлтиило, Нириё,

28 Мелхиё, Адиё, Косамо, Элмадамо, Иро,

29 Иосиё, Элиезеро, Иоримо, Матфато, Левиё,

30 Симеоно, Иуда, Иосифо, Ионамо, Элиакимо,

31 Мелеа, Мена, Матафа, Нафано, Давидо,

32 Иесеё, Овидо, Боазо, Сала, Нахшоно,

33 Аминадаво, Админо, Арниё, Хецроно, Фарецо, Иуда,

34 Иаково, Исаако, Абраамо, Терахо, Нахоро,

35 Серуго, Рейо, Пелего, Еверо, Шэлахо,

36 Каинано, Арпахшадо, Симо, Ноё, Ламехо,

37 Мафусало, Енохо, Иаредо, Мелелейло, Каинано,

38 Еносо, Сифо, Адамо, о Дэл.

Бэнг камэл тэ зумавэл Исусос андэ мал

1 Исусо, пхэрдярдо Свэнтонэ Духоса, авиля лэ Иорданостар и андярдо сас лэ Духоса андэ мал.

2 Котэ Лэс саранда дес зумавэлас Бэнг. Всавори кадъя врьяма Исусо нисо на халас. И сар прожывле кала деса, Лэсти фартэ закамляпэ тэ хал.

3 Бэнг пхэндя Лэсти:

— Сар ту Дэвлэско Шаво, пхэн калэ барэсти тэ терэлпэ марнэса.

4 Исусо пхэндя лэсти:

— Пистросардо, со на екхэ марнэса авэла тэ жувэл мануш.

5 Тунчи Бэнг взагля Лэс по баро плай и сыго сикадя Лэсти всаворэ тхагарима пхувьтиэрэ.

6 И пхэндя Лэсти:

— Мэ пэрэдваа Тути всаворо баримос и слава калэ тхагаримастирэ. Када вся отдино манди, и касти закамава, колэсти и дава лэн.

7 Сар Ту тэлёса манди, тунчи када вся авэла тиро.

8 Исусо пхэндя лэсти:

— Запистросардо: «Тэллю Рае, Дэвлэсти тирэсти, качи Лэсти ав бутярнэса».

9 Тунчи Бэнг андярда лэ Исусос андо Иерусалимо, тховдя пэ майучё тхан храмоско и пхэндя:

— Сар ту Шаво Дэвлэско, хук катар тэлэ.

10 Важ кода со пистросардо: «Пээстирэ ангелонэнди пала тутэ припхэнэла, кай онэ тэ дикхэн пала Тутэ.

11 Пэ васт андярнаа тут, кай тэ на арэсэспэ тирэ пэрнэса андо бар».

12 Исусо пхэндя лэсти:

— Када пхэндо: «На зумав лэ Рае Дэвлэс пээстирэс».

13 Тунчи Бэнг пэрэашыя тэ зумавэл Исусос и отжылия Лэстар пэ врьяма.

Исусо лэл тэ терэ Пээстири бути важ о Дэл

14 Исусо рисайля андэ Галилея, пхэрдо зораса Духостиряса. Дума пала Лэстэ разжыляпэ пав всавори кодъя пхув.

15 Вов ситярэлас андэ синагоги, и всаворэ лашарэнас Лэс.

Назарето на прилэл Исусос

16 Исусо авиля андо Назарето, кай выбариля, и андэ субота, сар Вов всавори врьяма терэлас, зажыля андэ синагога и вшиля тэ бинэл.

17 Лэсти подинэ лил, саво запистросардя пророко Исаю. Вов отпхэрнадя лил и аракхяя тхан, кай сас запистросардо:

18 «Духо лэ Рае Дэвлэско пэр Мандэ,

важ кода со Вов помакхля Ман

тэ роспхэнав Радосаво Лав чёрорэнди.

Вов бишалдя Ман тэ роспхэнав спханглэнди,

со онэ авэна роспханглэ,

корэнди, со онз авэна тэ дикхэн,

тэ отмэкав колэн, савэ грыжонпэ, пэ воля,

19 тэ роспхэнав, кай авиля врьяма лаши Рае Дэвлэстири».

20 Исусо запхандадя лил, отдя бутярнэсти и бэшля. Всаворэ андэ синагога дикхэнас пэр Лэстэ.

21 И Вов ля тэ пхэнэл лэнди:

— Адес, тердэпэ кола запистросардэ лава, савэ тумэ икхатар ашундэ.

22 Всаворэ лашарэнас Лэс, дивосавэнас Лэстирэ лашэ лавэнди и пушэнас:

— Дикхэнтэ, на Иосифоско када шаво?

23 Вов пхэндя лэнди:

— Акэ, тумэ пхэнэна манди дума: «Врач! Састяр ежэно пэс». И пхэнэна манди: «Амэ ашундэ, со Ту тердян андо Капернаумо. Стер кадя ж и катэ, кай Ту бариян».

24 Пхэнав тумэнди чячимаса: нисавэ пророкос на прилэн котэ, кай вов барияя.

25 Чячимаса пхэнав тумэнди: андэ връяма, кала сас о Илия, сар на сас трин бэрш енашэса брышынд пай всавори кодъя пхув, и сас баро бокхалимос, андо Израилё сас бут пхивлэ жувля.

26 Но на екхатэ лэндар на сас бишалдо Илия, а качи кай пхивли андэ Сарепта Сидоноско.

27 Бут сас насвалэ проказаса андо Израилё, кала сас пророко Елисеё, и ни екх лэндар на жужардиля, качи Неемано сирийцо.

28 Всаворэ андэ синагога фартэ холяйле, сар ашундэ када.

29 Онэ линэ и выцырдэ Лэс андав форо, и андярдэ по баро плай, кай сас тердо лэнго форо, кай тэ шонот котар Лэс тэлэ.

30 Но Вов прожыля машкар лэндэ тай ужыля.

Исусо вытрадэл найжужэс духос

31 Исусо жыля андо галилейско форо Капернаумо и сыйярэлас андэ суботни деса.

32 И дивосавэнас Лэстирэ сыйяримости, колэсти со андо лав Лэско сас бары зор.

33 Сас андэ синагога мануш, андэ лэстэ сас духо найжужэ бэнгэско, и вов зацыписайля фартэ:

34 — Эй, со тути амэндар трэбуй, Исусо андав Назарето? Ту авилян тэ умарэс амэн? Мэ жанав, ко Ту! Ту Свэнто Дэвлэско!

35 — Ашмулком! — припхэндя лэсти Исусо. — Выжка андар лэстэ!

Бэнг шута манушэс машкар синагога и выжыля андар лэстэ. И на тердя лэсти ни сави бида.

36 Всаворэ дарайле и дэнас дума машкар пэстэ:

— Со када кацаво? Вов баримаса и зораса припхэнэл найжужэ духонэнди, и онэ выжан!

37 Дума пала Лэстэ розжыляпэ пав всавори кодъя пхув.

Исусо састярэл манушэн

38 Исусо выжыля андай синагога и зажыля андо чер Симоноско. Кай ромни Симоностири сас насвали дэй, всавори пхаболас, и мангэнас Лэс кай Вов варисо тэ терэл.

39 Вов поджыля латэ, запхэндя насвалимости, и насвалимос ужыля. Вой андэ кодъя връяма вшилия и ля тэ подэл пэ мэсали.

40 Кала бэншэлас кхам, всаворэ, кастэ сас насвалэ, линэ тэ андярэн лэн кав Иисусо. Вов тховэлас пэ кажно васт и састярэлас лэн.

41 Бэнга выжанас манушэндар и цыпинас:

— Ту — Шаво Дэвлэско!

А Вов запхэнэлас лэнди тэ пхэнэн, колэстар со онэ жанэнас, со Вов — Христосо.

Исусо пхэнэл лав андэ Иудея

42 Сар авила дес, Вов выжыля андав форо и жыля андэ мал. Мануша линэ тэ родэн Лэс, и кала аракхле, мангэнас Лэс, соб Вов тэ ашэллэпэ лэнца.

43 Но Вов пхэндя лэнди:

— Манди трэбуй тэ роспхэнав Радосаво Лав палав Тхагаримос Дэвлэско и андэ авэр фороря. Пэ када Мэ бишалдо.

44 И Вов пхэнэлас лав андэ синагоги Иудеятирэ.

5

Сыйярнэ астарэн бут машё

1 Еххвар Исусо тэрдёлас пашай лэн Генисаретско, бут мануша стидэпэ и стасавэнас Лэс всаворэ ригэндар тэ ашунэ Лав Дэвлэско.

2 Иисусо удикхля пашав бэрэго дуй чёвноря и машярэн, савэ выжыле андай чёвноря и выхалавэнаса пэстирэ сетки.

3 Вов зажыла андо чёвно лэ Симоноско, манглэ лэс тэ отплывисарэл найдур бэргостар и бэшля, кай тэ сыйярэл манушэн пав чёвно.

4 Кала Иисусо пэрэашыля тэ сыйярэл, пхэндя Симоности:

— Плывисар майдур, кай майбут пай, и шув сетки тумарэ, кай тэ астарэн машё.

5 Симоно пхэндя:

— Сыйяримари амаро! Амэ всавори рят бут терасас и нисо на астардэ. Но сар Ту пхэнэс, тунчи шава сетки.

6 Онэ стердэ кадя и астардэ фартэ бут машё, кай сетки линэ тэ шындён.

7 Акхардэ вастэнца аврэн машярэн, савэ сас андэ авэр чёвно, кай кола тэ поджан тай тэ поможысарэн лэнди. Онэ авиле и еххэтанэ стидэ машен андэ лэдүй чёвноря скачи, со чёвноря линэ тэ тасон.

8 Симоно Петро дикхля када, пэля кай пэрнэ лэ Иисусостириэ и пхэндя:

— Выжка мандар, Рай, колэстар со мэ мануш бэзэхало!

9 Важ кода со пэ лэстэ и пэ лэстириэ амала, авиля бари дар, сар дикхле, со кадя бут астардэ машё.

10 Кадя и пэ Иаково лэ Иоаноса, шавэн Зэведеёстириэн, савэ сас амала Симоностириэ пай бути. Иисусо пхэндя Симоности:

— На дара! Кала врятатар авзса тэ астарэс манушэн.

11 Онэ выцырдэ чёвноря по бэрэго, ашадэ вся и жыле пала Лэстэ.

Иисусо састьярэл наслалэс проказаса

12 Кала Иисусо сас андэ екх форо, авиля Лэстэ мануш всаворо андэ проказа*. Удикхля Иисусос, пэля кай Лэстириэ пэрнэ и фартэ манглэ:

— Рай! Сар Ту камэс, Тутг исин зор тэ жужарэс ман!

13 Иисусо процырдя васт, ляпэ калэ манушэстэ и пхэндя:

— Камав, ав жужко!

Проказа андэ кодья вряза ужыля манушэстар.

14 Иисусо припхэндя лэсти:

— Никасти на роспхэн пала када, жа сикавпэ рашаести и ан жэртва пала пэско жужаримос, сар пхэндя Моисеё. Мэх онэ када удикхэна.

15 Нэ инке майбут розжаласпэ дума палав Иисусо, фартэ бут мануша авэнас Лэстэ тэ ашунэн и тэ састьярэнпэ наслалимастар.

16 Но Иисусо жалас андэ биманушэндирэ тхана и мангэластэ Дэвлэс.

Иисусо састьярэл манушэс, саво на пхирелас пэрнэнца

17 Ехквар, кала Иисусо сыйярэлас, котэ бэшэнас фарисеёря, сыйяримаря Законостириэ, савэ авиле андай бут тхана андэ Галилея, Иудея и андав Иерусалимо. Зор Рае Дэвлэстири эвэлэс Иисусоса тэ састьярэл наслалэн.

18 Ак, авиле мануша, савэ андярэнас наслалэс пэрнэнца по паринд, камэнас тэ заандярэн андо чер, кай тэ тховэн англав Иисусо.

19 Нащи сас тэ проандярэн лэс, колэстар со бут мануша сас котэ. Загульдэ по чер, розлинэ ушарди пав чер, зму克莱 по паринд наслалэс машкар о чер, англав Иисусо.

20 Иисусо дикхля лэнго патимос и пхэндя колэсти манушэстэ:

— Эртисарэнпэ тути тирэ бэзэхэ!

21 Фарисеёря и сыйяримаря Законостириэ гындонас пэсти: «Ко Кала Мануш, Саво дэл думэл бэзэхэл лава? Со, на екх о Дэл эртисарэл бэзэхэ?

22 Иисусо поля, со онэ гындон, тай пхэндя лэнди:

— Со тумэ гындосярэн андэ тумарэ водя?

* **5:12** Насвалимос, саво терэлас манушэс найжуужэса. Лэсти нащи сас тэ зажал андо храмо тэ мангэл Дэвлэс.

23 Со майлокхо: тэ пхэнэ: «Эртисарав тути тирэ бэзэхэ», — чи тэ пхэнэ: «Вщи и пхир?»

24 Кай тумэ тэ жанэн, со кав Шаво Манушыкано исин зор пэ пхув тэ эртисарэл бэзэхэ.

Тунчи пхэндя насвалэсти манушэсти:

— Пхэнав тути: вщи, лэ пэско паринд и жа черэ.

25 Андэ кодъя ж връма вов вицлия англай лэндэ, ля пэр со пашлёлас, тай жыля пэстэ чэрэ, лашарэлас лэ Дэвлэс.

26 И всаворэ дивосавэнас, лашарэнас лэ Дэвлэс и дараса пхэнэнас:

— Адес амэ дикхлям кода, со никала на сас.

Исусо хал лэ бэзэхалэ манушэнца андо чер кав Левиё

27 Сар выжыля андав чер, Исусо удикхля стидэмарес налогонэндирэс, савэс акхарэнас Левиё. Вов бэшэлас по тхан, кай стидэнас налогоря.

— Жа пала Мандэ, — пхэндя лэсти Исусо.

28 Вов вицлия, ашадя вся и жыля пала Лэстэ.

29 Тунчи Левиё тховдя пэстэ чэрэ бари мэсали хамаса важ о Исусо. Котэ бут стидэмаря налогонэндирэ тай авэр мануша, сас палай мэсали лэ Исусоса.

30 Фарисеёрия и сыйяримаря Законостирэ пушэнас найлашымаса Исусостирэ сыйярнэндэр:

— Состар тумэ хан и пэн стидэмаренца налогонэндирэ и бэзэхалэ манушэнца?

31 Исусо пхэндя лэнди:

— На састэ манушэнди трэбуй врачё, ай насвалэнди.

32 Мэ авилем тэ акхарав на жужэн манушэн, а бэзэхалэн, кай тэ каисавэн андэ пэстирэ бэзэхэ.

Пхурэдэра фарисеёнэндирэ пушэн палав посто

33 Тунчи онэ пхэндэ Лэсти:

— Иоаностирэ и фарисеёнэндирэ сыйярнэ бут молоря терэн мангимос лэ постоса, а Тирэ сыйярнэ хан и пэн!

34 Исусо пхэндя лэнди:

— Чи мишто тэ мангэ манушэн пэ бывя тэ авэн андо посто кала тэрно паша лэндэ?

35 Но авэна деса, кала залэлапэ лэндар тэрно. Тунчи андэ кола деса авэна тэ терэн посто.

36 Вов ростпхэндя лэнди кацави дума:

— Нико на отшынэл котор нэвя йидатар, важ кода, кай тэ присувэл кай пураи. Сар вов када терэла, то и нэви йида хасавэла, и кай пураи йида кодва котор на поджала.

37 Нико на шол тэрни мол андэ пхуранэ морцянэ гонэ, колэстар со тэрни мол росшынэла лэн и вышолапэ, ай гонэ хасавэна.

38 Най, тэрно мол шон андэ нэвя морцянэ гонэ.

39 И нико, ко пэл пхурано мол, на закамэла тэ пэл тэрно, колэстар со пхэнэла: «Пхурано мол фэдэр».

6

Сыйярнэ шынэн о ворзо андэ субота

1 Ехквар андэ субота, кала Исусо прожалас маляса, кай барёлас див, Лэстирэ сыйярнэ шынэнас о ворзо, кхосэнас андэ васт и ханас.

2 Варисаве андай фарисеёрия пхэндэ:

— Сости тумэ терэн кода, со нащи тэ терэ андэ субота?

3 Исусо пхэндя лэнди:

— Чи тумэ на бинэнас, со тердя Давидо, сар вов и лэстирэ мануша бокхайле?

4 Вов зажыля андо чер Дэвлэско, ля марно, саво тховэнас англав Дэл и саво наци сас тэ хал никости, сар качи лэ рашаенди, хаял ежено и дя тэ хал пэстире манушэнди.

5 Исусо пхэндя лэнди:

— Шаво Манушкикано исин Хулай ла суботнё!

Исусо састьярэл андэ субота манушэс шукэ вастэса

6 Андэ авэр субота Исусо зажыля андэ синагога и сыйярэлас. Котэ сас мануш шукэ правонз вастэса.

7 Сыйяримара Законостириэ и фарисеёра дикхэнас пала Лэстэ, на авэла ли Вов тэ састьярэл андэ субота, колэстар со родэнас тэ ужылисарэн Лэс.

8 Нэ Исусо жангэл, со онэ гындонас, и пхэнэл манушэсти шукэ вастэса:

— Вщи, выжла по машкар!

Мануш вщилия и выжылия англэ.

9 Исусо пхэндя лэнди:

— Мэ пушав тумэндар: со домукэлпэ тэ терэс андэ субота, лашымос чи выритимос? Тэ фэрисарэл жувимос чи тэ хасавэл?

10 Вов подикхля пэр лэндэ и пхэндя колэсти манушэсти:

— Процырдэ тиро васт.

Вов процүрдя, и лэско васт ашыля састьярдо.

11 Онэ жэ фартэ холийле и дэнас дума машкар пэстэ, со тэ терэн лэ Иисусоса.

Исусо вытидэл дэшудуен апостолонэн

12 Андэ кодья врьяма Исусо жыля по плай тэ мангэлпэ Дэвлэс и всавори рят сас андо мангимос.

13 Сар авилга дес, Вов акхардя Пэстириэн сыйярнэн и вытидя лэндар дэшудуй, савэн проакхардя апостолонэнца:

14 Симонос, савэс проакхардя Пэтро, пхралэс Симоностириэс Андреёс, Иаковос и Иоанос, Филипос и Варфоломеёс,

15 Матфеёс и Фомас, шавэс Алфёстириэс Иаковос, Симонос, проакхардо Зилото,

16 шавэс Иаковостириэс Иудас и Иудас Искариотос, саво предя лэ Иисусос.

Бахталимос и бида

17 Исусо сжыля пластар лэнца тэлэ и тэрдиля по биплаенго тхан. Котэ стидэпэ бут Лэстирэ сыйярнэ и фартэ бут мануша пай всавори Иудея и Иерусалимо, а кадя ж андай фороря Тиро и Сидоно, савэ по брэгэ барэ 2044 E Best Ave, Coeur D Alene, ID 83814паеско.

18 Онэ авиле тэ ашунэн Иисусос и тэ састьярэн насвалимастар. Мануша, савэ грыжонаспэ найжүжэндар духодндар, састьярнаспэ.

19 Всаворэ мануша камэнас тэ лэнпэ Иисусостэ, важ кода со Лэстар сжалас зор и састьярэлс всаворэн.

20 Вов взагля якха пэ сыйярнэ и ля тэ пхэнэл:

— Бахталэ тумэ, чёрэ!

Тумаро исин Тхагаримос Дэвлэско!

21 Бахталэ тумэ, ко бокхалэ икхатар!

Тумэ чяйёна!

Бахталэ тумэ, ко икхатар ровэл!

Тумэ авэна тэ радонпэ!

22 Бахталэ тумэ, сар мануша тумэн фартэ на камэна, кала тумэн вытрайдэна, акушэна и магрисарэна тумаро алав палав Шаво Манушкикано.

23 Челэн андэ кодва дес баря лошаса! Баро потинимос тумэнди по болыбэн! Кадя терзнас пророконэнца дада калэ манушэндирэ.

24 Нэ бида тумэнди, барвал!

Тумэ ужэ линэ пэско путинимос.

25 Бида тумэнди, ко чялэ икхатар!

Тумэ авэна бокхалэ.

Бида тумэнди, ко икхатар асалпэ!

Тумэ авэна тэ грыжонпэ и тэ ровэн.

26 Бида тумэнди,

кала всаворэ дэн дума пала тумэндэ лашымос!

Кадя лэндирэ папоря лашарэнас хохавнэн пророконэн.

Исусо сытярэл тэ камэн пэстирэ вражымарен

27 — Мэ пхэнав тумэнди, ко ашунэн Ман: камэн тумарэн вражымарен, терэн лашымос колэнди, ко на камэл түмэн.

28 Бахталисарэн колэн, ко дэл амрая тумэн, и мангэн Дэвлэс палай кола, савэ терэн тумэнди наймишто.

29 Колэсти, ко арэсэла тут пай чям, подтхов авэр. Колэсти, ко залэл тутар упраи ийда, отдэ лэсти и пэско гад.

30 Всаворэнди, ко тутэ мангэл, дэ; и сар ко залэла тиро, на манг палпалэ.

31 Терэн лэ манушэнди кода, со тумэ камэн, соб онэ тэ терэн тумэнди.

32 Сар тумэ камэн качи колэн, ко тумэн камэл, пала со тумэн тэ наисарэ? И бэзэхалэ мануша камэн колэн, ко лэн камэл.

33 Сар тумэ терэн лашымос колэнди, ко терэл мишто тумэнди, пала со тумэнди тэ наисарэ? И бэзэхалэ мануша терэн кадя жэ.

34 Сар тумэ дэн ловэ андо ужылимос качи колэнди, савэндар патян, со залэна палпалэ, пала со тумэнди тэ наисарэ? И бэзэхалэ мануша дэн андо ужылимос бэзэхалэнди и ажутярэн тэ залэн палпалэ вся, скачи динэ.

35 Ай тумэ камэн тумарэн вражымарен, терэн лэнди лашымос и дэн андо ужылимос, на ажутярэн, кай онэ отдэна палпалэ. Тунчи тумаро потинимос авэла баро, тумэ авэна шавэнца Майбарэстирэнца. Колэстар со Бов тангосарэл и колэн, савэ на наисарэн, и холятире.

36 Авэнтэ тангимиasti, сар тангимаско Дад тумаро.

На сындосарэн никас

37 На сындосарэн, и тумэ на авэна сындосардэ. На осындосарэн, и тумэ на авэна осындосардэ. Эртисарэн, и тумэ авэна эртисардэ.

38 Дэнтэ, и тумэнди кадя ж дэлапэ. Пхэрдэ гонэса шона и инке притасавэна, дэна тумэнди андо брэк, со авэла тэ росшолдёл. Савя мераса тумэ бинэн, кадя бинэнэ и тумэнди.

39 Исусо россхэндя лэнди кацави дума:

— Сар коро андярэла корэс? На пэрэна ли онэ лэдуй андэ ганади?

40 Сытярно на майбаро пэстирэ съятиримарестар. Нэ сар высытёла, тунчи авэла, сар пэско съятирами.

41 Со дикхэс по кашторо андэ ях ях пэстирэ пхралэстэ, ай андэ пэстири ях на додикхэс баро кашт?

42 Сар ту пхэнэса пэстирэ пхралэсти: «Пхрала, дэ, мэ вылава кашторо андай ях яхтири? Сар ту на дикхэс баро кашт андэ пэстири ях? Ту, дуемуенго! Вылэ майанглал баро кашт андай ях яхтири, и тунчи дикхэса, сар тэ вылэ кашторо андай ях ях пэстирэ пхралэстар.

Палай лашэ и найлашэ плодоря

43 По лашо дрэво на барёл найлашо плодо, и вырито дрэво на анэн лашо плодо.

44 Кажно дрэво ужанэлпэ пай пэско плодо. На стидэн инжыро пав тэрно и виноградо пав пусаимаско кустарнико.

45 Андав води, пхэрдярдо лашымаса, лашо мануш выандярэл лашымос, а холяко мануш выандярэл холи андав пэско води, пхэрдярдо холяса. Со кав мануш андо води, кода лэстэ и пэ шыб.

Чер, саво тердо по бар

46 Со тумэ аххарэн Ман: «Рай! Рай!» — а на терэн кода, со Мэ пхэнав?

47 Мэ пхэнава тумэнди, пэр касть мэзимэ кодва, ко авэл Мандэ, ашунэн лава Мэрнэ и терэл кадя, сар Мэ пхэнав.

48 Вов мэзима по мануш, саво терэлас чер. Вов выганадя бари ганади и тховдя фундаментом по бар. Кала пай вазгялпэ и лэн выжыля андав брэго и жыля по чер,вой на схаладя лэс, колэстар со сас тердо мишто.

49 Ай кодва, ко ашунэл Мэрнэ лава и на терэл кадя, сар Мэ пхэнав, вов мэзимэ по мануш, саво тердя чер пэ пхув бифундаментоско. Сар качи лэн жыля по чер, вов андэ кодья врьяма роспхагляпэ и роспэляпэ всаворо.

7

Сар патялас пхурэдэр шэлэ халавдэндэр

1 Сар пэрэашыля тэ дэл дума кай мануша, Исусо жыля андо Капернаумо.

2 Котэ, кав ехж халавдо, пхурэдэр англай шэл халавдэ, сас бутярно, вов лэс фартэ танголас. Вов сас фартэ насвало и мэрэлас.

3 Кала халавдо ашундя палав Исусо, бишалдя Лэстэ иудеёндирэн пхурэдэрэн тэ мангэн Лэс, кай тэ авэл и тэ састьярэл лэстирэ бутярнэс.

4 Пхурэдэра авиле кав Исусо и линэ тэ мангэн Лэс:

— Кадва мануш ашэл, кай Ту тэ терэс када важ лэсти.

5 Вов камэл амарэн манушэн и тердя амэнди синагога.

6 Исусо жыля лэнца. Кала Вов поджалас кав чер, пхурэдэр шэлэнгэ бишалдя Лэстэ пэстирэ амалэн тэ пхэнэн:

— Рай, на лэ пэр пэстэ пхаримос. Мэ на ашав, кай ту тэ зажас талай ушарди мэрнэ чөрэтирэ.

7 Мэ ежэно на ашав тэ авав Тутэ. Нэ пхэн качи лав, и мэрно бутярно састьёла.

8 Мэ ежэно кандав, со припхэнэн манди мэрнэ пхурэдэра. И мандэ исин майдэнэ мандар халавдэ, савэ кандэн ман. Мэ пхэнав екхэсти: «Жа!» — и жал, аврасти: «Ав кардэ!» — и кодва авэл. Бутярнэсти пэстирэсти пхэнав: «Стер када!» — и вов терэл.

9 Исусо шундя када, дивосайля, обрисайля кай мануша, савэ жанас пала Лэстэ, пхэндя:

— Пхэнав тумэнди, со и андэ Израилё Мэ на аракхлем кацаво патимос.

10 Кола, савэн бишалдэ, рисайле андо чер, аракхле бутярнэс састьярдэса.

Исусо жундярэл шавэс лэ пхивлятирэ

11 На прожыля бут врьяма, тунчи Исусо жыля андо форо, саво аххарэлтэ Наино. Лэса жанас Лэстирэ сыйярнэ и бут авэр мануша.

12 Кала Вов поджыля кай форости удар, котар выяндярэнас мулэс. Вов сас ехж шаво кай дэй, айвой сас пхивли. Екхэтанэ ласа андав форо выжанас бут мануша.

13 Кала Рай удикхля кала жувля, Вов тангосардя ла.

— На ров, — пхэндя Вов лати.

14 Тунчи Вов поджыля, ляпэ кав сикрио. Кола, ко андярэлас лэс, ашыле. Исусо пхэндя:

— Шаворо, пхэнав тути: вши!

15 Муло бэшля и ля тэ дэл дума. Исусо отдя лэс лэстирэ дати.

16 Пэ всаворэ, ко сас котэ, авиля бари дар, и мануша линэ тэ лашарэн Дэвлэс и тэ пхэнэн:

— Баро пророко авиля амэндэ! Дэл авиля кай Пэстирэ мануш!

17 Кацави дума розжылялпэ пала Лэстэ пай всавори Иудея и всавори пхув.

Исусо и сыйярнэ Иоаностирэ

18 Сытярнэ Иоаностиирэ роспхэндэ лэсти пала вся кода. Тунчи Иоано акхардя пэстэ дуен андэр лэндэ.

19 И бишалдя лэн кав Рай тэ пушэн:

— Ту кодва, Ко трэбуй тэ авэл, или амэнди тэ ажутярас аврэс?

20 Кала мурша авиле кав Иисусо и пхэндэ:

— Иоано Болдэмарё бишалдя амэн Тутэ тэ пушас: «Ту Кодва, Ко трэбуй тэ авэл, или амэнди тэ ажутярас аврэс?»

21 Андэ кодья врима Иисусо састирдя бутэн манушэн насвалимастар, дукхатар и холтиирэ духондар, и бутэнди корэнди отпхэрнадя якха.

22 Иисусо пхэндя бишалдэнди:

— Жантэ, роспхэнэнтэ Иоаности, со тумэ дикхле и шунндэ: корэ дикхэн, бангэ пхирэн, наасвал проказаса жужарэнпэ латар, кашукэ ашунэн, мулэ жундён, и чёрэнди роспхэнэлпэ Радосаво Лав.

23 Бахтало кодва, ко на хасарэла патимо андэ Мандэ!

Иисусо роспхэнэл палав Иоано Болдэмарё

24 Кала бишалдэ сыртаярнэ Иоаностиирэ ужыле, Иисусо ля тэ дэл дума манушэнди палав Иоано:

— Со тумэ пхирдэ тэ дикхэн андэ мал? Чяр, сави тинолпэ балвалятар?

25 Тунчи, со тумэ пхирдэ тэ дикхэн? Манушэс, урявдэс андэ барвалийда? Най! Кала, сава урявдэ андэ ковлийда, жувэн барвалэс андэ тхагарэндирэ чера.

26 Тунчи, со тумэ пхирдэ тэ дикхэн? Пророкос? Кадя, пхэнав тумэнди, со майбарэс, сар пророко.

27 Вов кодва, пала кастэ пистросардо:

«Акэ, Мэ бишалав англав Тутэ Мэрнэс ангелос,
саво гытола англав Тутэ Тиро дром».

28 Пхэнав тумэнди: колэндар, савэн бэяндэ жувля, нинай майбарэс пророкос, сар Иоано. Но майцэкно андэ Тхагаримос Дэвлэско — майбаро лэстар.

29 Всаворэ мануша тай стидэмаря налогонэндирэ, ашундэ и прижангле Дэвлэско дром чячюно и прилинэ болдимос Иоаноско.

30 А фарисеёрыя и сыртаяримаря Законостиирэ отпхэндэл тэ терэ, со пхэндя о Дэл, и на болдэл Иоаностар.

31 Иисусо пхэндя:

— Пэр кастэ тунчи шонпэ мануша кала родостар? Пэр кастэ онэ мэзимэ?

32 Онэ — сар бэяцэ, савэ бэшэн пэ тарго и цыписавэн ек еххэсти:

«Амэ дилабасас тумэнди пэ дудка,
и тумэ на цэлэнас.

Амэ дилабасас тумэнди ровиканэ дилия,
и тумэ на ровэнас».

33 Акэ, авиля Иоано Болдэмарё, на хал марно и на пэл мол, и тумэ пхэнэн: «Андер лэстэ бэнг».

34 Авиля Шаво Манушыкано, хал и пэл, и тумэ пхэнэн: «Акэ мануш, саво обхалпэ, и матимири, амал стидэмаренго налогонэндиро и бэзэхалэ манушэнго».

35 Нэ допхэнэллэ годы рындонца всаворэ бэяцэнца.

Жувли макхэл Иисусос кучютнэнца духоднэнца

36 Ехх андай фарисеёрыя акхардя Иисусос пэстэ черэ тэ хал. Иисусо авиля лэстэ чөрэ и бэшля палай мэсали.

37 Андэ кадя врима ехх жувли колэ форостар, савя жанэнас сар бэзэхаля, ужангя, кай Иисусо хал андо чер фарисеёско, андя кордэ кхоро андай алебастро лэ духоднэнца.

38 Жувли тэрдиля палал паша пэрнэ кав Иисусо, фартэ ровэлас, и ясва прастэнас Лэсти пэ пэрнэ. Вой ля тэ выкхосэл Лэсти пэрнэ пэсти балэнца, чюминдэлас лэн и макхэлас духонэнца.

39 Кала фарисеё, саво аххардя Иисусос, дикхля када, вов гындосардя: «Сар Кадва Мануш чячес тэ авэл пророкоса, то Бов жанэлас бы, со манушни, сави Лэстэ лэлпэ, — бэзэхали».

40 Тунчи Иисусо пхэндя лэсти:

— Симоно, Мэ камав тути варисо тэ пхэнав.

Кодва пхэндя:

— Пхэн, Сытрямари.

41 — Дуй мануша сас ужылэ екхэ и колэсти манушэсти. Ехх ужыло сас панч шэл динария, а авэр — пандэша.

42 И екхэсти, и аврэсти на сас,cosa тэ рисарэн ужылинос. Колэстар вов эртисардя дуенди. Ко лэндар авэла майфартэ тэ камэл лэс?

43 Симоно пхэндя:

— Гындосарав, кодва, касти сас будэр ужылинос эртисардо.

— Ту чячес полэс, — пхэндя Иисусо.

44 Обрисайля кай жувли, пхэндя Симоности:

— Ту дикхэс акала жувля? Мэ авилем адо чер тиро. Ту пай манди на дян, кай тэ выхалавав пэрнэ, а вой выхаладя Мэрнэ пэрнэ ясвэнца и выкхосля пэстирэ балэнца!

45 Ту на чюминдян Ман, сар авилем тутэ, а кадья жувли кола врятатар, сар Мэ зажылем тутэ, на пэрэшэл тэ чюминдэл Манди пэрнэ.

46 Ту на дян Манди оливково дээто тэ макхав шэро, а вой кучютнэ духонэнца помакхяя Манди пэрнэ.

47 Важ кода Мэ пхэнав тути: лати эртисардэпэ бут бэзэха, пала кода вой покамля кадя бут. А кодва, касти цыра эртисардо, и камэл майцыра.

48 Тунчи Иисусо пхэндя жувляти:

— Тирэ бэзэха эртисардэ.

49 Нэ авэр мануша, савэ сас паша мэсали, гындонас: «Ко Бов кацаво, со и бэзэха эртисарэл?»

50 Иисусо пхэндя жувляти:

— Тиро патимос фэрисардя тут. Жа лэ мироса.

8

Жувля жан лэ Иисусоса

1 Тунчи Иисусо жывля пай фороря и гава, пхэнэлас Радосаво Лав палав Тхагаримос лэ Дэвлэско. Лэса сас дэшудуй

2 и кадя ж сас жувля, савэн Бов састярдя холиатирэ духонэндар и насвалимистар: Мария, проакхарди Магдалина, савятар выжыле эхта бэнга,

3 Иоана, ромни лэ Хузостири, саво сас пхурэдэр андо чер Иродоско, Сусана и бут авэр. Кала жувля поможысарэнас Иусости и Лэстирэ сытярнэнди андай кода, со лэндэ сас.

Дума палай мануш, саво шол ворзо

4 Кав Иисусо авэнас мануша андай бут фороря. Сар стидиле бут мануша, Бов проспхэндя лэнди дума:

5 — Мануш выжыля тэ шол ворзо андэ пхув. Кала вов шолас, ехх ворзо пэля пашав дром, и мануша пэрнэнца потасадэ, ай чирикля упраклимастирэ похале лэс.

6 Авэр, со пэля пэ баруи пхув, подбариля тай зашутия, колэстар со котэ на сас пай.

7 Трито пэля андэ чяр, и кодья розбариляпэ тай замардя лэс.

8 Авэр пэлэя пэ лащи пхув, бариля и андя андэ шэл молоря майбут колэстар, со сас шуто.

Тунчи Иисусо вазгля гласо тай пхэндя:

— Касть исин кана, кай тэ ашунэл, мэк ашунэл!

9 Лэстирэ сыйтэрнэ пушле Лэстар:

— Сар тэ полэ кадья дума?

10 Иисусо пхэндя:

— Тумэнди дягэ тэ жанэн гарадо пала Тхагаримос Дэвлэско, ай аврэнди вся ашэллэг гарада думаса, кай онэ тэ дикхэн и тэ на удикхэн, тэ ашунэн и тэ на полэн.

11 Акэ, сар тэ полэ кадья дума: ворзо — када лав Дэвлэско.

12 Кодва, саво пэлэя паша дром, исин кола, савэ ашунэн лав, нэ тунчи авэл Бэнг и чёрэл лав андай лэнго води, соб онэ тэ на патян и тэ на фэрисарэнпэ.

13 Ворзо, саво пэлэя пэ баруи пхув, исин кола, ко радомаса прилэл лав, кала ашунэл лэс. Нэ лэндэ нинай корнё. Сави-то врязма патян, нэ сар авэл зумавимос, онз отпэрэн.

14 Ворзо, саво пэлэя андэ чяр, исин кола мануша, савэ ашунэн лав. Нэ авэн жувимистирэ рындоря, тай лэнди камэллэг тэ авэн барвалэнца и шукар тэ жувэн. Вся када на дэл тэ барёл лавэсти, и вов на анэл плодо.

15 Ворзо, саво пэлэя пэ лащи пхув, — када мануша, савэ ашунэн лав, ритярэн лэс андо лашо и жужко води и анэн плодо, тэрписаримаса андэ вся врязма.

Дума палав каганцо

16 Нико на запхабарэл каганцо и на тховэл лэс талай пири или талав пато, а тховэл лэс упрэ пэ вучё тхан. Тунчи, ко зажала, дикхэла удууд.

17 Нинай нисо чёрэхано, со на авэла удикхло, и гарадо, со на ужанэна и со на выжала аври.

18 Дикхэн, сар тумэ ашунэн. Касть исин, колэсти инке авэла дино, а касть нинай, колэстар отлэлэц и кода, со, сар лэсти гындолпэ, лэстэ исин.

Иисусо пхэнэл палав Пэско йири

19 Кав Иисусо авиле Лэстири дэй и пхрала, и на сас сар тэ поджан, колэстар со паша Лэстэ сас фартэ бут мануша.

20 Иисусости роспхэндэ:

— Дэй Тири и пхрала Тирэ тэрдён аври, камэн тэ дикхэн Тут.

21 Иисусо пхэндя лэнди:

— Мэрни дэй и пхрала исин кола, ко ашунэл лав Дэвлэско и терэл кадя, сар вов пхэнэл.

Иисусо тэрдярэл бари балвал

22 Ехвар Иисусо пхэндя Пэстирэ сыйтэрнэнди:

— Пэрэлпльвисараса пэ авэр риг.

Онэ бэшле андо чёвно, отпльвисардэ.

23 Сар онэ плывисарэнас, Иисусо засутя. Вазгялпэ по паи бари балвал, и чёвно ля тэ зашол паеса кадя, со лэнди авэлас бида.

24 Сыйтэрнэ поджыле кав Иисусо, вазгле Лэс и пхэндэ:

— Сыйтимари! Сыйтимари! Амэ хасавас!

Вов просутяэ и запхэндя балвалти и паести, саво ваздёлас. Вся пэрэашыля, и ашыля тыхо.

25 — Кай патимос тумаро? — пхэндя Иисусо сыйтэрнэнди. Онэ ж пэрэдараийле тай дивосайле, и пушэнас екхэстар:

— Ко Вов, со и балвалти, и паести припхэнэл, и онэ кандэн Лэс?

Иисусо вытрайдэл бэнгэн андэ балэ

26 Онэ приплывисардэ андэ пхув Гераса, сави сас англай Галилея.

27 Кала Иисусо авиля по бэрэго, Лэсти по дром выжыля мануш андав форо, андэр лэстэ сас буд бэнга. Пэр лэстэ дэлмут на сас йида, жувэлас на андо чер, а андэ склэпоря важ мулэ.

28 Кала вов удикхля Иисусос, вов пэля кай Лэсти пэрнэ и фартэ зацыпсайля:

— Со Ту мандар камэс, Иисусо, Шаво Барэ Дэвлэско? Мангав Тут, на хасар ман!

29 Иисусо приphэндя найжуужэ духости тэ выжал андав кадва мануш. Бэнг бут врэма хасарэлас лэс. Лэсти спхандэнас лэпунзэнца васт и пэрнэ, нэ вов росшынэлэс лэн, и бэнг затрадзлас лэс андэ мал.

30 Иисусо пушля лэс:

— Сар тут акхарэн?

— Легионо, — пхэндя кодва, колэстар со бут бэнга вжыле андэр лэстэ.

31 Онэ линэ тэ мангэнтэ Иисусостар тэ на бишалэл лэн андэ бездна.

32 Найдур котар по плай пасынаспэ бут балэ, и бэнга мангэнас Иисусос, кай онэ тэ вжан андэр лэндэ. Вов пхэндя лэнди: «Жан».

33 Кала бэнга выжыле андав мануш и вжыле андэ балэ, и кола всаворэ шутэпэ пай кручя андо пай и тасиле.

34 Пасымаря, савэ сас пашай балэ, дикхле, со тердяпэ, прастае и роспхэндэ вся андо форо и андэ гава.

35 Сжылепэ мануша тэ дикхэн, со тердяпэ. Онэ поджыле кав Иисусо и удикхле, со кодва мануш, андэ савэстэ сас бэнга, бэшэл пашай пэрнэ кав Иисусо, урявдо и андэ пэсти годи, и авиля пэр лэндэ дар.

36 Кола, савэ вся дикхле, роспхэндэ лэнди, сар сас састьярдо мануш андэ савэстэ сас бэнга.

37 Тунчи всаворэ мануша, савэ жувэнаас андэ пхув Гераса, линэ тэ мангэн Иисусос тэ ужал лэндар, колэстар со онэ фартэ здараилье. Иисусо башля андэ чёвно и рисайля палпалэ.

38 Мануш, савэстар выжыле бэнга, мангия Иисусос тэ лэл лэс Пэса. Но Иисусо отмэкля лэс и пхэндя:

— Рисав пэстэ черэ и роспхэн, со тердя важ тути Дэл.

Кодва жыля, роспхэнэлэс пав всаворо форо пала кода, со тердя важ лэсти Иисусо.

Иисусо састьярэл жувли и жундярэл щиёра

40 Кала Иисусо рисайля палпалэ, Лэс радомаса прилинэ бут мануша, колэстар со всаворэ ажутярэнэс Лэс.

41 Тунчи Лэстэ поджыля мануш, савэс акхарэнас Иайро, саво сас пхурэдэр андэ синагога, и пэлэ кай Иисусостирэ пэрнэ, ля тэ мангэл Лэс, кай тэ авэл лэстэ черэ.

42 Лэстэ сас ехк щей, савяти сас дэшудуй бэрш, ивой мэрэлас. Иисусо жыля лэса, и Лэс всаворэ ригэндар стасавэнас мануша.

43 Машкар лэндэ сас жувли, савяти дэшудуй бэрш жалас рат. Вой отдя вся, со латэ сас, врачёнэнди, и никастэ на сас зор тэ састьярэл ла.

44 Вой поджыля палал кав Иисусо и ляпэ кай риг Лэстирия йидатэ. Рат андэ кодъя ж врэма пэрэшияла тэж жал.

— Ко Мандэ ляпэ? — пушля Иисусо. Нико на прижандёллас. Петро пхэндя:

— Сытряимари, паша Тутэ бут мануша и стасавэн всаворэ ригэндар!

46 Иисусо пхэндя:

— Варико Мандэ ляпэ. Мэ полем, со Мандар выжыля зор.

47 Тунчи кодъя жувли поля, со вой на гарадёла, тиносайля, поджыля и пэля англав Иисусо. Англай всаворэ мануша роспхэндя, состар вой Лэстэ ляпэ, и сарвой састьярдяэ.

48 Тунчи Иисусо пхэндя лати:

— Щей Мэрни! Тиро патимос фэрисардя тут. Жа лэ мироса.

49 Кала Иусо инкэ на допхэндя када, авиля мануш андэв чер пхурэдэр синалогако.

— Щей тири муля, — пхэндя вов, — на залэ будэр Сытрямарес.

50 Ашундя када, Иусо пхэндя Иайости:

— На дара, качи патя, и щей тири авэла фэрисарди.

51 Сар Вов зажыля андо чер, на дяникасти тэ зажан Лэса, качи о Пэтро, Иоано, Иаково, дад и дэй Ѣшиёратирэ.

52 Всаворэ ровэнас и грыжонааспэ пала Ѣшиёры.

— Пэрэашэн тэ ровэн, — пхэндя Иусо. — Вой на муля, а совэл.

53 Онэ линэ тэ асан Лэстар, колэстар со жанэнас: вой муля.

54 Иусо ля ля палав васт и пхэндя:

— Бэята, вщи!

55 Духо Ѣшиёрако рисайля латэ, и андэ кодъя врязма вой вшиля. Иусо пхэндя тэ дэн лати тэ хас.

56 О дад и дэй латирэ дивосайле. Иусо пхэндя лэнди, никасти тэ на роспхэнэн пала када, со тердяпэ.

9

Иусо бишалэл пэстирэн апостолонэн тэ роспхэнэн Радосаво Лав

1 Иусо стида еххэтанэ дэшудуен апостолонэн и дя лэнди зор и баримос тэ вытградэн бэнгэн и тэ састьярэн насвалимластар.

2 И бишалдя лэн тэ роспхэнэн палав Дэвлэско Тхагаримос и тэ састьярэн насвалэн.

3 Пхэндя лэнди:

— Нисо на лэнтэ пэса андо дром: ни дэсто, ни траста, ни марно, ни ловэ, ни авэр ийда.

4 Андэ саво чер тумэ тэ зажан, котэ ашэнпэ и котар жан майдур.

5 Сар мануша тумэн на прилэнэ, тунчи, сар авэна тэ выжан колэ форостар, обмарэн пош тумарэ пэрнэндар, мэк када авэла важ лэнди шпэра.

6 Дэшудуй жыле андо дром, пэрэжанас гав гавэстэ, роспхэнэнас Радосаво Лав, и андэ всаворэ тхана састьярэнас насвалэн.

Иродо ашунэл палав Иусо

7 Дума пала вся када дожыля кав рай тетрархо Иродо. Вов дивосайля, колэстар со ехх пхэнэнас: када Иоано жундиля андай мулэ,

8 авэр — со када сикадяпэ Илия, ай авэр — со када жундиля андай мулэ ехх андай дэлмутно пророко.

9 Иродо пхэндя:

— Иоаности мэ отышнндэм шэро. А ко тунчи Кадва Мануш, пала саво мэ ашуван? И вов родэлас тэ дикхэл Иусос.

Иусо чялярэл майбут, сар панч мии манушэн

10 Апостолоря рисайле и роспхэндэ Иусости пала вся, со онэ стердэ. Тунчи Вов ля лэн Пэса, и онэ жыле ежэнэ биманушэнго кав форо, саво акхарэлпэ Вифсаид.

11 Нэ бут мануша ужангле пала када и жыле палав Иусо. Вов мишто лэн прияла, пхэнэлас лэнди палав Дэвлэско Тхагаримос и кадя ж састьярэлас колэн, касти када сас трэбуй.

12 Врязма жалас кай рят, и дэшудуй поджыле кав Иусо и пхэндэ:

— Отмук манушэн, соб онэ тэ жан андэ пашэ тхана и гава тэ аракхэн, кай тэ ратярэн и тэ хан, колэстар со амэ катэ андэ биманушэнго тхан.

13 Иусо пхэндя лэнди:

— Тумэ дэнтэ лэнди тэ хан.

Сытрянэ дивосайле:

— Амэндэ качи панч марнэ и дуй маше. Со амэнди, тэ жас тэ тинас хамос важ всаворэ акала мануш?

14 Котэ сас ехкэн муршэн варикай панч мии. Иисусо пхэндя сыйянэнди:

— Розбэшлярэн манушэн по пандэша.

15 Сыйянэн кадя тердэ. Кала всаворэ бэшле,

16 Иисусо ля панч марнэ и дуй маше, взагля якха по болыбэн и пхэндя наис палав хамос. Тунчи Вов ля тэ пхагэл марно и машё и тэ дэл Пэстирэ сыйянэнди, кай кола тэ роздэн манушэнди.

17 Всаворэ ханас и чялиле, и стидэ инке которая савэ ашылепэ, андэ дэшудуй барэ трасты.

Петро прижанэл Иисусос Христоса

18 Ехкварэс, кала Иисусо мангэласпэ Дэвлэс ежэно, найдур Лэстар сас Лэстирэ сыйянэн. Вов пушля лэндэр:

— Пала каастэ прилэн Ман мануша?

19 Онз пхэндэ:

— Палав Иоано Болдэмарё, ай авэр — палав Илия, ай авэр пхэнэн, со ехх андай дэлмутно пророко жундила.

20 — А тумэ важ касти прилэн Ман? — пушля лэн Иисусо.

— Дэвлэско Христосо, — пхэндя Петро.

Иисусо пхэнэл палав Пэско миринос и кай Вов жундёла

21 Нэ Иисусо припхэндя лэнди, кай никасти тэ на роспхэнэн пала када.

22 Пхэндя:

— Шаво Манушыкано авэла андэ бари грыжа, и Лэс на прилэнна пхурэдэра, барэ рашая и сыйтимаря Законостирэ. Вов авэла умардо, ай по трито дес жундёла.

23 Тунчи Иисусо пхэндя лэнди:

— Сар ко камэл тэ жал пала Мандэ, мэк отпхэндёл ежэно пэстар, кажно дес лэл пэско трушул и жал пала Мандэ.

24 Кодва, ко камэл тэ фэрисарэл пэско жувимос, хасарэла лэс, а ко хасарэла пэско жувимос важ Манди, кодва фэрисарэла лэс.

25 Со за мищимос манушэсти, сар вов лэла всавори люома, а ежэно хасавэла и терээла грыжа пэсти?

26 Ко лажала Мандар и Мэрнэ лавэндэр, колэстар лажала и Шаво Манушыкано, кала авэла андэ Пэстири слава и андэ слава лэ Дадэстири, и свэнтонэнца ангелонэнца.

27 Пхэнав тумэнди чячимос: исин машкар тумэндэ кола, савэ тэрдён катэ, онэ на мэрэна, сар удикхэна о Тхагаримос Дэвлэско.

Иисусо дэл дума лэ Моисеёса и Илияса

28 Кала прожыля варикай охта деса, сар Иисусо пхэндя кала лава, Вов ля Петрос, Иоанос и Иаковос и взагляпэ по плай тэ мангэллэ Дэвлэс.

29 Андэ кодья врязма, сар мангэласпэ, Лэско муй парудиля, Лэстири йида ашыля парни тай свэгосавэлас.

30 И акэ, авиле дуй мурш, савэ линэ тэ дэн дума Иисусоса, — када сас Моисеё и Илия.

31 Онэ авиле андэ бари слава и пхэнэнас, со Лэсти трэбуй тэ жал андо Иерусалимо кай тэ ашавэл кадья люома.

32 Петро и ко сас лэса засутэ. Но сар просутэпэ, удикхле слава Иисусостири и дуен муршэн, савэ тэрдёнас паша Лэстэ.

33 Кала мурша линэ тэ жантар, Петро пхэндя Иисусости:

— Сыйтимари! Амэнди катэ фартэ мишто! Амэ стераса трин катуны: ехх Тути, ехх Моисеёсти и ехх Илиясти.

Ежэно на полэлас, со дэлас дума.

34 Кала вов дэллас дума, авиля облако пэр лэндэ и онэ попэле талав лэстэ. Сар попэле андо облако, онэ фартэ пэрэдараиле.

35 Андав облако пхэндя гласо:

— Када Мэрно Шаво, Мэрно вытидо. Лэс ашунэн!

36 Сар гласо на ашыля, онэ удикхле екхэс Иисусос. Онэ ашэнас мулком пала кода и андэ кодья врязма никасти на роспхэнэнас, со онэ дикхле.

Иисусо састьярэл шаворэс найжүжэз духостар

37 Пэ авэр дес, кала онэ змукэнаспэ пав плай, Иисусос ажутярэнас фартэ бут мануша.

38 И екх мануш андар лэндэ зацыписайля:

— Сытрямари! Мангав Тут, подикх по мэрно шаво, вов екх мандэ.

39 Лэс схутилэл и тасавэл духо, и тунчи шаворо лэл тэ цыписавэл, тэ тиносавэл и тэ мукэл саля. Духо фартэ марэл лэс и тунчи цыра отжал лэстар.

40 Мэ манглем Тирэн сытярнэн тэ вытградэн лэс, но онэ на вытрадэ.

41 — Напатимаско и билажавардо родо, — пхэндя Иисусо. — Скачи Манди тэ авав тумэнца и тэ тэрписарав тумэн? Ан тирэс шавэс кардэ.

42 Кала шаворо инкэ жалас, бэнг шүти лэс пэ пхув и ля тэ марэл лэс. Но Иисусо запхэндя найжүжэ духости, састьярдя шаворэс и отдя лэстирэ дадэсти.

43 Всаворэ дивосайле, саво баро Дэл.

Иисусо упалэ пхэнэл палав Пэско миринос

Андэ кодья врязма, сар всаворэ дивосавэнас колэсти, со тердя Иисусо, Вов пхэндя Пэстирэ сытярнэнди:

44 — Ашунэн мишто, со Мэ тумэнди икхатар пхэнава: Шаво Манушыкано сыго авэла отдино андэ васт манушэндирэ.

45 Но онэ на полинэ, со Вов пхэндя. Лэнди када сас затердо, и онэ на полинэ, со сас пхэндо, а тэ пушэн Лэс пала када лав даранас.

Сытярнэ ханпэ, ко лэндар майбаро

46 Машкар сытярнэ екхвар сас дума пала кода, ко лэндар майбаро.

47 Иисусо жангия, со онэ гындонас андэ водя, ля цэknэс бэятос и тходя паша Пэстэ.

48 — Ко важ Мэрно алав прилэл акацавэс бэятос, — пхэндя Иисусо, — кодва и Ман прилэл, а ко прилэл Ман, кодва прилэл Колэс, ко Бишалдя Ман. Ко машкар тумэндэ майцэкно всаворэндар, кодва и майбаро.

49 Иоано пхэндя Лэсти:

— Сытрямари! Амэ дикхле манушэс, саво Тирэ алавэса вытрадэл бэнгэн. Амэ запхэндэ лэсти, колэстар со вов на пхирэл пала Тутэ екхэтанэ амэнца.

50 — На запхэнэн, — пхэндя лэсти Иисусо. — Ко на жал пэ тумэндэ, кодва пала тумэндэ.

Самаряноя на прилэн Иисусос

51 Кала Иисусости поджылия врязма тэ ваздэлпэ по болыбэн, Вов ля андэ годи со трэбуй тэ жал андо Иерусалимо.

52 Англал Пэстэ Вов бишалдя пэстирэ манушэн, онэ жыле андо екх андай самариятирэ гава тэ пригытон вся.

53 Нэ мануша, савэ жувэнас котэ, на прилинэ Лэс, колэстар со Вов жалас андо Иерусалимо.

54 Лэстирэ сытярнэ, Иаково тай Иоано, дикхле када и пхэндэ:

— Рай! Камэс, амэ припхэнаса ягати тэ сжал пав болыбэн и всаворэн лэн тэ спхабарэл?

55-56 Иисусо обрисайля, запхэндя лэнди.* И онэ жыле андэ авэр гав.

Иисусо пхэнэл, сави цымин, кай тэ жан пала Лэстэ

57 Сар онэ жанас пав дром, екх мануш пхэндя Иисусости:

— Мэ жава пала Тутэ андо всаворэ тхана, кай Ту жаса.

58 Иисусо пхэндя лэсти:

— Кай лисоря исин тхана, кай онэ жувэн, и кай чирикля болыбнастирэ — пэско тхан, а Шавэсти Манушыканэсти най кай шэрэ тэ хтовэл.

59 Аврэсти манушэсти Иисусо пхэндя:

— Жа пала Мандэ.

Кодва пхэндя:

— Рай, дэ манди майанглал тэ жав и тэ гаравав пэстирэ дадэс.

60 — Мэг мулэ ежэнэ гаравэн пэстирэн мулэн, а ту жа и роспхэн пала Тхагаримос Дэвлэско, — пхэндя лэсти Иисусо.

61 Инке екх мануш пхэндя Лэсти:

— Рай, Мэ жава пала Тутэ! Нэ дэ манди майанглал тэ жав и тэ дикхав пэско йири.

62 Иисусо пхэндя:

— Ни екх мануш, саво тховэла васт пэско по плого и обдикхэллэ палпалэ, на поджал важд Тхагаримос Дэвлэско.

10

Иисусо бишалэл эхтадэш сыйтарнэн

1 Тунчи о Рай вытидя инке эхтадэш сыйтарнэн и бишалдя по дуй англал Пэстэ андэ всаворэ фороря и тхана, каринг камэлас Ежэно тэ жал.

2 Вов пхэндя лэнди:

— Пэ мал вся выбариля, трэбуй тэ стидэ, а бутярнэн цыра. Мангэн Хулас, кай Вов тэ выбишалэл бутярнэн пэ мал тэ стидэ вся, со барииля.

3 Жантэ! Мэ бишалав тумэн, сар бакрорэн машкар рува.

4 На лэн пэса ни тышила, ни траста, ни пэрналэ, и никаса пав дром на ашэн тэ дэн дума.

5 Кала авэна тэ зажан андо чер, майанглал пхэнэн: «Тэ авэн баихталэ».

6 Сар андэ кодва чер жувэл шаво баихтиро, тунчи авэла пэр лэстэ баих тумари, а сар на прилэла, тунчи тумари баих рисавэла тумэндэ.

7 Андо кодва чер ашэнпэ, на пэрэжан андав чер чирэстэ, хантэ и пэнтэ кода, со лэндэ исин. Ко терэл бути, вов ашэл, кай лэсти тэ потинэн.

8 Сар тумэ зажана андо форо и тумэн котэ прилэна, хантэ вся, со тумэнди дэна,

9 састярэн лэндирэ насвалэн, савэ котэ исин, тай пхэнэнтэ лэнди: «Тхагаримос лэ Дэвлэско пашыля тумэндэ».

10 Сар тумэ зажана андо екх форо и тумэн котэ на прилэна, жан пай гасы калэ форостири и пхэнэн:

11 «И о прахо тумарэ форостар, саво приашыля кай амарэ пэрнэ, амэ обмарас пэр тумэндэ. Нэ жанэн: Тхагаримос Дэвлэско пашэ!»

12 Пхэнав тумэнди, со андо кодва дес Содомостири манушэнди авэла майлокхо, сар калэ форости.

13 Бида тути, форо Хоразино! Бида тути, форо Вифсаид! Сар андэ фороря Тиро и Сидоно тэ авэл тердо скачи диворя, сар тумэндэ, то дэлмут онэ урявдэл андэ калийда и бэшэнас андо пепло, каисавэнас.

14 Но Тирости и Сидоности авэла фэдэр по сындо, сар тумэнди.

* **9:55-56** Андэ коисавэ гречески манускрипторя инке исин кацавэ лава: «тай пхэндя: "Тумэ на жанэн, савэ тумэ духостар. Шаво Манушыкано авила, тэ на хасарэл манушэндирэ водя, а тэ фэрисарэл лэн"».

15 И ту, Капернаумо, гындоц, кай авэса вазгло кав болыбэн? Най, ту авэса сшуто андо адо.

16 Тунчи Вов пхэндя сыйярнэнди:

— Ко ашунэл тумэн, ашунэл Ман, а ко отпхэндёл тумэндар, и Мандар отпхэндёл. А ко отпхэндёл Мандар, отпхэндёл Колэстар, ко бишалдя Ман.

Эхтадэш сыйярнэ рисавэн

17 Эхтадэш сыйярнэн рисайле кав Исусо радомаса:

— Рай, — пхэнэнас онэ, — и бэнга кандэн амэн, кала амэ припхэнэн лэнди Тирэ алавэса!

18 Исусо пхэндя:

— Мэ дикхлем, сар о Сатана пэля пав болыбэн, сар молния!

19 Акэ, Мэ дав тумэнди баримос тэ тасавэн сапэн и скорпионон, тай всавори вражымостири зор, ай тумэнди нико на терла бида.

20 Нэ радосавэн на колэсти, со духоря кандэн тумэн, ай радосавэн колэсти, со тумарэ алава запистросардэ по болыбэн.

21 Андэ кодья время Исусо радосайля андо Свято Духо и пхэндя:

— Мэ лашарав Тут, Дадэ, Рай Дэл по болыбэн и пэ пхув, пала кода, со Ту гаравдян када годявэр и сыйярнэ манушэндар и отпхэрнадян када бэяцэнди. Кадя, Дадэ, када сас Тири лащи воля!

22 Дад отдя Манди вся. Нико на жанэл, ко исин Шаво, качи о Дад. И нико на жанэл, ко исин Дад, сар качи о Шаво и кодва, кости Шаво камэл тэ отпхэрнавэл Лэс.

23 Тунчи Вов обрисайля кай Пэстирэ сыйярнэ, пхэндя кадя:

— Бахталэ якха, савэ дикхэн кода, со тумэ дикхэн!

24 Мэ пхэнав тумэнди, со бут пророкоря и тхагара камэнас тэ дикхэн кода, со тумэ дикхэн, и на дикхле, и камэнас тэ шунэн кода, со тумэ ашунэн, и на ашундэ.

Дума налав лашэ водеско самарянино

25 Катэ вицила екх сыйяримари Законоско и пушля кав Исусо, камля тэ астарэл Лэс по лав.

— Сыйяримари, со манди тэ терав, кай мэ тэ лав жувимос вакоско?

26 — А со пхэнэллэ андо Законо? — пушля лэстар Исусо. — Со ту котэ бинэс?

27 Вов пхэндя:

— Кам Раес, Дэвлэл тирэс, всаворэ водеса тирэса, и всаворэ жувимаса тирэса, и всаворя зораса тиряса, и годяса тиряса. И кам пашэс тирэс, сар ежэно пэс.

28 — Чячес ту пхэндян, — пхэндя лэсти Исусо. — Тер кадя, и ту авэса тэ жувэс.

29 Сыйяримари Законоско камля тэ допхэнэл, кай вов на ужыло, пхэндя Исусости:

— А ко мэрно пашо?

30 Пэ када пхэндя Исусо:

— Екх мануш жалас андав Иерусалимо андо Иерихоно. Пав дром пэр лэстэ хукле прахаря, савэ злинэ пар лэстэ йида, мардэ фартэ и ужыле, ашадэ лэс тэ мэрэ.

31 Кадя прижыляяпэ, пав кода дром жалас рашай. Сар удикхля калэ манушэс, обжыля лэс пай авэр риг дром.

32 Кадя ж тердя и левито: дожыля кай кадва тхан, удикхля лэс и обжыля ригаса.

33 Колэ дромэса прожалас и самарянино, удикхля лэс и тангосардя.

34 Вов поджыля, прохаладя и помакхля оливково дзэтоса и молэса раноря, пэрэхангля лэн. Тунчи тходя лэс пэ пэско осло, андя лэс андэ гостиница и котэ инке додикхэллас пала лэстэ.

35 Пэ авэр дес, кала вов уладэлас, дя хуласти андай гостиница дуй динария и пхэндя: «Придих пала лэстэ, ай сар мэ авава тэ рисавав, сар ту потинэса майбут, мэ роспотиндювава туса».

36 Ко андай кала трин, пав тиро, сас майпашэ колэсти манушэсти, сава попэля кай прахаря?

37 Сытрямари Законско пхэндя:

— Кодва, ко сикадя лэсти тангимос.

Тунчи Иисусо пхэндя лэсти:

— Жа и ту тер кадя ж.

Марфа и Мария

38 Пав дром Иисусо лэ сытрянэнца зажыля андэ екх гав. Котэ жувли, савя акхарэнас Марфа, акхардя Лэс андо пэско чер.

39 Латэ сас пхэй, савя акхарэнас Мария. Вой бэшля пашай пэрнэ Раестиэр и шунэлас, со Вов пхэнэлас.

40 Марфа прастэлас кордэ палпалэ, терэлас и подэлас о хамос пэ мэсали. Вой поджыля кав Иисусо и пхэндя:

— Рай! Ту на дикхэс, кай мэрни пхэй екха ман ашадя тэ терав бути? Пхэн лати, кайвой тэ поможысарэл манди!

41 — Марфо, Марфо, — пхэндя Рай, — ту гындос и терэс бут со.

42 А трэбуй качи екх. Мария вытида, со майфэдэр, и када латар на залэлапэ.

11

Иисусо сытярэл сытярнэн тэ мангэн Дэвлэс

1 Екхварэс Иисусо андэ екх тхан мангэлас Дэвлэс, и сар Вов пэрэашыля, екх андай сътярнэ манггия Лэс:

— Рай! Сытяр амэн тэ мангас Дэвлэс, сар о Иоано сътярдя пэстирэ сътярнэн.

2 Вов пхэндя лэнди:

— Кала тумэ мангэн Дэвлэс, пхэнэн кадя:

Дада! Мэж всаворэ лашарэн Тиро свэнто алав!

Мэж авэл Тхагаримос Тиро!

3 Марно, саво трэбуй амэнди,
подэ амэнди пэ кадва дес.

4 И эртисар амэнди амарэ бэзэхэ,
колэсти со и амэ эртисарас всаворэнди,
ко амэнди ужыло.

И на домук тэ подаспэ кав бэзэх.

5 Тунчи Иисусо пхэндя лэнди:

— Сар варикастэ түмэндар исин амал, и тумэ авзна лэстэ андэ епаш рят и пхэнэна: «Амал, дэ манди андо ужылимос трин марнэ.

6 Мандэ дромэстэр залагля амал мэрно, и манди нинай, со тэ дав лэсти».

7 А кодва андрал андэв чөр пхэнэла лэсти: «На замисар ман! Удар затердэ, и бэяцэ мэрнэ манца по пато. Най сар тэ вцав и тэ дав тути».

8 Пхэнав түмэнди, сар вов на вцела и на дэла колэсти, со вов исин лэско амал, пала кода со түмэ на пэрэашэн тэ мангэн, вов вцела и дэла, со түмэнди трэбуй, кай лэсти тэ на авэл лажаво.

9 Пхэнав түмэнди: мангэн — и о Дэл дэла түмэнди, родэн — и аракхэна, марэн андэ удар — и о Дэл отпхэрнавэла түмэнди.

10 Кодва, ко мангэл — лэл, ко родэл — аракхэл, и ко марэл андэ удар — колэсти отпхэрнавэн.

11 Иисин машкар түмэндэ кацаво дад, саво дэла пэстирэ шавэсти сапэс, сар вов мангэл машё?

12 Сар мангэла парноро, дэла лэсти скорпионо?

13 Кала тумэхолятиэрэ, ай пэстирэ бэяцэнди дэн лашымос, майфартэ Дад тумаро бοлыбнаско дэла Свэнтонэс Духос колэнди, ко мангэл Лэстар.

Исусо вытрадэл бэнгэн Дэвлэстирия зораса

14 Ехвар Иисусо вытрайда бэнгэс, саво терэлас манушэс мутонэса. И кала бэнг выжыля, мануш, саво сас муту, задя дума. Мануша дивосайле.

15 Коисавэ пхэнэнас:

— Вов вытрадэл бэнгэн зораса, сави дэл Веельзевуло, пхурэдэр бэнг.

16 Ай авэр камэнас тэ зумавэн лэ Иисусос, тай мангле, кай Вов тэ сикавэл шпэра пав болыбэн.

17 Иисусо жанггя, со онэ гындон, пхэндя лэнди:

— Кажно тхагаримос, саво машкар пэстэ вражымари, авэла шушо, и чер, кай вражымари машкар пэстэ, пэрэла.

18 Сар о Сатана вражымари ежэно пэсти, сар утэрдёла тхагаримос лэско? Тумэхэнэн, со Мэ зораса, сави дэл Веельзевуло вытрайдав бэнгэн.

19 Сар Мэ вытрайдав бэнгэн зораса, сави дэл Веельзевуло, тунчи савя зораса вытрайдэн лэн тумарэ шавэ? Колэсти онэ авэна тумэнди сындомаренца.

20 А сар Мэ вытрайдав бэнгэн Дэвлэстирия зораса, тунчи авиля тумэндэ Тхагаримос Дэвлэско.

21 Кала зорало мануш лэ мардянца мишто дикхэл пала пэско чер, тунчи лэско хулаимос нико на обчёрэла.

22 Кала майзор лэстар хукэла пэр лэстэ, тунчи помарэла лэс тай залэла лэстар мардя, савэнца вов гындолас тэ фэрисарэллэ, вся, со исин андо чер, залэла и роздэла.

23 Ко на екхэтанэ Манца, кодва жал пэр Мандэ; и ко на стидэл Манца, кодва росшол.

Сар рисавэл палпалэ найжужо духо

24 Кала найжужо духо выжал андад мануш, вов пхирэл пай бипастирэ тхана, родэл, кай тэ отчиёл, и на аракхэл. Тунчи вов пхэнэл: «Рисавава мэ андо чер, катар выжылем».

25 Кала вов рисавэл, дикхэл, со чер лэско жужардо и притидо.

26 Тунчи вов жал и лэл пэса эхта аврэн духон, майхолятирен пэстар, и онэ зажан и жувэн котэ. И када важо мануш инке майвырито, сар сас майанглэ.

Чячию баҳт

27 Сар Вов инке дэлас дума, тунчи екх жувли зацыписайля андай мануша, савэ стидэпэ котэ:

— Бахтали кодья дэй, сави бэяндя и выправардя Тут!

28 Иисусо пхэндя пэ када:

— Бахталэ кола, ко ашунэн Дэвлэско лав и терэн, сар Вов пхэнэл.

Шпэра Ионастири

29 Сар манушэн стидяпэ майбут, Иисусо ля тэ дэл дума:

— Кадва родо — холяко. Вов родэл шпэра, нэ лэсти на дэлапэ нисави шпэра, качи шпэра Ионастири.

30 И сар Иона сас шпэра важ ниневитяниоря, кадя Шаво Манушыкано авэла шпэра важ кадва родо.

31 Тхагарни пав юго ваздёла по сындо манушэнца калэ родостар и синдосарэла лэн, колэсти со вой пай авэр риг пхув авэлас тэ пошуунэл годяримос Соломоноско, и акэ, катэ майбаро Соломоностар.

32 Ниневитяноря ваздёна по сындо лэ манушэнца калэ родостар и сынdosарэна лэн, колэсти со онэ ашадэ бээзэх пэско лавэндар, савэ пхэндя Иона. И акэ, катэ майбаро Ионастар.

Исусо пхэнэл палав уудд, саво андрал

33 Нико, ко запхабарэл каганцо, на тховэл лэс по тхан, кай лэс нико на дикхэла, или талай ххоро. Нэ тховэн лэс упрэ, кадя, кай, ко зажала, тэ дикхэл уудд.

34 Тирэ якха — уудд важ тиро тило. Кала тирэ якха жужэ, тунчи и ту всаворо пхэрдо ууддэса. Ай сар тутэ найлашэ якха, тунчи тило тиро пхэрдо калимаса.

35 Колэстар дикх, уудд, саво андрэ тутэ, на калимос?

36 Акэ, сар тиро тило пхэрдо ууддэса и андрэ лэстэ нинай нисаво калимос, тунчи ту всаворо авэса пхэрдо ууддэса, сар молниятар шолпэ пэр тутэ лако уудд.

Исусо ужылисарэл фарисеёнэн и сытряимарен Законостирэн

37 Кала Иисусо када пхэнэлас, екх фарисеё акхарда Лэс пэстэ тэ хал. Иисусо жыля тай бэшля палай мэсали.

38 Фарисеё дивосайля, со Вов на халадя и васт, англал сар тэ бэшэл тэ хас.

39 Рай пхэндя лэсти:

— Акэ тумэ, фарисеёра, жужарэн чярэ и тарелки упран, ай андрал тумэ исин скумпо и холятире.

40 Бигодятиэр! Кодва, Ко тердя упран, на тердя ли и андрал?

41 Дэнтэ чёрорэнди, колэстар, со тумэндэ исин, и тунчи вся важ тумэнди авэла жужо.

42 Бида тумэнди, фарисеёра! Тумэ дэн дэшто котор пай мята, рута и пай всавори зэлэнь, ай чячимос и камлимос Дэвлэско забистарэн. И када трэбуй тэ терэн, и кода тэ на ашавэн.

43 Бида тумэнди, фарисеёра! Тумэ камэн тэ залэн майлашэ тхана андэ синагоги и кай мануша тумэнди тэ пхэнэн пэ барэ грады: «Тэ авэн бахталэ».

44 Бида тумэнди! Тумэ — сар склэпоря, савэ на душон, пай савэ мануша пхирэн и на жанэн, кай онэ котэ исин.

45 Екх андай сътряимаря Законостирэ пхэндя Лэсти:

— Сътряимари! Кала думаса и амэн обмукэс.

46 Иисусо пхэндя:

— Бида и тумэнди, сътряимаря Законостирэ! Тумэ тховэн пэ мануш траста, сави пхарэс тэ андяэрэ, ай ежэнэ и наеса кадэла трастатэ на лэнпэ.

47 Бида тумэнди! Тумэ тховэн шукарнэ памятникоря пророконэнди, савэн умардэ тумарэ дада.

48 Калэса тумэ подритярэнрындэри тумарэ дадэндирэ. Онэ умардэ пророкон, а тумэ терэн важ лэнди памятникоря.

49 Колэсти годяримос Дэвлэско пхэндя: «Мэ бишалава лэндэ пророкон и апостолонэн, и онэ екхэн умарэна, айavrэн вытградэн».

50 Колэстар кадва родо потинэла палав всаворо рат пророкэндиро, саво сас прошшто кола врятатар, кала тердяпэ люма,

51 лэ ратэстар Авилистирэстар кав рат Захарияско, саво сас умардо машкар жэртвенико и храмо. Кадя, пхэнав тумэнди, пушэлапэ калэ родостар.

52 Бида тумэнди, сътряимаря Законостирэ! Тумэ залинэ тии лэ джянглимастар, нэ ежэнэ на зажыле и затердэ дром колэнди, ко зажал.

53 Кала Иисусо выжыля андав чер, сътряимаря Законостирэ и фарисеёра фартэ холяйле пэр Лэстэ, долэнас Лэс и бут пушэнас Лэстар.

54 Онэ родэнас, сар тэ астарэн Лэс по лав.

12

Исусо пхэнэл пала дуемуендиэрэн

- 1** Андэ кодъя връяма стидэпэ бут мануша, кадя со тасавэннаспэ машкар пэстэ. Иисусо ля тэ пхэнэл майанглал Пэстирэ сыйярнэнди:
— Фэрисавэн фарисеёнэндирия закваскатор, кай тэ на авэн тумэ дуемуендиэрэ.
- 2** Нинай нисо гарадо, со на отпхэрнавэлапэ, и нисо чёрхано, со на ужандёла.
- 3** Со тумэ пхэнэн чёрханэс рягыса, кода ашундёла десэ; и со тумэ пхэнэнас тыхо андрэ андо чер, авзла тэ цыпписавэлээ упран пай чера.

Даран качи екхэ Дэвлэс

- 4** Мэ пхэнав тумэнди, Мэрнэ амалэнди: на даран колэндар, ко умарэла тило и будэр нисо на терэла.
- 5** Мэ сикавава тумэнди, Кастьар трэбуй тэ даран: даран Колэстар, Ко на качи умарэла, но исин Лэстэ баримос тэ шол андо геена. Чячес пхэнав тумэнди, Лэстар даран.

6 Най панч цэкнэ чириклия битиндён пала дуй копийки? И ни пала екх лэндар о Дэл на бистардя.

7 А тумэндэ и бал по шэро всаворэ побиндэ! На даран — тумэ майкуч бутэ цэкнэ чириклияндар.

На лажан Исусостар

- 8** Пхэнав тумэнди: всаворэ, ко прижанэнна Ман англай мануша, и Шаво Манушыкано прижанэла колэс англай ангелоря Дэвлэстирэ.
- 9** А ко отпхэндёла Мандар англай мануш, колэстар и Вов отпхэндёла англай ангелоря Дэвлэстирэ.
- 10** Всаворэ, ко пхэнэла выррито лав по Шаво Манушыкано, эртисардёла лэсти, а ко пхэнэла выррито лав пэ Свэнто Духо, колэсти на эртисардёла.

11 Кала тумэн андярэнэ андэ синагоги, кай пхурэдэра и барэ рапа, на гындон пала кода, сар тэ фэрисарэн пэс и со тэ пхэнэн.

12 Свэнто Духо сыйярэла тумэн, со андэ кодъя връяма трэбуй тэ пхэнэн.

Дума палав бигодяко барвало

- 13** Варико андай мануш пхэндя Исусости:
— Сыйяримари! Пхэн мэрнэ пхралэсти, кай вов тэ дэл котор андар хулаимос, саво ашыляпэ амэнди дадэстар.

14 Иисусо пхэндя:

— Мануш, ко тховдя Ман тэ сындосарав тумэн и тэ роздав тумаро хулаимос машкар тумэндэ?

15 Вов пхэндя лэнди:

— Дицхэн, кай тэ на стидэн бут барвалимос. Вов тумаро жувимос бахталэса на терэлээ.

16 Тай Иисусо роспхэндя лэнди дума:

— Екхэ барвалэ манушэстэ бариял пэ мал бут ворзо.

17 Тай вов гындолас пэсти: «Со манди тэ терав? Най кай мандэ тэ тхав кода, со выбариля».

18 Тунчи Вов пхэндя: «Акэ со мэ терава: пхагава пусына мэрнэ и терава авэр майбарэ, стидава тай тхава о ворзо и всаворо барвалимос мэрно кордэ.

19 Тунчи мэ пхэнава пэстирэ жувимости: «Ай, жувимос мэрно! Акан бут барвалимос пашлэл тутэ, пэ бут бэрша хутилэла. Отчиюв, ха, пи и радосав!»

20 О Дэл пхэндя лэсти: «Бигодяко! Адес андэ кадъя рят залэна тутар жувимос тиро. Касти доросэлапэ кода, со ту гытосардян?»

21 Кадя авзла всаворэнца, ко стидэл барвалимос важ пэсти, а на стидэл барвалимос важ о Дэл.

Исусо пхэнэл, тэ на грыжон

22 Тунчи Иисусо пхэндя пэстирэ сыйярнэнди:

— Важ кода Мэ пхэнав тумэнди: на пэрэжуувэн пала тумаро жувимос, со тумэнди тэ ха, и пала тило, андэр со тумэнди тэ урядён.

23 Жувимос майкуч хамастар, и тумаро тило майкуч иидатар.

24 Подикхэн пэ вороноря: онэ на шон ворзо и на стидэн, нинай пэстирэ пусына и амбароря, но о Дэл праварэл лэн. Пэ скачи тумэ фэдэр чирикляндэр!

25 Ко ж тумэндар, грыжатар, терэла майлунго пэско жувимос пэ ехч чясо?

26 Сар тумэ на стерна када найбаро рындо, состар грыжонпэ пала вся авэр?

27 Подикхэн, сар барён лулудя. Онэ на терэн бути и на сувэн пэстийида, нэ пхэнав тумэнди, со Соломоно андай всаворо пэско барвалимос и баримос на урявдягэ кадя, сар ехх лэндар.

28 Сар о Дэл кадя урявэл чяр пэ мал, сави адес исин, а тэся шона ла андо бов, чи на урявэла Бов и тумэн, ко цыра патял?

29 На родэн, со тумэнди тэ ха тай со тэ пэ, и на грыжавэн пала када.

30 Всаворэ народоря кала люматирэ качи гындолсарэн пала када. Ай тумаро Дад жанэл, со тумэнди трэбүй вся када.

31 Родэн фэдэр Лэско Тхагаримос, а када вся додэна тумэнди.

32 На даран, найбаро стадо! Дад тумаро камэл тэ дэл тумэнди Тхагаримос.

33 Битинэн тумаро хабэ и дэн чёёрэнди. Терэн пэсти кацавэ тышлы, савэ на спихиравэнпэ, барвалимос по болыбэн, саво на цэнхэл, каринг ни чёр на дожала, ни моль на схала.

34 Кай тумаро барвалимос, котэ авэла и води тумаро.

Дума палай лашэ бутярнэ

35 Авэнтэ гытомэ: йида пэр тумэндэ мэй авэла пэрэпхангли күщикаса, и мэй пхабон тумарэ каганцоря.

36 Авэнтэ сар бутярнэ, савэ ажутярэн пэстирэс хулас пав ябяяв. Кала хулай авэла и марэла андэ удар, онэ андэ кодъя врязма отпхэрнавэна лэсти.

37 Бахталэ кола бутярнэ, савэн о хулай, сар рисавэла, аракхэл лэн, кай на совэн. Чячимаса пхэнав тумэнди, вов тунчи ежэно пэрэпхандёла күщикаса, бэшляярэл лэн палай мэсалы и авэла тэ подэл важ лэнди.

38 Бахталэ кола бутярнэ, савэн хулай аракхэла, кай онэ ажутярэн лэс андэ епашият, и тэсара.

39 Жанэнтэ, сар тэ жанэл о хулай лэ черэско, андэ сави врязма авэла чёр, вов на домэктэлэс бы, кай вов тэ загулел андо чер.

40 И тумэ авэнтэ гытомэ, колэстар со Шаво Манушыкано авэла андэ кодъя врязма, андэ сави тумэ на ажутярэн.

41 Пэтро пхэндя:

— Рай, Ту пхэнэс кадья дума качи амэнди чи всаворэнди?

42 Рай пхэндя:

— Саво исин патимаско и годяко пхурэдэр бутярно андо чер, савэс о хулай тховдя пашай пэстирэ бутярнэ, кай тэ роздэл хамос лэнди пай врязма?

43 Бахтало кодва бутярно, савэс о хулай, кала рисавэла, удикхэла, со вов кадя терэл.

44 Пхэнав тумэнди чячимаса, калэс бутярнэс хулай тховэла пэ всаворо пэско хабэ.

45 А сар кодва бутярно пхэнэла андэ води: «Мэрно хулай авэла на сыго», — и авэла тэ марэ бутярнэн и бутярнян, тэ ха и тэ пэ, кай тэ матэл,

46 тунчи авэла лэско хулай андо дес, кала вов на ажутярэл, и андэ кодъя врязма, кала вов на жанэл. Вов росшиэнэла по епаши лэс и дэла лэсти ехх шана найпатимистирэ манушэнца.

47 Кодва бутярно, саво жанэлас, со камэл хулай, и на терэлас, сар камля хулай, нэ на сас гытомэ и на терэлас, авзла фартэ мардо.

48 А кодва, саво на жанэлас, и терэлас кода, пала со трэбуй тэ марэн, мардо авэла цыра. Касти сас бут дино, колэстар и бут замангэна, и касти бут дэласпэ, майбут пушэлэпэ.

Вражымос машкар мануша палав Иисусо

49 Мэ авилем тэ анав яг пэ пхув, и сар Мэ камав, собвой икхатар тэ роспхаболпэ!

50 Манди трэбуй тэ прожав болдимос, и сар Мэ грыжосавав, кала када терэлэлпэ!

51 Тумэ гындолсарэн, Мэ авилем, кай тэ анав пэ пхув миро? Най, пхэнав тумэнди, мэ авилем тэ анав вражымос.

52 Йири андай панч мануш розжалапэ: трин англай дуй, и дуй англай трин.

53 Дад розжалапэ лэ шавэса, ай шаво лэ дадэса; дэй розжалапэ ла щяса, ай и щей пээстиря даса; свэкруха розжалапэ ла боряса, ай и бори ла свэкрухаса.

Шпэра врэмжатири

54 Иисусо пхэндя лэ манушэнди:

— Сар тумэ дикхэн по западо тучя, андэ кодья врэма пхэнэн, со авэла брышынд, и када терэлпэ.

55 Кала пхурдэл тати балвал пав юго, тумэ пхэнэн: «Авэла фартэ тато», — и кади терэлпэ.

56 Дуемуендирэ! Тумэ жанэн, сар тэ полэн шпэры по болыбэн и пэ пхув, а состар на полэн, сави икхатар авиля врэма?

57 Важ со тумэ ежэнэ на сындолсарэн, андэр со о чячимос?

58 Сар жас тирэса вражымареса кав пхурэдэр, допхэнпэ лэса пав дром. Сар када на терэса, вов тут андярэла кав сындолмари, ай о сындолмари отдэла тут халавдэнди, а халавдэ бэшляярэна тут андо баруно.

59 Пхэнав тути, со на выжаса котар, аж сар на выпотинэса всаворэ ловэ.

13

Иисусо акхарэл манушэн тэ каинэ

1 Тунчи кав Иисусо авиле варисавэ мануша и роспхэндэ Лэсти пала галилеяноря, савэн Пилато припхэндя тэ умарэн андэ кодья врэма, кала онэ анэнас жэртвээр.

2 Иисусо пхэндя:

— Тумэ гындолсарэн, со кала галилеяноря хасайле, колэстар со онэ сас майбэзэхэл всаворэндар?

3 Най, пхэнав тумэнди! Нэ сар тумэ на каинапэ, тумэ када ж всаворэ хасавэна.

4 Ай кола дэшуюхто мануша, савэ хасайле, кала пэля пэр лэндэ Силоамоско башня? Тумэ гындолсарэн, онэ сас майужылэ всаворэндар колэндар, ко живэлэс андо Иерусалимо?

5 Най, пхэнав тумэнди! Нэ сар тумэ на каинапэ, када хасавэна.

6 Тунчи Иисусо роспхэндя лэнди дума:

— Еххэ манушэстэ андо винограднико барёлас дрэво инжыроско. Еххвар вов жуяла тэ родэл пэр лэстэ плодоря и нисо на аракхля.

7 Тунчи вов пхэндя пээстирэсти виноградорести: «Акэ, трин бэрш мэ авав тэ родав пэ кадва инжыро плодоря и нисо на аракхав. Спхаг лэс, пэр со вов залэл пхув?»

8 «Хулай, — пхэндя кодва, — ашав лэс инке пэ кадва бэрш. Мэ лэс обганавава, тхаха пэрэгэйнэ,

9 и ко жанэл, чи вов на анэла плодоря пэ авэр бэрш? Ай сар на анэла, тунчи спхагэса лэс».

Иисусо састиярэл жувля андэ субота

10 Андэ субота Иисусо сыйярэлас андэ екх синагога.

11 Котэ сас жувли, савягэ дэшуюхто бэрш сас духо насвалимаско. Латэ сас банго думо, ивой нисар на тэрдёлас ворта.

12 Кала Иисусо удикхля ла, Вов вылакхардя ла англз тай пхэндя:

— Жувлий! Ту састьярэспэ пэстирэстар насвалимастар.

13 Вов тховдя пэр латэ васта, ивой андэ кодья врима тэрдиля ворта и ля тэ лашарэл лэ Дэвлэс.

14 Пхурэдэр синагогако холяйля, со Иисусо састьярдя андэ субота, и пхэндя лэ манушэнди:

— Иisin шов деса, андэ савэ трэбуй тэ терэ бути. Андэ кола деса авэн и састьярэнпэ, нэ на андэ субота.

15 Пэ када Рай пхэндя лэсти:

— Дуемуендири! Кажно тумэндар андэ субота чи на отпхандэл пэстирэс гурувэс тай ослос и на вынандярэл лэн андай пусын и на андярэл тэ дэл пай?

16 Ай када исин екх андай щея Абраамостири, савя спхангия Сатана дэшуюхто бэрша. На трэбуй ли сас тэ роспхандэ андэ субота лэпунзэ кала жувляти?

17 Кала Вов пхэндя када, всаворэнди Лэстирэ вражымаренди тердяпэ лажаво, а всаворэ мануш радонаспэ пала барэрындоря, савэ Вов терэлас.

Дума палав Тхагаримос Дэвлэско

18 Иисусо пхэндя:

— Пэр со мэзимэ Тхагаримос Дэвлэско? Сар тэ роспхэнав пала лэс?

19 Вов — сар горчично ворзо, саво о мануш ля тай шүтия андэ пэстирэ баря. Ворзо выбарилия и ашияла барэ дрэвоса, кадя, со чириклия болыбнастирэ жувэнас пэр лэстэ.

20 Инке Вов пхэндя:

— Пэр со мэзимэ Тхагаримос Дэвлэско?

21 Вов — сар заквашэн хумэр, саво и жувли ля и тховдя андэ трин толоря варо, тай всаворо хумэр вазглияэ.

Санэ удура

22 Иисусо прожалас пай фороря тай гава, сыйярэлас лэ манушэн. Вов жалас андо Иерусалимо.

23 Варико пхэндя Лэсти:

— Рай! Качи цыра манушэн авэна фэрисардэ?

Иисусо пхэндя:

24 — Терэн вся, кай тэ зажан андэ санэ удура. Пхэнав тумэнди, бут авэна тэ родэн, кай тэ зажан, тай на зажана.

25 Кала о хулай лэ черэско вщела тай затерэла и удар, тумэ авэна тэ тэрдён андрал, тэ марэн андэ удар и тэ мангэнпэ: «Хулай, отпхэрнав амэнди!» Ай Вов пхэнэла: «На жанав тумэн, катар тумэ».

26 Тунчи тумэ пхэнэнэ: «Амэ хасас и пасас англай Тирэ якха, ай Ту сыйярэсас пэ амарэ гасы».

27 Нэ Вов пхэнэла: «Мэ на жанав тумэн, катар тумэ, отжан Мандар, всаворэ, савэ терэн найлашэрындоря».

28 Котэ авэла ровимос и бари грыжа, кала дикхэна лэ Абраамос, Исаакос и Иаковос, и всаворэн пророкон андо Тхагаримос Дэвлэско, ай тумэ авэна вытрадэ.

29 Авэна мануша пав востоко и западо, северо и юго и бэшэнэ палай мэсали андо Тхагаримос Дэвлэско.

30 Тунчи палатунэ авэна англал, ай англатунэ авэна палал.

Иисусо ровэл палав Иерусалимо

31 Тунчи кав Иисусо поджыле фарисеёря и пхэндэ:

— Ужа, ашав кадва тхан, колэсти со Иродо камэл Тут тэ умарэл.

32 Исусо пхэндя:

— Жантэ и пэрэдэнтэ калэсти хрантимарести: «Адес и тэся мэ авава тэ вытградав бэнгэн и тэ састирав манушэн, ай по трито дес Мэ дотерава Пэско рындо».

33 Нэ адес, тэся и палтэся Мэ трэбуй тэ жав, колэсти со на терэлпэ кадя, кай пророкос тэ умарэн на андо Иерусалимо!

34 Иерусалимо! Иерусалимо! Ту умарэс лэ пророкон и марэс барэнца колэн, кас бишалэн тутэ! Скачи молоря Мэ камлем тэ стидав тирэн бэяцэн, сар и кагни стидэл пэстирэ пуёнэн паша пэстэ, а тумэ на закамле!

35 Акана тумаро чер ашэлпэ шушо. Пхэнав тумэнди, кала тумэ удикхэна Ман андэ авэр моло, тунчи пхэнэна: «Лашардо Кодва, Ко авэл важ алав Рае Дэвлэско!»

14

Со домукэлпэ тэ терэ андэ субота

1 Ехвар андэ субота Исусо авиля екхэстэ андай пхурэдэр фарисеёря тэ хал марно, и онэ дикхэнас пала Лэстэ.

2 Котэ бэшэлас англав Исусо мануш, савэстэ сас паеско насвалимос.

3 Исусо пушля кай фарисеёрия и сыйяримаря Законостире:

— Домукэлпэ тэ састирэл андэ субота?

4 Онэ ашэнас мулком. Исусо ляпэ кав мануш, састирдя лэс и отмэклия.

5 Тунчи Вов пхэндя лэнди:

— Сар варикастэ түмэндар шаво или гуурув пэрэла андэ хаинг, на вылэна тумэ андэ кодья ж врязма андэ субота?

6 Лэнди найсо сас тэ пхэнэн пэ када.

Дума палаий фэдэр тхана нэ ябъяв

7 Исусо додикхля, сар кола, кас акхардэ, вытидэнас майфэдэр тхана палай мэсали, тай роспхэндя екх дума:

8 — Кала варико акхарэла тут по ябъяв, на бэш пэ англуно тхан. Колэсти со котэ авэла мануш майфэдэр тутар,

9 и хуалы, саво акхардя тут и лэс, поджала тутэ и пхэнэла: «Дэ тхан калэсти манушэсти». И тути прижалапэ лажаимаса тэ бэшэс по палатуно тхан.

10 Нэ сар тут акхардэ, жа и бэш по палатуно тхан. Тунчи о хурай поджала тутэ и пхэнэла: «Амал, пэрэбэш по майфэдэр тхан». Тунчи тути авэла бари шана англай мануша, савэ бэшэн туса палай мэсали.

11 Всаворэ, ко ваздэл пэс, авэла тэллярдо, а ко тэллярэл пэс, авэла вазгло.

12 Тунчи Исусо пхэндя манушэсти, саво акхардя Лэс:

— Кала тховэс мэсали, на акхар лэ амалэн, лэ пхралэн, манушэн тирэ родостар тай лэ барвалэн, савэ паша тутэ жувэн. Колэсти со и онэ акхарэна тут пэстэ и рисарэна тути тиро лашымос.

13 Нэ сар тут тховэс мэсали важ мануша, акхар чёрэн, попхаглэн, бангэн тай корэн.

14 Тунчи ту авэса баихтало, колэстар со онэ на отдэна тути кода, со ту дян, и тунчи тути потинэлапэ, кала жундёна чячимастирэ мануша.

Дума пала кола, савэн акхардэ по ябъяв

15 Кала екх андай кола, ко бэшэлас палай мэсали, ашундя када, вов пхэндя Иусости:

— Баихтало, ко авэла тэ хал марно андэ Тхагаримос Дэвлэско!

16 Исусо пхэндя лэсти:

— Ехх мануш тердя баро свэнко и акхардя бутэн манушэн.

17 Кала авиля и връма тэ бэшэн палай мэсали тэ хан, вов бишалдя пэстирэс бутярнэс тэ акхарэл акхардэн: «Авэнтэ, вся гытомэ».

18 Онэ екх палай аврэстэ линэ тэ мангэн патив. Екх пхэндя: «Мэ тиндэм пхув, и манди трэбуй тэ жав тай тэ дикхав ла. Мангав тут, эртисар ман».

19 Авэр пхэндя: «Мэ тиндэм дэшэн гурувэн тай жав тэ дикхав лэн, савэ онэ андэ бути. Мангав тут, эртисар ман».

20 Трито пхэндя: «Мэ лем ромня, колэсти най сар тэ авав тутэ».

21 Бутярно рисайля и роспхэндя пэстирэсти хуласти. Тунчи о хурай лэ чөрэско холяйля и пхэндя пэстирэсти бутярнэсти: «Жа майсыг пай барэ и цэнкнэ гасы форостирэ и ан кардэ чёэрэн, попхаглэн, корэн тай бангэн».

22 «Хурай, — пхэндя бутярно, — кода, со ту припхэндян, вся тердэм, и инке исин тхан».

23 Тунчи хурай пхэндя пэстирэ бутярнэсти: «Жа пай дрома и паша грады и манг, кай тэ авэн кардэ, кай о чер мэрно тэ авэл пхэрдо манушэнца.

24 Пхэнав тумэнди, со нико колэндар, кас мэ акхаравас майнанглал, на хала пай мэрни мэсали».

Исусо пхэнэл пала кода, со трэбуй, кай тэ авэл Лэстирэ сыйярнэс

25 Лэ Исусоса жанас бут мануша, и Вов обрисайля лэндэ тай пхэндя:

26 — Сар ко авэл Мандэ и на камэла Ман майфартэ пэстирэ дадэстар, датар, ромнятар, бэццэндар, пхралэндар, пхэяндар и пэстирэ жувимастар, кодва нисар на авэла Мэрнэса сыйярнэса.

27 Кодва, ко на андрярэл пэско трушул и на жал пала Мандэ, нисар на авэла Мэрнэ сыйярнэса.

28 Ко тумэндар закамэла тэ терэл башня и майнанглал на бэшэлэл тэ пэрэбинэл, скачи када авэла тэ ашэл, хутилэлэл лэстэ ловэ, кай тэ стерэл ла?

29 Кала тховэла фундаменто, нэ на дотерэла, кола, савэ дикхэна када, авэна лэстар тэ асан

30 и тэ дэн дума: «Кадва мануш ля тэ терэл и на дотердя».

31 Саво тхагар жала маримаса пэ авэр тхагар, майнанглал на бэшэлэл и на пэрэбинэла, исин лэстэ зор дэш барянца халавдэнца тэ утэрдёл англай дуй дэшэ баря халавдэ?

32 А сар най, то кала о вражымари инке дур, лэла и бишалэла пэстирэ манушэн тэ мангэн миро.

33 Кадя, ко тумэндар на отпхэндёла всаворэстар, со лэстэ исин, нисар на авэла Мэрнэ сыйярнэса.

34 Лон — лашо, нэ сар о лон хасарэла пэско лондимос, сар терэса, кай тэ авэл лондо?

35 Ни андэ пхув, ни андэ пэрэгнёе на поджгал; и вышон лэс аври. Касть исин каны тэ ашунэн, мэк ашунэн!

15

Дума палай хасарди бакрёры

1 Тэ пошунэн Исусос стидёнас всаворэ стидэмара налогонэндирэ тай авэр бэзэхалэ мануша.

2 Фарисеёнэнди тай сыйяримаренди Законостирэ на чялёлас када, и онэ пхэнэнас:

— Вов прилэл бэзэхалэн манушэн тай хал лэнца.

3 Тунчи Исусо роспхэндя лэнди кацави дума:

4 — Ко тумэндар, касть исин шэл бакрэ, и хасардиля екх лэндар, на ашавэла инядэш ияа бакрэн андэ мал и на жала тэ родэл кола, сави хасайля, жы кодла врятматэ, кала аракхэла ла?

5 А сар аракхэла ла, радомаса лэла пэ пэстирэ пхикхэ.

6 Сар авэла черэ, заакхарэла пэстирэ амалэн и ко жувэл пашэ паша лэстэ, и пхэнэла лэнди: «Радосавэн манца, мэ аракхлем бакрёра, сави сас хасарди!»

7 Пхэнав тумэнди, со по болыбэн майбут радонпэ палай екх бэзэхало мануш, саво каисавэл андэ пэстирэ бэзэха, сар важ инядэш ини жужэ водеса мануша, савэнди на трэйуй тэ каинпэ.

Дума палай хасарди драхма

8 Сар жувлятэ исин дэш драхморя, ивой екх лэндар хасарэла, на запхабарэлавой каганцо и на лэлапэ тэ притидэл чер ай мишто тэ родэл жы кала, сар аракхэла драхма?

9 А сар аракхэла драхма, акхарэла пэстирэ амалэн и ко жувэл пашэ, и пхэнэла: «Радосавэн манца: мэ аракхлем хасарди драхма!»

10 Акэ, Мэ пхэнав тумэнди, со Дэвлэстирэ ангелоря кадя радосавэн пала екх бэзэхало мануш, саво каисавэл андэ пэстирэ бэзэха!

Дума палав шаво, саво ужылия пэстирэ дадэстар

11 Исусо дэлас дума:

— Екхэ манушэстэ сас дуй шавэ.

12 Майцэнко пхэндя пэстирэ дадэсти: «Дад, дэ манди тирэ хулаимастар котор, саво авэла мэрно». И о дад роздя хулаимос машкар шавэ.

13 Прожыля найбут деса. Майцэнко шаво стиля вся, со лэстэ сас, жылятар майдур андэ авэр пхув. Котэ вов ростердя вся пэско хулаимос, колэсти со жувэлас найлашэ жувимаса.

14 Кала вов вся ростердя, андэ кодья пхув авиля баро бокхалимос, и вов ашыля чёрорэса.

15 Тунчи вов жыля тай мангияпэ пэ бути екхэ манушэстэ, саво жувэлас котэ. А кодва мануш бишалдя лэс пэ маля пэстирэ тэ пасый лэ балэн.

16 Вов сас бокхало и камэлас тэ хал кода, соса праварэнас лэ балэн, но лэсти и кода на дэнас.

17 Кала вов авиля андэр пэстэ, пхэндя: «Скачи бутярнэ мэрнэ дадэстэ чялён марнэстар, ай мэ мэрав бокхатар!»

18 Жава, рисавава кав мэрно дад и пхэнава лэсти: «Дад! Мэ тердэм бэзэх англов Болыбэн и англов тутэ.

19 Мэ будэр на ашав тэ акхарарапэ тирэ шавэса, прилэ ман андэ бутярнэ тирэ».

20 Вов вишия и жыля кав пэско дад.

Кала вов сас инке дур, дад удикхля лэс, и тангосардя пэстирэ шавэс. Вов прастая майянглэ кав пэско шаво, обля лэс и ля тэ чюминдэл.

21 Шаво пхэндя лэсти: «Дад! Мэ тердэм бэзэх англов Болыбэн и англов тутэ. Мэ будэр на ашав тэ акхарарапэ тирэ шавэса».

22 Ай о дад пхэндя пэстирэ бутярнэнди: «Жантэ майсыго, анэн со майфэдэр ийда и урявэнтэ лэс. Дэн ангрусни пэ лэско васт и пэрналэ пэ лэстирэ пэрнэ.

23 Анэн тай зашынэн отправардэс гууровэрэс, тераса свэнко, аваса тэ хас и тэ радосавас!

24 Мэрно шаво сас муло и жундиля! Вов сас хасардо и аракхадиля!» И линэ тэ радосавэн.

25 О пхурэдэр шаво андэ кадья врязма сас андэ мал. Кала вов поджалас кав чер, ашундя, кай андо чер дилабэн дилия тай челэн.

26 Вов акхардя екхэс андай бутярнэ и пушля лэс, со котэ кацаво тердяпэ.

27 «Тиро пхрал рисайля, — пхэндя лэсти кодва, — и тиро дад зашынди отправардэс гууровэрэс, колэстар со лэско шаво рисайля жундо и састо».

28 Пхурэдэр шаво холийля и на камля тэ зажал андо чер. Тунчи дад выжыля и акхарэлас лэс.

29 Нэ шаво пхэндя дадэсти: «Всаворэ кала бэрша мэ теравас бути пэр тутэ, и никала на выжавас тирэ лавэстар. Ай ту никала на дян манди бузнорэс, кай мэ тэ радосавас пэстирэ амалэнца.

30 А кала кадва шаво тиро ростердя о хулаимос тиро лэ лубнянца, ту зашындин яваж лэсти отправардэс гуруворэс!»

31 «Шаво мэрно! — пхэндя тунчи дад. — Ту всавори врьяма манца, и вся, со мандэ, исин тиро.

32 Ай пала када трэбуй сас тэ радосавас, со пхрал тиро сас муло и жундиля, хасавэлас и аракхялпэ!»

16

Дума пала бутярно, саво хохавэлас

1 Иисусо пхэндя Пэстирэ сыйтэрнэнди:

— Ехкэ барвалэ манушэстэ сас пхурэдэр бутярно, саво дикхэлас палав лэско хулаимос. Пала лэстэ роспхэндэ, со вов ростерэл о барвалимос лэ хуласко.

2 Хулай выакхардя лэс пэстэ тай пхэндя: «Со када мэ шунав пала тутэ? Здэ и бути, колэстар со ту будэр на авэса тэ дикхэс пала мэрно хулаимос!»

3 Пхурэдэр бутярно гындосардя: «Со манди акана тэ терав? Хулай вытрадэл ман пай бути. Тэ жав тэ ганавав и пхув нинай зор мандэ, тэ мангав манди лажаво.

4 Мэ жанав, со манди трэбуй тэ терав кадя, соб, сар ман вытрадэна кала бутятар, тэ аракхадён кацавэ мануша, савэ прилэнэ ман пэстэ!»

5 И вов ля тэ акхарэл екх пала екхэстэ пэстирэ хуластирэн ужылимарен. Екхэстэ пушля: «Скачи ту ужыло мэрнэ хуласти?»

6 «Шэл кхорэ оливково дзэтэ», — пхэндя кодва. Бутярно пхэндя лэсти: «Лэ пэско запистросаримос, бэш и майсыго пэрэпистросар пэ пандэшэ!»

7 Тунчи вов пушля аврэстэ ужылимарестэ: «Ай ту скачи ужыло?» «Мия гонэ ворзо», — пхэндя кодва. Бутярно пхэндя лэсти: «Залэ пэско запистросаримос и пэрэпистросар пэ охтошэла!».

8 Хулай лашардя пэстирэс хохавнэс пхурэдэр бутярнэс, со годяварнэс тэрдя. Кала люматирэ шавэ майбут полэн, сар тэ андярэн пэс аврэ манушэнца, сар шавэ Дэвлэстирэ, Саво исин Ууду.

9 Ай Мэ пхэнав тумэнди: терэн пэсти амалэн найчячимастирэ барвалимаса, кай, кала лэс на авэла, тумэн тэ прилэн андэ чера пэ вако.

10 Ко патимаско андэ найбари бути, кодва авзла патимаско андэ бари бути. Ай ко найпатимаско андэ найбари бути, кодва авэла найпатимаско и андэ бари бути.

11 И сар тумэ найпатимастирэ андо найжуужо барвалимос, ко дэла тумэнди чячюно?

12 И сар тумэ сас найпатимастирэ, кала терэнас бути на андо пэско хулаимос, ко дэла тумэнди тумаро?

13 Нисаво бутярно на авэла тэ терэл бути пэ дуй хуляя. Вов екхэс авэла фартэ тэ на камэл, ай аврэс тэ камэл, екхэсти авэла чячюнэса, ай пэ авэр на тховэла патив. Тумэ нисар на авэна тэ терэн бути андэ екх врьма важ о Дэл и важ о барвалимос.

14 Фарисеёря, савэ камэнас ловэ, шундэ када вся и асанаспэ Иисусостар.

15 Иисусо пхэндя лэнди:

— Англай мануша тумэ сикавэн пэс, кай тумэ жүжэ водеса, нэ о Дэл жанэл тумарэ водя. Кода, со учес кай мануша исин выритимос англав Дэл.

Законо лэ Дэвлэско инке терэл

16 Врьма Законоско ай пророконго сас жыкай Иоано, ай икхатар роспхэнэлпэ Радосаво Лав палав Тхагаримос Дэвлэско, и всаворэ тховэн зора, соб тэ заха андэр лэстэ.

17 Майсыг болыбэн и пхув ужана, сар екх майцэкни пистросарди андэв Законо хасардёла!

18 Ко розжалпэ пэстирия ромняса и лэл аврия ромня, кодва терэл лубимос, и ко лэл ромня, сави розжыляпэ пэстирия ромэса, терэл лубимос.

Дума налав барвало мануш и чёоро Лазарё

19 Жувэлэс екх барвало мануш. Вов урявэласпэ андэ майкучютни йида, и всавори жувимос лэстэ сас сар радосаво свэнко.

20 Ай паша лэстирия градатирэ удар пашлёлас чёоро, савэс акхарэнас Лазарё, всаворо общуту насвалимаса.

21 Вов фартэ камэлас тэ хал кода, со пэрэлэс пай мэсали кав барвало. Риконэ авэнэс и шыбаса жужарэнас лэстирия дукха.

22 О чёоро муля, и ангелоря одандядрэ лэс кав Авраамо. Муля и барвало, тай гарадэ лэс.

23 Барвало сас андо адо андэ бари грыжа. Вов вазглия якха тай удиххля дур пэстар лэ Авраамос, ай паша лэстэ Лазарёс.

24 Вов акхардя: «Дад Авраамо, тангосар ман и бишал лэ Лазарёс, мэк вов тховэл пэско най андо пай и шол пэ шыб мэрни, а то мэ фартэ грыжавав андэ кадъя яг».

25 Нэ Авраамо пхэндя: «Бэято, гындосар, со ту лян андо тиро жувимос лашымос, а Лазарё ля выритимос. Иххатар вов катэ радолпэ, а ту грыжоспэ.

26 Тай инкэ, машкар амэндэ ай тумэндэ — бари выганавди, и кала варико закамэла тэ пэрэжгал катар тумэндэ ай тумэндар амэндэ, на пэрэжана».

27 Барвало пхэндя: «Тунчи мангав тут, дадэ, бишал Лазарёс андо чер мэрнэ дадэстэ.

28 Мандэ исин панч пхрала, мэк вов умангэл лэн, кай и онэ тэ на попэрэн кардэ, андо тхан грыжако».

29 Авраамо пхэндя: «Лэндэ исин Моисеё и пророкоря, мэк лэн ашунэн».

30 «Нат, дад Авраамо, — пхэндя барвало, — сар авэла варико андай мулэ лэндэ, тунчи онэ каисавэна».

31 Пэ када Авраамо пхэндя лэсти: «Сар лэ Моисеёс и лэ пророкон на ашунэн, тунчи, кала ко андай мулэ жундёла, онэ на патяна».

17

Иисусо сытряэл налав эртигаримос, патимос и ужыслимос

1 Иисусо пхэндя пэстирия сытрянэнди:

— Всавори врязма авэла кода, со зумавэла тумэн, но грыжа колэсти, кастар авэл о зумавимос.

2 Ко еххэс андай кала цэknэ шола кав бэзэх, авэлас бы лэсти фэдэр тэ пхандэн нэ кор бар и тэ шон лэс андэ лэн.

3 Дикхэн пала пэстэ! Сар тиро пхрал стердя бэзэх, выпхэн лэсти, ай сар каисавэл, эртигар лэс.

4 И сар эхта молоря андо дес терэла англав тутэ бэзэх, и эхта молоря андо дес авэла тутэ и пхэнэла: «Мэ каисавав», — эртигар лэс.

5 Апостолоря мангле Раес:

— Тер андэ амэндэ майбаро патимос!

6 Рай пхэндя:

— Сар тумэндэ исин патимос, сар горчично ворзо, тумэ пхэнэнас бы акала түтигинти: «Вышиныдюв корнёса и тховпэ андэ лэн», — то вой кандэлас бы тумэн.

7 Пхэнэса, тумэндэ исин бутярно, саво ганавэл и пхув или пасый бакрэн. Чи пхэнэна тумэ лэсти, кала вов авэла пай бути: «Майсыгожажа, бэш тэ хас?»

8 Най, тумэ майсыг охижээна лэсти: «Гытосар манди тэ хас ай дикх пала мандэ, кала мэ хава и пава, а тунчи авэса тэ хас и тэ пэс ejээн».

9 Чи түмэ авэна тэ пхэнэн «наис» лэ бутярнэсти пала лэстирэ рындор? Най.

10 Кадя и тумэ, сар стирэна вся, со тумэнди сас припхэндо, пхэнэн: «Амэ бутярнэ, савэ нисо на ашас. Амэ качи тердям кода, со трзбуй сас тэ терас».

Исусо састьярэл дэшэн насвалэн проказаца

11 Пав дром андо Иерусалимо Иисусо прожалас машкар Самария и Галилея.

12 Кала Вов зажалас андэ екх гав, Лэс удикхле дэш насвалэ проказаса. Онэ тэрдиле найдур

13 и фартэ цыпинас:

— Иисусо, Сытиярими! Тангосар амэн!

14 Кала Иисусо лэн удикхля, Вов пхэндя:

— Жантэ ай сикавэнпэ кай рашая.

Онэ жыле и пав дром састьярдиле.

15 Екх лэндар, сар качи удикхля, кай вов састьярдо, рисайля, барэ гласоса лашарэлас Дэвлэс.

16 Вов пэля кай и пэрнэ Иисусостири, пхэнэлас «наис» Лэсти. И кадва мануш сас самарянин.

17 — Чи на дэш мануша сас жужкардэ? — пушля Иисусо. — Кай кола иня?

18 Состар нико лэндар, сар акадва мануш андай авэр пхув, на рисайля, кай тэ лашарэл Дэвлэс?

19 И пхэндя самаряниности:

— Вщи и жа. Тиро патимос фэрисардя тут.

Исусо пхэнэл, со авэл Тхагаримос Дэвлэско

20 Екхвар фарисеёра пушле Иисусостар, кала авэла о Тхагаримос Дэвлэско. Вов пхэндя лэнди:

— Тхагаримос Дэвлэско на авэла кадя, со тумэ дикхэна лэс якхэнца.

21 Нико на пхэнэла: «Акэ, вов катэ» чи «Акэ, котэ». Тхагаримос Дэвлэско иххатар исин машкар тумэндэ.

22 Тунчи Вов пхэндя сильтянрэнди:

— Авэла кацави врязма, кала тумэ закамэна тэ удикхэ екх дес андай деса Шавэс Манушыканэс и на удикхэна.

23 Тумэнди авэна тэ пхэнэн: «Акэ, Вов котэ» чи «Акэ, Вов катэ». Нэ тумэ на прастэн тэ дикхэн.

24 Колэстар со, сар молния, сави запхабол и дэл удууд по болыбэн екха ригатар кай авэр риг, кадя авэла Шаво Манушыкано андо дес Пэско.

25 Нэ майанглал Лэсти трэбуй авэла тэ пэрэандярэл бари грыжа и Лэстар отпхэнэнапэ кала мануша.

26 Сар сас андэ деса лэ Ноёстири, кадя авэла и андэ деса Шавэс Манушыканэс.

27 Мануша ханас, пэнас, лэнас ромнян, жанас палав ром кав кодва дес, кала Ноё зажыяла андо ковчего. Тунчи жыля фартэ баро брышинд, и всаворэ хасайле.

28 Кадя сас и андэ деса Лотостири. Мануша ханас, пэнас, тинэнас, битинэнас, шонас ворзо, терэнас чера.

29 Нэ андо дес, кала Лото выжыля андав Содомо, жыле пав болыбэн ягуну брышинд и сера, тай всаворэ хасайле.

30 Кадя авэла и андэ кодва дес, кала сикадёла Шаво Манушыкано.

31 Андэ кодва дес, ко авэла упрэ по чер, а ийда авэла андо чер, мэк на жал тэ лэл ла. Ай ко авэла пэ мал, мэк и вов на жал паллалэ.

32 Сэрэн палай ромни Лотостири!

33 Ко камэла тэ фэрисарэл пэско жувимос, кодва хасарэла лэс, ай ко хасарэла пэско жувимос, кодва фэрисарэла лэс.

34 Пхэнав тумэнди: андэ кодья рят дуй авэна пэ екх пато, екх авэла залино, ай авэр ашэлапэ.

35-36 Дуй жувля авэна екхэтанэ тэ марэн ворзо, екх авэла залити, ай авэр ашэлапэ.*

37 — Кай, Рай? — пушле онэ.

Исусо пхэндя:

— Кай о трупо, кордэ стидёна и орлоря.

18

Дума Исусостири палай пхивли

1 Тунчи Иисусо роспхэндя лэнди дума, со трэбуй тэ на пэрэашэн тэ мангэнпэ Дэвлэс ай тэ на грыжонпэ.

2 — Андэ екх форо сас сындомари, саво на дараглас Дэвлэстар и на лажалас манушэндар.

3 Анда кодва форо сас екх пхивли. Вой авэлас кав сындомари, мангэлас: «Фэрисар ман мэрнэ вражымарестар».

4 Сындомари бут врязма на камэлас тэ поможысарэл лати, ай тунчи пхэндя ежэно пэсти: «Мэк мэ Дэвлэстар на дарав и манушэндар на лажав.

5 Нэ сар кадья пхивли дохалая манди пэстирэ мангимаса, терава, со вой мангэл, кайвой тэ пэрэашэл тэ дохал ман».

6 Ай о Рай пхэндя:

— Шундэ, со пхэнэл сындомари найччимаско?

7 Сар о Дэл на фэрисарэла колэн, кас Вов вытидя, и ко фартэ мангэн Лэс о дес и ряты? Чи ашавэла лэн о Дэл?

8 Пхэнав тумэнди: Вов грабисавэла пав чячимос тэ фэрисарэл лэн. Нэ кала Шаво Манушыкано авэла, аракхэла патимос пэ пхув?

Дума пала фарисеёй палай стидэмарё налогонэндиро

9 Колэнди, савэ гындонас пала пэстэ, кай онэ жужэ, и пхутярдэс дикхэнас пэ авэр мануша, Иисусо роспхэндя кацави дума:

10 — Дуй мануша зажыле андо храмо тэ мангэнпэ Дэвлэс. Екх лэндар сас фарисеёй, ай авэр — стидэмарё налогонэндиро.

11 Фарисеёй тэрдёлас и мангэласпэ Дэвлэс кадя: «Дэвла, наис Тути, со мэ на кацаво, сар авэр мануша: прахаря, найжужэ, лубаря, и на кацаво, сар акадва стидэмарё налогонэндиро.

12 Мэ ритярав посто дуввар андо курко, дав дэшто котор андар вся, со затерав».

13 Ай стидэмарё налогонэндиро тэрдёлас андэ риг и на ваздэлас якха пэстирэ кав болбыз, нэ марэлас пэс андо колин и пхэнэлас: «Дэвла, тангосар ман, бэзэхалэс манушэс!»

14 Пхэнав тумэнди, со кадва мануш жыля черэ майэртисардо, сар кодва. Кодва, ко ваздэл пэс, авэла обмэклэ, а ко обмэклэ пэс, ваздёла.

Иисусо бахтасарэл бэяцэн

15 Мануша анзнаас кав Иисусо цэктэн бэяцэн, кай Вов тэ лэлпэ лэндэ. Сытрянэ удикхле када и камле тэ запхэнэн лэнди.

16 Иисусо ахтардя лэн Пэстэ ай пхэндя:

— Мэк бэяцэ авэн Мандэ, и на запхэнэн лэнди, колэсти со Тхагаримос Дэвлэско важ кацавэ, сар онз.

17 Пхэнав тумэнди чячимаса: ко на прилэла о Тхагаримос Дэвлэско, сар бэято, кодва на зажала андэр лэстэ.

* **17:35-36** Андэ коисавэ гречески манускрипторя инке исин кацавэ лава: «Дуй мануш авэна андэ мал, екхэс манушэс залэна, ай авэр ашэлапэ».

Исусо дэл дума барвалэ пхурэдэрэса

18 Екх пхурэдэр пушля Лэстар:

— Лашо Сыгтрямари, со тэ терав, кай манди тэ дэлпэ жувимос вакоско?

19 — Сости ту акхарэс Ман «лашо»? — пхэндя Исусо. — Нико на лашо, качи екх о Дэл.

20 Ту жанэс запхэнимос: на тер лубимос, на умар, на чёр, на пхэн хохавимаско лав, пативаса обжагэ дадэса и лэ даса.

21 — Вся када мэ терав пай тэрнэ пэстирэ бэрша, — пхэндя вов.

22 Исусо ашундя када ай пхэндя лэсти:

— Екх тути инке на хутилэл. Битин вся, со тутэ исин, и роздэ ловэ чёрорэнди, и тунчи тутэ авэла барвалимос по болыбэн. Тунчи ав и жа пала Мандэ.

23 Кала пхурэдэр ашундя када, вов грыжосайля, колэсти со сас фартэ барвало.

24 Кала Исусо удикхля, со кодва грыжосайля, Вов пхэндя:

— Сар пхарэс барвалэнди тэ зажан андо Тхагаримос Дэвлэско!

25 Майлокхо лэ верблюдости тэ прожал андэ сувьяко кан, сар лэ барвалэсти тэ вжал андо Тхагаримос Дэвлэско.

26 Кола, ко ашундя када, пхэндэ:

— Ко тунчи авэла фэрисардо?

27 Исусо пхэндя:

— Сар кав мануш нинай зор тэ стерэл варисо, кав Дэл исин зор кода тэ стерэл.

28 Тунчи Пётро пхэндя:

— Акэ, амэ ашадэ вся, со амэндэ сас, и жылям пала Тутэ.

29 Исусо пхэндя лэнди:

— Пхэнав тумэнди чячимаса: всаворэ, ко ашадя чер, и ла ромня, и лэ пхралэн, лэ дадэс и ла да, тай лэ бэяцэн важ о Дэвлэско Тхагаримос,

30 онэ лэна майбут андэ кадья врязма, ай андэ врязма, сави авэла, — жувимос вакоско.

Исусо андо трито моло пхэнэл палай Пэско миринос

31 Тунчи Исусо отакхардя дэшудуен андэ риг ай пхэндя лэнди:

— Акэ, амэ зажас андо Иерусалимо. Котэ терэлалэ вся, со запистросардо пророконца пала Шаво Манушыкано.

32 Вов авэла отдино андэ васта манушэнди авря народостар, и кола авэна тэ асанспэ Лэстар, обмукэнэ Лэс и шунгардэнэ пэр Лэстэ,

33 авэна тэ марэн чюкнянца и умарэна. Нэ по трито дес Вов жундёла.

34 Сытэрнэ нисо калэстар на полинэ. Вся, со Вов пхэндя, сас важ лэнди запхандадо, и онэ на полёнас, со Вов камэлас лэнди тэ пхэнэл.

Исусо састьярэл корэс

35 Кала Исусо поджалас кав форо Иерихоно, пашав дром бэшэлэс тай мангэлас коро мануш.

36 Вов ашундя, со паша лэстэ прожан бут мануша, пушля, со када кацаво.

37 — Жал Исусо андав Назарето, — пхэндэ лэсти.

38 Тунчи коро зацыписайля:

— Исусо, Шаво Давидоско! Тангосар ман!

39 Кола, ко жалас майанглал, линэ тэ пхэнэн, кай вов тэ ашэл мулком, нэ коро инке майфартэ ля тэ цыписавэл:

— Шаво Давидоско! Тангосар ман!

40 Исусо ашияля и припхэндя, кай калэ манушэс тэ анэн Лэстэ. Кала кодва поджыля, Исусо пушля лэс:

41 — Со ту камэс, кай Мэ тэ терав важ тути?

— Рай, мэ камав тэ дикхав, — пхэндя коро.

42 Иисусо пхэндя лэсти:

— Мэй отпхэрнавэнпэ тутэ якха! Патимос тиро састьярдя тут.

43 Коро андэ кодья връяма ля тэ дикхэл. Вов жыля палав Иисусо и лашарэлас лэ Дэвлэс. Всаворэ мануша, ко дикхля када, линэ кадя ж тэ лашарэн лэ Дэвлэс.

19

Иисусо и стидэмэрё налогонэндиро Закхеё

1 Тунчи Иисусо зажыля андо форо Иерихоно и прожалас пар лэстэ.

2 И акэ, екх мануш, савэс акхарэнас Закхеё, пхурэдэр стидэмэрё налогонэндиро, барвало мануш,

3 родэлэс тэ дикхэл лэ Иисусос, ко Вов кацаво, нэ на сас сар, колэстар со фартэ бут мануша сас пашав Иисусо, ай Закхеё сас цэнко ростоса.

4 Вов запрастая майанглэ, загульдя пэ тютина, сави барёлас пэ кодва тхан, кай прожалас Иисусо.

5 Кала Иисусо поджыля кав кадва тхан, Вов подикхля упрэ и пхэндя лэсти:

— Закхеё! Згуль майсыго! Манди трэбуй адес тэ авав андо тиро чер.

6 Закхеё сыйг згульдя и лошаса прияла Лэс андо пэско чер.

7 Всаворэ, ко дикхля када, холийле и лине тэ дэн дума, со Вов зажыля кав бэзэхало мануш.

8 Закхеё вишиля и пхэндя Раести:

— Рай! Акэ, епаши всаворэстар, со мандэ исин, мэ роздава чёрорэнди, и каастар лем хохавимаса, отдава андэ штарвар майбут!

9 Иисусо пхэндя лэсти:

— Адес авиля фэрисаримос андэ кадва чер, колэсти со и вов исин шаво лэ Абраамоско.

10 Шаво Манушыкано авиля тэ аракхэл и тэ фэрисарэл колэн, ко хасавэл.

Дума палав барвало и лэстирэ бутярнэ

11 Колэнди, ко ашунэлас Иисусос, Вов пхэндя екх дума. Колэстар со онэ сас пашав Иерусалимо, и онэ гындонас, со сыйг отпхэрнавэлапэ Тхагаримос Дэвлэско.

12 Иисусо пхэндя кадя:

— Екх барвало мануш ладэлэс андэ дурутни пхув, кай тэ лэл пэсти тхагаримос и тунчи тэ рисавэл.

13 Вов акхардя дэшэн пэстирэн слугонэн, дя лэнди по шэл драхморя тай пхэндя: «Тэрэн арли, жы кала мэ рисавава».

14 Нэ мануша кола пхувьятар на камэнас лэс и бишалдэ пала лэстэ пхурэдэрэн манушэн, кай онэ тэ пхэнэн: «На камас, соб вов тэ авэл амарэ тхагараса».

15 Нэ вов тэридия тхагараса тай рисайля черэ. Вов припхэндя тэ акхарэл лэ слугонэн, касти вов дя руп, кай тэ ужанзл, ко скачи затердя.

16 Авиля англuno и пхэндя: «Хулай! Тирэ шэл драхморя андэ манди дэш шэла».

17 Хулай пхэндя лэсти: «Мишто, лашо бутярно! Пала кода, со ту патимаско андэ кадва цэнкорындо, тути авэла баримос пэ дэш фороря».

18 Авиля авэр и пхэндя: «Хулай! Тирэ шэл драхморя андэ панчшэл».

19 Хулай пхэндя лэсти: «И ту ав пхурэдэр андэ панч фороря».

20 Авиля трито и пхэндя: «Хулай! Акэ тути тирэ шэл драхморя. Мэ ритяравас лэн андо хкосноро.

21 Мэ даравас тутар, ту мануш, саво бут мангэл: лэс кода, со на тховэсас, и стидэс кода, со ту на шосас андэ пхув».

22 Хулай пхэндя лэсти: «Тирэ лавэнца авава тэ сындосарав тут, хохавно бутярно! Ту жанэсас, кай мэ бут мангав, лав кода, со мэ на тховавас, и стидав кода, со на шавас андэ пхув».

23 Состар ту на дян руп мэрно андэ арли, сар мэ рисавава, тэ авэл руп будэр?»

24 И вов пхэндя колэнди, ко котэ ашлас: «Залэнтэ лэстар шэл драхморя и отдэн колэсти, кастэ дэш шэла».

25 Онэ пхэндэ лэсти: «Хулай! Лэстэ ж исин дэш шэла драхморя».

26 Хулай дя дума: «Пхэнав тумэнди, со всаворэнди колэнди, кастэ исин, дэлапэ инкэе, а кастэ нинай, залэлэпэ и кода, со лэстэ исин.

27 А мэрнэн вражымарен, ко на камэлас, кай мэ тэ авав лэндирэ тхагараса, анэн и умарэнтэ англав мандэй.

Исусо заладэл андо Иерусалимо

28 Исусо пхэндя када тай жыля майдур кав Иерусалимо.

29 И сар поджыля кай и гава, савэ акхарэнтэ Вифагия и Вифания, пашав плай, саво акхарэллэ Оливково, бишалдя дуен сытрянэн Пэстирэн

30 и пхэндя лэнди:

— Жан андо гав, саво англай тумэндэ, ай сар зажана андэ лэстэ, аракхэна припхангле осликос, пэ саво нико никала на бэшэлас. Отпхандэн лэс и анэн Мандэ.

31 Сар ко пушэла тумэндар: «Пэр со отпхандэн лэс?» — пхэнэн лэсти кадя: «Вов трэбүй Раести».

32 Сытрянэн, савэн Вов бишалдя, жыле и аракхле, сар Вов пхэндя лэнди.

33 Кала онэ отпхандэнас осликос, хулая пушле лэн:

— Пэр со тумэ отпхандэн лэс?

34 Онэ пхэндэ:

— Вов трэбүй Раести.

35 Онэ андэ лэс кав Иисусо, шутэ йида пэ ослико и тховдэ пэр лэстэ лэ Иисусос.

36 Кала Вов ладэлас, онэ шонас йида пэстири пав дром.

37 А кала Вов подлагля кав тхан, кай о дром эмукэллэ пав плай Оливково, фартэ бут сытрянэн радосавэнас и зоралэ гласоса лашарэнас лэ Дэвлэс пала диворя, савэ онэ дикхле.

38 Онэ пхэнэнас:

— Лашардо Тхагар, саво жал важ алав Рае Дэвлэско! Миро по болыбэн, слава упрэ по болыбэн!

39 Коисавэ фарисеёрыя, савэ сас машкар мануша, пхэндэ Лэсти:

— Сытряимари, припхэн Пэстирэ сытрянэнди тэ ашэн мулком!

40 Нэ Вов пхэндя:

— Пхэнав тумэнди, сар онэ ашэнна мулком, и бара лэнна тэ цыписавэн.

Исусо ровэл налав Иерусалимо

41 Кала Иисусо поджалас кав Иерусалимо, Вов удикхля о форо и заровдя.

42 Тунчи пхэнэлас:

— О, сар ту адес тэ ужанэс, со анэлас бы тути миро! Нэ икхатар када сгаратдо тирэ яхжандар.

43 Авэна кацавэ деса, кала вражымаря тирэ жана пэр тутэ маримаса, тэрдёна тай стасавэнна тут всаворэ ригэндар.

44 Онэ розмарэнна тут, умарэнна тирэ бэяцэн и на ашавэнна бар по бар, пала кода со ту на ужанглян врязма, кала о Дэл авиля тутэ.

Исусо вытрайдэл битимарен андав храмо

45 Тунчи Иисусо зажыля андо храмо и ля тэ вытрайдэл битимарен.

46 — Пистросардо, — пхэндя Вов лэнди, — со Мэрно чер авэла черэса, кай мангэнтэ Дэвлэс. А тумэ тердэ андэр лэстэ пракхарицко тхан.

47 Кажно дес Иисусо сытряэлас андо храмо. Барэ рашая, сытряимаря Законостирэ и майбарэдэр машкар и мануша родэнас тэ умарэн Лэс.

48 Нэ на аракхэнас, сар када тэ терэн, колэстар со всаворэ мануша на камэнас тэ промукэн ни екх лав Лэско.

20

Исусоско баримос

1 Андэ екх дес, кала Иисусо сыйярэлас андо храмо и пхэнэлас Радосаво Лав, Лэстэ авиле барэ рашая, сыйяримаря Законостириэ и пхурэдэра.

2 — Пхэн амэнди, савэ баримаса Ту када терэс? Ко дя тути кацаво баримос? — пушле онэ.

3 Иисусо пхэндя лэнди:

— Тунчи и Мэ пушава тумэндэр. Пхэнэн Манди,

4 boldimos Иоаноско сас пав болыбэн чи манушэндэр?

5 Онэ линэ тэ дэн дума машкар пэстэ:

— Сар пхэнаса: «Пав упралимос», — то Вов пхэнэла: «Состар тумэ на патяйле лэсти?»

6 Сар пхэнаса: «Манушэндэр», тунчи всаворэ мануша марэна амэн лэ барэнца, колэстар со онэ патян, кай Иоано сас пророко.

7 И пхэнэнас онэ Лэсти:

— На жанас, катар.

8 Иисусо пхэндя лэнди:

— И Мэ на пхэнава тумэнди, савэ баримаса Мэ када терав.

Дума палай холятэрэ виноградоря

9 Вов ля тэ роспхэнэл манушэнди кацави дума:

— Екх мануш ганадя винограднико, ашадя пэ врьяма лэ бутярнэнди, а ежэно улагля пэ бут врьяма.

10 Кала поджыля и врьама, бишалдя лэндэ пэстирэс бутярнэс, кай онэ тэ дэн лэско котор пав винограднико, нэ онэ помардэ лэн и отмэклэ шүшэ вастэнца.

11 Инке бишалдя аврэс бутярнэс, нэ онэ и кадалэс помардэ, акушле и отмэклэ шүшэ вастэнца.

12 И тритонэс бутярнэс бишалдя, нэ онэ и кодлэс помардэ жы кав рат и вышутэ андай винограднико.

13 Тоди пхэндя о хулай виноградникоско:

— Со манди тэ терав? Бишалава пэстирэс шавэс, савэс мэ камав. Ко жанэл, чи на лажана лэстар?

14 Кала бутярнэ удикхле лэ шавэс, пхэндэ машкар пэстэ: «Акэ лэско шаво, саво авэла хулай лэ виноградникоско. Авэн, умараса лэс, и всаворо хулаимос заласа пэстти».

15 Онэ выландрэд лэс андав винограднико и умардэ. Со терэла лэнца о хулай виноградникоско?

16 Вов авэла тай умарэла колэн бутярнэн, ай винограднико отдэла аврэнди.

Ко шунэлэс, кала пхэндэ:

— Мэй на авэл кадя!

17 Нэ Иисус подиухля пэр лэндэ и пхэндя:

— Сар тэ полэ кала лава андай Пистросаримос: «Бар, саво отшутэ кола, ко терэнас о чер, ашыля англунэ барэса, пэ саво ритярдёл всаворо чёр?»

18 Кожно, ко пэрэла пэ кадва бар, розмардёла, и пэр кастэ пэрэла кадва бар, колэс ростасавэла.

19 Сыйяримаря Законостириэ и барэ рашая полинэ, со кадья дума Иисусо роспхэндя пала лэндэ, и камле сыго тэ лэн Лэс, нэ даранас манушэндэр.

Иисусо пхэнэл палай налогоря

20 Онэ линэ тэ дикхэн палав Исусо тай подбишалдэ Лэстэ хохавнэн манушэн, савэ притердэпэ, кай онэ пативалэ, тэ астарэн Лэс андэ лава и тэ отдэн Лэс андэ васта барэ раести андав Римо.

21 Кола пушле Лэс:

— Сытрямари! Амэ жанас, кай Ту чячес пхэнэс и сытряэрэ. И на дикхэс, ко англав тутэ ашэл, нэ чячимаса сытряэрэ Дэвлэстирэ дромэсти.

22 Трэбуй тэ дас налогоря лэ императорости чи нат?

23 Вов поля лэнго хрантинос и пхэндя:

24 — Сикавэнтэ Манди динариё. Каско муй пэр лэстэ вымардо, и каско пэр лэстэ алав?

— Императороско, — пхэндэ онэ.

25 — Акэ и отдэн императороско императорости, а Дэвлэско — Дэвлэсти, — пхэндя Вов.

26 И кадя онэ на астардэ Лэс англай мануша пала Лэстирэ лава. Онэ дивосайле Лэстирэ лавэнди и ашыле мулком.

Пала кола, ко жундёла мулэндар

27 Кав Исусо поджыле коисавэ садукеёря. Онэ сытряэнас, кай мулэ на жундён. Тай пушле Лэстар:

28 — Сытрямари! Моисеё пистросардя, сар каствэ мэрэла пхрал, савэстэ ашэлэпа ромни и на сас бэяцэ, тунчи авэр пхрал трэбуй тэ лэл ла пэстирия ромняса, кай тэ авэн бэяцэ андо лэндиро родо.

29 Сас эхта пхрала. Англuno ля пэсти ромня, нэ муля бибэяцэнго.

30 И авэр,

31 и трито лэнас ла пэстирия ромняса, и кадя всаворэ эхта пхрала муле и на ашадэ бэяцэн.

32 Тунчи муля и ромни.

33 Сар жундёна андай мулэ, кастиривой авэла ромни? Акэ, всаворэ эхта пхрала сас латирэ ромэнца!

34 Исусо пхэндя лэнди:

— Икхатар мануша лэн пэсти ромнян и выжан палав ром.

35 Ай кола, савэ авэна тэ жувэн андэ авэр люма тай жундёна андай мулэ, на авэна тэ лэн пэсти ромнян и тэ жан палав ром.

36 Онэ на мэрэна, нэ авэна, сар ангелоря. Онэ — шавэ Дэвлэстирэ, савэ жундиле.

37 Ай со мулэ жундён, андо роспхенинос, сар пхаболас о пусаимаско кустарнико, сикядя Моисеё, кала акхардя Раес Дэвлэс «Дэл Авраамоско, Дэл Исаакоско и Дэл Иаковоско».

38 Дэл исин Дэл на мулэнго, ай жундэнго. Важ Лэсти всаворэ жундэ!

39 Коисавэ андай сытрямария Законостириэ пхэндэ:

— Мишто Ту пхэндян, Сытрямари!

40 И будэр нико на пушэлас Лэстар.

Ко кацаво Исусо?

41 Тунчи Исусо пушля лэндар:

— Состар дэн дума, со Христосо — шаво лэ Давидоско?

42 Ай ежэно Давидо пхэнэл андо пэско лил псалморя:

Пхэндя Рай Дэл мэрнэ Раести:

«Бэш пай право риг Мандар,

43 кола врятматэ, кала шава тирэ вражымарен кай и пэрнэ Тирэ».

44 Сар Давидо акхарэл Лэс Раеса, сар жэ Вов Шаво лэсти?

Исусо пхэнэл палай дуемуендиэ мануша

45 Кала всаворэ мануша ашунэнас Лэс, Вов пхэндя Пэстириэ сытрянэнди:

46 — Фэрисавэн лэ сыйтряимарендар Законостирэ. Лэнди чялёт тэ урявэнпэ андэ лунго йида, онэ камэн, кай мануша лэнди тэ пхэнэн пэ форо: «Тэ авэн бахталэ», и соб тэ бэшэн пэ англунэ тхана андэ синагоги ай пэ свэнкоря.

47 Онэ залэн чера кай пхивля и бут мангэнпэ Дэвлэс, кай тэ удикхэн лэн мануша. Лэн ажутярэл майбаро сындо.

21

Чёроры пхивли тховэл ловэ андо храмоско сартари

1 Иисусо дикхэлас, сар и барвалэ шонас ловэ андо храмоско сартари.

2 Вов дикхля, сар чёроры пхивли шутя андо сартари дуй хурдэ ловэ.

3 — Пхэнав тумэнди чичимаса, — пхэндя Иисусо, — со кадья чёроры пхивли шутя майбут всаворэндар.

4 Колэстар со всаворэ дэнас ловэ пэстирэ барвалимастар, нэ вой пэстирэ чёrimастар дя вся, со латэ сас по жувимос.

Иисусо пхэнэл пала кода, со авэла

5 Кала мануша, савэ котэ сас, дэнас дума палав храмо, сар вов стердо андай кучютнэ бара и шукар дароря, савэ анэнас Дэвлэсти, Иисусо пхэндя:

6 — Авэла время, кала всаворэстар, со тумэ катэ дикхэн, на ашэлапэ бар по бар, вся авэла розмардо.

7 Лэстар пушле:

— Сыйтряими! Кала када авэла? И сави шпэра сикавэла, со када сыго авэла?

8 Вов пхэндя:

— Дикхэн, кай нико тэ на дилярэл тумэн. Бут авэна талав Мэрно алав и авэна тэ пхэнэн: «Када Мэ» и «Врэяма авиля». На жан пала лэндэ.

9 Кала ашуунэна палав маримос и пала кода, сар ваздэнпэ мануша екх пэ екх, на даран. Вся када трэбуй тэ авэл майанглал, нэ када инке най вся.

10 Иисусо пхэнэлас:

— Мануша екха пхувьятар авэна тэ вражысарэн манушэнца авря пхувьятар, и екх тхагаримос ваздёла пэ авэр.

11 Авэла фартэ тэ тинолпэ и пхув, пай бут тхана авэла бокх и бут насвалимос, авэна тэ терэнпэрындоя, савэ даравэна манушэн, и по болыбэн авэна барэ шпэры.

12 Нэ майанглал тумэн авэна тэ традэн, тэ залэн, тэ анэн андэ синагоги, тэ пхандавэн андо бар, и андярэна тумэн кай и тхагара и кай барэ рапа пала алав Мэрно.

13 Када авэла допхэнимос важ тумэнди.

14 Тховэнтэ андэ пэстирэ водя тэ на гытонпэ, со тумэнди тэ пхэнэн пала пэстэ.

15 Мэ дава тумэнди кацаэ лава и кацави годи, со никастэ андай тумарэ вражымаря на авэла, со тэ пхэнэл тумэнди, и онэ на утэрдёна англай тумэндэ.

16 Тумэн авэна тэ прэдэн дада и дэя, пхрала тумарэ, родо тумаро и амала тумарэ, и варикас тумэндар умарэна.

17 Всаворэ авэна тэ на камэн тумэн пала Мэрно алав.

18 Нэ ни екх бал на пэрэла пав тумаро шэрэ.

19 Тумарэ терписаримаса фэрисарэна пэстирэ водя.

20 Кала дикхэна, со бут халавдэ тэрдён всаворэ ригэндар Иерусалимостар, тунчи жанэнтэ, со авиля время, кала вов авэла розмардо.

21 Тунчи кола, ко исин андэ Иудея, мэк нашэн андэ плая, а ко андо форо — мэк нашэн андэр ласть, а ко исин пашав форо — мэк на зажан андэр ласть.

22 Када исин деса, кала Дэл пушэла пала лэндирэрындоя, мэк терэлпэ кода, со запистросардо.

23 Андэ кодъя връяма авэла бида жувлянди, савэ пхарэ и савэ праварэн чуючса бэяцэн. Пэ пхув авэла бари грыжа, и пэ кала мануша скала холи.

24 Екх мэрэна мечёстар, аврэн схутилэна и андярэна андэ авэр пхувья. Иерусалимо авэла помардо манушэнца аврэ народостар, жы кала прожала лэндири връяма.

Сар Исусо рисавэла нэ пхув

25 По кхам, по шон и пэ чиргая авэна шпёры. Мануша пай всавори пхув ашунэна, сар шумисарэл и ваздэл море, и авэна тэ тинонпэ даратар.

26 Мануша авэна тэ ажутярэн биды, савэ жан андэ люмса, онэ даратар авэна тэ пэрэн бизоратирэ, и болыбнастирэ зора тинонапэ.

27 Тунчи мануша удикхэна лэ Шавэс Манушыканэс, Саво жал пэ облако баря зораса и славаса.

28 Кала акада вся авэла тэ терэллэ, вщен ворта и ваздэн шэрэ пэстирэ, колэсти со авэл тумэндэ майпаши тумаро фэрисаримос.

29 Тунчи Вов пхэндя лэнди кацахи дума:

— Подикхэн пэ инжыро и пэ авэр дрэвояр.

30 Кала онэ лэн тэ розмукэнпэ, тумэ дикхэн пэр лэндэ и жанэн, со милай пашэ.

31 Кала тумэ дикхэна, со када терэллэ, жанэн, со Дэвлэско Тхагаримос пашэ.

32 Пхэнав тумэнди чячимос: на прожала кадва родо, сар вся када терэллэ.

33 Болыбэн и пхув прожана, нэ лава Мэрнэ на прожана.

Исусо приакхарэл манушэн тэ авэн гытосардэ

34 Дикхэн пала пэстэ, мэй тумарэ водя на авэн залитэ лубимаса, матимаса, и грыжаса пала жувимастирэ рындоря, кай о дес кадва тэ на авэл тунчи, кала тумэ лэс на ажутярэн.

35 Кодва дес авэла, сар фэли важ чириклия, када ж важ всаворэ мануша, савэ жувэн пай пхув.

36 Авэнтэ гытомэ и всавори връяма мангэнпэ Дэвлэс, кай тумэндэ тэ авэл зор тэ унашэн всаворэстар, со сыго авэла, и тэ ашэн англав Шаво Манушыкано.

37 Исусо десэ сыйярэлас андо храмо, ай пэ ряят жалас по плай Оливково.

38 Всаворэ мануша, кала качи авэлас дес, авэнас андо храмо тэ ашунэн Лэс.

22

Иуда допхэнэллэ тэ здэл Исусос

1 Поджалас свэнко Бизакваскатирэн марнэн, саво инке акхарэласпэ Патради.

2 Барэ рашая и сыйяримаря Законостирэ родэнас, сар тэ умарэн Исусос, нэ даранас манушэндэр.

3 Тунчи Сатана вжыля андо Иуда, савэс акхарэнас Искариото, екх андай дэшдуудий.

4 Вов жыля и дя дума лэ барэ рашаенца и пхурэдэрэ халавдэнца, сар тэ здэл лэнди Исусос.

5 Онэ радосайле и допхэндэлэ тэ дэн лэсти ловэ.

6 Вов дя лав и родэлас лащи връяма, сар тэ здэл Исусос, кала пашэ на авэла манушэн.

Сыйярэн гытсонпэ кай и Патради

7 Авиля дес Бизакваскатирэн марнэн, кала трэбуй сас тэ зашынэн патрадятирэс бакрорэс.

8 Исусо бишалдя лэ Пэтрос тай лэ Иоанос, пхэндя лэнди:

— Жантэ, пригытон важ амэнди патрадяко хамос.

9 — Кай Ту камэс, соб амэ тэ гытосарас? — пушле онэ.

10 Вов пхэндя лэнди:

— Кала тумэ зажана андо форо, дикхэна манушэс, саво андярэл кхоро паеса. Жантэ пала лэстэ андо чер, андэ саво вов зажала,

11 и пхэнэн лэ хуласти пав чер: «Сытряимари пхэнэл тути: "Кай тхан андо чер, саб Манди тэ хав патрадяко хамос лэ сытрянэнца Мэрнэнца?"»

12 И вов сикавэла тумэнди баро, гытосардо тхан упрэ андо чер, котэ гытон.

13 Онэ жыле и вся удикхле кадя, сар пхэндя лэнди Иисусо, и гытосардэ патрадяко хамос.

Иисусо хал патрадяко хамос лэ сытрянэнца

14 Кала авиля время Иисусо бэшля лэ апостолонэнца палай мэсали.

15 Тунчи Иисусо пхэндя лэнди:

— Сар фартэ Мэ камавас тэ хав кадва патрадяко хамос тумэнца майанглал, сар Манди авэла бари грызка.

16 Пхэнав тумэнди, со Мэ будэр на авава тэ хав патрадяко хамос жы кала кадья Патради терэлэлэ андо Тхагаримос Дэвлэско.

17 Тунчи Вов ля о тахтай молэса, наисардя и пхэндя:

— Лэнтэ и пэнтэ андар лэстэ всаворэ.

18 Пхэнав тумэнди, со Мэ будэр на авава тэ пав пимос виноградостар жы кола времятэ, кала авэла Тхагаримос Дэвлэско.

19 Тунчи Вов ля о марно, наисардя пала лэстэ Дэвлэс, пэрэхагля и дя лэнди. Вов пхэндя:

— Када исин тило Мэрно, саво пала тумэндэ отдэллэ. Терэн када, кай сэрэн пала Мандэ.

20 Кала онэ хале, упалэ ля о тахтай и пхэндя:

— Кадва тахтай исин нэво завето андо Мэрно рат, саво пала тумэндэ питял.

21 Акэ, васт колэско, ко Ман прэдэла, Манца палай мэсали.

22 Нэ Шаво Манушыкано жал, сар Лэсти трэбуй. Тай бида колэсти манушэсти, саво прэдэл Лэс.

23 Тунчи апостолоря линэ тэ пушэн екх екхэстар, ко лэндар када терэла.

Ко майпхурэдэр?

24 Тунчи онэ линэ тэ ханпэ машкар пэстэ, ко лэндар авэла пхурэдэр.

25 Иисусо пхэндя лэнди:

— Тхагара аврэ пхувьяндар припхэнэн пэстирэ народонэнди, кола, савэндэ исин баримос, пхэнэн, кай онэ терэн мищимос.

26 Ай тумэ на авэн кацавэ, сар онэ. Тумэндэ мэж майпхурэдэр авэла, сар майцэкно, и рай — сар бутярно.

27 Ко майпхурэдэр? Кодва, ко бэшэл палай мэсали? Ай бутярно? Чи най кодва, саво бэшэл палай мэсали? Нэ Мэ машкар тумэндэ, сар бутярно.

28 Тумэ ашылепэ Манца, сар Манди сас бида.

29 Сар Мэрно Дад дя Манди Тхагаримос, кадя Мэ икхатар дав лэс тумэнди,

30 кай и тумэ тэ хан и тэ пэн палай Мэрни мэсали андо Тхагаримос Мэрно, и бэшэна тумэ пэ троноря, кай тэ сындосарэн дэшудуй родоря лэ Израилёстирэ.

Иисусо пхэнэл, сар Петро отпхэндёла Лэстар

31 — Симоно! Симоно! Акэ, Сатана мангэлас тэ зумавэл тумэн и тэ жужарэл, сар о ворзо жужарэн.

32 Нэ Мэ манглем пала тутэ Дэвлэс, кай тэ на хасарэс патимос тиро. Ай ту ежэно, кала рисавэса Мандэ, подритяр лэ пхралэн тирэн.

33 Петро пхэндя Лэсти:

— Рай, Туса мэ гытомэ тэ жав Туса андо баруно и по миримос!

34 Нэ Иисусо пхэндя:

— Пхэнав тути, Пэтро, на задилабэла адес башно, сар ту тривар пхэнэса, со на жанэс Ман.

35 Тунчи Иисусо пхэндя лэнди:

— Кала Мэ бишалавас тумэн битышылако, и битрастако, и бипэрналэнго, со тумэнди на хутилэлас?

Онэ пхэндэ:

— Най, вся хутилэлас.

36 — Нэ икхатар, — пхэндя Иисусо, — сар каастэ исин тышыла, лэ пэса, кадя ж лэ и траста; а каастэ нинай, битин пэстири йида и тин мечё.

37 Пхэнав тумэнди, со Манца трэбуй тэ стерэлпэ вся, со запистросардо: «И Вов сас забиндо сар прахарий». Вся, со пала Мандэ сас пистросардо, трэбуй тэ авэл.

38 Апостолоря пхэндэ:

— Рай, аж дикх, амэндэ дуй мечёрыя.

Иисус пхэндя лэнди:

— Када хутила.

Иисусо мангэл Дэвлэс по плай Оливково

39 Иисусо выжыля тай, сар Лэстэ сас прилито, жыля по плай Оливково. Лэстирэ сыттарнэ жыле Лэса.

40 Кала Иисусо авиля по тхан, Вов пхэндя лэнди:

— Мангэнпэ Дэвлэс, соб тэ на попэрэн андо зумавимос.

41 Тунчи Вов отжыля лэндар пэ скачи шонас о бар, тэрдиля пэ чянга и ля тэ мангэлээ Дэвлэс.

42 Вов пхэндя:

— Дадэ! Андэ Тири зор тэ залэс кадва тахтай Мандар. Нэ мэк вся авэл на кадя, сар Мэ камав, а сар Ту камэс.

43 Тунчи пав болыбэн Лэстэ авиля ангело и подритярэлас Лэс.

44 Анда пхари грыжа Иисусо зоралэс мангэласпэ. Лэско пото сас сар рат, саво капленца питялас пэ пхув.

45 Кала Вов пэрэашыля тэ мангэлпэ, рисайля кай сыттарнэ и удикхля лэн сутэнца, колэсти со онэ чиеле грыжатар.

46 — Состар тумэ совэн? — пушля Иисусо. — Вщен и мангэнпэ, соб тэ на попэрэн андо зумавимос.

Иуда эдэл Иисусос

47 Кала Вов инке дэллас дума, сикадэлэ мануша, и англал жалас ехк андай дэшдуудай, савэс акхарэнас Иуда. Вов поджыля кав Иисусо, соб тэ чюминдэл Лэс.

48 Иисусо пхэндя лэсти:

— Иуда, ту чюминдэс и калэса прэдэс Шавэс Манушыканэс?

49 Тунчи кола, ко сас лэ Иисусоса, дикхле, со икхатар авэла, и пушле:

— Рай! Ай со, сар амэ арэсаса мечёса?

50 Ехк лэндар арэсля барэ рашастирэс бутярнэс и отшийнди лэсти право кан.

51 Нэ Иисусо пхэндя:

— На терэн, хутила!

Вов лялэ палав кан и састьядя бутярнэс.

52 Тунчи Иисусо пхэндя барэ рашаенди, пхурэдэрэ халавдэнди храмостар и пхурэдэрэнди, савэ авиле пала Лэстэ:

— Сар по прахарий тумэ авиле мечёнэнца и рулянца?

53 Мэ кажно дес сымас тумэнца андо храмо, и тумэ на схутилдэ Ман. Нэ икхатар тумари врязма, икхатар баримос калимаско.

Пэтро отпхэндэл лэ Иисусостар

54 Онэ схутилдэ Лэс и андрэдэ андо чер барэ рашаеско. Пэтро дурал жалас пала лэндэ.

55 Машкар града роспхабардэ яг, и Пэтро екхэтанэ аврэ манушэнца бэшля пашай яг.

56 Екх бутярни удикхля лэ Пэтрос, пэ удууд ягако, придикхляпэ лэстэ ай пхэндя:
— И кадва мануш сас Лэса.

57 Нэ Пэтро отпхэндяя.

— Мэ на жанав Лэс, жувлиё, — пхэндя вов.

58 Тунчи инке авэр мануш удикхля лэс и пхэндя:

— И ту екх лэндар.

— Най, мануш, — пхэндя о Пэтро.

59 Прожыла варикай екх чясо время, и инке екх мануш ашыля тэ допхэнэл:

— Чячес, и кадва мануш сас Лэса. И вов кацаво жэ галилеянино.

60 Нэ Пэтро пхэндя:

— Мануш, мэ на жанав, пала со ту пхэнэс!

И андэ кодья ж время, кала вов инке дэлас дума, продилабайдя башно.

61 Рай обрисайля и подикхля по Пэтро. Тунчи Пэтро гындосардя лава Раестирэ, сар Вов пхэндя лэсти: «На задилабэла адес башно, сар ту тривар пхэнэса, со на жанэс Ман».

62 Пэтро выжыля котар и грыжатар заровдя.

63 Мануша, савэ ритярэнас лэ Иисусос, линэ тэ аса Лэстар и тэ марэ Лэс.

64 Онэ запхангле Лэсти яхса, пушэнас Лэс:

— Пхэн пророкско лав! Ко арэсля Тут?

65 И пхэнэнас Лэсти авэр бут акушэмос.

Барэ рашая сындолсарэн Иисусос

66 Сар авиля дес, манушэндирэ пхурэдэра, барэ рашая и сыйтаримаря Законостириэ стидиле и заандярдэ Иисусос андо синедрионо.

67 — Ту исин Христос? Пхэн амэнди, — пушэнас онэ. Иисусо пхэндя:

— Сар Мэ пхэнава тумэнди, тумэ на патяна.

68 И сар пушава тумэндар, тумэ на пхэнэна Манди.

69 Акала врятатар Шаво Манушыкано авэла тэ бэшэл пав право васт Дэвлэстиря зоратар.

70 Онэ всаворэ линэ тэ пушэн:

— Када Ту исин Дэвлэско Шаво?

Вов пхэндя:

— Тумэ ежэнэ пхэнэн, со када Мэ.

71 Тунчи онэ пхэндэ:

— Саво инке амэнди трэбуй допхэнимос? Амэ ежэнэ ашундэ, со Вов пхэндя.

23

Пилато допушэл Иисусос

1 Тунчи всаворэ онэ подлинэпэ и андярдэ Лэс кав Пилато.

2 Котэ онэ линэ тэ ужылисарэн Лэс:

— Амз удикхле, со Вов змарэл чячюнэ дромэстар амарэ манушэн. И запхэнэл тэ потинэн налогоря лэ императорости, и пхэнэл, со Вов — Христосо, Тхагар.

3 Пилато пушля Иисусос:

— Ту Тхагар иудеёско?

— Ту ежэно када пхэнэс, — пхэндя Иисусо.

4 Тунчи Пилато пхэндя барэ рашаенди и манушэнди, савэ сас котэ:

— Мэ на аракхав нисаво ужылимос андэ Кадва Мануш.

5 Но онэ тэрдёнэс пэ пэско, пхэнэнас:

— Вов ваздэл лэ манушэн, сар сыйтэрэл пай всавори Иудея, лэ Галилеятар жыкай кадва тхан.

Иродо допушэл Исусос

6 — Кадва Мануш — галилеянино? — пушля Пилато, сар ашундя када.

7 И ужанггия, со Вов андай пхув, кай сас тхагар Иродо, бишалдя Лэс кав Иродо, саво сас андэ кола деса андо Иерусалимо.

8 Сар Иродо удикхля лэ Исусос, фартэ радосайля, колэсти со дэлмут камля тэ дикхэл Лэс. Тай бут ашундя пала Лэстэ и гындолас, со Исусо сикавэла важ лэсти варисави шпэра.

9 Вов пушэлас Лэстар бут со, нэ Исусо нисо на пхэнэлас лэсти.

10 Барэ рашая и сыйяримаря Законостирэ тэрдёнас и фартэ ужылисарэнас Исусос.

11 О Иродо пэстирэ халавдэнца акушле и обсае Лэс, урявдэ пэр Лэстэ шукар йида и рисардэ палпалэ кав Пилато.

12 Андэ кодва дес Иродо и Пилато ашыле амала, а жы кола врятатар онэ сас вражымаря.

Пилато сындосарэл Исусос

13 Тунчи Пилато стидя барэ рашаен, пхурэдэрэн раен и манушэн

14 и пхэндя лэнди:

— Тумэ андэ манди Калэс Манушэс, и пхэнэн, кай Вов ваздэл манушэн. И акэ, мэ допушлем Лэс англай тумэндэ, тай на аракхлем андэр Лэстэ нисаво ужылимос, андэ со тумэ Лэс ужылисарэн.

15 Иродо кадя ж на аракхля андэр Лэстэ нисаво ужылимос и бишалдя Лэс палпалэ амэндэ. Сар дикхэн, Вов на стердя нисо кацаво, пала со Лэс трэбуй тэ умарэ.

16-17 Мэ приphэнава, кай тэ марэн Лэс чюкняса, и тунчи отмукава Лэс.*

18 Нэ всаворэ линэ тэ цыписавэн:

— Залэ! Лэс! Отмук амэнди Баравас!

19 Барава бэшэлэс андо баруно пала умаримос и пала кода, со ваздэлас манушэн андо форо.

20 Пилато жэ камэлас тэ отмэкэл Исусос и инке дэлас дума лэнца.

21 Нэ онэ цыписавэнэс:

— Примар, примар Лэс кав трушул!

22 Пилато трито моло пхэндя лэнди:

— Со вырито Вов тердя? Мэ на аракхлем пала Лэстэ нисо, пала со Лэс трэбуй тэ умарэ. Мэ приphэнава, кай тэ марэн Лэс чюкнянца, и тунчи отмэкава Лэс.

23 Нэ мануша цыпимаса домардёнас пэско, кай Исусос тэ примарэн кав трушул. Тунчи онэ домардээз пэско.

24 Пилато сындосардя тэ терэл кадя, сар онэ камэнас.

25 Вов отмэклия, сар онэ мангэнэс, колэс, ко сас андо баруно пала кода, со ваздэлас лэ манушэн и тердя умаримос. Ай лэ Исусос отдя андэ лэндирэ васта.

Исусос андярэн тэ примарэн кав трушул

26 Кала онэ андярэнас Лэс, линэ варисавэс Симонос Киринеятар, саво жалас пай мал, и тховдэ пэр лэстэ трушул, кай тэ андярэл палав Исусо.

27 Пала Лэстэ жанас бут мануша и жувля, савэ марэнэс пэс андэ кулин и ровэнэс пала Лэстэ.

28 Исусо обрисайля лэндэ и пхэндя:

— Щея Иерусалимостирэ, на ровэн пала Мандэ, нэ ровэн пала пэстэ и пала пэстирэ бэяцэ.

* **23:16-17** Андэ коисавэ гречески манускрипторя инке исин кацавэ лава: «Андэ кодья врятма кадя сас, со пэ свэнко вов трэбуй тэ отмэкэл еххэс манушэс андай барунаря».

29 Авэла кацави вряма, кала авэна тэ пхэнэн: «Бахталэ бибэяцэндирэ, кола, савэ на бэяндэ бэяцэн и кола, савэ на праварэн чочяса!»

30 Тунчи мануша пхэнэна плаенди: «Пэрэн пэ амэндэ!» И холмонэнди: «Гаравэнтэ амэн!»

31 Сар жундэ дрэвоса терэн кацаво, тунчи со авэла шукэса?

Исусос примарэн кав трушул

32 Исусоса андрэрэн дуен прахарэн по миримос.

33 Сар онэ авиле по тхан, саво акхарэлээ Черэпо, котэ примардэ кав трушул Исусос и прахарен, екхэс пай право риг, ай аврэс пай авэр риг.

34 Исусо пхэндя:

— Дадэ! Эртисар лэн, онэ на жанэн, со терэн.

Халавдэ шонас жребиё тай розлэнас машкар пэстэ йида Исусостири.

35 Ай мануша тэрдёнэс и дикхэнэс. Пхурэдэра асанас Лэстар и пхэнэнас:

— Фэрисарэлас аврэн! Мэк акана фэрисарэл Ежэно Пэс, сар Вов Дэвлэско Вытидо — Христосо!

36 Халавдэ, кадя ж асанас Исусостар. Онэ поджанас и дэнэс Лэсти уксусо

37 и пхэнэнас:

— Фэрисар Пэс, сар Ту Тхагар иудеёско!

38 Ай упрэ англав Исусо сас пистросардо: «Када Тхагар иудеёско».

39 Екх андай примардэ кав трушул прахари дэлэс амрая Лэс и пхэнэлас:

— Со Ту, на Христосо? Фэрисар Пэс и амэн!

40 Авэр жэ прахари улэлэс лэс и пхэнэлас:

— Чи ту на дарас Дэвлэстар? Ту кадя ж сындолсардо по миримос.

41 Амэ туса пав чячимос прилас кода, со затердэ, ай Вов нисо вырито на тердя.

42 И вов пхэндя:

— Исусо, гындосар пала мандэ, сар авэса андо Пэско Тхагаримос!

43 И пхэндя лэсти Исусо:

— Чячимос пхэнэв тути: адес авэса Манца андо раё.

Исусостиро миримос по трушул

44 Сар сас вряма пашэ дэшудуй чясоря десэстирэ, пай всавори пхув ашыля рят, и када сас жыкай трин чясоря.

45 Кхам перэашыля тэ пхабол, о паринд андо храмо росшындыя пэ поепаш.

46 Исусо фартэ зацьписайля:

— Дадэ, андэ Тирэ васта Мэ отдав духо Мэрно!

И сар пхэндя када, Вов отдя пэско духо.

47 Кала пхурэдэр шэлэ халавдэнго вся када удикхля, лашардя лэ Дэвлэс и пхэндя:

— Кадва Мануш чячес сас жужо!

48 И всаворэ мануша, савэ стидэп тэ подикхэн пэ умаримос, удикхле, со сас, рисавэнэс паллалэ и марэнэс пэс андэ кулин.

49 Всаворэ, савэ жанэнэс Исусос, и жувля, савэ жанас пала Лэстэ андай Галилея, тэрдёнэс и дикхэнэс дурал пала када.

Исусос гаравэн

50 Котэ сас лашо и жужо англав Дэл мануш, савэс акхарэнэс Иосифо. Вов сас екх андай пхурэдэра синедрионо.

51 Нэ вов на подритьярэлас лэндирэ лава и рындоря. Иосифо сас андай Аримафея, форо Иудейско, и ажутярэлас Тхагаримос Дэвлэско.

52 Кадва мануш авилия кав Пилато и манглия о тило лэ Исусоско.

53 Вов зля тило, тховдя андэ сани материя и тховдя Лэс андо склэпо, саво сас вымардо андэ баруно плай. Котэ инке никас на гаравэнэс.

54 Када сас дес, кала гытонаспэ кай субота, и кадва дес поджалас.

55 Палав Иосифо жанас и жувля, савэ авиле лэ Исусоса андай Галилея. Онэ дикхлэ о склэпо и сар корда тховдэ тило Исусоско.

56 Сар онэ рисайле, гытосардэ мастина лашэ фаноса и духоря. Суботнё дес онэ отчийнас пав запхэнимо.

24

Иисусо жундёл андай мулэ

1 Ай дэнзор андо курко жувля линэ гытосардэ мастина и жыле кав склэпо.

2 Онэ дикхлэ, со бар сас отштуо лэ склэпостар.

3 Кала зажыле, онэ на аракхле тило лэ Раеско Исусоско.

4 Онэ на полэнас, со тердяпэ, и акэ, сикадэпэ лэнди дуй мурша андэ йида, сави святосавэлас, сар молния.

5 Даратар жувля обмэклэ пэстирэ мүя тэлэ, нэ кола пхэндэ лэнди:

— Со тумэ родэн жундэс машкар мулэ?

6 Лэс катэ нинай, Вов жундия! Тумэ сэрэн, со Вов пхэнэлас тумэнди, кала сас инкэ андэ Галилея:

7 «Шавэс Манушыканэс трэбуй сас тэ отдэн андэ васта бэзэхалэ манушэнди, тэ примарэн кав трушуул. Нэ по трито дес Вов жундёла».

8 Тунчи онэ сэрдэ Лэстирэ лава.

9 Онэ рисайле лэ склэпостар и роспхэндэ пала вся када дэшүекхэ апостолонэнди и аврэнди, ко сас лэнца.

10 Када сас Мария Магдалина, Иоана, дэй Иаковостири, савя кадя ж акхарэнас Мария и авэр жувля, савэ сас лэнца. Онэ роспхэндэ вся када апостолонэнди,

11 нэз апостолоря на патяйле лэнди. Лэнди сикадяпэ, со када качи шүшэ лава.

12 Ай Пётро вшилия и прастая кав склэпо. Вов тэлилия и задикхля андрэ, нэ удикхля качи материя. Вов рисайля пэстэ, дивосайля всаворэсти, со тердяпэ.

Иисусо сикадёл сытрянэнди пав дром андо Эмаусо

13 Андэ кодва ж дес дуй андай сытрянэ жанас андо гав Эмаусо, саво сас варикай дэшдуудай километроря лэ Иерусалимостар.

14 Онэ дэнас дума машкар пэстэ пала вся, со тердяпэ.

15 И кала онэ дэнас дума и роспушэнас ехк екхэстар, Ежэно Иисусо поджылия и жыдя лэнца.

16 Нэ лэндирэ якха сас затердэ, и вонэ на ужангле Лэс.

17 Иисусо пушля лэндар:

— Пала со када тумэ дэн дума машкар пэстэ, сар жан пав дром?

Онэ тэрилде, и мүя лэндэ сас грыжомз.

18 Ехк лэндар, савэс акхарэнас Клеопа, пхэндя:

— Ту, душол, авилиян андо Иерусалимо и ехк, саво на жанэл пала кода, со тердяпэ андэ кала деса?

19 — Пала со? — пушля Иисусо.

— Со тердяпэ Иисусоса андав Назарето, — пхэндэ онэ. — Вов сас пророкоса, зорало англав Дэл и англай всаворэ мануша андэ лава и рындоря.

20 Амарэ барэ рашая и пхурэдэра сындосардэ Лэс по миримос и примардэ кав трушуул.

21 Ай амэ ажутярасас, со Вов исин Кодва, Саво трэбуй сас тэ фэрисарэл лэ Израилёс. Нэ акэ, трито дес, сар вся када тердяпэ.

22 Нэ коисавэ андай амарэ жувля дивосардэ амэн: онэ жыле дэнзор кав склэпо

23 и на аракхле котэ Лэско тило, рисайле и роспхэндэ амэнди, со онэ дикхлэ ангелон, савэ пхэндэ, кай Вов жундо.

24 Тунчи коисавэ андар амарэ жыле кав склэпо и удикхле котэ вся, сар роспхэндэ жувля, но Лэс онэ на дикхле.

25 Вов пхэндя лэнди:

— Савэ тумэ бигодятирэ и сар тумэ найсыго патян всаворэсти, со пхэнэнас пророкоря!

26 Чи на трэбуй сас лэ Христости тэ грыжолпэ и тэ зажал андэ Пэстири слава?

27 И ля лэ Моисеёстар и всаворэ пророконэндар тэ роспхэнэл лэнди, со пхэнэлласп пала Лэстэ андэ всаворо Пистросаримос.

28 Кала онэ поджыле гавэстэ, каринг онэ жанас, Исусо сикадя, кай камэл тэ жал майдур,

29 нэ онэ фартэ мангэнас Лэс:

— Ашпэ амэнца. Поджал рят, дес прожыля.

И Вов зажыля андо чер и ашыляялэ лэнца.

30 Кала Исусо бэшэллас лэнца палай мэсалы, Вов ля марно, наисардя Дэвлэс, пэрэхагля и дя лэнди.

31 Тунчи лэндирэ якха отпхэрнадэпэ, и онэ гатярдэ Лэс. Нэ Вов ашыля важ лэнди надикхло.

32 Онэ линэ тэ пхэнэн екх екхэсти:

— Чи на хлабонас андэ амэндэ водя, кала Вов дэлас дума амэнца пав дром и отпхэрнавэллас амэнди Пистросаримос?

33 Андэ кодъя ж вряза онэ вцили и жыле палпалэ андо Иерусалимо. Котэ онэ аракхле дэшүекх апостолон и колэн, ко сас лэнца.

34 Кола пхэндэ лэнди, со о Рай чячес жундия и сикадиля лэ Симоности.

35 Тунчи кала дуй роспхэндэ вся, со сас лэнца пав дром, сар онэ ужангле Исусос, кала Вов пхагэллас о марно.

Исусо сикадёл сыйтэрнэнди

36 Онэ инке дэнаас дума, сар Ежэно Исусо ашыля машкар лэндэ и пхэндя:

— Миро тумэнди!

37 Онэ замуле даратар, тындонас, со дикхэн духос.

38 Вов пхэндя лэнди:

— Состар тумэ даран? Состар тумэ на саастэс патян?

39 Подикхэн пэ Мэрнэ васта и пэрнэ. Када ж Мэ! Лэнпэ Мандэ и роздикхэн. Кав духо нинай тило и кокаля, ай Мандэ, сар дикхэн, исин.

40 Вов пхэндя када и сикадя лэнди Пэстирэ васта и пэрнэ.

41 Нэ онэ лошатар инке на патянас и дивосавэнас. Тунчи Исусо пушля лэндар:

— Тумэндэ катэ исин варисо тэ хан?

42 Онэ подинэ Лэсти котор пэко машё.

43 Вов ля и халас англай лэндэ.

44 — Пала када Мэ пхэнавас тумэнди, кала сымас инке тумэнца, — пхэндя Вов. — Вся, со запистросардо пала Мандэ андо Законо Моисеёско, кай пророкоря и андэ псалморя трэбуй тэ терэлпэ.

45 Тунчи Вов лэнди отпхэрнадя годи, кай онэ тэ полэн Пистросаримос.

46 — Пистросардо, со сас лэ Христости тэ грыжолпэ и по трито дес тэ жундёл андай мулэ, — пхэндя Вов.

47 — Важ Алав Лэско всаворэнди манушэнди, майанглал Иерусалимостар, тунчи пай всаворэ пхувья, авэла роспхэндо, кай онэ тэ каисавэн и тунчи простицарэнэлэ лэндирэ бээхэ.

48 Тумэ авэна пала вся када тэ роспхэнэн.

49 Акэ, Мэ бишалава тумэнди кода, пала со дя лав Мэрно Дад, нэ тумэ ашэнпэ андо форо Иерусалимо, жы кала прилэна зор упралимастар.

Исусо ваздэлтэ по болыбэн

50 Тунчи Вов выандядя лэн андав форо кай Вифания, вазгля васта и бахталисардя лэн.

51 Андэ кодъя врьяма, кала Вов бахталисарэлас лэн, Вов ля тэ отжал лэндар и тэ ваздёл по болыбэн.

52 Сытрянэ тэлинэ Лэсти и баря лошаса рисайле андо Иерусалимо.

53 Онэ сас всавори врьяма андо храмо и лашарэнас лэ Дэвлэс.

АПОСТОЛОНЭНДИРЭ РЫНДОРЯ

Пативалз амала!

Түмэ ритярэн андэ васт лил, саво тердо андай дуй котора: «Радосаво Лав Лукастар» и «Апостолонэндирэ рындоря». Онэ лэдуй сас запистросардэ екхэ манушэса Лукаса, саво сас Исусоско сыйярно. Онэ исин котор андай Библия, Дэвлэско Лав. Ежэй Библия терди андай дуй барэ котора «Пхурано Завето» и «Нэво Завето». Андо «Пхурано Завето» роспхэнэллэ, сар ашыля пэ пхув жувимос, а кадя ж палав Израилёско народо, саво о Дэл вытидя важ Пэсти. Андо «Нэво Завето» запистросардо пала жувимос лэ Исусоско Христоско, ай кадя ж роспхэнэллэ, сар ашыла хандири тай сарвой розжыляя пай пхув.

Ежэно лав «Евангелия» пэрэндярэллэ, сар «Радосаво Лав». Када лав пала кода, со дуй мия бэрш павпалэ андэ люма авиля Исусо Христосо, саво акхарэллэ Фэрисаримари, пала кода со Вов жувалас амэнца, састьярэлас и сыйярэлас манушэн, эртисарэлас лэнди бэзэхэ, муля пала всаворэ мануша и жундиля. А кадя ж пала кода, со Вов упалэ рисавэла андэ кадья люма. Евангелии ашыле андэ англуюн важно амаря эра и сас пистросардэ пэ греческо шыб. Штар Евангелии, савэ пистросардэ Исусостири апостолонэнца (Матфёса и Иоаноса) и апостолонэндирэ паши амалэнца (Лукаса и Маркоса), андо Нэво Завето тердён майянглал. Пала лэндэ жал лил «Апостолонэндирэ рындоря». Андэ латэ роспхэнэллэ пала кода, сар Исусостири апостоля розандярэнас Радосаво Лав Дэвлэско, а кадя ж пала кода, сар тховэннаспе англунэ хандирия. Кадя ж андо англуюн важно ашыле лила Исусостири сыйярэндирэ и лил «Откровение». Всаворэ кала лила стидэ андэ ехк лил, саво сас акхардо «Нэво Завето», андэ саво исин бишта хета лила.

Пэ адесутно дес лила Нэвэ Заветостири, а фэдэр Евангелии, пэрэндярдэ пэ всаворэ шыбы люматирэ, савэндэ исин пистросаримос. Библия исин майхурано лил андай манушэндиро пистросаримос. Амэ патяс, со тумэ кадя ж пативаса прилэнда кадьа драго дума.

Амэ всаворэ водестар наискарас всаворэн, ко терэнас бути, кала кадва лил гытосарэнас важ публикацыя: пэрэндимаренди, редакторонэнди и бутэнди ромэнди, савэ шунэнас и бинэнас кадва лил, кала лэс гытонас. Баро наис тумэнди!

Тэ дэл о Дэл тумэнди баих!

Пативаса тумэндэ,

Бутярнэ пай организацыя «Пэрэндимаря яа Библиятире андэ Украина».

Исусо ваздэллэ по болыбэн

¹ Пативало Феофило, анда мэрно англуюн лил мэ пистросардэм палай вся, со Исусо терэллас и состэ Вов сыйярэлас,

² жыкай кодва дес, кала припхэндя Свэнтонэ Духоса вытидэнди Лэса апостолонэнди, со трэбуй тэ терэн, и сас залино по болыбэн.

³ Кала Вов пэрэндярдя и грыжа, сикадяллэ лэнди жундэса и бут допхэнэллас, со када чячимос. И саранда дес сикавэласлэ лэнди и пхэнэллас палав Тхагаримос Дэвлэско.

⁴ Еххвар, кала онэ сас еххэтанэ, Вов припхэндя лэнди тэ на ашавэн Иерусалимо, нэ тэ ажутярэн кода, пала со дя лав о Дад.

— Пала када тумэ ашундэ Мандар.

⁵ Иоано болэллас паеса, ай кала прожана найбут деса, авэна болдэ Свэнтонэ Духоса.

⁶ Кола, савэ стидэллэ котэ, пушле Лэс:

— Рай, Ту со, стидэслэ тэ рисарэс андэ кадья вряза тхагаримос Израилёско?

7 Вов пхэндя лэнди:

— Най тумаро рындо тэ жанэн деса и врёма, савэ о Дад тховдя Пэстирэ зораса.

8 Нэ кала пэр түмэндэ скала Свэнто Духо, тумэ прилэна зор и авэна Мэрнэ дотхэнимяр андо Иерусалимо, пай всавори Иудея, Самария и кав дурутнэ тхана пай всавори пхув.

9 Вов пхэндя када, и англай лэндирэ якха сас вазгло упрэ, и облако гарадя Лэс.

10 Онэ дикхэнас по болыбэн, сар Вов ваздэласпэ. И акэ, андэ кодъя врёма паша лэндэ авиле дүй мануша андэ парни йида.

11 И пхэндэ:

— Мурша галилеянор! Со тумэ тэрдён и дикхэн упрэ? Кадва Исусо, Саво сас залино түмэндар по болыбэн, рисавэла кадя ж, сар тумэ дикхле Лэс, кала Вов ужалас.

Апостолоря вытидэн Матфеёс по тхан Иудаско

12 Тунчи онэ рисайле андо Иерусалимо пав плай, саво акхарэллэ Оливково. Вов сас найдур форостар, по дром, саво домукэллэ тэ прожал андо суботнё дес.

13 И сар онэ зажыле андо чер, взаглепэ андо тхан упрэ, кай онэ жувэнас андэ кодъя врёма. Котэ сас Пётро и Иоано, Иаково, Андреё, Филипо, Фома, Варфоломеё, Матфеё, Иаково, шаво Алфеёско и Симоно Зилото, тай Иуда, шаво Иаковоско.

14 Всаворэ онэ екхэтанэ мангэнаспэ Дэвлэс. Катэ сас коисавэ жувля и Мария, дэй Исусостири, и Лэстири пхрала.

15 Андэ кодъя врёма Пётро вшияла машкар пхрала пав патявимос и пхэндя (сас стидэ варийк шэл биш манушэн):

16 — Пхралалэ! Трэбуй сас тэ терэллэ кода, со андэ Пистросаримос пхэндя Свэнто Духо Давидостири ўштэнца палав Иуда. Вов сас пхурэдэр колэнго, савэ линэ Исусос.

17 Вов сас амэнца и терэлас апостолонэндири бути,

18 нэ приля замаихлэ ловэ и тиндя мал. Котэ вов пэля и кадя арэсляпэ, со лэстэ пхариля о пэр, и выпэле всаворэ лэстири пора.

19 И када ужангле всаворэ, ко жувэлас андо Иерусалимо, и акхардэ кадя мал пэ лэндири шыб Акелдама, со исин «Ратэстири мал».

20 Андэ лил Псалморя пистросардо:

«Мэл лэскэ чер авэла шушо,
тай тэ на жувэл котэ нико»

и

«Лэскэ тхан мэл залэл авэр».

21 Амэнди трэбуй тэ вытидас екхэс манушэс, саво сас машкар амэндэ всавори врёма, пав всаворэ тхана, кай пхирэлас Рай Исусо,

22 кола врёматар, кала лэс болэлас Иоано, жыкай кодва дес, кала Вов сас залино амэндар. Сар и амэнди, лэсти трэбуй сас тэ дикхэл, со Исусо жундия мулэндар.

23 Онэ вытидэ дуен: Иосифос, саво акхарэллэ Вар-Сава, и инке акхарэллэ Иусто, и Матфеёс;

24 и манглепэ Дэвлэс тай пхэндэ:

— Ту, Рай, жанэс всаворэндиэр водя. Сикав андай кала дүй екхэс, савэс Ту вытидян

25 тэ прилэл кадай бути и апостолимос, саво ашавдя Иуда, кай тэ жал кордэ, каринг лэсти сас сындосярдо.

26 Онэ шутэ жребиё, и вов выпэля лэ Матфеёсти, и кодва сас прилито кай дэшүекх апостолоря.

1 Кала авиля свэнко Пандэшако дес*, онэ сас андэ екх тхан.

2 Сыго авиля шумо пав болыбэн, сар фартэ зораля балвалятар, и пхэрдярдя всаворо чер, кай онэ сас.

3 Авиле лэнди шыба, сар яга, савэ всаворэ екх пала екх скыле по кажно мануш.

4 Всаворэ пхэрдиле Свэнтонэ Духоса и линэ тэ дэн дума пэ авэр шыба, сар о Духо дэллас лэнди тэ пхэнэн.

5 Андо Иерусалимо сас дэвлэкунэ иудеёря андай всаворэ пхувья талай болыбэн.

6 И сар тердяпэ қадва шумо, стидэпэ бут мануша и на полэнас, со терэлпэ, колэсти со всаворэ ашунэнас, сар апостолоря дэнас дума пэ лэндирэ шыба.

7 Всаворэ фартэ дивонаспэ и дэнас дума машкар пэстэ:

— Кала, савэ дэн дума, най всаворэ галилеяноря?

8 Сар амэ ашунас пэстири шыб, сави амэ жанас амарэ бэяндимастар?

9 Машкар амэндэ исин парфяниоря и мидяноря, еламиторя и ко жувэл андэ Месопотамия, Иудея и Кападокия, Понто и Цэкни Азия,

10 Фригия и Памфилия, Египто и пхув андэ Ливия, сави пашай Киринея, и кола, ко жувэл андо Римо,

11 иудеёрия и прозелиторя, критяноря и араборя. Ашунэнас, сар онэ дэн дума амара шыбаса палай барэрындоря Дэвлэстийрэ?

12 Всаворэ дивосавасна и на дополэнас, пхэнэнас екх екхэсти:

— Со қада терэлпэ?

13 Ай авэр асанас лэндар тай пхэнэнас:

— Онэ матиле гугз молэстар.

Дума лэ Пэтrostири

14 Пэтро вишия лэ дэшүеукхэнца и зоралэ гласоса пхэндя лэнди:

— Мурша иудеёрия и всаворэ, ко жувэл андо Иерусалимо! Ашунэнтэ мэрнэ алава, кай тэ жанэн.

15 Онэ на матэ, сар тумэ гындон. Иххатар качи иня чясо дэнзорэско!

16 Нэ пала қада пхэндя майанглал пророко Иоилё:

17 «Андэ палатунэ деса, — пхэнэл о Дэл,

— шава Духо Мэрно пэ всаворэн манушэн,
шавэ и щэл тумарэ авэна тэ пхэнэн лав Дэвлэстар
и шаворэ тумарэ авэна тэ дикхэн дикхимос,
и пхурэ мурша тумарэ дикхэнса сунэ Лэстар.

18 И пэ бутярнэ и бутярня Мэрнэ андэ кола деса шава Мэрно Духо,
и онэ авэна тэ пхэнэн лав Дэвлэстар.

19 Мэ сикавава диворя по болыбэн упрэ и шпэры пэ пхув тэлэ,
рат и яг, и баро тхув.

20 Кхам калёла, и шон ашэла сар рат,
жы кала авэла дес Раеско, баро и лашардо.

21 И тунчи кажно, ко приакхарэла алав Раеско, авэла фэрисардо.

22 Мурша Израилэстирэ! Выашунэн, со мэ пхэнава. Зораса тай дивоса и шпэраса, савэ о Дэл тердя чөрэз Лэстэ машкар тумэндэ, сар тумэ и жанэн, Дэвэл допхэндя тумэнди, со Мурш Исусо андэ Назарето авиля Лэстар.

23 Сар Дэл загындоосарэлас и жанэлас майанглэ, тумэ умардэ Лэс. Прэдинэ андэ прахарэндирэ васта, савэ примардэ Лэс кав трушул.

24 Нэ о Дэл жундярдя Лэс, росшынде грыжи миримастирэ, колэсти со миримасти на сас зор тэ уритьярэл Лэс.

25 Давидо пхэнэл пала Лэстэ:

«Дикхлем мэ англав пэстэ лэ Раес всавори врязма,

* **2:1** Куркэндирио свэнко, иудеёнго свэнко, кала стидэ ворзо пай маля. Вов сас пэ пандэшако дес палай Патради.

- Вов пай право риг паша мандэ,
кай саастэс тэ тэрдював.
- 26** Важ кода радосайля води мэрно
и лошарэл шыб мэрни;
и всаворэ мэрнэ маса авэна тэ жувэн надияса.
- 27** Колэсти со Ту на ашавэса води мэрно андо адо
и на дэса свэнтонэсти Тирэсти тэ ашэл прахоса.
- 28** Ту дян манди тэ ужанав дром жувимаско,
Ту пхэрдярэса ман лошаса англав Тутэ».
- 29** Пхралалэ! Домукэн ман тэ пхэнав тумэнди ворта. Прапапо Давидо муля и
гарадо, и склэпо лэско амэндэ жыкай адесутно дес.
- 30** Вов сас пророко и жанэлас, со о Дэл солахадя лэсти, со по троно авэла тэ
бэшэл мануш пай лэско родо.
- 31** Вов майанглал пхэндя, со Христосо жундёла андай мулэ, со на авэла ашадо о
води Лэско андо адо, и тило Лэско на ашзла прахоса.
- 32** Калэс Исусос о Дэл жундярдя андай мулэ, амэ всаворэ дикхасас када.
- 33** Вов сас взагло Дэвлэстирэ правонэ вастэса и прили лэ Дадэстар Свэнто Духо,
пала Саво дя лав о Дэл, и со тумэ иххатар дикхэн и ашунэн.
- 34** Давидо на взагляп о болжээн, нэ вов пхэнэлас када:
«Пхэндя Рай Дэл мэрнэ Раести:
- Бэш пай право риг Мандар,
- 35** кола врятматз, кала шава тирэ вражымарен кай и пэрнэ Тирэ».
- 36** Кадя саастэс жанэн, всаворо чер лэ Израилёско, со Калэс Исусос, Савэс тумэ
примардэ кав трушул, о Дэл стердя Раеса и Христоса.
- 37** Кала онэ ашундэ када, заровдэ воденца и пхэндэ Пэтрости и аврэнди
апостолонэнди:
- Пхралалэ! Со амэнди тэ терас?
- 38** Пэтро пхэндя лэнди:
- Каисавэн и тэ болэлпэ кажно тумэндар важ алав Исусоско Христоско, кай Дэл
тэ эртисарэл тумэнди бээзха. И тунчи тумэ прилэна даро Свэнтонэ Духос.
- 39** Кадва лав дино тумэнди и тумарэ бэяцэнди, колэнди, ко дур, и всаворэнди,
кас акхарэла амаро Рай Дэл.
- 40** И бут аврэ лавэнца вов уманглэас лэн:
- Фэрисавэнпэ калэ хохавэн родостар!
- 41** Кола, ко прили лэско лав, болдэпэ, и приашыле лэндэ андэ кодва дес варикий
трин мия манушэн.
- 42** Онэ ритярэнаспэ апостолонэндирэ сыйтиrimastэ, всавори врьма екхэтанэ
дэнас дума, пхагэнас марно и мангэнаспэ Дэвлэс.
- Жувимос патишимастирэн манушэн**
- 43** Всаворэ мануша сас андэ дар англав Дэл, и апостолоря сикавэнас бут шпэры
и терэнас диворя.
- 44** Всаворэ патикунэ сас екхэтанэ, и вся лэндэ сас гуртоско.
- 45** Онэ битинэнас пэско хулаимос тай барвалимос, и роздэнас всаворэнди,
касти, со сас трэбуй.
- 46** Кажно дес онэ екхэтанэ сас андо храмо, ай пай чера пхагэнас марно, ханас
хамос лошаса и отпхэрнадэ воденца,
- 47** лашарэнас Дэвлэс. Онэ жувэнас андо мищимос всаворэнца манушэнца, и Рай
кажно дес анэлас лэндэ фэрисардэн.

1 Пётро и Иоано жанас кав храмо андэ трито чясо десэско. Андэ кадья врима хотэ сас мангимос.

2 Пашай удара лэх храмостири, савэ акхарэнасп «Шукар», бэшэлас мануш, саво сас банго всаворо пэско жувимос. Лэс кажно дес анэнас и башлярэнас, кай вов тэ мангэл ловэ колэндэ, ко зажал андо храмо.

3 Вов удикхля лэ Пётрос и Иоанос, савэ зажанас андо храмо, тай мангия лэндэр.

4 Пётро и Иоано фартэ вдикхлепэ андэр лэстэ и пхэндэ:

— Подикх пэ амэндэ.

5 Вов вдикхляпэ пэр лэндэ и гындолас, со онэ варисо дэна лэсти.

6 Нэ Пётро пхэндя:

— Руп и сомнак нинай мандэ, а со исин мандэ, кода и дав тути: важ алав Исусоско Христоско андав Назарето вщи и пхир!

7 Вов ля лэс палав право васт тай вазглия. Андэ кодья врима ашыле майсасть элэстирэ чянга и пэрнэ.

8 Вов подхукля, тэридя тай ашыля тэ пхирэл. Тунчи зажыля лэнца андо храмо, пхирэлас и хүкэлас, лашарэлас лэ Дэвлэс.

9 Всаворэ мануша дикхле лэс, сар вов пхирэл и лашарэл Дэвлэс.

10 Онэ ужангле, со када сас кодва, саво бэшэлас пашай Шукар удара храмостириэ кай тэ мангэл ловэ. Онэ на патянас лэ яххэнди тай дивонаспэ колэсти, со тердяпэ.

Пётро пхэнэл лав Дэвлэско

11 Ай сар састьярдо банго на отжалас лэ Пётростар и Иоаностар, тунчи всаворэ мануша дивонаспэ колэсти тай спрастаепэ лэндэ андо тхан, саво акхарэлпэ Соломоностириэ тиндэ.

12 Кала Пётро удикхля када, вов пхэндя лэ манушэнди:

— Мурша Израилёстири! Состар тумэн када дивосарэл? Состар тумэ дикхэн пэ амэндэ кадя, сар наче амэ пэстирия зораса и жужымаса тердэ када, со вов пхирэл?

13 О Дэл Авраамоско, лэ Исаакоско и Иаковоско, Дэл амарэ дадэнго, лашардя Пэстириэ Бутярнэс Исусос, Савэс тумэ прэдинэ и Савэстар отпхэндээз англав Пилато, кала вов камэлас тэ отмукэл Лэс.

14 Тумэ отпхэндээл лэ Свэнтостар и Чячимастар и мангле тэ отмукэл тумэнди колэс, саво умарэлас манушэн.

15 Тумэ умардэ Пхурэдэрэс лэ Жувимастириэс, нэ о Дэл жундярдя Лэс андай мула, и амэ дикхасас када пэстириэ яххэнца.

16 Кадва мануш, савэс тумэ жанэн и дикхэн, патийля андо алав Исусоско, и Вов састьярда лэс англай тумарэ яхха.

17 Пхрала, мэ полав: тумэ и тумарэ пхурэдэра на жанэнас, со терэнас.

18 Нэ кадя о Дэл тердя кода, со пхэнэлас черээ всаворэн пророконэн, со лэ Христости трэбий авэла тэ пэрэндярэл грыжа.

19 Акэ, каисавэн и рисавэн кав Дэл, кай тэ скхосэнпэ бэзэхэ тумарэ,

20 кай авиля лэ Раестар врима тэ чиёл, и кай бишалдя Вов тумэнди лэ Исусос Христос, Савэс Вов майнанглал вытидя тумэнди.

21 Болыбнасти трэбуй сас тэ прилэл Лэс кай врима, кала терэлапэ кода, со дэлмутния вриматар пхэнэнас Дэвлэстар всаворэ Лэстириэ свэнтонэ пророкоря.

22 Моисеё пхэндя:

«Рай, о Дэл тумар,

тховэла тумэнди андай пхрала тумарэ

Пророкос, сар ман.

Кандэн Лэс андэ вся,

со Вов авэла тэ пхэнэл тумэнди.

23 Всаворэ, ко на кандэла колэс Пророкос, авэна вытградэ андав народо».

24 Самуило и всаворэ авэр пророкоря, савэ сас палав лэстэ, дэнас дума, со авэна кала деса.

25 Тумэ — шавэ пророкондирэ и заветостирэ, саво Дэл дя тумарэ дадэнди, кала пхэндя А враамости:

«Кодва, Саво авэла андав тиро родо,
дэла бахт всаворэнди манушэнди пай пхув».

26 Дэл жундярдя андай мулэ Пэстирэс Бутярнэс, майанглал бишалдя Лэс тумэндэ тэ бахталисарэл тумэн и обрисарэл кажнонэс лэстирэ выритонэрындондар.

4

Петро и Иоано англав Синедрионо

1 Кала онэ дэнас дума кай и мануша, лэндэ поджыле рашая, пхурэдэр халавдэнго андэ храмо и садукеёра,

2 савэ холявэнас пэ кода, со онэ сыйярэнас манушэн, тай пхэнэнас, со чөрэз Исусо жундёна мулэ.

3 Онэ линэ лэн тай пхандадэ андо баруно жыкай дэнзор, колэсти со врэма сас кай ряят.

4 Бут мануша, савэ ашунэнас лав, патяйле, и сас кацавэн, ко патяйля, варикай панч мия.

5 Пэ авэр дес стидэпэ андо Иерусалимо лэндирэ майбарэ, пхурэдэра тай сыйяримяра Законостирэ,

6 о Аннас, баро рашай, о Каиафа, о Иоано, и Александро, и авэр андав родо барэ рашаенго.

7 Онэ тховдэ лэн по машкар тай пушле:

— Савя зораса ай савэ алавэса тумэ тердэ када?

8 Тунчи Петро пхэрдиля Свэнтонэ Духоса тай пхэндя лэнди:

— Рая манушэндирэ и пхурэдэрэ!

9 Кала тумэ допушэн адес амэндэр пала лашорындо, саво сас тердо важ наасвало мануш, и пала кода, сар вов састиля,

10 тунчи жанэн тумэ и всаворэ мануша Израилёстирэ, со вов тэрдёл англай тумэндэ састьярдо алавэса Исусостирэса Христостирэса андав Назарето, Савэс тумэ примардэ кав трушул и Савэс о Дэл жундярдя андай мулэ.

11 Вов исин бар, саво отшутэ тумэ, ко терэнас о чер, ашыля англунэ барэса, пэ саво ритярдёл всаворо чер.

12 И нико авэр на дэл о фэрисаримос, колэсти со на дино манушэнди авэр алав талай болыбэн, савэса трэбүй амэнди тэ фэрисавас.

13 Онэ дикхле, со о Петро тай Иоано, мэк и наервалэ и мануша андав народо, нэ всаекх на даранас. И кала онэ ужангле, со кола сас лэ Иусоса, фартэ дивосайле.

14 Онэ кадя ж дикхле састьярдэс манушэс, саво тэрдёлас лэнца, тай лэнди нисо на сас тэ пхэнэн пэ када.

15 Тунчи онэ припхэндэ апостолонэнди тэ выжан андав Синедрионо тай ашыле тэ дэн дума машкар пэстэ:

16 — Со амэнди тэ терас калэ манушэнца? Всаворэнди, ко жувэл андо Иерусалимо, ашундо, со онэ тердэ чячюно диво, и амэнди най сар тэ отпхэндюваскалэстэр.

17 Нэ соб тэ на розжалпэ кадья дума машкар мануша, дараваса лэн тай запхэнаса лэнди, кай тэ на дэн дума палав кадва алав никасти андай мануша.

18 Онэ акхардэ лэн, припхэндэ лэнди майбут тэ на дэн дума и тэ на сыйярэн палав алав Иусоско.

19 Нэ Петро и Иоано пхэндэ лэнди:

— Сындосарэн: чи пав чячимос авэла англав Дэл, кай тэ кандас тумэн майфартэ, сар лэ Дэвлэс?

20 Амэнди най сар тэ на пхэнас кода, со дикхле и ашундэ.

21 Онэ придарадэ лэн тай отмуkle, колэсти со на аракхле, сар тэ марэн лэн, тай колэсти со всаворэ лашарэнас Дэвлэс пала кода, со тердяпэ.

22 Важ кода со колэсти манушэсти, каса тердяпэ диво састьяримаско, сасварикай саранда бэрша.

Мангимос патикунэнго

23 Кала Пётрос тай Иоанос отмуkle, онэ авиле кай пэстирэ пхрала и роспхэндэ, со пхэнэнас лэнди баэрэ раша тай пхурэдэра.

24 Онэ вышандэ и екхэтанэ вазгле огласо кав Дэл и пхэндэ:

— Баро Дэл, Саво тердян болыбэн, пхув, море и вся, со андэ лэндэ!

25 Ту уштэнца дадэс амарэс Давидос, бутярнэс Тирэс, пхэндян Свэнтонэ Духоса: «Состар вазглепэ мануша всаворя пхувьятар и народоря гындуосардэ шушымос?

26 Вазглепэ тхагара пхувьятирэ, и пхурэдэра стидэпэ екхэтанэ пэ Рай Дэл и по Христосо Лэско».

27 Пав чячимос стидэпэ андо кадва форо по Свэнто Бутярно Тиро Иисусо, Савэс Ту помакхлян, Иродо и Понтиё Пилато аврэ народонэнца и народоса Израилёстиреса,

28 соб тэ терэ кода, со Ту майанглал гындуосардян тэ тирэс Пэстирия зораса и воляса.

29 Икхатар, Рай, подикх, сар онэ амэн даравэн, и дэ Тирэ бутярнэнди бидарако тэ пхэнэн лав Тиро.

30 Процырдэ о васт Тиро тай састьяр насвалэн и тер шпэры ай диворя алавэса Свэнтонэ Бутярнэса Тирэса Иисусоса.

31 И пав мангимос лэнго ля тэ тинолпэ о тхан, кай онэ стидэпэ, и пхэрдярдэпэ всаворэ Свэнтонэ Духоса, и пхэнэнас лав Дэвлэско бидарако.

Пхрала жувэн сар екх води

32 Всаворэ патикунэ сас амала екхэ водеса и екхэ гындуоса; и нико на бинэлас пэско хулаимос качи пэстирэса, нэ вся лэндэ сас гуртоско.

33 Апостолоря баря зораса допхэнэнас палав жундимос андай мулэ Раес Иисусос; и баро мицимос сас пэр лэндэ всаворэндэ.

34 На сас машкар лэндэ никас, касти варисо на хутилэлас, колэсти со кола, кастье сас пхув и чера, битинэнас лэн, и анэнас и ловэ битинимастар

35 и тховэнас кай и пэрнэ апостолонэндирэ. И кала ловэ роздэнаспэ кожжноэсти, со касти сас трэбуй.

36 Кадя тердя Иосифо, кас апостолоря акхардэ Варнава (со пэрэндярэлпэ «шаво, саво подритярэл»), левито, родоса андав Кипро.

37 Лэстэ сас пэстири пхув, вов битиндя ла тай андя ловэ и тховдя кай и пэрнэ апостолонэнди.

5

Анания тай Сапфира

1 Ехк мурш, савэс акхарэнас Анания и лэстири ромни Сапфира битиндэ хулаимос.

2 Саво-то котор битинимастар вов тховдя кай пэрнэ апостолонэнди. Ай авэр котор гарядя пэсти. Лэстири ромни жанэлас пала кода.

3 Петро пхэндя:

— Анания! Пэр со ту дян Сатанасти тэ пхэрдярэл тиро води, кай ту пхэндян найччимос Свэントонэ Духости, и гаравдян андай цэмин пхувьтири?

4 Кода, со ту битиндян, сас тиро, ай ловэ, со ту прилян, сас тирэ. Пэр со ту тховдян андо тиро води тэ тирэс кадя? Ту пхэндян найччимос на манушэнди, а Дэвлэсти.

5 Кала Анания ашундя кала лава, вов пэля и муля. Бари дар авиля пэ всаворэн, ко ашундэ када.

6 И тунчи тэрнэ мануша вшиле, гытосардэ тэ гаравэн, выандядрэ тай гаравдэ.

7 Ай кала прожыля трин чясоря, авиля и ромни лэстири. Вой на жанэлас, со тердяпэ.

8 Пэтро пушля латар:

— Пхэн манди, палай кацави цэмин тумэ битиндэ э пхув?

— Агэ, — пхэндявой, — палай кацави.

9 Нэ Пэтро пхэндя лати:

— Со када тумэ допхэндэпэ тэ зумавэн Духос Раестирэс? Акэ, зажан андэ удар кола, савэ гаравдэ тирэромэс. Онэ тут выандядрэна.

10 Андэ кадья ж врязма вой пэля пашай пэрнэ лэстири тай муля. Тэрнэ мануша зажыле и аракхле ла муляса. Онэ выандядрэ тай гаравдэлаша лако ром.

11 И бари дар авиля пэ всавори кхандири и пэ всаворэ, ко ашундя када.

Апостолоря терэн диворя и шпэры

12 Апостолоря пээтирэ вастэнца терэнэс бут шпэры и диворя машкар мануша. Всаворэ патикунэ екхэтанэ стидэнспэ андэ Соломоностирэ тиндэ.

13 Авэр мануша даранас тэ приашэн лэндэ, ай народо лашарэлас лэн.

14 Майбут мануша авэлас кав патявимос андо Рай, и мурша и жувля.

15 Мануша выандядрэнэс лэ насовалэн пэ гасы и тховзанс пэ паторя тай пэ паринда, кай и лэ Пэтrostири тень, кала вов прожалас, тэ пэрэл пэ варикастэ андар лэндэ.

16 Андо Иерусалимо андай пашутнэ фороря зжанаспэ бут мануша. Онэ анэнэс насовалэн и колэн, андэр каастэ сас найжүжэ духоря, и всаворэ састирэнэспэ.

Апостолонэн гонисарэн палав алав Иисусоско

17 Баро рашай и всаворэ, ко сас пэ лэстири риг, андав стидимос садукеёско, пхэрдярэпэ холяса пэ лэн,

18 и схутилдэ лэ Апостолонэн и запхандадэ андо фороско баруно.

19 Нэ ангело Раеско и рят отпхэрнадя удара андав бар, выандядрэ лэн тай пхэндя:

20 — Жантэ, тэрдён андо храмо и пхэнэн всаворэ кала лава жувимастирэ лэ манушэнди.

21 Онэ кангле тай жыле дэнзор андо храмо и сыйтэрэнас.

Андэ кодья врязма барэ рашая и кола, савэ сас лэнца, авиле и стидэ Синедрионо, акхардэ всаворэн пхурэдэрэн андай шавэ Израилэстирэ и бишалдэ андо баруно бутярнэн тэ анэн лэ апостолонэн.

22 Нэ бутярнэ, сар авиле, на аракхле лэн андо баруно и рисайле тай допхэндэ:

23 — Амэ дикхле, со барунэстирэ удара мишто затердэ и пашай лэндэ тэрдён халавдэ, нэ кала отпхэрнадэ удара, андрэ никас на аракхле.

24 Кала пхурэдэр халавдэнго андо храмо и барэ рашая ашундэ кала лава, фартэ дивосайле и на жанэнас, сар тэ полэн кода, со тердяпэ.

25 Авиля варико и допхэндя лэндэ:

— Акэ мурша, савэн тумэ запхандадэ андо баруно, тэрдён андо храмо и сыйтэрэн лэ манушэн.

26 Тунчи халавдэнго пхурэдэр жыля лэ бутярнэнца и андя лэн най зораса, колэсти со даранас лэ манушэндар, кай тэ на помарэн лэн барэнца.

27 Кала андэ лэн и тховдэ андо Синедрионо, баро рашай пушля лэн:

28 — Чи на запхэндэ амэ тумэнди тэ сыйярэн палав кадва алав? Ай тумэ пав всаворо Иерусалимо розандядэ тумаро сыйяримос и камэн тэ ужылисарэн амэн пала миринос Каластирэс Манушэс.

29 Пётро и апостолоря пхэндэ пэ када:

— Трэбуй тэ кандаас фэдэр Дэвлэс, сар лэ манушэс.

30 Дэл амарэ дадэндиро жундядра андай мулэ Иисусос, Савэс тумэ тховдэ по каштуно трушул тай умардэ.

31 О Дэл вазгия Лэс правонэ вастэса и тердя Пхурэдэрэса и Фэрисаримареса, кай тэ дэл Израилёсти каисаримос и эртисаримос лэ бэзэхэндар.

32 Допхэнимаря калэсти амэ и Свэнто Духо, Савэс о Дэл дя колэнди, ко кандэл Лэс.

33 Кола, савэ сас котэ, кала ашундэ када, росшынэнаспэ холятар и камэнас тэ умарэн лэн.

34 Тунчи вшия андо Синедрионо екх фарисеё, савэс акхарэнас Гамалиило, сыйяримари Законоско, пативало англай всаворэ мануша. Вов припхэндя тэ вынандярэн апостолонэн пэ найбари врязма,

35 и пхэндя манушэнди андав Синедрионо:

— Мурша Израилёстирэ! Погындон машкар пэстэ палай кала мануша, со лэнца тэ терэн.

36 На фартэ дэлмут авиля Февда, саво сикавэлас пэс пала варисаво баро мануш, и лэстэ приашыле варикай штаршэл мануша. Нэ вов сас умардо, и всаворэ, ко кандэлас лэс, розжылепэ, и на ашыляяпэ никас.

37 Тунчи пала лэстэ сас Иуда галилеянино. Вов авиля, кала сас запистросаримос, тай андядра пала пэстэ бутэн манушэн. Нэ вов муля, и всаворэ, ко кандэлас лэс, розжылепэ.

38 И иххатар пхэнав тумэнди: ашавэн калэн манушэн и отмукэн лэн. Сар када воля и рындо манушэндирэ, то онэ росперэнапэ,

39 ай сар Дэвлэстэр, тумэ нисар на роспхагэна лэн. Фэрисавэн, кай тумэ тэ на ашэн вражжымаренца Дэвлэсти.

Кола, савэ сас котэ, кангле лэс.

40 Онэ акхардэ апостолонэн и припхэндэ тэ марэн лэн чюкнянца. Тунчи запхэндэ лэнди тэ пхэнэн палав алав Иисусоско тай отмуkle лэн.

41 Онэ жыле андав Синедрионо и лошавэнас, со лэнди выпэля патив тэ прилэн лажаимос палав алав Иисусоско.

42 Всаворэ деса андо храмо и пай чера на пэрэашэнас тэ сыйярэн и тэ пхэнэн Радосаво Лав палав Иисусо Христосо.

6

Апостолоря вытидэн эхта бутярнэн

1 Андэ кала деса, кала сыйярнэн ашыля майбут, элинисторя* линэ тэ холявэн пэ евреёра пала кода, со лэндирэ пхивлянди нисо на дэнас, кала роздэнас хамо кажно дес.

2 Тунчи дэшудуй апостолоря акхардэ бутэн сыйярнэн тай пхэндэ:

— Наймишто амэнди тэ ашавас лав Дэвлэско тай тэ подас о хамос пэ мисяля.

3 Акэ со, пхрала, вытидэн машкар пэстэ эхта манушэн, пала савэ лашо дэн дума, савэ пхэрдядрэ Духоса и годяся, и тховаса лэн пэ кадья бути.

4 Ай амэ всавори врязма аваса тэ мангаспэ Дэвлэс и тэ терас бути лавэса.

* **6:1** Элинисторя — кадя акхарэнас евреёнэн, савэ дэнас дума на по евреёнэндирэ, ай по греконэндирэ шыбы.

⁵ Всаворэнди чялиля кадъя дума, и вытидэ Стэфанос, муршэс, саво пхэрдярдо патвимаса и Свэнтонэ Духоса, Филипос, Прохорос, Никанорос, Тимонос, Пармэнос и Николаёс, прозелигос[†] андай Антиохия.

⁶ Лэн тховдэ англай апостолоря, савэ мангле Дэвлэс тай тховдэ и васт пэр лэндэ.

⁷ О лав Дэвлэско барёлас, и андо Иерусалимо ашэлас майбут сыйярнэ. Кадя ж и андай рашая фартэ бут патяйле.

Стэфанос схутилэн

⁸ Ай о Стэфано, пхэрдярдо мищимаса и зораса, терэлас барэ диворя и шпэры андо нароо.

⁹ Лэ Стэфаноса ашыле тэ ханпэ коисавэ андай синагога, сави проакхарди Либертинорэндири[‡]. Кордэ кадя ж хирэнас мануша андай Киринея и Александрия, тай андай Киликия и Цэкни Азия.

¹⁰ Нэ лэндэ на сас, со тэ отпхэнэн ла годяти и Духости, савэса вов пхэнэлас.

¹¹ Тунчи онэ подпхэндэ коисавэн тэ пхэнэн:

— Амэ ашундэ, сар вов пхэнэлас бэзэхалэ лава пэ Моисеё и по Дэл.

¹² Онз вазгле о нароодо, пхурэдэрэн и сыйяримарен Законостирэн, нахукле пэр лэстэ, хутилдэ тай андярдэ андо Синедрионо.

¹³ Котэ тховдэ хохавнэн допхэнимарен, савэ пхэнэнас:

— Кадва мануш на пэрэашэл тэ пхэнэл бэзэхалэ лава пэ кадва свэнто тхан и по Законо.

¹⁴ Амэ ашундэ, сар вов пхэнэлас, со Исусо андав Назарето розмарэла кадва тхан и пэрэтэрэла сыйяримос, саво пэрэдя амэнди Моисеё.

¹⁵ Всаворэ, ко бэшэлас андо Синедрионо, дикхэнас пэр лэстэ и дикхле, со муй лэско, сар муй ангелоско.

7

Стэфано дэл дума англав Синедрионо

¹ Тунчи баро рашай пушля Стэфанос:

— Када чячес кадя?

² Вов пхэндя:

— Пхрала и дада, выашунэнтэ! Кала амаро дад Авраамо инке на пэрэтрадя андо Харано и живэллас андэ Месопотамия, Дэл славако авиля лэстэ

³ и пхэндя: «Ужа пай пхув тири и лэ родостар тирэстар и жа кай пхув, сави Мэ тути сикавава».

⁴ Тунчи вов жыля пай пхув халдеёндири и авиля андо Харано. Ай котар, кала муял лэско дад, о Дэл пэрэндярдя лэс андэ кадъя пхув, андэ сави тумэ икхатар жувэн.

⁵ И на дя лэсти пэр латг нисаво котор пхув, а пхэндя, со отдэла кадъя пхув лэсти и лэстира бэяцэнди тунчи, кала вов инке сас бибэяцэнго.

⁶ И пхэндя лэсти о Дэл: «Тирэ бэяцэ авэна найчяченца андэ найпэстири пхув, и лэн терэна бутярнэнца, и онэ андярэна грыжа штаршэл бэрша.

⁷ Нэ Мэ, — пхэндя о Дэл, — авава тэ сындосарав кодва нароодо, кастэ онэ авэна бутярнэнца, и тунчи онэ выжана и авэна тэ тэлэн Манди пэ кадва тхан».

⁸ Тунчи Вов дя лэсти завето тэ обшиянлэлэ. Авраамо, кала бэяндиля Исаако, обшияндя лэс андо охто дес. Кав Исаако бэяндиля Иаково, ай кав Иаково — дэшудуй патриархоря.

⁹ Патриархоря завистятар битиндэ Иосифос андо Египто. Нэ Дэл сас лэса

[†] 6:5 Прозелито — мануш, савас общында и вов приля иудаенго патвимос. [‡] 6:9 Либертиноря — кадай дума пала кола евреёри, савэ сас залиэн андай Иудея андэ Римско пхув, кай тэ авэн бутярнэнца. Тунчи онэ сас отмукле пэ воля, ай лэндир бэяцэ рисайле палпалэ андэ Иерусалимо.

10 и фэрисардя лэс всаворя грыжатар. Вов дя Иосифости годи и мищимос англав фараоно, тхагар египтонэнго. Ай кодва тердя лэс пхурэдэрэса андо Египто и андо всаворо пэско чөр.

11 Тунчи авиле бокхалимос и бары грыжа пэ всаворэ пхувъя Египто и Ханаано. Амарэ дада никай на аракхэнас хамос.

12 Кала Иаково ашундя, кай андо Египто исин марно, вов бишалдя кордэ амарэ дадэн екх моло.

13 Ай сар онэ авиле авэр моло, Иосифо отпхэрнадялэ пэстирэ пхралэнди, и фараоно ужангля пала Иосифоско родо.

14 Тунчи Иосифо бишалдя и акхардя пэстирэс дадэс Иаковос и всаворо пэско родо, савэс сас эхтадэш панч манушэн.

15 Иаково авиля андо Египто. Котэ муле вов и дада амарэ.

16 Лэндирэ тилоря сас пэрэнандярдэ андо Шэхемо и тховдэ андо склэпо, саво тиндя Авраамо палай рупунэ кай шавэ Хаморостирэ андо Шэхемо.

17 И сар майпашэ сас врьяма, кала тердялэ кода, пала со Дэл солахалас лэ Авраамости, амарэн манушэн ашэлас майбут андо Египто,

18 жыкай кодъя врьяма, сар андо Египто взагляпэ авэр тхагар, саво на жанэлас Иосифос.

19 Кадва хрантимаса обжаласлэ амарэ народоса, стасавэлас дадэн амарэн, терэлас кадя, соб онэ тэ вышон пэстирэн бэяцэн, савэ найдэлмут бэяндиле, кай кола тэ мэрэн.

20 Андэ кадъя врьяма бэяндиля Моисеё, вов сас шукар англав Дэл. Трин шон лэс праварэнас андо чер лэстирэ дадэстэ.

21 А сар сас шуто, лэс ля щей фараоностири и барярдя лэс, сар пэстирэс шавэс.

22 Моисеё сас сытыядо всаворя египтостирти годяти и сас зорало андэ лава и рындоря.

23 Сар лэсти ашыля саранда бэрш, авиля лэсти по води тэ авэл кай пэстирэ пхрала, шавэ Израилёстирэ.

24 И удикхля, сар еххэсти лэндар египтянино терэлас бида. Вов тэрдиля пала лэстэ, отпотиндя вражымарести и умардя египтянинос.

25 Вов гындолас, лэстирэ пхрала полэна, со Дэл лэстирэса вастэса дэл лэнди фэрисаримос, нэ онэ на полинэ.

26 Пэ авэр дес, кала коисавэ андай лэндэ марэнаслэ, вов авиля и закамля тэ андярэл лэн кав миро, пхэндя: «Муршалэ, тумэ ж пхрала! Пэр со терэн бида екх еххэсти?»

27 Нэ кодва, ко терэлас бида лэ пашутнэсти, отшутя лэс пэстар тай пхэндя: «Ко тут тховдя пхурэдэрэса и сындомареса паша амэндэ?

28 Чи на камэс ту и ман тэ умарэс, сар арати умардя египтянинос?»

29 Кала Моисеё ашундя кала лава, вов нашля тай ашылялэ тэ жувэл андэ пхув Мадиамо, котэ андэ лэстэ бэяндиле дуй шавэ.

30 Кала прожыля саранда бэрша, андэ мал, пашав плай Синаё кав Моисеё авиля ангело андэ ят, сави пхаболас андо пусаимаско кустарнико.

31 Моисеё дивосайля, кала удикхля када. Вов поджыля тэ подикхэл пэ када и ашундя котар гласо лэ Раеско:

32 «Мэ Дэл тирэ дадэнго, Дэл Авраамоско, Исаакоско и Иаковоско». Моисеё тиноласлэ даратар и на ваздэлас пэстирэ якха.

33 Рай пхэндя лэсти: «Злэ пэрналэ пай тирэ пэрнэ, колэсти со пхув, пэ сави ту тэрдэс — свэнто.

34 Мэ дикхлем, сар стасавэн Мэрно нароо андо Египто, и ашундэм лэско ровимос, и авилем тэ фэрисарав лэс. Ай икхатар жа, Мэ бишалав тут андо Египто».

35 Калэс Моисеёс, савэстар онэ отпхэндэпэ лавэнца: «Ко тховдя тут пхурэдэрэса и сынодомареса?» — Дэл бишалэл сар пхурэдэрэс и фарисаримарес чөрэс ангелос, саво сикадиля лэсти андэв пусаймаско кустарнико.

36 Кадва выяндярдя лэн тай тердя диворя и шпэры андэ пхув Египто, и андо Лоло море, и андэ мал саранда бэрш.

37 Када кодва Моисеёс, саво пхэндя шавэнди Израилёстириэнди: «Андай тумарэ пхрала о Дэл тховэла тумэнди пророкос, сар тховдя ман».

38 Када кодва, саво стидяпэ андэ мал лэ амарэнца дадэнца и лэ ангелоса, саво дэлас дума лэса по плай Синаё. Када вов приля жундэ лава, кай тэ пэрэдэл амэнди.

39 Амарэ дада на закамле тэ кандэн Моисеёс, нэ отшүтэ лэс тай тходэ андо води тэ рисавэн андо Египто.

40 Онэ пхэндэ Аароности: «Стер амэнди дэвлэн, савэ жана англай амэндэ, пала кода со амэ на жанас, со тердяпэ лэ Моисеёса, саво выяндярдя амэн андай Египтистири пхув».

41 Ай андэ кола деса онэ стердэ гурувэс тай андэ жэртвя идолости и лошавэнас колэсти, со стердэ пэстири вастэнца.

42 Дэл отрисайля лэндар и ашада лэн тэ тэлён чергаенди пав болыбэн, сар пистросардо андэ лила пророкондирэ:

«Чер Израилёско! Чи зашынэнас тумэ,

чи анэнас жэртвоя всаворэ саранда бэрш андэ мал?

43 Тумэ линэ пэса катуна Молохостири,

чиргай тумарэс дэвлэс Ремфанос

тай образоря, савэ тумэ стердэ, кай тэ тэлён лэнди.

Пала када Мэ пэрэандярава тумэн майдур Вавилоностар».

44 Амарэ дадэндэ андэ мал сас Катуна Допхенимастири. Кодва, Ко дэлас дума Моисеёса, припхэндя лэсти тэ терэл ла пав образо, саво кодва дикхля.

45 Кала амарэ дада прилиинэ кадья Катуна, онэ и Иисусо Навиёско заандярдэ ла андэ пхув народонэн, савэн Дэл вытградя англай лэндэ. Кадя сас кай и врязма Давидостири,

46 саво аракхля мицимос англав Дэл и мангэлас Лэстар, кай тэ аракхэл чөр важ о родо Иаковоско.

47 Ай о чер Лэсти стердя Соломоно.

48 Нэ Майбаро на жувэл андэ чера, савэ тердэ манушэнца. Пророко пхэнэл пала када:

49 «Болыбэн — Мэрно троно,

и пхув — када тхан, кай Мэ тховав Пэстири пэрнэ!

Саво чөр тумэ терэна Мандий?

— пхэнэл о Рай.

— Кай тэ авэл тхан Мэ тэ чиовав?

50 Чи най Мэрно васт

вся када стердя?»

51 Тумэ — найкандуунэ мануша барунэ воденца и затердэ канэнца! Тумэ всавори врязма вэрийцвэн Свэнтонэ Духости, сар тумарэ дада, кадя и тумэ!

52 Кас андай пророкоря на гонисарэнас тумарэ дада? Онэ умардэ колэн, савэ пэ англал пхэнэнас, со авэла Чячимаско, ай икхатар тумэ прединэ тай умардэ Лэс!

53 Тумэ прилиинэ о Законо, саво пэрэдинэ тумэнди ангелоря, нэ на ашыле тэ жувэн, сар вов пхэнэл.

Стэфанос марэн барэнца

54 Кала онэ ашунэнас када, холятар росшынэнас водя и стасавэнас данда.

55 Стэфано, пхэрдярдо Свэнтонэ Духоса, вазгия якха по болыбэн тай дикхля слава Дэвлэстири и Иисусос, Саво тэрдёлас пай право риг Дэвлэстар.

56 — Дикхэн, — пхэндя вов, — мэ дикхав отпхэрнадо болыбэн и Шавэс Манушыканэс, Саво тэрдёл пай право риг Дэвлэстар.

57 Нэ онэ зацыпсардэ зоралэ гласоса, затердэ пэстирэ кана и екхэтанэ хукле пэр лэстэ.

58 Онэ выяндярдэ лэс палай форо и ашыле тэ шон андэр лэстэ бара. Допхенимаря тховдэ пэстири йида кай пэрнэ тэрнэ манушэсти, савэс акхарэнас Савло.

59 Кала онэ шонас андо Стэфандо бара, вов приакхардя Иисусос:
— Рай Иисус! Прилэ духо мэрно!

60 Тунчи пэля пэ чянга и фартэ зацыпсайля:
— Рай, мэк на авэл пэр лэндэ кадва бэзэх.

Вов пхэндя кала лава и муля.

8

Гонисарэн патикунэн

1 Савло подритеярэлас кода, со умардэ Стэфанс.

Кола вряматар ашыле тэ гонисарэн иерусалимско кхандири, и всаворэ роспрастаенэ пай Иудея и Самария. Качи апостолоря ашылепэ андо Иерусалимо.

2 Дэвлэкунэ мурша гаравдэ Стэфанс тай фартэ ровэнас пала лэстэ.

3 Ай Савло розмарэлас пэ котора и кхандири. Вов захукэлас андэ чера, выцьрдэлас муршн тай жувлян тай шолас андо баруно.

Филипо пхэнэл Радосаво Лав андэ Самария

4 Ай кола, савэ сас росшутэ, роспхэнэнас Радосаво Лав, каринг онэ тэ на жан.

5 Филипо авиля андэ екх Самариятиро форо и ашыля тэ роспхэнэл котэ палав Христосо.

6 Бут мануша мишто ашунэнас кода, со вов пхэнэлас. Онэ всаворэ сар екх ашунэнас лэс и дикхэнас шпэры, савэ вов терэлас.

7 Колэсти со буттэндар манушэндар выжанас найжууж духоря барэ цыпимаса, ай бут, савэ на пхирэнаса пэрнэнца, и бангэ састирэнасла.

8 И андо кодва форо сас бари лош.

9 Андо кодва форо сас мануш, савэс акхарэнас Симоно. Вов майанглал драбатярэлас и калэса дивосарэлас манушэн андэ Самария. Вов выдэлас пэс палав варисаво баро мануш.

10 Всаворэ мануша, и чёрорэ, и барвалэ, ашунэнас лэс дивоса и пхэнэнас:

— Када исин бари зор Дэвлэстери.

11 И мишто ашунэнас лэс колэсти, со вов бут врьяма дивосарэлас манушэн пэстирэ драбатиrimаса.

12 Нэ кала онэ патяйле лэ Филипости, саво роспхэнэлас палав Тхагаримос Дэвлэско и алав Иусоско Христоско, бут мурша и жувля болдэпэ.

13 Симоно кадя ж патяйля и приля болдимос. Вов всавори врьяма пхирэлас палав Филипо, диволастэ шпэрэнди и барэ чюдонэнди.

14 Кала апостолоря андо Иерусалимо ашундэ пала кода, со андэ Самария прилиинэ лав Дэвлэско, онэ бишалдэ лэндэ Пэтрос и Иоанос.

15 Онэ авиле и манглэпэ Дэвлэс, кай кола, савэ обрисайле кав Дэл, тэ прилэн Свэнтонэс Духос,

16 колэсти со инке ни пэр касть лэндар Духо на сжалас, онэ качи сас болдэ андо алав Раеско Иусоско.

17 Тунчи Пётро и Иоано тховдэ пэр лэндэ и васта, и онэ прилиинэ Свэнтонэ Духос.

18 Кала Симоно дикхля, со Духо дэллэ, кала апостолоря тховэн и васта, вов процырдя лэнди ловэ

19 тай пхэндя:

— Дэнтэ и манди кацави зор, кай кодва, пэр кастэ мэ тхава и васта, тэ лэл Свэнтонэ Духос.

20 Нэ Пэтро пхэндя:

— Мэк тиро руп хасавэла екхэтанэ туса, сар ту гындос, со тинэса даро Дэвлэско палай ловэ.

21 Тутэ нинай кацаво право тэ терэс кадварындо, колэсти кай о води тиро найчачюно англав Дэл.

22 Каисав андо кадва бэзэх и манг Раес, кай Вов тэ эртийарэл тути, со ту гындосас андо тиро води.

23 Мэ дикхав, со ту пхэрдярдо кэрконя завистяса и спхангло лэпунзэнца, саво исин найчачимос.

24 Симоно пхэндя:

— Мангэн пала мандэ Раес, кай манца тэ на терэлэл нисо, со тумэ пхэндэ.

25 Кала апостолорын тэрэашыле тэ допхэнэн и тэ роспхэнэн хотэ лав Раеско, онэ жыле палпалэ андо Иерусалимо, ай пав дром роспхэнэнас Радосаво Лав андэ бут самаряниностирэ гава.

Евнухо андай Эфиопия прилэл Радосаво Лав

26 Ангело Раеско пхэндя Филиппости:

— Жа по юго, по дром, саво андярэл пай мал андав Иерусалимо андэ Газа.

27 Филиппо вшияа и жылия. Андэ кодья ж врьяма хотэ сас эфиопско евнухо, рай Кандакияко, ла тхагарняко эфиопонэнго, саво дикхэлас палай всавори сартари. Вов авэлас тэ тэлэл Дэвлэсти андо Иерусалимо

28 и иххатар рисавэлас черэ. Вов бэшэлас андэ пэско урдон и бинэлас лил лэ пророкоско Исаяско.

29 Духо пхэндя Филиппости:

— Поджа кай кадва урдон и жа паша лэстэ.

30 Филиппо поджыля кай урдон и ашундя, со хотэ бинэллэ лил пророкоско Исаяско:

— Ту полэс кода, пала со бинэс? — пушля Филиппо.

31 — Сар манди тэ полав, кала манди нико на подпхэнэла? — пхэндя евнухо и акхарда Филиппос тэ зажал и тэ бэшэл лэса андо урдон.

32 Ай бинэлас вов кадва тхан Пистросаримаско:

«Сар бакро, Вов сас андярдо по зашыннимос,
и сар бакроро ашэл мулком англай кола, савэ стрижын лэс,
кадя ж и Вов на отпхэрнавэлас Пээстирэ ушта.

33 Вов сас лажавардо, и Лэсти на динэ чячюно сыйндо.

Ко роспхэнэла пала Лэско родо?

Ай лэско жувимос залэллэ пхувьятар».

34 Евнухо мангия Филиппостар:

— Пхэн манди, пала кастэ катэ пхэнэл пророко, пала пэстэ чи пала кастэ авэрэстэ?

35 Тунчи Филиппо ля тэ роспхэнэл акалэ тханэстар Пистросаримастар и пхэндя лэсти Радосаво Лав палав Иисусо.

36-37 Онэ майдур традэнас и подтрайдиле кав паи.

— Дикх, аэл паи, — пхэндя о евнухо. — Со манди на дэл тэ прилав болдимос?*

38 Вов тэрдярдя о урдон, лэдүй онэ, Филиппо и евнухо, зажыле андо паи, и Филиппо болдя лэс.

* **8:36-37** Андэ коисавэ гречески манускрипторя инке исин кацавэ лава: «Филиппо пхэндя: "Сар патяс всаворэ водеса, то болдэл". Евнухо пхэндя: "Мэ патяв, со Иисусо Христосо — када Шаво Дэвлэско"».

39 Ай кала онэ выжыле андав пай, Духо Раеско андярдя Филипос, и евнухо майбут лэс на дикхля. И лошаса лагля майдур пэстирэ дромэса.

40 Ай Филипо попэля андо форо Ашдодо. Вов роспхэнэлас Радосаво Лав пай всаворэ фороря, сар на авиля андэ Кесария.

9

Савло обрисарэлпэ кав Дэл

1 Савло сас холяко пэ Раестирэ сыйтарнэн и фартэ камэлас тэ умарэл лэн. Вов авиля кав баро рапай

2 и мангля лэстар лила, пистросардэ кай синагоги Дамаскостирэ, соб, сар вов аракхэла варикас, ко приритядёл Исусостирэс сыйтаримости, саво акхарэлпэ Дром, тунчи лэстэ сас зор тэ спхандэл лэн и тэ андярэл андо Иерусалимо.

3 Кала вов подладзлас кав Дамаско, лэсти, катар на ляпэ запхабиля андай всаворэ рига удуд пай болыбэн.

4 Вов пэля пэ пхув и ашундя гласо:

— Савло! Савло! Сости ту гонисарэс Ман?

5 — Ко Ту, Рай? — пушля Савло.

— Мэ Иисусо, Савэс ту гонисарэс.

6 Вщи и жа андо форо. Котэ тути пхэнэна, со трэбуй тэ терэс.

7 Мануша, савэ традэнэас екхэтанэ лэ Савлоса, ашыле сар муторя: онэ ашундэ гласо, нэ никакс на дикхле.

8 Савло взгляпэ пай пхув, нэ кала вов отпхэрнадя якха, нисо на дикхэлас. Лэс линэ палай васт тай андярдэ андо Дамаско.

9 Трин дес вов сас коро и нисо на халас и на пэлас.

10 Андо Дамаско жувэлас сыйтарно, савэс акхарэнас Анания. Рай пхэндя лэсти андо дикхимос:

— Анания!

— Акэ мэ, Рай, — пхэндя кодва.

11 Рай пхэндя лэсти:

— Жа пэ гаса, сави акхарэлпэ «Ворта», андо чер Иудаско и пуш котэ Савлос, саво акхарэлпэ Тарсянино. Вов иксхатар мангэлпэ Дэвлэс.

12 Вов дикхля андо дикхимос манушэс пав алав Анания, саво авиля и тховдя пэр лэстэ и васт, кай вов тэ дикхэл.

13 Анания пхэндя:

— Рай, мэ ашундэм бутэндар пала кадва мануш, сар вов тердя бут бида Тирэнди свэнтонэнди андо Иерусалимо.

14 И катэ лэстэ исин баримос барэ рашаендар, кай тэ спхандэл всаворэн, ко приакхарэл Тиро алав.

15 Нэ Рай пхэндя лэсти:

— Жа, колэстар со вов исин Мэрно мануш. Мэ вытидэм лэс, кай вов тэ андярэл Мэрно алав народонэнди, лэндирэ тхагарэнди и шавэнди Израилёстирэ.

16 Мэ сикавава лэсти кода, скачи лэсти трэбуй авэла тэ пэрэжувлэл грыжа пала Мэрно алав.

17 Анания жыля и авиля андо чер, тховдя по Савло и васт тай пхэндя:

— Пхрал Савло, Рай Иисусо, Саво авиля тутэ по тиро дром кардэ, бишалдя ман тутэ, кай түупалэ тэ дикхэс и тэ авэс пхэрдярдо Свэнтонэ Духоса.

18 Андэ кодья ж вроя сар чешуя спэля пай якха кав Савло, и вов ашыля тэ дикхэл. Савло вшилия и приял болдимос.

19 Тунчи вов халия, и лэстэ рисайля зор.

Савло пхэнэл лав Дэвлэско андо Дамаско

И сав вов скачи деса лэ сыйтарнэнца андо Дамаско

20 и андэ кодья ж връяма ашыля тэ роспхэнэл андэ синагоги пала кода, со Иисусо — Шаво Дэвлэско.

21 Всаворэ, ко лэс ашунэлас, дивонааспэ и пхэнэнас:

— Чи на вов гонисарэлас андо Иерусалимо колэн, ко акхарэл кадва алав? Чи на авиля вов кардэ, кай тэ спхандэл и тэ андярэл лэн кай барэ рашая?

22 Нэ Савло инке майбаря зораса роспхэнэлас и терэлас кадя, со иудеёря андо Дамаско на жанэнас, со тэ пхэнэн, кала вов допхэнэлас, со Иисусо исин Христосо.

23 Кала прожыле бут деса, иудеёря допхэндэпэ тэ умарэн лэ Савлос.

24 Нэ Савло ужангия, со онэ гындон тэ умарэн лэс. Кола, савэ камэнас тэ терэн када, рят и дес ажутярэнас пашай удара форостириэ.

25 Нэ лэстирэ сытэрнэ рятияса зму克莱 лэс андэ бари траста дуряса пай форостири стинка.

Савло андо Иерусалимо

26 Савло авиля андо Иерусалимо и камэлас тэ авэл лэ сытэрнэндэ, нэ всаворэ даранас лэстар и на патянас, со вов кадя ж сытэрно.

27 На Варнава ля лэс и андя кай апостолоря и роспхэндэ лэнди пала кода, сар Савло пав дром дикхля лэ Раес, и сар Вов дэлас дума лэса, сар андо Дамаско бидараоко вов роспхэнэлас важ алав Иисусоско.

28 Савло терэлас лэнца екх рындо андо Иерусалимо и бидараоко роспхэнэлас важ алав Раеско.

29 Вов дэлас дума и спорисавэлас лэ элинистонэнца, ай кола камле тэ умарэн лэс.

30 Кала пхрала ужангле пала када, онэ одандярдэ Савлос андэ Кесария, ай котар бишалдэ андо Тарсо.

31 Андэ кодья връяма кхандири пай всавори Иудея, Галилея и Самария сас андо миро, састярэлас тай барёлас, пхирэлас андо дар англав Рай, и Свэнто Духо подритеярэлас ла.

Петро састярэл Энэёс

32 Петро обжалас всаворэн, и закамля тэ авэл кай свэнти мануша, савэ жувэнас андэ Лида.

33 Котэ сас екх мануш, савэс акхарэнас Энэё, вов сас насвало пэрнэнца и на вщелас пав пато охто бэрша.

34 Петро пхэндя лэсти:

— Энэё! Иисусо Христосо састярэл тут. Вщи и стидэ пэско пато.

Андэ кодья ж връяма Энэё вщилия.

35 Кала всаворэ, ко жувэлас андэ Лида и Шароно дикхле лэс састярдэса, онэ обрисайле кав Рай.

Петро жундярэл андай мулэ лэ Тавита

36 Андэ Яфа сас екх сытэрни, савя акхарэнас Тавита, со пэрэндярэлпэ, сар «серна». Вой терэлас бут лашымос и поможысарэлас чёрорэнди.

37 И акэ, андэ кадья връяма вой занасвайля и муля. Ла обхаладэ и тховдэ упрэ андо чер.

38 Ай сар и Лида сас найдур лэ Яфатар, сытэрнэ бишалдэ котэ дуен манушэн, бо ашундэ, со Петро котэ. Онэ мангле лэс:

— Ав сыйго амэндэ!

39 Петро жыля лэнца и кала авиля, лэс проандярдэ упрэ андо чер. Паша лэстэ стидэпэ всаворэ пхивля. Онэ ровэнас и сикавэнас лэсти и йида, сави сувлэлс Серна, кала сас жунди.

40 Петро выбишалдя всаворэн котар, тэрдиля пэ чянга и мангляпэ Дэвлэс. Тунчи обрисайле кав трупо и пхэндя:

— Тавита, вщи!

Вой отпхэрнадя и якха, удикхля Пэтрос и бэшля.

41 Вов ля ла палав васт и поможысадя тэ вщел. Тунчи вов акхардя свэнтонэн манушэн и пхивлян и отда ла Тавита жундяса.

42 Пала када ашыля ашундо пай всавори Яфа, и бут мануша патяйле андо Рай.

43 Пётро сас андэ Яфа инке бут деса и жувэлэс кай Симоно морцэндиро.

10

Корнилиё дикхэл дикхимос

1 Андэ Кесария сас мануш, савэс бушонас Корнилиё, вов сас шэлэнго андав полко, саво акхарэллэ Италийско.

2 Корнилиё, сар и всаворо лэско йири, сас пативало мануш и даралас Дэвлэстар, бут поможысадэлэс чёрорэнди и всавори врязма мангэласпэ Дэвлэс.

3 Еххвар, варикай андэ трин чясоря десэско, вов дикхля дикхимос. Вов чячес дикхля Дэвлэстирэс ангелос, саво авиля лэстэ и пхэндя:

— Корнилиё!

4 Вов подикхля пэр лэстэ дараса и пхэндя:

— Со, рай?

Ангело пхэндя:

— О Дэл сэрэсардя пала тутэ, колэсти со тиро мангимос и тирэрындоря важ чёрорэн вазглэпэ Лэстэ.

5 Бишал манушэн андэ Яфа, кай онэ тэ акхарэн Симонос, савэс бушон Пётро,

6 вов ашыляпэ кав морцэндиро Симоно андо чер пашай море.

7 Кала ангело, саво дэлас дума лэса, ужыля, Корнилиё акхардя дуен пэстирэн бутярнэн и пативалэс халавдэс, саво терэлас лэстиро припхэнимос.

8 Вов пэрэпхэндя лэнди вся, со тердяпэ, тай бишалдя андэ Яфа.

Пётро дикхэл дикхимос

9 Па авэр дес, варикай андэ епаш дес, кала и бишалдэ инке сас андо дром и поджанас кай форо, о Пётро зажыля пэ упраи по чер тэ мангэллэ Дэвлэс.

10 И акэ вов бокхайля и фартэ закамля тэ хал. Кала гытонас тэ хас, лэ Пётрости сас дикхимос.

11 Вов дикхля отпхэрнадо болыбэн и варисо мэзимэ по бугло паринд, саво змукэлэспэ пэ пхув и подритьярдёласпэ штарэ ригэндар.

12 Андэ кадва паринд сас бут всаворо штарэпэрнэнго ското, сапа тай чириклия.

13 Тунчи гласо пхэндя лэсти:

— Пётро, вщи, зашын и ха.

14 — Ни пала со, Рай! — пхэндя Пётро. — Мэ никала на хавас нисо магрисардо и найжужу.

15 Тунчи гласо пхэндя лэсти авэр моло:

— На акхар магрисардэсэ кода, со Дэл жужардя.

16 Кадя сас трин молоря, ай тунчи паринд сас вазгло пэ болыбэн.

17 Пётро на полэлас, со кадва за дикхимос вов дикхля, и андэ кодъя ж врязма мурша, савэн бишалдя Корнилиё, ростушле, кай о чер Симоноско, поджыле кав чер и линэ тэ ажутярэн пашай удара.

18 Онэ ашыле тэ пушэн, чи катэ ашыляпэ о Симоно, савэс бушон Пётро.

19 Пётро инке гындолас палав кадва дикхимос, Духо пхэндя лэсти:

— Тут родэн трин мануша.

20 Вщи и змукэлэспэ тэлэ. Жа лэнца и ни пала со на пуш, колэсти со када Мэ бишалдэм лэн.

21 Тунчи Пётро змукляпэ тэлэ и пхэндя колэнди манушэнди:

— Мэ кодва мануш, савэс тумэ родэн. Пав саво рындо тумэ авиле?

22 Онэ пхэндэ:

— Пхурэдэр шэлэн халавдэн Корнилий, мануш чячимаско, саво дарал Дэвлэстар, касти отдэн патив всаворэ мануша иудеёндирэ, приля свэнтонэстар ангелостар припхэнимо тэ акхарэл тут андо пэско чер, кай тэ ашунэл вся, со ту лэсти пхэнэса.

23 Тунчи Пэтро акхардя лэн андо чер и приля лэн вудестар. Ай пэ авэр дес Пэтро жыля лэнца, и лэса жыле коисавэ пхрала андай Яфа.

Пэтро андо чер кав Корнилий

24 Пэ авэр дес онэ авиле андэ Кесария. Корнилий ажутярэлас лэн. Вов акхардя пэстирэ родос и пашутнэн амалэн.

25 Кала Пэтро авиля, Корнилий поджыля лэстэ, пэля кай лэстирэ пэрнэ и тэлия.

26 Нэ Пэтро вазгля лэс и пхэндя:

— Вщи, мэ кадя ж исин мануш.

27 Пэтро дэлас дума лэ Корнилиёса и зажыля андо чер, кай стидэпэ бут мануша.

28 Вов пхэндя лэнди:

— Тумз жанэн, со иудеёсти наши тэ дэл дума манушэса андав авэр народи и тэ зажал лэстэ андо чер. Нэ о Дэл сикадя манди, кай мэ ни екхэ манушэс тэ на акхарав магрисардэса ай найжүжэса.

29 Колэсти, кала пала мандэ авиле и акхардэ, мэ жылем лэнца и на пушавас ни пала со. Аканы мэ пушав түмэндар, сости тумэ бишалдэ пала мандэ?

30 Корнилий пхэндя:

— Штэр дес палпалэ андэ кадя ж врязма, андо трито чясо мэ мангаваспэ Дэвлэс пэстэ чэрэ, сар сыго англай мандэ тэрдиля мануш андэ йида, сави свэнтояспэ.

31 «Корнилий, — пхэндя вов, — тиро мантимос ашундо, ай рындоря важ чёрорэн сэрэсардя о Дэл.

32 Бишал манушэн андэ Яфа палав Симоно, савэс акхарэн Пэтро, вов ашыляпэ чөрэ кав Симоно морцэндиро пашай море».

33 Мэ сыго бишалдэм пала тутэ, и мишто кай ту авилян. Иххатар амэ всаворэ катэ англав Дэл и камас тэ выашунас кода, со Рай пхэндя тути.

34 Пэтро ашыля тэ пхэнэл:

— Аканы мэ полав, со о Дэл чячимаса на дикхэл по муй,

35 и машкар всаворэн манушэн, савэ жувэн андэ люма, Лэсти чялёл кодва, ко дарал Лэстар и терэл пав чячимос!

36 Вов бишалдя шавэнди Израилёстирэ Радосаво Лав пала кода, со амэндэ авэл миро лэ Дэвлэса чөрэз Исусо Христосо, Саво исин Рай всаворэ манушэнго.

37 Тумз жанэн пала кода, со терэласпэ пай всавори Иудея, ла Галилейтар, пала кода Иоано акхарэлас манушэн тэ болэнза.

38 О Дэл помакхля Свэнтонэн Духоса и зораса Исусос андав Назарето. Вов пхирэлэс, терэлэс лашэ рындоря и састьярэлас всаворэн, ко сас андэ васт кав Бэнг, колэсти со Лэса сас о Дэл.

39 Амэ допхэнимаря всаворэсти, со Исусо терэлас андэ пхув иудеёндир и андо Иерусалимо. Лэс умардэ, примардэ кав трушул.

40 На о Дэл по трито дес жундярдя Исусос андай мулэ и дя Лэсти тэ сикадэллэлэ манушэнди —

41 най всаворэнди манушэнди, нэ амэнди, допхэнимаренди, савэн о Дэл вытида майянглал. Ай амэ хасас и пасас Лэса тунчи, кала Вов жундиял андай мулэ.

42 Вов припхэндя амэнди тэ россхэнас манушэнди и тэ допхэнас пала кода, со Исусо исин вытидо Дэвлэса Сындомари жундэнго и мулэнго.

43 Пала Лэстэ допхэнэн всаворэ пророкоря, со кажнонэсти, ко патяла андэр Лэстэ, эртисарэнапэ бээзэха чөрэз алав Исусоско Христоско.

44 Пэтро инке дэлас дума, кала пэ всаворэн, ко ашунэнас лэс, сжyля Свэнто Духо.

45 Патикунэ андай обшындэ, савэ авиле лэ Пэтроса, дивосайле, со даро Свэнтонэ Духоско сас дино кадя ж манушэнди аврэ народонэндар.

46 Колэсти со онэ ашунэнас, сар кола дэнас дума пэ найжанглэ шыба и лашарэнас лэ Дэвлэс. Тунчи Пэтро пхэндя:

47 — Ко запхэнэла тэ болдэнпэ андо пай колэнди, савэ прилинэ Свэнтонэ Духос, сар и амэ?

48 Пэтро пхэндя, кай онэ тэ прилэн болдимос важ алав Исусоско Христоско. Тунчи хулая мангле лэ Пэтрос кай тэ ашэллэ лэнца пэ качи деса.

11

Пэтро роспхэнэл лэ пхралэнди пала пэско дикхимос

1 Апостолоря и пхрала андэ Иудея ашундэ, со авэр народоря прилинэ лав Дэвлэско.

2 Колэсти, кала о Пэтро авиля андо Иерусалимо, патикунэ андай обшындэ иудеёра ашылы тэ пхэнэн лэсти, со лэнди када на чялёт.

3 — Ту пхирдян кай найобшындэ и хасас лэнца, — пхэнэнас онэ.

4 Тунчи Пэтро ашыля екх пала аврэстэ тэ роспхэнэн лэнди, сар вся тердяпэ.

5 — Мэ сымас андо форо Яфа и мангавас Дэвлэс, — пхэндя вов, — и андэ кодья врэма манди сас дикхимос: варисо, сар баро паринд, саво подритярдёлласпэ штарэ ригэндар, змуkэласпэ пав болыбэн ворта кордэ, кай мэ сас.

6 Мэ задикхлем кордэ и дикхлем штарэпэрнэнго черутнэско и вэшэско ското, сапэн и чириклен.

7 Тунчи мэ ашундэм гласо, саво пхэнэлас манди: «Пэтро, вщи, зашын и ха».

8 Ай мэ пхэндэм: «Нисар нащи, Рай! Мэ никала на хавас нисо магрисардо и найжкужо».

9 Гласо пав болыбэн пхэндя манди дуйто моло: «На акхар магрисардэса кода, со Дэл жужардя».

10 Кадя сас трин молоря, и тунчи када вся сас взагло упалэ пэ болыбэн.

11 Андэ кодья ж врэма пашав чер, кай мэ сымас, тэрдиле трин мануша, бишалдэ манди андай Кесария.

12 Духо пхэндя манди тэ жав лэнца и ни пала со тэ на пушав. Акэ, кала шов пхрала жыле манца, и амэ авиле андо чер колэстэ, ко ман акхардя.

13 Вов роспхэндя амэнди пала кода, сар вов дикхля пашай пэстэ ангелос, саво тэрдёллас и пхэнэлас лэсти: «Бишал манушэн андэ Яфа палав Симоно, савэс бушон Пэтро,

14 и вов пхэнэла тути лава, сар ту и всаворо тиро йири авэна фэрисардэ».

15 Кала мэ ашылем тэ дав дума, пэр лэндэ сжyля Свэнто Духо кадя ж, сар Вов сжyля майланглэ пэ амэндэ.

16 Тунчи манди авиле по гындо лава Раестириэ: «Иоано болэлас андо пай, ай тумэ авэна болдэ Свэнтонэ Духоса».

17 Колэсти, сар о Дэл дя лэнди кодва ж даро, со и амэнди, савэ патяйле андо Рай Исусо Христосо, ай ко мэ кацаво, кай тэ на домукав лэ Дэвлэс?

18 Кала онэ када выашундэ, онэ вся полинэ и лашардэ лэ Дэвлэс тай пхэндэ:

— Душол, о Дэл дя тэ каисавэн и аврэ народонэнди, кай и онэ тэ прилэн жувимос!

Хандири андэ Антиохия

19 Ай кола, савэн рострадэ, кала гонинас палав Стэфено, дожыле кай Финикия, Кипро и Антиохия и роспхэнэнас лав Дэвлэско качи иудеёнди.

20 Коисавэ лэндар сас андай Кипро и Киринея. Онэ авиле андэ Антиохия и роспхэнэнас Радосаво Лав палав Рай Иисусо кадя ж и лэ элинистонэнди.

21 Васт лэ Раеско сас лэнца, и фартэ бут паттайле и обрисайле кав Рай.

22 Лав пала када дожыля кай кхандири андо Иерусалимо. Котар бишалдэ андэ Антиохия Варнавас.

23 Кала Варнава авиля и дикхля мищимос Дэвлэско, вов радосайля и мангэлас всаворэн тэ ашэнтэ андэ пэстирэ водя чячюнэ англав Рай.

24 Варнава сас лашо мануш, пхэрдярдо Свэнтонэ Духоса и патявимаса. И бут мануша ашыле тэ патян андо Рай.

25 Тунчи Варнава жыля андо Тарсо, кай тэ аракхэл котэ лэ Савлос.

26 Вов аракхля лэс тай андя андэ Антиохия. Всаворо бэрш онэ ашэнаспэ андэ антиохийско кхандири и сыйярэнас бутэ манушэн. Андэ Антиохия майанглал лэ сыйярэн линэ тэ акхарэн христианоря.

27 Андэ кадья връяма андав Иерусалимо андэ Антиохия авиле коисавэ пророкоря.

28 Ех лэндар, савэс акхарэнас Агаво, вшиля и пхэндя лэ Духостар, со пай всавори пхув авэла баро бокхалимос, со и тердиля андэ връяма, кала сас императоро Клавдиё.

29 Колэсти сыйярэн закамле тэ подритярэн ловэнца лэ пхралэн, савэ жувэнас андэ Иудея, касть скачи выжкалас.

30 Онэ кадя и стердэ, тай бишалдэ лэ Варнавас и Савлос тэ андярэн ловэ, савэ онэ стидэ, и тэ отдэн пхурэдэрэнди.

12

Пэтро андо баруно

1 Андэ кадья ж връяма тхагар Иродо схутилдя коисавэн манушэн андай кхандири, кай тэ терэл лэнди бида.

2 Вов прихэндя тэ умарэн мечёса Иаковос, пхралэс Иоаностиирэс.

3 И кала вов дикхля, со иудеёнди када чилия, вов запхандадя лэ Пэтрос андо баруно. Када сас андэ свэнкостиирэ деса Бизакваскатирэ марнэн.

4 Пэтрос запхандадэ андо баруно и тховдэ штар пэ штар халавдэн, тэ дикхэн пала лэстэ. Иродо камля тэ выандярэл лэс кай и мануша, кала прожала и Патради.

5 Пэтро сас андо баруно, ай кхандири пхабардэс мангэласпэ пала лэстэ Дэвлэс.

6 Ряятса, англай кода, кала Иродо камля тэ выандярэл лэс по сындо, Пэтро совэлас машкар дуй халавдэ, спхангло дуе лэпунзэнца, ай инке халавдэ тэрдёнас и дикхэнас пашай удара барунэстиирэ.

7 И акэ, авиля ангело Раеско, и баро ууду свэнтояспэ по тхан, кай сас о Пэтро. Ангело арэсля пай риг Пэтростири и вазгяя лэс сунэстар.

— Вщи майсыго! — пхэндя вов, и лэпунзэ пэлэ пай васта Пэтростиирэ.

8 Ангело пхэндя:

— Об phандюв күщикаса и уряв пэрналэ.

Пэтро тердя кадя.

— Уряв пэстири йида и жа пала мандэ, — пхэндя ангело.

9 Пэтро выжыля палав ангело андав баруно тай на поля, со вся, со терэл ангело, терэллэ чячес. Лэсти сикадиляпэ, со вов дикхэл дикхимос.

10 Онэ прожыле ехэн халавдэн, тунчи машкар аврэн и поджыле кай саструнэ удара, сава андярэн андо форо. Удара ejэнэ отпхэрнадэпэ англай лэндэ, и онэ выжыле. Онэ прожыле ех гаса, и акэ ангело ужыла.

11 Кала о Пэтро авиля андэр пэстэ, вов пхэндя:

— Акана мэ чячимаса жанав, со Рай бишалдя Пэстирэс ангелос и заля ман андай васта Иродостири и фэрисардя бидатар, сави камэнас тэ терэн манди иудеёско народо.

12 Кала Петро поля, со тердяпэ, вов жыля андо чер, кай жувзлас Мария и дэй Иоаностири, савэс инке акхарэнас Марко. Котэ стидэпэ тэ мангэнпэ Дэвлэс бут мануша.

13 Петро помардя андэ удара, и бутярни, савя акхарэнас Роза, жыля кай тэ отпхэрнавэл.

14 Вой ужанглия лэ Петрос пав гласо, и лошатар забистардя тэ отпхэрнавэл удара. Вой прастая палпалэ, кай тэ пхэнэл, со Петро тэрдёл пашай удара.

15 — Ту на андэ пэстири годи, — пхэндэ лати.

Нэ вой инке и инке пхэнэлас лэнди.

— Када лэско ангело, — пхэндэ онэ.

16 Петро майдур марэлас андэ удара, и кала онэ отпхэрнадэ удара и удикхле лэс, фартэ дивосайле.

17 Петро вастэса сикадя кай тэ ашэн мулком и роспхэндя, сар о Рай выандядя лэс андав баруно.

— Роспхэнэнтэ пала када Иаковости и аврэнди пхралэнди, — пхэндя вов и жыля котар андо авэр тхан.

18 Дэнзор халавдэ ашыле тэ прастэн кордэ-кардэ, бо нико на жанэлас, со тердяпэ лэ Петроса.

19 Иродо родэлас лэ Петрос, нэ сар на аракхле лэс, вов допушля халавдэн и припхэндя тэ умарэн лэн. Тунчи Иродо лагля Иудеятар андэ Кесария и сас котэ сави-то времяа.

Иродоско миримос

20 Иродо сас холяко пэ мануша андав Тиро и Сидено. Кола допхэндэпэ машкар пэстэ и авиле кав Иродо. Онэ умангле Бластос, саво сас пхурэдэр андэ тхагарстири града, кай вов подиряэрл лэн, тай мангле кав тхагар о миро, колэсти со лэндири пхув лэлас о хамос андэ тхагарстири пхув.

21 Андэ вытидо дес Иродо урявдя тхагарстири йида, бэшлия пэ троно и пхэнэлас лэнди лав.

22 Мануша ашыле тэ цыписавэн:

— Када гласо дэвлэско, ай на манушэско!

23 Нэ андэ кодья ж времяа ангело Раеско умардя Иродос, колэсти со вов на дя слава лэ Дэвлэсти. Лэс схале чермэ, и вов муля.

24 Ай лав Дэвлэско розжаласпэ майдур и майдур.

25 Варнава и Савло тердэ пэско рындо андо Иерусалимо и рисайле. Онэ линэ пэса Иоанос, савэс инке акхарэнас Марко.

13

Варнава и Савло лэн тэ терэн бути

1 Андэ кхандири андэ Антиохия сас пророкоря и сыйтряимаря: Варнава, Симеоно, саво акхарэнас Нигеро, Луцье андай Киринея, Манаило, саво выбариял якхэтан лэ теттархоса Иродоса, и Савло.

2 Ехвар, кала онэ тэлёнас лэ Раести и сас андо посто, Свэнто Духо пхэндя:

— Отдэнтэ Манди Варнавас и Савлос по рындо, пэ саво Мэ лэн вытидэм.

3 Ай кала прожыле о посто и мангимос, онэ тховдэ пэ лэндэ и васт тай отмуkle лэн.

Варнава и Савло по Кипро

4 Кала дуй пхрала, бишалдэ Свэнтонэ Духоса, жыле андэ Селевкия, ай котар плывисардэ по Кипро.

5 Онэ авиле андо Саламино и котэ пхэнэнас лав Дэвлэско андэ иудеёндирэ синагоги. Иоано кадя ж сас лэнца и поможысарэлас лэнди.

6 Онэ прожыле всаворо острово и авиле андо Пафосо. Котэ онэ дикхле екхэс иудеёс, савэс аххарэнас Вар-Исусо, саво сас чяяклуно и хохавно пророко.

7 Вов сас паша римско проконсуло Сергиё Павло, манушэс баря годяса. Проконсуло аххардя Варнавас и Савлос тай камля тэ ашунэл лав Дэвлэско.

8 Нэ кадва Элимо (лэско алав пэрэндярэллэ «чяяклуно») терэлас вся, кай тэ отритяэрэл проконсуulos лэ патявимастар.

9 Тунчи Савло, вов жэ Павло, пхэрдиля Свэntonэ Духоса, подикхля ворта по Элимо

10 тай пхэндя:

— Шаво Бэнгэско, вражымари всаворэ чячимасти, пхэрдярдо хохавимаса и найжужымаса. Кала ж ту пэрэашэса тэ римосарэс вортателэ дрома Раестиэрэ?

11 О васт Раеско обрисардо пэр тутэ, ту коравэса и сави-то врьяма на авэса тэ дикхэс кхамэско удууд.

И андэ кодья ж врьама авиле пэ якха Элимостэ калимос и рят, и вов ашыла тэ пхирэл кордз-кардэ тай тэ родэл варикас, ко андярэла лэс палав васт.

12 Кала о проконсуло дикхля, со тердяпэ, вов дивосайля Раестиэрэ сятияrimasti и патяйля.

Бути важ о Рай андэ писидийско Антиохия

13 Павло и всаворэ, ко сас лэса, плывисардэ андав Пафосо и авиле андэ Пергия, сави сас андэ Памфилия. Котэ о Иоано ашадя лэн и рисайля андо Иерусалимо.

14 Андай Пергия онэ жыле майдур, андэ писидийско Антиохия. Андэ субота онэ авиле андэ синагога и бэшле.

15 Тунчи, кала пробиндэ андав Законо и Пророконэн, пхурэдэра синагогако бишалдэ, кай тэ пхэнэн лэнди:

— Пхралалэ, сар исин тумэндэ лав, кай тэ подритярэн манушэн, пхэнэн.

16 Павло вшилия, взгля о васт и пхэндя:

— Мурша Израилёстирэ и всаворэ, ко дарал Дэвлэстар, ашунэнтэ ман!

17 О Дэл амаро народоско, Израилёско вытидя амарэн дадэн. Вов взгля лэн, кала онэ сас андо Египтостири пхув, и выандярдя лэн котар зоралэ вастэса.

18 Саранда бэрша о Дэл додикхэлэс пала лэндэ андэ мал.

19 Вов вымардя андо Ханаано эхта народонэн и отдя лэндирэ пхувъя амарэ дадэнди.

20 Кадя прожыля варикай штар шэла пандэша бэрша. Тунчи вов дэлас лэнди сындомарен жыкай пророко Самуило.

21 Ай тунчи нароо мангя пэсти тхагарас, и Дэл дя лэнди Саулос, шавэс Кхишостиэрэс, андав родо Вениаминоско. Сауло сас тхагараса саранда бэрша.

22 Тунчи о Дэл зля лэ Саулос пав тхагаримос и тховдя Давидос. И пхэнэлас пала лэстэ: «Мэ аракхэм Давидос, шавэс Иесеёстирэс. Вов Манди кав води, и вов терэла вся, со Мэ камав».

23 Сар о Дэл и солахадя, Вов дя лэ Израилёсти андав родо Давидоско Фэрисаримарес Исусос.

24 Жыкай врьама, кала авиля Исусо, Иоано аххарэлас всаворо народо Израилёско тэ каисавэн тай тэ болэнпэ.

25 Кала Иоано пэрэашэлэс тэ терэл пэстири бути, вов пхэндя: «Пала кастэ тумэ ман прилизн? Мэ на Вов. Нэ палал мандэ жал Кодва, Савэстэ мэ на ашав тэ роспхандав Лэсти пэрнэлэ».

26 Пхралалэ, бэяцэ Авраамостиэрэ родостар и кола, савэ даран Дэвлэстар! Кадва лав фэрисаримаско сас бишалдо амэнди!

27 Кола, ко жувэлас андо Иерусалимо, и лэндирэ пхурэдэра на ужангле Лэс. Онэ сындосардэ Лэс и калэса тердэ кода, со пхэнэнас лава пророкондирэ, савэ бинэнпэ кажно суботнё дес.

28 Онэ на аракхле андэ Лэстэ нисави ужылимос, пала со Лэс тэ умарэн, нэ всаекх вымангле Пилатостар, кай Лэс тэ умарэн.

29 Кала онэ тердэ кода, со пала Лэстэ сас пистросардо, онэ злинэ Лэс пав трушул и тховдэ андо склэпо.

30 Нэ о Дэл жундярдя Лэс андай мулэ.

31 И бут деса кола, савэ авиле Лэса Галилеятар андо Иерусалимо, дикхле Лэс. Ай икхатар онэ допхэнэн када англай мануша.

32 Кадя ж и амэ икхатар роспхэнас тумэнди Радосаво Лав: кода, пала со о Дэл дя лав амарэнди дадэнди,

33 Вов тердя важ амэнди, лэндирэ бэяцэ, кала жундярдя Иисусос андай мулэ. Сар андо дуйто писалмо пистросардо:

«Ту Шаво Мэрно, адес Мэ бэяндэм Тут».

34 Ай пала кода, со о Дэл жундярдя Лэс андай мулэ, кадя со Лэско тило никала на дикхэла прахо, Вов пхэндя кадя:

«Мэ дава тумэнди свэнто баихалимос Давидоско,

саво на парувэлапэ».

35 И андэ авэр тхан Вов пхэндя:

«Ту на дэса Свэнтонэсти Тирэсти тэ дикхэл прахо».

36 Давидо андэ пэстири врязма терэлас бути пай воля лэ Дэвлэстири, нэ вов муля, и лэс гарадэ лэстирэ дадэнца, и тило лэско ашыля прахоса.

37 Нэ Кодва, Кас о Дэл жундярдя андай мулэ, на ашыля прахоса.

38 Пхрала, колэсти мэ камав, кай тумэ тэ жанэн, со черэз Иисусос тумэнди роспхэнэллэ эртисаримос лэ бэзэхэндар. Андо Законо Моисеёско на сас зор тэ террэл тумэн жужэнца,

39 нэ всаворо, ко патяла андо Иисусо, авэла жужо.

40 Дикхэн, кай тумэнца тэ на терэллэ кода, пала со пхэнэнас пророкоря:

41 «Подикхэн кола, ко асанпэ,

дивосавэна и хасавэна!

Мэ терава андэ тумарэ деса кацаво,

андэр со бы тумэ никала на патянас,

сар тумэнди тэ роспхэнэн пала када».

42 Кала Павло и Варнава выжанас андай синагога, лэн мангле тэ дэн дума пала када андэ авэр субота.

43 Мануша розжылепэ, нэ бут иудеёрия и прозелиторя, савэ тэлёнэс лэ Дэвлэсти, жыле палав Павло и Варнава, савэ умангэнас лэн, соб онэ тэ ашэнпэ андо мицимисс лэ Дэвлэско.

44 Андэ авэр субота стидиля всаворо форо, кай тэ ашунэн лав Раеско.

45 Кала иудеёрия дикхле скачи манушэн, онэ фартэ холяйле и линэ тэ акушэн Павлос.

46 Нэ Павло и Варнава пхэндэ лэнди бидарако:

— Лав Дэвлэско трэбуй сас майанглал тэ роспхэнэллэ тумэнди. Нэ сар тумэ на прилэн лэс и на бинэн, со тумэ пативалэ, кай тэ прилэнvakоско жувимос, амэ акана жас кай найиудеёрия.

47 Кадя припхэндя амэнди о Рай:

«Мэ тердэм тут удудэса важ народоря,

соб ту тэ андярэс фэрисаримос жыкай майдурутни пхув».

48 Кала найиудеёрия ашундэ када, онэ радионаспэ и лашарэнас лэ Раес пала Лэско лав, и всаворэ кола, савэ сас вытидэ важ vakоско жувимос, патяйле.

49 Лав Раеско розжыляя пай всавори кодья пхув.

50 Нэ иудеёра подмардэ жувлян андай пативалэ йирия и пхурэдэрэн андав форо и кола линэ тэ гонин Павлос и Варнавас и выгградэ лэн андав лэнго тхан.

51 Тунчи онэ обмардэ о прахо пай пэстирэ пэрнэ и жыле андэ Икониё.

52 Сытаярнэ ж пхэрдёнас лошаса и Свэнтонэ Духоса.

14

Андэ Икониё

1 Андэ Икониё Павло и Варнава зажыле андэ иудеёндири синагога и пхэнэнас кадя, со патяйле фартэ бут иудеёрия и грекория.

2 Ай иудеёрия, савэ отпхэндэпэ тэ патян лэнди, вазgle пэ пхрала найиудеёнэн и тховдэ андэ лэндирэ водя вражымос.

3 Нэ Павло и Варнава сас котё бут врьяма. Онэ бидарако пхэнэнас палав Рай, Саво допхэнэлас лав палав Пэско мищимос и дэлас лэнди зор тэ терэн диворя и шпэры.

4 Кола, ко жувэлас андо кадва форо, розжылепэ машкар пэстэ, екх подритярэнас иудеёнэн, ай авэр — апостолонэн.

5 Нэ кала найиудеёрия тай иудеёрия екхэтанэ пэстирэ пхурэдэрэнца камле тэ лажаварэн и тэ марэн лэн барэнца,

6 онэ ужангле пала када и нашле андэ фороря Ликаониятире, Листра тай Дэрвия и паша лэндирэ пхувья.

7 Котэ онэ майдур роспхэнэнас Радосаво Лав.

Андэ Листра

8 Андэ Листра жувэлас мануш, насвало пэрнэнца; вов сас бангэса пэстирэ бэяндимастар и никала на пхирэлас. Вов бэшэлас

9 и ашунэлас, со пхэнэлас Павло. Павло подикхля пэр лэстэ и удикхля, со колэстэ исин патявимос, кай тэ састьярэлпэ.

10 — Вщи пэ пэстирэ пэрнэ! — гласно пхэндя Павло.

Кодва вшилия и ашылия тэ пхирэл.

11 Мануша дикхле, со тердя Павло, и линэ тэ цыписавэн пэ ликаониятири шыб:
— Амэндэ авиле дэвла андо манушыкано образо.

12 Онэ акхардэ Варнавас Зевсоса, ай лэ Павлос Гермесоса, колэсти со вов андярэлас и дума, сар пхурэдэр.

13 Англав форо сас храмо Зевсоско, и лэско рашай андя кай форостириэ удара гуруүэн и вэнкоря. Вов камэлас екхэтанэ лэ манушэнца тэ анэл лэнди жэртва.

14 Кала апостолоря Варнава и Павло ашундэ пала када, онэ росшынде пэстири ийда, впрастае кай мануша тай линэ тэ цыпин:

15 — Мануша, со тумэ терэн? Амэ кацавэ ж мануша, сар и тумэ, андэ тумэнди Радосаво Лав, и камас, кай тумэ тэ ашавэн шушэн идолонэн и тэ обрисавэн кав жундо Дэл, Саво тердя болыбэн, пхув и море тай вся, со андер лэндэ.

16 Андэ дэлмутни врьяма Вов домукля народонэнди тэ пхирэн пэстири дромэнца,

17 нэ на пэрэашэлэс тэ пхэнэл пала Пэстэ, терэлэс лашымос, дэлас брышынд болыбнастар тай плодоря андэ пэстири врьяма, дэлас хамос и пхэрдярэлас лошаса тумарэ водя.

18 Калэ лавэнца апостолоря барэ пхаримаса тердярдэ манушэн, соб онэ тэ на анэн лэнди жэртва.

19 Нэ иудеёрия, савэ авиле андай Антиохия и Икониё, пэрэцырдэ манушэн пэ пэстири риг. Онэ лэ Павлос мардэ барэнца и выцырдэ палав форо, колэсти со гындонас, со вов муло.

20 Нэ кала сытаярнэ стидэпэ паша лэстэ, Павло вшилия и жыля палпалэ андо форо. Ай пэ авэр дес вов и Варнава жыле котар андэ Дэрвия.

Апостолоря рисавэн андэ сирийско Антиохия

21 Андэ кадва форо онэ роспхэнэнас Радосаво Лав кадя, со бут мануша ашыле Раестиэр сыйярнэнца. Тунчи онэ рисайле андэ Листра, Икониёй и Антиохия.

22 Онэ подритярэнас лавэнца сыйярнэн и мангэненас, кай онэ тэ ашэнпэ састэ андо патявимос. Онэ пхэнэнас:

— Амэнди тэрбуй тэ пэрэандярас бут грыжа, англай колэ, кала амэ аваса андо Тхагаримос Дэвлэско.

23 Анда всаворэ кхандиря Павло и Варнава тховдэ пхурэдэрэн, манглепэ постоса тай пэрэдинэ лэн Раести, андо Саво онэ патяйле.

24 Тунчи онэ прожыле Писидия тай авиле андэ Памфилия.

25 Онэ пхэнэнас лав Дэвлэско андэ Пергия тай авиле андэ Аталия.

26 Ай андай Аталия апостолоря плывисардэ палпалэ андэ Антиохия. Котар онэ, пав мищимос Дэвлэско, сас отдинэ по рындо, саво онэ и стердэ.

27 Кала онэ авиле, стидэ кхандирти тай роспхэндэ палай вся, со о Дэл тердя чөрэз лэндэ, и сар Вов отпхэрнадя удар важ патявимос найиудеёнди.

28 Котэ апостолоря бут вряза сас екхэтанэ лэ сыйярнэнца.

15

Пхурэдэрэнго кхандирятире стидэнпэ андо Иерусалимо

1 Андай Иудея андэ Антиохия авиле мануша, савэ сыйярэнас лэ пхралэн:

— Сар тумэ на авэна обшындэ пав запхэнимос Моисейско, тумэ на фэрисарэнапэ.

2 Черэз када онэ бут молоря ханаспэ лэ Павлоса и Варнаваса. Тунчи пхрала прилиинэ, со лэ Павлости, Варнавасти тай аврэнди тэрбуй тэ жан андо Иерусалимо, кай тэ дэн дума пала када лэ апостолонэнца и пхурэдэрэнца.

3 Кола, кас бишалдяя кхандирти, прожанас Финикия тай Самария и роспхэнэнас хотэ, сар патяйле авэр народоря. Кадай дума анэлас бари лош всаворэнди пхралэнди.

4 Кала онэ авиле андо Иерусалимо, лэн прилиинэ кхандирти, апостолоря и пхурэдэрэ. Онэ роспхэндэ, со о Дэл тердя чөрэз лэндэ.

5 Нэ патикунэ андай фарисеёско стидимос пхэнэнас, со найиудеён тэрбуй тэ обшынэн и тэ припхэнэн лэнди, кай онэ тэ жувэн пав Закону Моисейско.

6 Апостолоря тай пхурэдэра стидэпэ, соб тэ роздикхэн кадва рындо.

7 Онэ бут вряза дэнас дума пала када, ай тунчи Пётро вишия и пхэндэй:

— Пхралалэ, сар тумэ жанэн, прожыля бут вряза колэ десэстар, кала о Дэл вытидаа ман тэ роспхэнав Радосаво Лав найиудеёнди, соб и онэ тэ патян.

8 О Дэл жанзл водя манушэндирэ, и Вов дя долпхэнимос колэсти, со прилэл найиудеён, кала дя лэнди даро Свэнтонэ Духос кадя ж, сар и амэнди.

9 Вов жужкардя лэндирэ водя чөрэз патявимос, ай икхатар англав Лэстэ амэ кацавэж, сар и онэ.

10 Тунчи пэр со тумэ холярэн лэ Дэвлэс колэса, со тховэн пэ сыйярнэндирэ кора гамо, саво на сас зор тэ андярэн най амарэ дадэнди, най амэнди?

11 Нэ амэ патяс, со амэн фэрисарэл мищимос лэ Раеско Иисусоско кадя ж, сар и лэн.

12 Тунчи всаворэ ашыле мулком тай ашундэ, со роспхэнэнас Варнава и Павло палаш шперы и диворя, савэ о Дэл тердя чөрэз лэндэ машкар найиудеёрга.

13 Кала онэ пэрэашыле тэ дэн дума, Иаково пхэндя:

— Пхралалэ, выашунэнтаа ман.

14 Симоно роспхэндя амэнди пала кода, сар о Дэл англуюно моло камля тэ стидэл важ Пэско алав народо андай найиудеёндирэн.

15 Када подритярэн пророкондирэ лава, савэ пхэнэн:

16 «Тунчи Мэ рисавава
тай инкэ екх моло тховава катуна Давидостири,
сави пэля.

Мэ терава упала кода, со роспхагло,
и ваздава ла,

17 кай авэр мануша
тай всаворэ народоря,
савэ сас акхардэ Мэрнэ алавэса,
ашыле тэ родэн лэ Раес.

Кадя пхэнэл Рай, Саво терэл када.

18 Када жангло дэлмутня врятатар».

19 Колэсти мэ бинав, со амэнди на трэбуй тэ тховас нисаво пхаримос важ
найиудеёра, савэ обрисаван кав Дэл.

20 Нэ тэ пистросарас лэнди лил, кай тэ на магрисавэн идолонэнца, тэ ритярэнэ
майдур лубимастар, тэ на хан мас скотостар, саво сас тасадо, и тэ на пэн о рат.*

21 Колэсти со Законо Моисеёско дэлмутня врятатар бинэллэх какжно субота андэ
синаоги андо какжно форо.

22 Тунчи апостолоря и пхурэдэра екхэтанэ всаворя кхандиряса линэ тэ вытидэн
машкар пэстэ коискача манушэн и тэ бишалэн лэн лэ Павлоса и Варнаваса андэ
Антиохия. Онэ вытидэ Иудас, савэс инке акхарэнас Вар-Сава, и Силас. Кала мурша
сас пхурэдэра машкар пхрала.

23 Онэ пистросардэ кацаво лил:

«Пхрала апостолоря тай пхурэдэра —
пхралэнди андай найиудеёра, савэ жувэн андэ Антиохия, Сирия тай Киликия.
Тэ авэн бахталэ!

24 Амэ ашундэ, со коисавэ мануша, савэ авиле амэндар, пхэндэ тумэнди кацавэ
лава, андай савэ тумэнди ашыля наймишто по води. Нэ амэ на бишаласас лэн.

25 Колэсти амэ всаворэ екхэтанэ закамле тэ вытидас машкар амэндэ скачи
манушэн тай тэ бишалас лэн тумэндэ екхэтанэ амарэ пативалэ пхралэнца
Павлоса и Варнаваса,

26 савэ отдэн пэско жувимос пала алав амарэ Раеско Иисусоско Христоско.

27 Амэ бишалас тумэндэ кадя ж лэ Иудас и Силас, соб онэ алавэнца тэ допхэнэн
кода, со амэ пистросардэ.

28 Свэнто Духо и амэ на камас тэ тховас пэр тумэндэ нисаво пхаримос, сар качи
акэ со:

29 Тэ на хан хамос, саво анэнаспэ андэ жэртва идолонэнди, и мас скотостар, саво
сас тасадо, тэ на пэн о рат и на терэн лубимос.† Сар авэна кадя тэ терэн, тумэнди
мишто авэла.

Тэ авэн састэ!»

30 Бишалдэ пхрала жыле тай авиле андэ Антиохия, стидэ котэ и кхандири тай
пэрэдинэ о лил

31 Кала мануша пробиндэ о лил, лошавэнас лавэнди, савэ подритярдэ лэн.

32 О Иуда тай Сила, савэ сас пророкоря, пэстирэ лавэнца подритярдэ и састярдэ
о патявимос лэ пхралэнго.

33-34 Онз сас котэ сави-то врязма, и пхрала отму克ле лэн мироса палпалэ кав
апостолоря.‡

35 Павло лэ Варнаваса ашылепэ андо Антиохия, кай онэ бутэ аврэнца пхралэнца
сыйярэнас и роспхэнэнас лав Раеско.

* **15:20** Андэ коисавэ гречески манускрипторя инке исин кацавэ лава: «Тай, кай на терас аврэнди кода, со на камас пэсти». † **15:29** Андэ коисавэ гречески манускрипторя инке исин кацавэ лава: «И тэ на терэн аврэнди кода, со на камэн пэсти». ‡ **15:33-34** Андэ коисавэ гречески манускрипторя инке исин кацавэ лава: «Нэ Сила закамля тэ ашэллэ, ай Иуда рисайля андо Иерусалимо».

Павло лэ Варнаваса розжаннэ

36 Прожыла сави-то връма и Павло пхэндя лэ Варнавасти:

— Авэн жаса кай и пхрала пай всаворэ фороря, кай амэ роспхэнасас лав Раеско, и дикхаса, сар лэндэ жан рындоря.

37 Варнава камэлас тэ лэл пэса Иоанос, савэс акхарэнас Марко,

38 нэ Павло на закамля тэ лэл пэса колэс, ко ашадя лэн андэ Памфилия тай на терэлас лэнца бути.

39 Павло и Варнава похалепэ машкар пэстэ и кажно жыля андэ пэстири риг. Варнава ля лэ Маркос и плывисардя андо Кипро.

40 Ай Павло вытида пэсти Силас. Пхрала отдинэ лэс по мищимос Раеско, и вов жыля андо дром.

41 Вов прожалас черэр Сирия тай Киликия и подритярэлас лавэса и кхандиря.

16

Тимофеёй жал лэ Павлоса и Силаса

1 Тунчи Павло авиля андэ Дэрвия и Листра. Котэ жувэлас сыттарно, савэс акхарэнас Тимофеёй. Лэстири дэй сас иудейка и патялас андо Рай, ай дад сас греко.

2 Палав Тимофеёй сас лаши дума лэ пхралэндэ андай форо Листра тай Икониёй.

3 Павло закамля тэ лэл лэс пэса андо дром. Тай важ иудеёря, савэ жувэнас котэ, обшынди лэс, важ кода со всаворэ жанэнас, со дад Тимофеёско сас греко.

4 Онэ пхирэнас андав екх форо андо авэр, пхэнэнас всаворэнди патикунэнди тэ терэн кода, со прилинэ апостолоря тай пхурэдэра андо Иерусалимо.

5 Андэ кхандиря патикунэ ашэнас майсастэ андэ патявимос, и кажно дес лэн ашэнас майбут.

Павло дикхэл андо дикхимос манушэс андай Македония

6 Онэ прожанас черэр Фригия тай Галатийско пхув, нэ Свэнто Духо на домукля лэн тэ роспхэнэн лав андэ Цыкни Азия.

7 Кала онэ поджыле кай Мисия, стидэпэ тэ жан андэ Вифиния, нэ Духо Иусоско на домукля лэн.

8 Тунчи онэ прожыле Мисия и авиле андэ Троасо.

9 Ай рятяса лэ Павлости сикадиля дикхимос: лэстэ авиля мануш андай Македония, вов тэрдёлас и мангэлас Павлос:

— Ай андэ Македония и поможысар амэнди!

10 Тунчи пала кадва дикхимос амэ полям, со о Дэл акхарэл амэн тэ пхэнас Радосаво Лав, и сыго гытосардямпэ тэ жас андэ Македония.

Лидия отпхэрнавэл пэско води важ о Рай

11 Андав Троасо амэ плывисардям ворта андэ Самофракия, ай котар пэ авэр дес андо Неаполи.

12 Андав Неаполи амэ жылям андэ Филипоря, римостири колония и майпхурано форо пай кодья риг Македониятири. Котэ амэ сас коискачи деса.

13 Тунчи андэ суботнё дес амэ выжылям палай форостири э удара кай и лэн. Амэ гындосардз, со котэ сас тхан важ мангимос. Амэ бэшле и линэ тэ дас дума лэ жувлянца, савэ котэ стидэпэ.

14 Котэ машкар лэндэ сас екх жувли, сави тэлёлас лэ Дэвлести. Ла акхарэнас Лидия, вой сас андав форо Фиатира. Вой битинэлас кучютни сынё-лоли материя. Вой ашунэлас Павлос и о Рай отпхэрнадя лако води тэ прилэл, со пхэнэлас о Павло.

15 Тунчи вой и кола, савэ жувэнас андо лако чер, прилинэ болдимос, и вой акхардя амэн пэстэ чэр.

— Кала тумэ бинэн ман, сар патявимастири англав Рай, тунчи авэн и пожувэн мандэ чэрэ, — мангэлас вой амэн и умангия.

Андэ Филипоря Павлос и Силас пхандавэн андо баруно

16 Екхвар, кала амэ жасас кав тхан, кай мангэнаспэ Дэвлэс, пав дром амэн дикхля бутярни, андэ сави сас драбатиримаско духо. Драбатиримаса вой анэлас барз ловз пэстирэнди хулаэнди.

17 Вой жалас палав Павло и пала амэндэ и цыписавэлас:

— Кала мануша — бутярнэ Майбарэ Дэвлэстирэ! Онэ роспхэнэн тумэнди, сар тэ фэрисарэнпэ!

18 Вой када терэлас кажно дес, и кала лэ Павлости вся када надохаля, вов обрисайля и пхэндя лэ духости:

— Важ алав Иисусоско Христоско мэ припхэнав тути: выжва андар латэ!

Андэ кодъя ж врязма о духо выжыля латар.

19 Кала латира хулая полинэ, со лэндэ хасайля надия тэ затерэн ловэ, онэ хутилдэ лэ Павлос и Силас и цырдэ по форо кай рая.

20 Онз андэ лэн кай форостирэ рапа и пхэндэ:

— Кала мануша — иудеёря, и онэ ваздэн манушэн андо амаро форо.

21 Онз роспхэнэн кода, со амэнди, римлянёнэнди, наши ни тэ прилас, ни тэ терас.

22 Бут мануша кадя ж ваздинэпэ по Павло и Сила, и рапа припхэндэ тэ злэн пай лэндэ йида и тэ марэн лэн рулянца.

23 Лэн фартэ мардэ тай пхандадэ андо баруно, ай лэ халавдэсти барунэстар припхэндэ мишто тэ дикхэл пала лэндэ.

24 Кала халавдо приля кадва припхенимос, вов запхандадя лэн андрал андо баруно и спхангля лэнди пэрнэ каштунэ лэпунзэнца.

25 Варийк андэ ешашрят Павло и Сила мангэнаспэ Дэвлэс и дилянца лашарэнас лэ Дэвлэс, ай авэр барунаря ашуунэнас лэн.

26 И акэ, пхув ля фартэ тэ тинолпэ, кадя со фундаменто барунэско ашыля тэ пхирэл риг ригатар. Всаворэ удара отпхэрнадэпэ, и всаворэ барунарендэ спэле лэпунзэ пай пэрнэ.

27 Кала халавдо барунэстар, саво дикхэлас пала лэндэ, просутялэ тай удикхля, со всаворэ удара барунэстирэ отпхэрнадэ, вов ля мечё и камля тэ мулярэл пэс. Вов гындолас, со всаворэ барунаря нашле.

28 Нэ Павло фартэ зацыписайля:

— На тер пэсти бида! Амэ всаворэ андо баруно!

29 Халавдо мангля удууд, запрастая андо баруно и даратар пэля кай пэрнэ Павлостирэ и Силастирэ.

30 Вов выяндярдя лэн андав баруно и пушля:

— Мэрнэ рапа, со манди тэ терав, соб тэ фэрисавав?

31 — Патя андо Рай Иисусо, — пхэндэ апостолоря. — Фэрисарэсапэ ту, и всаворэ, ко жувэл андо тиро чер.

32 Тунчи онэ пхэндэ лав Раеско лэсти и колэнди, ко жувэлас андо лэско чер.

33 Андэ кодъя ж врязма рягыса о халавдо барунэско халадя лэнди помардэ тхана и сыго сас болдо, вов и всаворэ, ко жувэнас андо лэско чер.

34 Тунчи вов андя лэ Павлос и Силас пэстэ чөрэ и тховдя важ лэнди мэсали. Всаворэ колэнца, ко жувэнас андо лэско чер, вов лошавэлас колэсти, со патяйля андо Дэл.

35 Кала авиля дес, форостирэ рапа бишалдэ пэстирэ бутярнэн припхенимаса:

— Отмукэн калэн манушэн.

36 Халавдо барунэстар пхэндя лэ Павлости:

— Рапа припхэндэ тэ отмукав тумэн! Жан лэ мироса!

37 Нэ Павло пхэндя:

— Амэн бисындоско мардэ англай мануша и на дикхле пэ кода, со амэ римляноря, ай тунчи шутэ амэн андо баруно. Ай икхатар онэ камэн тэ мукэн амэн, кай нико тэ на жанэл? Нат! Мэк онэ ежэнэ авэн и выандярэн амэн катар.

38 Тунчи бутярнэ роспхэндэ пала када лэ раенди, ай онэ здараийле, кала ашундэ, со Павло и Сила римляноря.

39 Онэ авиле и мангле, кай лэн тэ эртисарэн. Тунчи выандярэ лэн андав баруно тай мангле, кай кола тэ ужан андав форо.

40 Кала Павло и Сила выжыле андав баруно, онэ жыле андо чер Лидиятэ. Котэ онэ дикхлепэ лэ пхралэнца и подритядрэ лэн лавэнца. Тунчи онэ жыле.

17

Бути андэ Фесалоника

1 Кала онэ прожыле Амфиполи тай Аполония, авиле андэ Фесалоника, кай сас иудеёско синагога.

2 Павло, сар вов и терэлас всавори врьяма, жыля кордэ и трин суботы сикавэлас лэнди андав Пистросаримос,

3 роспхэнэлас и допхэнэлас, со Христости трэбуй сас тэ грыжоллэ тай тэ жундэл андай мулэ.

— Иисусо, пала Саво мэ тумэнди пхэнав, исин Христосо, — пхэнэлас Павло.

4 **Лэнди патяйле коискачи иудеёря, када ж бут грекоря, савэ тэлёнэас лэ Дэвлэстии и бут жанглэ жувля. Ай всаворэ онэ жыле палав Павло и Сила.**

5 Авэр иудеёря холяйле пала када, онэ аракхле пэ тарго найлашэн манушэн, линэ лэн пэса, стидэ бут манушэн и вазгле всаворо форо. Онэ прастае кав чер Иасоноско, кай тэ родэн котэ Павлос и Силас тай тэ выандярэн лэн манушэндэ.

6 Нэ кала на аракхле лэн котэ, онэ поцырдэ Иасонос и аврэн пхралэн кай форостиэр пхурэдэра.

— Кала мануша ваздэн лэ манушэн пай всавори люма, ай икхатар авиле и кардэ, — цыпсавэнаас онэ,

7 — ай Иасоно приля лэн андо пэско чер. Онэ отжан лэ императоростиэр ухлэнимастар и пхэнэн, со исин авэр тхагар, Савэс акхарэн Иисусо.

8 Народо и форостиэр пхурэдэра ашундэ када тай здараийле.

9 Онэ линэ лав и ловэ пав Иасоно и аврэн, ко сас лэса тай отму克ле лэн.

Бути андэ Верия

10 Тунчи, сар качи авиля и ряят, пхрала отбишалдэ лэ Павлос и Силас андэ Верия. Кала онэ авиле кордэ, жыле андэ иудеёндири синагога.

11 Верийцоря сас майотпхэрнадэ воденца, сар и фесалоникийцоря. Онэ всаворя зораса прилинэ кода, со пхэнэлас Павло, и кажно дес розлэнас Пистросаримос, кай тэ полэн, када чячимос чи нат.

12 Бут лэндар патяйле, када ж патяйле пативалэ гречянки и бут грекоря.

13 Нэ кала иудеёря андэ Фесалоника ужангле пала кода, со Павло роспхэнэл лав Дэвлэско андэ Верия, онэ авиле кордэ и ашыле тэ ваздэн и тэ холярэн лэ манушэн.

14 Тунчи и пхрала бишалдэ лэ Павлос кай море, ай о Сила и Тимофеёй ашылепэ андо форо.

15 Кола, ко проандярэлас лэ Павлос, авиле лэса андэ Афиноря, ай тунчи жыле палпалэ, колэсти со Павло дя лэнди запхэнимос, соб о Сила и Тимофеёй майсыго тэ авэн лэстэ.

Бути лэ Павлостири андэ Афиноря

16 Кала Павло ажутярэлас лэн андэ Афиноря, вов дикхля, со када бут идолоря андэ кадва форо и калэстар лэсти сас наймишто по води.

17 Вов дэлас дума андэ синагога лэ иудеёнца и колэнца, савэ тэлёнэас лэ Дэвлэстии, ай када ж кажно дес пэ тарго колэнца, ко авэлас кордэ.

18 Лэса дэнаас дума коисавэ философоря — эпикуреицоря и стоикоря. Ехх пушэнас:

— Со кадва шыбало камэл тэ пхэнэл?

Ай авэр пхэнэнас:

— Вов пхэнэл амэнди пала авэр дэвла, — колэсти со Павло роспхэнэлас Радосаво Лав палаав Иисусо и Жундимос.

19 Онэ андэ Павлос андо Ареопаго^{*} и мангле:

— Роспхэн амэнди, со када за нэво сыйтряимос, саво ту дэс дума?

20 Ту роспхэнэс пала варисо, со амэ на полас, и амэнди камэлпэ тэ жанас, со када кацово исин.

21 Афинянояри и мануша авэр пхувьятар, савэ жувэнас котэ, майфэдэр камэнас тэ дэн дума чи тэ ашунэн варисо нэво.

22 Тунчи Павло вшиля помашкар Ареопаго тай пхэндя:

— Афинянояри! Мэ дикхав, со тумэ майбут всаворэндар тэлён лэ дэвлэнди.

23 Мэ аракхлем ехх жэртвенико, пэ саво сас пистросардо: «НАЙЖАНГЛЭДЭВЛЭСТИ». Мэ роспхэнав тумэнди пала Калэс Дэвлэс, Савэс тумэ на жанэн, ай всаекх тэлён Лэсти.

24 О Дэл, Саво тердя всавори люма и вся, со пэр латэ, исин Рай болыбнаско и пхувьяко. Вов на жувэл андэ храморя, савэ тердэ вастэнца мануша.

25 Лэ Дэвлэсти на трэбуй, соб и мануша тэ терэн бути Лэсти пэстирэ вастэнца, сар наче Лэсти варисо на хутилэл. Вов Ежено дэл всаворэнди манушэнди жувимос, зор и вся авэр.

26 Ехх манушэстар Вов тердя всаворэ манушэн, соб онэ тэ жувэн пай всавори пхув, и пхэндя кай и кала онэ авэн тэ жувэн.

27 Вов тердя када, соб мануша тэ родэн тай тэ аракхэн Дэвлэс, нэ Вов чячес исин найдур кажнонэс амзэндэр.

28 Акэ, андэр Лэстэ амэ жувас, пхирас тай исин андэ люма, сар пхэнэн коисавэ тумарж поэторя: «Ай амэ исин Лэско родо».

29 Ай кала амэ родо Дэвлэско, амэнди на трэбуй тэ гындосарас, со о Дэл мэзимэ пэ кода, со тердо сомнакастар, рупэстар чи барэстар вастэнца тай годяся манушэндиряса.

30 Майанглал мануша на жанэнас Дэвлэс и Вов запхандэлас пэ када якха, нэ икхатар Вов прихэнэл всаворэнди пай всавори пхув тэ кайсавэн.

31 Вов тховдя дес, кала Вов авэла тэ сындосарэл всавори люма пав чячимос, тай вытидя Манушэс, Саво и авэла сындомари. Вов допхэндя када всаворэнди, кала жундярдя Лэс андай мулэ!

32 Кала онэ ашундэ палай кода, со жундёна и мулэ, коисавэ лэндар ашыле тэ асан, ай авэр пхэндэ:

— Пала када амэ поашунаса тут андэ авэр время.

33 Тунчи Павло жыляттар котар.

34 Коискачи манушэн еххпатив патяйле тай жыле лэ Павлоса. Машкар лэндэ сас Дионисиё, мануш андав Ареопаго, инке жувли, савя акхарэнас Дамарь, и авэр.

18

Бути андо Коринфо

1 Тунчи о Павло жыляттар андай Афиноря и авиля андо Коринфо.

2 Котэ вов дикхля иудеёс, савэс акхарэнас Акила, андав Понто. Вов найдэлмут авиля андай Италия пэстиря ромниса Прискиласа, колэсти со императоро

* **17:19** Плай Аресоско, када акхарэлласэ плай андэ Афиноря, пэ саво стидэнасэ барэ мануша форостар и роздикхэнас рындоря, сар тэ сыйтэрэн, тэ тэлён лэ Дэвлэсти и сар тэ жувэн пав чячимос.

Клавдиё припхэндя всаворэнди иудеёнди тэ ужан андав Римо. О Павло авиля тэ дикхэл лэн.

3 Ай лэндэ сас екх бути лэ Павлоса: онэ терэнас катуны, и колэсти Павло ашыляпэ лэндэ, кай тэ жувэл и терэл бути лэнца.

4 Кажно субота вов дэлас дума андэ синагога лэ иудеёнца тай лэ греконэнца, кай тэ анэл лэн кав патявимос.

5 Ай кала андай Македония авиле Сила тай Тимофеё, о Павло отдя всавори пэстири время кай тэ пхэнэл о лав, допхэнэлас иудеёнди пала кода, со Иисусо исин Христосо.

6 Нэ кала онэ линэ тэ протисавэн и тэ акушэн лэс, вов обмардя о прахо пай пэстири йида тай пхэндя:

— Кала тумэ хасавэна, када тумаро ужылинос! Мэ жужо, и акана жав кай наийдеёр.

7 Тунчи Павло выжыля андай синагога и жыля андо чер, саво сас пашэ. Котэ жувэлэс Титиё Иусто, мануш, саво тэлэлэс лэ Дэвлэсти.

8 Ай пхурэдэр синагогако Криспо и всаворэ, ко жувэнэс андо лэско чер, патайле андо Рай. И бут андай коринфяноря, савэ ашунэнэс лэ Павлос, патайле и сас болдэ андо пай.

9 Еххвар рятияса о Рай пхэндя лэ Павлости андо суно:

— На дара! Роспхэн майбут и на ашмулком.

10 Мэ туса, и нико на терэла тути вырито. Андэ кадва форо исин бут Мэрнэн манушэн.

11 О Павло прожудя котэ екх епашэса бэрш тай сыйярэлэс лэн Дэвлэстирэ лавэсти.

12 Ай андэ кодья время, кала о Галионо сас проконсуло андэ Ахаяя, иудеёрия стидээп, нахукле по Павло тай андэ лэс по сындо.

13 Онэ ашыле тэ ужылисарэн лэс:

— Кадва мануш сыйярэл лэ манушэн тэ тэлён лэ Дэвлэсти най кадя, сар сыйярэл амаро Законо.

14 Павло инке нисо на пхэндя, сар о Галионо обрисайля кай иудеёря:

— Иудеёря, сар тумэ б ужылисарэнэс лэс андэ кода, со вов тердя варисаво найчячимос чи сави-то бида, тунчи мэ выашунавас бы тумэндар.

15 Нэ сар катэ тумэ споринэлэ палав сыйяримос тай алava андав тумаро Законо, тунчи розлэн када ежэнэ. Мэ на камав тэ авав сындумареса андэ кала рындоря.

16 И вов вытрайда лэн андав сындо.

17 Тунчи всаворэ схутилдэ пхурэдэрэс синагогако Сосфэнос тай ашыле тэ марэн лэс англав сындумарэско тхан, нэ Галионо на закамля нисо тэ терэл.

Павло рисавэл андэ Антиохия

18 Ай о Павло сас инке бут деса лэ пхралэнца. Тунчи вов простисайля лэнца и екхэтанэ лэ Прискиласа и Акиласа плывисардя андэ Сирия. Павло варикала дя лав Дэвлэсти и майанглал, сар тэ плывисарэл, вов обшиныдэ пэстириэ бал андэ Кенхрэя.

19 Онэ авиле андо Эфесо. Котэ о Павло ашадя Прискилас и Акилас, ай ежено жыля андэ синагога и дэлас дума лэ иудеёнца.

20 Онэ мангле лэс тэ ашэллэпэ лэнца пэ сави-то время, нэ вов отпхэндя.

21 — Мэ рисавава, сар авэла пэ када Дэвлэстири воля, — пхэндя Павло, ай тунчи простисайля лэнца тай плывисардя андав Эфесо.

22 Вов вщилия пав кораблё андэ Кесария, авиля андо Иерусалимо, дикхляпэ лэ кхандиряса и жыля андэ Антиохия.

23 Павло пожудя сави-то время андэ Антиохия, ай тунчи вов жыля черэз Галатия и Фригия и пав дром подритьярэлэс лавэса всаворэ сыйярнэн.

Апостолстири бути андо Эфесо

24 Тунчи андо Эфесо авиля иудеё, савэс акхарэнас Аполосо. Вов выбариля андэ Александрия и сас ервало мануш, саво мишто жанэллас Пистросаримос.

25 Вов сас сыйярдо Раестирэ Дромэсти и фартэ пхабардэс дэллас дума и пав чичимос сыйярэллас палав Иисусо, ай ежэно качи жанэллас болдимос Иоаноско.

26 Аполосо ашыля бидараоко тэ роспхэнэл андэ синагога, ай кала Прискила и Акила ашунэнас лэс, онэ акхардэ лэс пэстэ и майшишто роспхэндэ лэсти палав Дром Дэвлэско.

27 Тунчи Аполосо камля тэ жал андэ Ахаяя. Пхрала подритярдэ лэс тай пистросардэ лил сыйярнэнди, кай мангле лэн тэ прилэн Аполосос. И кала вов авиля кордэ, бут поможысардя колэнди, ко патайлия пав Дэвлэско мищимос.

28 Пэ якха всаворэндар Аполосо зоралэс допхэнэллас лэ иудеёнди андав Пистросаримос, со Иисусин Христосо.

19

Бути лэ Павлостири андо Эфесо

1 Андэ кодья время, кала Аполосо сас андо Коринфо, Павло прожыля пав плаендиэр пхувья и авиля андо Эфесо. Котэ вов аракхля коискачи сыйярнэн.

— Тумэ прилинэ Свэнтонэ Духос, кала патяйле? — пушля вов.

— Амэ и на ашундэ палав кода, со иisin Свэнто Духо, — пхэндэ онэ.

3 Тунчи Павло пушля:

— Сар тумэ болдэпэ?

— Кадя сар болэллас Иоано, — пхэндэ онэ.

4 Ай Павло пхэндя:

— Иоано болэллас, кала мануша каисавэнас. Нэ вов акхарэллас лэ манушэн тэ патян андо Кодва, Саво трэбуй сас тэ авэл пала лэстэ, андо Иисусо.

5 Кала онэ ашундэ пала када, онэ прилинэ болдимос важ алав Раеско Иисусоско.

6 Павло тховдя пэр лэндэ васта, и пэр лэндэ сжыля Свэнто Духо. Тунчи онэ ашыле тэ дэн дума аврэ шыбэнца и тэ пхэнэн лав Дэвлэстар.

7 Всаворэн лэн сас варижай дэшдуудай мануша.

8 Павло трин шон бидараоко дэллас дума андэ синагога и допхэнэллас котэ палав Дэвлэско Тхагаримос.

9 Нэ коисавэ лэндэр ехж патив холявэнас и отпхэнэнаспэ тэ патя, англай всаворэ пхэнэнас найлашэ лава по Иисусоско Дром. Тунчи Павло ашадя лэн. Вов вытида пэсти сыйярнэн и кажно дес дэллас дума лэнца андэ сыйярди Тираностири.

10 Кадя прожыле дуй бэрша, и всаворэ иудеёря тай грекоря, савэ жувэнас андэ Цыкни Азия, ашундэ лав Раеско.

11 Ай о Дэл терэллас Павлостириэ вастэнца барэ диворя.

12 Насвалэнди дэнэс тэ лэнпэ кай кхоснорэ тай бутярни йида, савэндэ лэласпэ о Павло, и лэндэ прожжалас насвалимос, тай холятирэ духоря выжанас андар лэндэ.

13 Ай коисавэ иудеёря, савэ пхирэнас пай дрома и вытградэнас духонэн, ашыле кадя ж тэ приакхарэн алав Раеско Иисусоско пэр мануша, андэ савэндэ сас холятирэ духоря. Онэ пхэнэнас:

— Припхэнав тумэнди алавэса Иисусостириэса, пала Саво роспхэнэл Павло.

14 Када терэнэс и эхта шавэн лэ Скэвостириэн, саво сас иудеёнго баро рашай.

15 Нэ холяко духо пхэндя:

— Иисусос мэ жанав, и пала Павло мэ ашунавас, ай тумэ ко кацавэ?

16 И мануш, андо саво сас холяко духо, хукля пэр лэндэ кацавя зораса, со помардя лэн всаворэн, и онэ нашле андав кадва чер нангэ и помардэ.

17 Кала иудеёря и грекоря, савэ жувэнас андо Эфесо, ужангле пала када, пэр лэндэ авиля бари дар, и онэ линэ тэ тховэн майбари патив кав алав Раеско Иусоско.

18 Ай бут мануша, савэ патаяле, авэнас и англай всаворэ отпхэрнавэнас пэстирэрындоря.

19 И бут кола, ко драбатярэлас, анэнас пэстирэ драбатиримастирэ лила тай пхабарэнас англай всаворэ пэ яг. Ай кала пэрэбиндэ, скачи ловэ ашэн кала лила, выжыля варикай пандэша мии драхморя.

20 Када алав Раеско розжаласпэ пай тхана и терэласпэ майзорало.

Бида андо Эфесо

21 Кала вся када прожыля, Павло приля андо Духо тэ жал андо Иерусалимо черэз Македония и Ахаяя.

— Кала мэ поавава андо Иерусалимо, тунчи манди трэбуй тэ жав када ж андо Римо, — пхэнлас вов.

22 Павло бишалдя андэ Македония дуен пэстирэн бутярнэн, лэ Тимофеёс и Эрастос, ай ежэно ашылялэ пэ сави-то вряза андэ Цыкни Азия.

23 Андэ кодъя вряза вазглепэ и мануша по Дром Раеско.

24 Ех мануш, савэс акхарэнас Димитриё, терэлас андав руп цыкнэ храморя Артэмидако и дэлас тэ затэрэн ловэ аврэнди бутярнэнди.

25 Вов акхардя всаворэн бутярнэн кацавя бутятар и пхэндя:

— Тумэ жанэн, со кадай бути дэл амэнди барвалэс тэ жувас.

26 Ай тумэ дикхэн и ашунэн, со кадва Павло пэрэцырдя пэ пэстири риг бутэ манушэн на качи катэ андо Эфесо, нэ пай всавори Цыкни Азия. Вов пхэнэл, со дэвла, савэ стердэ вастэнца, на дэвла.

27 Мэ дарав, со на качи амари бути хасарэла лашо алав, нэ кадя ж и храмо баря дэвляко Артэмидако ашэлэлэ нисоса. И ежэй дэвли, савяти тэлён всавори Цыкни Азия и всавори люма, хасарэла пэско баримос!

28 Сар ашундэ када, онэ андай холи линэ тэ цыписавэн:

— Бари Артэмиды Эфесостири!

29 Всаворо форо вазгляя. Всаворэ екхэтанэ онэ хутилдэ македонянонэн лэ Гаёс тай Аристархос, со пхирэлас лэ Павлоса, и поцырдэ лэн андо театро.

30 Павло камял тэ выжал кай и мануша, нэ сыйярнэ на домуклэ лэс.

31 И коисавэ Азиятире барвалэ рага, амала Павлостири, бишалдэ лэстэ манушэн, кай тэ мангэн, соб вов тэ на авэл андо театро.

32 Мануша андо стидимос прастанас риг ригатэ, ех цыписавэнас ех, ай авэр цыписавэнас авэр. Майбут мануша на полэнас, сости онэ кордэ авиле.

33 Сар пхэндэ иудеёря, мануша выцырдэ пэ англал Александрос. Вов сикадя вастэса, кай тэ ашэн мулком, а ашыля тэ дэл думэл манушэндэ.

34 Нэ кала онэ ужангле, со вов иудеё, линэ тэ цыписавэн екхэ гласоса:

— Бари Артэмиды Эфесостири!

И кадя цыписавэнас варикай дуй чясоря.

35 Тунчи фороско пистросарими успокоисардя о народо и пхэндя:

— Эфесиоя, чи на жанэл варико, со форо Эфесо фэрисарэл храмо баря Артэмидако тай лако образо, саво пэля пав болыбэн?

36 Када чячимос, саво на трэбуй тэ допхэнэс. Колэсти тумэнди трэбуй тэ успокоинпэ и тэ на терэн бигодяко.

37 Тумэ андэ кардэ калэн манушэн, онэ на обчёрдэ храмо и на пхэндэ вырито лав пэ амари дэвли.

38 Ай сар Димитриё и авэр рупунаря камэн варикас тэ ужылисарэн, пэ када амэндэ исин сындоря и проконсулоря. Кордэ мэк онэ и жан пэстирэрындонца.

39 Ай сар тумэндэ инке исин варисаво рындо, вов авэла продикхло андо стидимос пав законо.

40 Мэ дарав, со пала кода, со тумэ адес вазглепэ, амэн терэндэ ужылэнца, колэстар со нинай черэз со тэ стидэн кацаво стидимос. Амэнди на авэла, со тэ пхэнэн.

Тай кацавэ лавэнца вов розмуклия о стидимос.

20

Павло жал андэ Македония тай Грецыя

1 Кала всаворэ мануша пэрэашлы тэ цыписавэн, Павло акхардя сыйянрэн, подритярдя лавэса, простирайла лэнца и жыля андэ Македония.

2 Вов прожалас черэз кадья пхув тай бутэнца лавэнца подритярэлас патикунэн. Кала Павло авиля андэ Грецыя.

3 Вов прожыля котэ трин шон. Ай кала вов камэлас тэ плывисарэл андэ Сирия, вов ужангия, со иудеёря гытосардэпэ тэ умарэн лэс. Тунчи вов приля тэ рисавэл чөрэз Македония.

4 Лэса жанас Сопатро, шаво Пироско андай Верия, фесалоникийцоря Аристархо тай Секундо, Гаё андай Дэрвия и Тимофей, ай кадя ж Тихико и Трофимо андай Цыкни Азия.

5 Онэ жыле майанглэ и ажуярэнас амэн андэ Троасо.

6 Кала прожыля свэнко Биквасно марнэсю, амэ плывисардэ андай Филипоря тай чөрэз панч деса авиле лэндэ андэ Троасо. Котэ амэ сас эхта деса.

Павло жундярэл андай мулэ Эвтихос

7 Андо англуюн дес куркэско амэ стидиле екхэтанэ тэ пхагас о марно. Павло дэлэс дума лэнца, и сар вов камэлас пэ авэр дес тэ жал андо дром, лэстири дума зацьырдяпэ жыкай епащрят.

8 Упрэ андо чер, кай амэ стидэпэ, пхабонас бут каганцоря.

9 Ай пэ фэлястра бэшэлас тэрно мануш, савэс акхарэнас Эвтихо. И кадя сар о Павло лунго дэлэс дума, о Эвтихо саастэс засутя и пэля тэлэ пав трито этажо. Ай кала лэс вазгле, вов сас муло.

10 Павло эмукляпэ, пашлия упранл пэр лэстэ и обля лэс.

— На даран, — пхэндя вов, — вов жундо!

11 Тунчи Павло жыля упрэ, пхагля о марно тай халя. Вов дэдумэлас жыкай дэнзор, ай тунчи жыля андо дром.

12 Ай лэ шаворэс одандярдэ чөрэ жундэса, и всаворэ лошавэнас калэсти.

Дром андай Троасо андо Милето

13 Павло при phэндя амэнди тэ бэшас по кораблэ и тэ плывисарас андо Асо. Ежено вов камэлас тэ жал дромэса пай пхув. Андо Асо амэнди трэбуй сас тэ дикхаспэ и тэ лас лэ Павлос по кораблэ.

14 Кала Павло авиля андо Асо, амэ линэ лэс по кораблэ и плывисардэ андэ Митилене.

15 Пэ авэр дес амэ выжыле котар андэ риг островос Хиосос. Кала прожыля инке дес, амэ плывисардэ кав острово Самосо, ай инке чөрэз дес авиле андо форо Милето.

16 О Павло закамля тэ обжал о Эфесо ригаса, кай тэ на заритярдёл андэ Цыкни Азия, колэсти со вов грабияс и камэлас, сар выжала, тэ авэл андо Иерусалимо кав Пандэшако дес.

Павло дэл дума хандирятирэ пхурэдэрэнца андо Эфесо

17 Андав Милето Павло бишадя манушэн андо Эфесо, кай тэ мангэн пхурэдэрэн хандирятирэн тэ авэн лэстэ.

18 Ай кала кола авиле, вов пхэндя лэнди:

— Тумэ жанэн, сар мэ жувавас тумэндэ всавори врима пай англuno дес, кала мэ авилем андэ Цыкни Азия.

19 Мэ теравас бути важ о Рай бипхутимаско и ясвэнца и пэрэндряравас грыжи, савэ терэнас манди иудеёра.

20 Мэ на умукавас нисо колэстар, соб тумэнди тэ авэл мишто, роспхэнавас и сыйтравас тумэнанглай мануша пэ гасы и пай чера.

21 Мэ приакхараравас лэ иудеёнэн и греконэн, со лэнди трэбуй тэ каисавэн тай тэ обрисавэн кав Дээ и тэ патян андо амаро Рай Иисусо.

22 Нэ икхатар о Духо припхэнэл манди, кай мэ тэ жав андо Иерусалимо, и мэ на жанав, со котэ манца авэла.

23 Мэ жанав, кай андо кажно форо Свэнто Духо допхэнэл манди пала кода, со ман ажутярэн лэпунзэ и грыжа.

24 Важ мандэ мэрно жувимос нисо на ашэл, качи камав тэ дожав пэско дром и тэ дотерав бути, сави манди дя Рай Иисусо, — тай допхэнав Радосаво Лав палав мищимос Дэвлэско.

25 Ай икхатар мэ жанав, со тумэ всаворэ, каса мэ сымас и кости роспхэнавас палав Тхагаримос, никала ман майбут на дикхэна.

26 Важкода мэ пхэнав адес: мэ на авава ужыло, ни андэр кастиро хасаримос,

27 колэсти со мэ нисо на промуклем и роспхэндэм тумэнди пала всавори Дэвлэстири воля.

28 Дикхэн пала пэстэ и палав всаворо стадо, андо саво Свэнто Духо тховдя тумэн дикхимаренца, кай тумэ тэ пасын кхандири Дэвлэстири, пала сави Вов путиндя Пэстире ратэса.

29 Мэ жанав, со кала мэ ужава, тумэндэ авэна холятирэ рува, савэ на тангосарэна о стадо.

30 Тай машкар тумэндэ авэна мануша, савэ ашэнэ тэ пэрэболдэн о чячимос, соб тэ уандярэн лэ сыйтэрнэн пала пэстэ.

31 Колэсти дикхэн мишто! Сэрэн кода, со мэ трин бэрша ясвэнца, дес и рят сыйтравас годяти кажнонэс тумэндар.

32 Ай икхатар мэ отдав тумэн лэ Дэвлэсти и Лэстире мищимистирэ лавэсти, савэстэ исин зор тэ терэл саастса тумаро патявимос и дэла тумэнди барвалимос машкар Лэско свэнто народо.

33 Мэ никастар на лавас ни руп, ни сомнак, ни йида.

34 Ай тумэ ежэн жанэн, со мэ акалэ пэстире вастэнца затеравас по жувимос пэстэ и колэнди, савэ сас манца.

35 Андэр вся мэ сикававас тумэнди, со кадя трэбуй тэ терас бути, тэ поможысаарас чёрорэнди и тэ сэрас лава Раестири Иисусостири: «Майбахтало исин кодва, ко дэл, сар кодва, ко лэл».

36 Кала Павло пхэндя када, вов тэрдиля пэ чянга всаворэнца и манглия Дэвлэс.

37 Всаворэ фартэ ровэнас тай облэнас лэ Павлос и чюминдэнас лэс.

38 Онэ фартэ грыжонааспэ палай кода, со майбут никала лэс на дикхэна. Тунчи онэ проандярдэ лэ Павлос кав кораблё.

21

Павло ладэл андо Иерусалимо

1 Кала амэ простисайле лэнца, тунчи выжыле андо море и плывисардэ ворта по острово Косо. Пэ авэр дес амэ авиле по острово Родосо, ай котар — андэ форо Патара.

2 Котэ амэ аракхле кораблё, саво плывисарэлас андэ Финикия, бэшле пэр лэстэ и жыле майдур.

3 Амэ прожыле о Кипро, ашадэ лэс пай лево риг тай жыле пэ Сирия. Ай котэ авиле кав бэрэго андо Тиро, колэсти со котэ амарэсти кораблёстι трэбуй сас тэ ашавэл грузо.

4 Андо Тиро амэ аракхле сыйярэн и сас лэндэ эхта деса. Онэ Духоса пхэнэнас лэ Павлости, кай тэ на жал андо Иерусалимо.

5 Ай кала авиля врьяма, амэ жыле майдур. Всаворэ сыйярнэ, лэндирэ ромня и бзяцэ проандярэнас амэн андав форо, тай по бэрэго амэ тэрдиле пэ чянга и манглелэ Дэвлэс.

6 Амэ простирайле лэнца и бэшле по кораблё, ай онэ рисайле черэ.

7 Амэ плывисардэ майдур и андав Тиро авиле андэ Птолемаисо. Котэ дикхлепэ лэ пхралэнца тай проандярдэ лэнца екх дес.

8 Ай пэ авэр дес амэ жыле андо дром и авиле андэ Кесария и ашылепэ андо чер кав Филипо-благовестнико, вов сас екх андай эхта диаконоря* Дэвлэстирэ.

9 Лэстэ сас штар щея. Онэ на сас пала ромэстэ тай пхэнэнас лав Дэвлэстар.

10 Тунчи, кала амэ сас котэ бут деса, андай Иудея авиля пророко, савэс акхарэнас Агаво.

11 Вов поджыля амэндэ, ля Павлостири күшник, спханглья пэстирэ васта тай пхэндя:

— Свэнто Духо пхэнэл: «Акадя иудеёра андо Иерусалимо спхандэна и отдэна андэ васта найиудеёнди колэс, кастири исин кадъя күшник».

12 Кала амэ и кола, ко жувэлэс котэ, ашундэ када, ашыле тэ мангас лэ Павлос тэ на жал андо Иерусалимо.

13 Нэ Павло пэ када пхэндя:

— Пэр со тумэ ровэн и росшынэн манди о води? Мэ гытосардо най качи тэ авав спхангло, нэ и тэ мэрав андо Иерусалимо важ алав Раеско Исусоско.

14 Кала амэндэ на выжыля тэ парувас лэско гындо, ашыле мулком тай пхэндэ:

— Мэк авэла воля лэ Раестири.

15 Кала прожыля коискачы деса амэ стидэпэ и жыле андо Иерусалимо.

16 Амэнца жыле коисавэ сыйярэн андай Кесария. Онэ андэ амэн андо чер Мнасаноско андав Кипро, саво сас дэлмутно сыйярно, амэ ашылепэ лэстэ.

Иаково дэл думэл лэ Павлоса

17 Кала амэ авиле андо Иерусалимо, пхрала лошаса прилинэ амэн.

18 Пэ авэр дес Павло екхэтанэ амэнца жыля кав Иаково. Котэ сас всаворэ пхурэздэра.

19 Павло дя лэнди о васт и роспхэндя пала вся кода, со о Дэл тердя машкар найиудеёра черэз лэстирти бути.

20 Онэ выашундэ лэс тай лашардэ лэ Дэвлэс. Тунчи онэ пхэндэ Павлости:

— Пхрала, ту дикхэс, скачи мии иудеёрэн патяйле, и всаворэ онэ фартэ ритярэнтэ палал Законо.

21 Ай пала тутэ онэ ашундэ, со ту сыйярэс иудеёнэн, савэ жувэн машкар найиудеёра, тэ отжан лэ Моисейстирэ Законостар и пхэнэс, тэ на обшинын пэстирэ шавэн тай тэ на жувэн кадя, сар амэндэ прилито.

22 Со ж тэ терас? Онэ екхпатив ужанэна, кай ту авилян.

23 Колэсти стер када, со амэ пхэнаса. Машкар амэндэ исин штар мануша, савэ соглахадэ англав Дэл.

24 Ай ту лэ лэн, прожа лэнца жужаримаско обрядо и потин пала лэндэ, кай онэ тэ обшинын и бал по шэро. Ай тунчи всаворэ дикхэна, со кода, со пала тутэ пхэнэн, наччимос, и со ту жувэс пав Законо.

* **21:8** Дикхэн Апостолонэндирэрындоря 6.5.

25 Ай со трэбуй тэ терэн лэ патикунэнди найиudeёнди, амэ пистросардэ, сар лэнди тэ жувэн: наци тэ хан хамос, саво анэн андэ жертва идолонэнди, тэ на пэн рат и тэ на хан мас пай тасадо ското, тай тэ на терэн лубимос.

26 Тунчи пэ авэр дес о Павло ля пэса калэн манушэн и прожыля екхэтанэ лэнца жужаримаско обрядо. Тунчи вов зажыля андо храмо и пхэндя, кала жужаримос прожала и кала пала какжно лэндар анэна жертвта.

Павлос хутилэн андо храмо

27 Кала прожыле эхта дес, коисавэ иудеёря андай Цыкни Азия удикхле лэ Павлос андо храмо, вазгле пэр лэстэ всаворэн манушэн тай хутилдэ лэс.

28 Онэ цыписавэнас:

— Мурша Израилёстир! Поможысарэн! Акэ мануш, саво андэ всаворэ тхана сыйтэрэл вырито всаворэн манушэн пала амаро народо, амаро Законо и храмо. Ай икхатар вов андя андо храмо греконэн,cosa и магрисардя кадва свэнто тхан.

29 Жы калэстэ онэ дикхле андо форо лэ Павлос екхэтанэ лэ эфесяниноса Трофимоса и гындосардэ, со Павло андя лэс андо храмо.

30 Андо всаворо форо вазглэпэ и стидэпэ и мануша. Ай лэ Павлос схутилдэ, вьшырда андав храмо и удара лэ храмостири сыго запхандадэ.

31 Онэ камэнас тэ умарэн лэ Павлос, нэ дума пала када, со всаворо Иерусалимо вазгляпэ, дожыля кав миенго римсконэс полкос.

32 Вов сыго ля халавдэн и коискачи шэлэнгонэн тай прастая кордэ, кай стидэпэ мануша. Кала иудеёря удикхле пхурэдэрэс мия халавдэн и лэстирэ халавдэн, онэ перэашыле тэ марэн лэ Павлос.

33 Ай пхурэдэр мия халавдэн поджыля, ля лэ Павлос и припхэндя тэ спхандэн лэс дуе лэпүнзэнца. И пушэлас кай мануша, ко вов кацово и со вов тердя.

34 Нэ сар мануша цыписавэнса какжно пэско и лэстэ на выжыля тэ ужанэл чачимос, вов припхэндя тэ одандрэн лэ Павлос андо халавдэнго чер.

35 Кала онэ сас пэ лестница, бут мануша стасавэнас пай рига кадя, со халавдэнди прижыляпэ тэ андярэн лэ Павлос пэ васт.

36 Пала лэндэ жанас бут мануша и цыписавэнас:

— Миримос лэстэ!

Павло пхэнэл лав лэ манушэнди

37 Ай кала поджыле кав халавдэнго чер, Павло пхэндя миенгости:

— Чи домукэлпэ манди тэ пхэнав тути варисо?

— Ту жанэс греконэндири шыб? — пушля пхурэдэр мия халавдэн.

38 — Тунчи ту на кодва египтянино, саво коискачи вряза палпалэ вазглия лэ манушэн и уандярдя андэ мал штар мии прахарен?

39 Ай о Павло пхэндя:

— Мэ иудеё андав Тарсо, саво андэ Киликия, мануш барэ форостар. Мангав тут, дэ манди тэ пхэнав лав кай мануша.

40 И кала о пхурэдэр домукля лэс тэ дэл дума, о Павло вшиля пэ лестница и сикадя вастэса, кай тэ ашэн мулком и мануша. Ай кала онэ ашыле мулком, вов задя дума пай евреёнэндири шыб.

22

1 — Пхрала и дада! Дэн манди тэ пхэнав лав пала пэстэ.

2 Кала онэ ашундэ, со вов дэл дума пай евреёнэндири шыб, тунчи всаворэ инке майфартэ заашыле мулком. Вов пхэндя:

3 — Мэ иудеё, саво бэяндилем андо Тарсо андэ Киликия, нэ выбарилем андэ кадва форо. Мэ сымас мишто сыйтэрдо Законости амарэ дадэнго кав Гамалиило. Мэ всаворэ водеса предино лэ Дэвлэсти, сар и какжно тумэндар адес.

4 Мэ гонисаравас и маравас жыкай миринос колэн, ко жалас Раестирэ Дромэса, астараавас лэл муршэн и лэ жувлян тай шавас лэн андо баруно.

5 Допхэнимаря калэсти, со пхэнав, — баро рашай и стидимос пхурэдэрэнго. Мэ прилем лэндэр лила кай пхрала андо Дамаско и жылем кордэ, соб тэ лав колэн, ко жалас пав Дром и тэ анав лэн андо Иерусалимо, кай тэ помарэн.

6 Пав дром, кала мэ поджавас кав Дамаско, варикай андо епащдес, кала мэ на ажутяравас, мэ ашылемпэ андрал баро удууд болыбнастар, пэ саво нащи сас тэ дикхав.

7 Мэ пэлем пэ пхув и ашундэм гласо, саво пхэнэлас манди: «Савло! Савло! Сости ту гонисарэс Ман?»

8 Мэ пушлем: «Ко Ту, Рай?» Вов пхэндя: «Мэ Исусо андав Назарето, Савэс ту гонисарэс».

9 Кола, ко сас манца, дикхле удууд, нэ гласо, саво мэ ашундэм, онэ на ашундэ.

10 Мэ пушлем: «Рае, со манди тэ терав?» Ай о Рай пхэндя манди: «Вщи и жа андо Дамаско. Котэ тути пхэнэна вся, со тути трэбуй авэла тэ терэс».

11 Удууд, саво мэ дикхавас сас кацаво зорало, со мэ корайлем. Колэсти кола, савэ сас манца, андэ ман палав васт андо Дамаско.

12 Котэ мандэ авиля дэвлэкуно мануш, савэс акхарэнас Анания. Вов тэрэлас вся, со пхэнэлас Законо, тай всаворэ иудеёря, савэ жувэнас котэ, пативаса обжанааспэ лэса.

13 Вов тэрдиля паша мандэ тай пхэндя: «Пхрал Савло, мэк отпхэрнавэнпэ тирэ яхса!» И андэ кодъя ж врязма мэ ашылем тэ дикхав и дикхлем калэс манушэс.

14 Вов пхэндя манди: «Дэл амарэ дадэнго вытида тут, кай ту тэ ужанэс Лэстири вола, тэ удикхэс Чычимастирэс и тэ ашунэс гласо андай Лэстирэ ушта.

15 Ту авэса тэ пхэнэс всаворэнди манушэнди пала вся, со ту дикхлян и ашундян.

16 Ай икхатар, со ту цырдэс врязма! Вщи, акхар Лэско алав, прилэ болдимос тай схалав пэстирэ бээзэх».

17 Тунчи мэ рисайлем андо Иерусалимо, и кала мэ мангаваспэ Дэвлэс андо храмо, манди сикадяпэ дикхимос.

18 Мэ дикхлем Раес, Саво пхэндя манди: «Майсыго выжа андав Иерусалимо, колэсти со катэ на прилэна тиро допхэнино пала Мандэ».

19 Ай мэ пхэндэм: «Рай, кала мануша жанэн, со мэ пхираавас андай ехк синагога андэ авэр синагога, соб тэ лав и тэ марав колэн, ко патял андэр Тутэ.

20 И кала питялас о рат пав Стэфено, саво сас Тиро допхэнимари, мэ тэрдюавас котэ, подритьяравас колэн, ко умарэлас лэс, и дикхавас палай лэндири йида».

21 Тунчи Вов пхэндя манди: «Жа, Мэ бишалав тут дур кай найиудеёря».

Павлов англав пхурэдэр мия халавдэн

22 Жыкай кала лава мануша ашунэнас Павлос, нэ катэ ашыле тэ цыпсавэн:

— Тэ скхосэ лэс пхувьятар! Лэсти на трэбуй тэ жувэл!

23 Онэ цыпсавэнас, шынэнас пэр пэстэ йида и шонаас упрэ пош.

24 Пхурэдэр мия халавдэн припхэндя тэ уандярэн лэ Павлос андо халавдэнго чөр. Вов припхэндя тэ марэн лэс чюкнянца тай тэ допушэн, пала со и мануша ваздэнпэ пэр лэстэ.

25 Нэ кала лэ Павлос припхангле күщикэнца, соб тэ марэн, вов пхэндя шэлэнгости, саво тэрдэлас паша лэстэ:

— Чи домукэллэ тумэнди тэ марэн чюкнянца римостирэс манушэс, тай инке бисындоско?

26 Кала шэлэнго када ашундя, вов жыля и допхэндя пхурэдэрэсти мия халавдэн.

— Со ту терэс? Када римоско мануш, — пхэндя вов.

27 Пхурэдэр выжыля кав Павло тай пушля:

— Ту римоско мануш?

— Агэ, — пхэндя Павло.

28 Тунчи пхурэдэр пхэндя:

- Манди трэбуй сас тэ потинав бут ловэ, соб тэ авав римоско мануш.
- Ай мэ бэяндилем римоско манушэса, — пхэндя Павло.

29 Кола, савэ камле лэс тэ допушэн, сыг огжыле лэстар. Пхурэдэр пэрэдараилья, кала ужангля, со вов спхангля лэпунзэнца римостирэс манушэс.

Павло англай Синедрионо

30 Ай пэ авэр дес пхурэдэр мия халавдэн камэлас чячес тэ ужанэл, андэр со иудеёра ужылисарэнас Павлос, россхангля и лэпунзэ тай припхэндя, соб тэ стидён барэ рашай тай всаворо Синедрионо. Тунчи вов андярдя Павлос и тховдя англай лэндэ.

23

1 Павло мишто вдикхляпэ пэ Синедрионо и пхэндя:

- Пхралалэ, жыкай адесутно дес мэ жувавас жужаса пативаса англав Дэл.

2 Катэ о баро рашай Анания припхэндя колэнди, ко тэрдёлас пашэ лэ Павлоса, тэ арэсэл лэс пай ушта.

3 Тунчи Павло пхэндя:

— О Дэл арэсэла тут, дуемуенго мануш! Ту бэшэс катэ, соб тэ сындосарэс ман пав Закону ай ежэно отжас лэ Законостар, и припхэнэс тэ марэн ман!

4 Кола, савэ тэрдёнас пашав Павло, пхэндэ лэсти:

- Ту со, акушэс лэ барэ рашаес лэ Дэвлэс?

5 Ай Павло пхэндя:

— Пхралалэ, мэ на жанглэм, со вов баро рашай. О Пистросаримос пхэнэл: «На пхэн вырито палав пхурэдэр тирэ народостар».

6 Павло жанзлас, со андо Синедрионо екх сас садукеёра, ай авэр — фарисеёра. Колэсти вов зоралэ гласоса пхэндя:

— Пхрала, мэ фарисеё, шаво фарисеёстиро! Ай ман сындосарэн палай надия, со мулэ жундэна.

7 Кала вов када пхэндя, фарисеёра тай садукеёра ашыле тэ споринпэ, и стидимос розжыляпэ андэ дума.

8 Колэсти со садукеёра пхэнэн, со и мулэ на жундён и нинай ни ангелонэн, ни духонэн. Ай фарисеёра патян, со исин и кода и авэр.

9 Вазгялэпэ баро цыпимос, коисавэ сыйтариаря Законостирэ андай фарисеёра холяся пхэндэ:

— Амэ на дикхас андэ кадва мануш нисо вырито. Со, кала лэсти пхэнэлас духочи ангело?

10 Онэ линэ тэ споринпэ кадя, со пхурэдэр мия халавдэн дарайля, соб лэ Павлос тэ на росшынэн пэ котора, и припхэндя халавдэнди зораса тэ выхутилэн лэс лэндар и тэ уандярэн андэ халавдэнго чер.

11 Пэ авэр ряят кав Павло авиля о Рай и пхэндя:

— Ав саастса! Сар ту допхэнэсас пала Мандэ андо Иерусалимо, кадя ж ту трэбуй тэ допхэнэс и андо Римо.

Иудеёра гындон тэ умарэн лэ Павлос

12 Ай дэнзор коисавэ иудеёра стидэпэ и солахадэ нисо тэ на хан и тэ на пэн жыкай, кала умарэнэ лэ Павлос.

13 Кадя допхэндэпэ тэ терэн варикай саранда манушэн.

14 Онэ жыле кай барэ рашая и пхурэдэра тай пхэндэ:

- Амэ солахадям нисо тэ на лас андо муй, жыкай на умараса лэ Павлос.

15 Ай икхатар тумэ и Синедрионо мангэн пхурэдэрэс мия халавдэн тэ анэн лэс тумэндэ важ кода, соб майпашэ тэ роздикхэн лэско рындо. Ай амэ аваса гытомэ и умараса лэс инке жыкай, кала вов дожала кардэ.

16 Палай кадай чёрэхани дума ужангля лэ Павлоско пхэятиро шаво. Вов жыля андо халавдэнго чер и роспхэндя када лэ Павлости.

17 Тунчи Павло подакхардя екхэс андай шэлэнго и пхэндя лэсти:

— Одандрэн акалэс шаворэс кав пхурэдэр мия халавдэн, лэстэ исин варисо тэ пхэнэл.

18 Пхурэдэр шэлэн халавдэн одандрядя лэ шаворэс кав пхурэдэр мия халавдэн и пхэндя:

— Павло, саво бэшэл затердо, акхардя ман и мангля тэ анав калэс шаворэс тутэ. Лэстэ исин варисо тэ пхэнэл тути.

19 Пхурэдэр мия халавдэн ля лэ шаворэс палав васт, одандрядя андэ риг тай пушля:

— Со ту манди камэс тэ роспхэнэс?

20 Шаворо пхэндя:

— Иудеёра допхэндэпэ тэ мангэн тут, соб ту тэ анэс тэся лэ Павлос по Синедрионо, сар бы важ кода, соб майфэдэр вся тэ ужанэн.

21 Нэ ту калэсти на патя, колэсти со лэс поджуутярэн майбут, сар саранда манушэн. Онэ солахадэ тэ на хан и тэ на пэн, жыкай на умарэнэ лэс. И онэ тэрдён гытосардэ и ажутярэн, со ту стерэса кадя, сар онэ мангле.

22 Тунчи пхурэдэр мия халавдэн отму克ля шаворэс тай пхэндя лэсти:

— Никасти на роспхэн пала кода, со ту манди пхэндян.

Павлос андярэн андэ Кесария

23 Тунчи пхурэдэр мия халавдэн выакхардя дуй пхурэдэрэн шэлэн халавдэн и припхэндя:

— Гытосарэн дуйшэл халавдэн, эхтадэш, савэ бэшэн пэ граста, и дуйшэл, савэ андярэн кольюря, кай тэ жас андэ Кесария андэ иня чясоря ратятерэ.

24 Гытосарэн лэ Павлости грастэс, кай бибидако тэ доладэл вов кав баро рай Фэликсо.

25 И вов пистросардя кацово лил:

26 «Клавдиёстар Лисиёстар,

Пативалэсти барэ раести Фэликсости:

Тэ авэс баахтало!

27 Иудеёра схутилдэ калэс манушэс и стидэнаспэ тэ умарэн лэс. Нэ мэ ужанглем, со вов римоско мануш, авилем халавдэнца и фэрисардэм лэс.

28 Мэ камлем тэ ужанав, андэр со онэ лэс ужылисарэн, тай андэм лэс андэ лэнго Синедрионо.

29 Мэ аракхлем, со онэ ужылисарэн лэс пала лэнго Законо, нэ пэ лэстэ нинай саво ужылинос, пала сави трэбүй тэ умарэн чи тэ запхандавэн андэ лэпунзэ.

30 Нэ кала манди пхэндэ, со лэс камэн тэ умарэн, тай мэ сыго одандрядэм лэс тутэ и припхэндэм колэнди, ко ужылисарэл лэс, тэ допхэнэн пэстирэ лава англав тутз».

31 Тунчи халавдэ тердэ кода, со лэнди припхэндэ, линэ Павлос тай рятыса андярдэ андэ Антипатрисо.

32 Ай пэ авэр дес халавдэ пэ граста андярдэ лэс майдур, а авэр халавдэ рисайле андо халавдэнго чер.

33 Кала кола, савэ ладэнас пэ граста, авиле андэ Кесария, отдинэ о лил барэ раести тай перэдинэ лэсти Павлос.

34 Баро рай пробиндя лил тай пушля Павлостар, андай сави вов пхув. Кала вов ужангля, со Павло андай Киликия,

35 пхэндя:

— Мэ выашунава тут кала авэна кола, ко ужылисарэл тут, — и припхэндя соб лэ Павлос тэ запхандавэн андо баро чер Иродоско.

24***Иудеёря ужылисарэн лэ Павлос***

1 Кала прожыле панч деса, баро рашай Анания, коисавэ пхурэдэра, тай мануш саво жанэл законо Тертуло авиле андэ Кесария, соб тэ ужылисарэл англав барорай лэ Павлос.

2-3 Ай сар заандярдэ лэ Павлос, о Тертуло ашыля тэ ужылисарэл лэс.

— Пативало Феликсо! Ту и тирэ годятиэр парувима важ амаро народо андярэн амэнди састо миро. Амэ пэ всаворэ тхана и андэ всавори врьяма прилас када и наисарас тут.

4 Кай тэ на залав тири врьяма, мэ мангав тут пав пэско мищимос выашун мэрно налунгуну лав.

5 Амз аракхас, со кадва мануш — сар найлахи дукх. Вов ваздэл лэ иудеёнэн пай всавори люмая и исин пхурэдэр пай назаретоско стидимос.

6-7 Вов кадя ж камэлэс тэ магрисарэл о храмо. Колэсти амэ схутилдэ лэс*. *

8 Кала ту допушэса лэс, ту ежено ужанэса пала вся, андэр со амэ ужылисарас лэс.

9 Иудеёря кадя ж ужылисарэнас лэ Павлос и пхэнэнас, со када вся чячимос.

Павло пхэнэл лав пала пэстэ

10 Баро рай сикадя лэ Павлости, кай вов тэ дэл дума, и кодва ашыля тэ пхэнэл:

— Мэ жанав, со ту бут бэрша сындос кадва народо, и колэсти лошаса пхэнэва лав пала пэстэ.

11 Тути напхарэс авэла тэ ужанэс кода, со на майбут, сар дэшудуй деса палпалэ мэ авилем тэ тэлював Дэвлэсти андо Иерусалимо.

12 Кола, савэ ман ужылисарэн, на дикхле, кай мэ тэ спорисавав варикаса андо храмо и тэ ваздэв лэ манушэн анда синагоги тай андэ саво-то тхан фороско.

13 Онэ на допхэнэна кода, андэр со икхатар ман ужылисарэн.

14 Мэ прижандював тути, со жав пав Дром Раеско, саво онэ акхарэн хохавно сыйтэринос. Мэ тэлював Дэвлэсти амарэ дадэнго, патяв всаворэсти, со пистросардо андо Законо тай андэ пророкондирэ лила.

15 Мандэ кацави ж надия по Дэл, сар и колэндэ манушэндэ, — надия, со чячимастирэ и найчячимастирэ жундэна мулэндар.

16 Важ кода мэ терав вся, кай тэ жував жужаса пативаса англав Дэл и англай мануша.

17 Мэ на сымас катэ коискачи бэрша, ай тунчи авилем андо Иерусалимо, кай тэ пэрэдэв мэрнэ народости ловэ, савэ стиэ важ чёрэрэ, и тэ анав жэртва.

18 Ай ман дикхле андо храмо, кала мэ теравас жужаримаско обрядо. Катэ на сас нисаво цыпсаримаско стидимос, и нико на ваздэлэстэ.

19 Жыкай кала авиле коискачи иудеёрия андай Цыкни Азия. Лэнди и трэбуй сас ман тэ ужылисарэн, сар исин андэр со.

20 Мэк мануша, савэ катэ исин, пхэнэн, саво найчячимос онэ аракхле андэ кода, со мэ теравас, кала ман допушэлэс Синедрионо.

21 Мэ домукав, со ужыло андо кода, со, кала тэрдювавас котэ, цыпсайлел:

— Ман сындосарэн пала кода, со мэ патяв, со жундэна мулэ!

22 Тунчи Феликсо, саво майфэдэр жанэлас пала Дром, пхэндя:

— Мэ пхэнэва пэско лав палав кадварындо, кала авэла пхурэдэр мия халавдэн Лисиё.

23 Вов припхэндя пхурэдэрэсти шэлэн халавдэн тэ дикхэл палав Павло, нэ тэ дэл лэсти найбут воля и тэ домукэл лэстирэ амалэн тэ подритярэн лэ Павлос.

* **24:6-7** Андэ коисава гречески манускрипторя инке исин кацавэ лава: «и камле тэ сындосарас пай амаро Законо. Нэ пхурэдэр мия халавдэн Лисиё зораса заля лэс амэндар тай припхэндя колэнди, ко лэс ужылисарэлас».

24 Кала прожыле коискачи деса, о Фэликсо авиля пэстирия ромняса, сави сас иудейка, ла акхарэнас Друзила. Вов бишалдя палав Павло, кай тэ поашунэн палав лэско патвимос андо Иисусо Христосо.

25 Павло дэлас дума палав жужымаско жувимос, со трэбуй тэ ритярэл пэс андэ васта и палав сындо, саво авэла. Фэликсо пэрэдараилья тай пхэндя:

— Хутилэла пэ адес! Жатар! Сар трэбуй авэла, мэ тут акхарава.

26 Вов кадя ажутярэлас, со Павло дэла лэсти ловэ, колэсти бут молоря припхэнзлас тэ анэн лэс и дэлас дума лэса.

27 Прожыля дуй бэрш, по Фэликсоско тхан тэрдиля Порцыё Фэсто. Ай о Фэликсо камля тэ терэл мишто иудеёнди и ашадя лэ Павлос андо баруно.

25

Павло домарэлпэ кай тэ авэл сындо императороско

1 Фэсто сас андэ кадай пхув трин деса, ай тунчи отлагля андай Кесария андо Иерусалимо.

2 Котэ барэ рашая тай майнанглуунэ андай иудеёря подинэ лэсти ужылимос по Павлов.

3 Онэ фартэ умангэнас лэ Фэстос, кай вов терэл лэнди мишто тай тэ пэрэандярэл лэ Павлос андо Иерусалимо. Ай ежэнэ камэнас тэ нахукэн пэ лэс пав дром и тэ умарэн.

4 Фэсто пхэндя:

— О Павло бэшэл запхандадо андэ Кесария. Мэ кадя ж сыго авава котэ.

5 Мэк тумарэ майбарэ пхурэдэра жан манца и сикавэн, андэр со вов ужыло, сар вов тердя варисо вырито.

6 Фэсто сас лэнца пашай охто чи дэш деса, тунчи рисайля андэ Кесария. Пэ авэр дес бэшэл по сынодомарэско тхан тай припхэндя тэ анэн лэ Павлос.

7 Ай кала лэ Павлос андэ, иудеёря, савэ авиле андав Иерусалимо, линэ тэ ужылисарэн лэс андэ бут найлашэ рындоря, нэ лэндэ на выжыля варисо тэ допхэнэн.

8 Павлос ашыля тэ допхэнэл пэсюю чячимос и пхэндя:

— Мэ на тердэм бэзэх ни англав иудеёско Законо, ни англав храмо, ни англав императоро.

9 Фэсто камля тэ терэл мишто лэ иудеёнди, колэсти пушля лэ Павлос:

— Ту камэс тэ жас андо Иерусалимо, кай мэ котэ тут тэ сынодосарав?

10 Павло пхэндя:

— Мэ тэрдював англав сындо императороско, и лэсти трэбуй ман тэ сынодосаэрэл. Мэ на тердэм иудеёнди нисави бида, сар ту и ежэнэ мишто жанэс.

11 Сар терав найчячимос и ман трэбуй тэ умарэн, мэ гытосардо тэ мэрэв. Нэ сар иудеёря ужылисарэн ман юивья, тунчиникасти нащи тэ выдэн ман лэнди. Мэк ман сынодосаэрэл императоро!

12 Тунчи Фэсто пэрэдя дума пэстириэ подпхэнирэмаренца и пхэндя:

— Сар ту мангэс лэ императороско сындо, тунчи кав императоро и авэса.

Павло англав тхагар Агрипа

13 Кала прожыле коискачи деса, кав Фэсто андэ Кесария авиле тхагар Агрипа и Берника, кай тэ дикхэнпэ лэса.

14 Онэ сас котэ бут деса, и Фэсто роспхэндя лэ тхагарости палав рындо лэ Павлоско:

— Катэ исин мануш, савэс Фэликсо ашадя андо баруно.

15 Кала мэ сымас андо Иерусалимо, иудеёндирэ барэ рашая и пхурэдэра ужылисарэнас лэс тай мангэнас тэ прижанэл лэс ужылэса.

16 Ай мэ пхэндэм лэнди, со римлянонэндэ на прилито тэ выдэн лэ манушэс, жыкала вов на дикхэлэпэ лэ ужылимаренца и на пхэнэла лав пала пэстэ.

17 Онэ авиле манца кардэ, и пэ авэр дес мэ бэшлем по сынодарёско тхан и при phэндэм, кай тэ анэн калэс манушэс.

18 Лэстирэ ужылисаримаря тэрдиле англав лэстэ, нэ на сикадэ нисо, со мэ бинавас бы выритонэ рындоса.

19 Када сас спорно дума палав лэнго патявимос и палав саво-то Иисусо, Саво муля, нэ Павло саастас пхэнэлас, со Вов жундо.

20 Мэ на жанавас, сар тэ розлав кадва рындо, и пушлем лэстар, чи камэл вов тэ жал андо Иерусалимо и котэ тэ авэла сындосярдо.

21 Нэ Павло манглья, кай лэско рындо тэ роздикхэл майбаро, колэстар мэ при phэндэм тэ ритярэн лэс запхандадэса, жыкала мэ бишалава лэс кав майбаро императоро.

22 Агрипа пхэндя лэ Фэстости:

— Мэ кадя ж камав тэ поашунав калэс манушэс.

— Тэся ашунэса лэс, — пхэндя Фэсто.

23 Пэ авэр дес о Агрипа тай Берника барэ пхутимаса зажыле андо баро зало. Лэнца авиле пхурэлдэра мия халавдэн и жанглэ форостирэ мануша. Фэсто при phэндя тэ заандярдэн лэ Павлос.

24 Тунчи Фэсто пхэндя:

— Тхагар Агрипа и всаворэ, ко исин пэ кадва тхан! Тумэ икхатар дикхэн англай пэстэ манушэс, пэ саво бут иудеёра жалисавэнас манди, сар андо Иерусалимо кадя ж и катэ. Онэ цыписавэн, со лэсти нащи тэ жувэл.

25 Сар мэ аракхлем, вов нисо на тердя, пала со лэс трэбуй тэ умарэл. Нэ сар вов манглья, кай лэс тэ сындосярэл майбаро императоро, мэ камав тэ бишалав лэс андо Римо.

26 На манди нинай, со тэ пистросарав пала лэстэ раести, и колэсти мэ выяндярдэм лэс тумэндэ тай майнанглал, тутэ, тхагар Агрипа, кай ту лэс тэ дупшэс. Тунчи мэ авава тэ жанав, со манди тэ пистросарав.

27 Мэ гындосяраав, со када нагодярванэс, кай варико тэ бишалэл барунарес и тэ на сикавэл, андэр со лэс ужылисарэн.

26

Павло пхэнэн лав пала пэстэ

1 Тунчи Агрипа пхэндя Павлости:

— Тути домукэлпэ тэ пхэнэс лав пала пэстэ.

Павло взгля пэско васт тай ля тэ дэл дума:

2 — Тхагар Агрипа! Мэ бахтало тэ допхэнав адес тути пэско чячимос английскээс иудеёра, савэ ужылисарэн ман.

3 Ту фартэ мишто жанэс пала вся, со прилито машкар иудеёра и пала со онэ ханпэ. Колэсти мангав тут, терпиримаса выашун ман.

4 Всаворэ иудеёра жанэн, сар мэ тэрнимастар жувавас машкар мэрно народо андо Иерусалимо.

5 Онэ дэлмут жанэн ман, и сар закамэна, допхэнэна, со мэ сымас фарисеё и жувавас пав майсасто сыйяримос андэ амаро патявимос.

6 Ай адес мэ тэрдював англав сындо пала пэстиири надия пэ лав, саво дя о Дэл амарэнди дадэнди.

7 Дэшудуй родоря амарэ народостирэ дес и рят всавораса зораса терэн бути важо Дэл тай ажутярэн, кала терэлапэ кадва лав. Пала надия пэ када, тхагар, ман ужылисарэн иудеёра.

8 Тумэ бинэн, со пхарэс тэ патян андо кода, со о Дэл жундярэл мулэн?

9 И мэ кадя ж гындосаравас, со манди трэбуй тэтирав вся, со андэ мэрно зор, пэ холи алавэсти Иисусостирэс андав Назарето.

10 Када мэ и теравас андо Иерусалимо. Мэ прилем зор лэ барэ рашаендар и пхандававас андо баруно бутэн свэнтонэ манушэн, ай кала лэн сындосярэнас по миринос, мэ отдавас пала када пэско гласо.

11 Мэ бут молоря маравас лэн андэ всаворэ синагоги, кай онэ тэ отпхэндён пэстирэ патявимастар. Мэ сымас кацово холяко пэр лэндэ, со гонисаравас лэн андэ авэр фороря.

12 Еххвар мэ ладавас андо Дамаско припхэннимаса и зораса лэ барэ рашаендар.

13 Пав дром кордэ, тхагар, мэ удикхлем удуд больбнастар, саво свэнтояспэ майфартэ, сар о кхам. Мэ и ко жалас манца ашылпэ андрал калэс удудэстар.

14 Амэ всаворэ пэлэ пэ пхув, ай мэ ашундэм гласо, саво дэлас дума манца пай евреэнэндири шыб: «Савло! Савло! Сости ту гонисарэс Ман? Пхарэс тути тэ жас пэр Мандэ*».

15 Тунчи мэ пушлем: «Ко Ту, Рай?» «Мэ Иисусо, Савэс ту гонисарэс, — пхэндя Рай. —

16 Вщи и тэрдюв. Мэ авилем, кай тэтирав тут Мэрнэ бутярнэса, кай ту тэроспхэнэс пала кода, со дикхлян, со Мэ тути сикавава.

17 Мэ фэрисарава тут тирэ народостар и найиудеёндар, савэндэ Мэ тут бишалав.

18 Кай ту отпхэнрадян лэнди яхса и обрисардян лэ калимастар кав удуд, тай рисардян лэн андэ Сатанаско васт кав Дэл, соб лэндирэ бээзха тэ авэн эртисардэ и онэ тэ авэн машкар кола, кас Мэ свэнтосардэм патявимаса андэр Мандэ>.

19 Тхагар Агрипа, манди нащи сас тэ на кандав болыбнаско дикхимос.

20 Майанглал мэ ашылем тэроспхэнав колэнди, ко сас андо Дамаско, тунчи колэнди, ко жувэнас андо Иерусалимо и андэ Иудея. Ай тунчи ашылем тэ пхэнав найиудеёнди, кай онэ тэ каисавэн аглав Дэл тай тэ сикавэнрындонэнца, со онэ чячимаса каисайле.

21 Пала када иудеёря схутилдэ ман андо храмо и камле тэ умарэн.

22 Нууц О дэл жыкай адеснуту дес поможысарэл манди, и акэ мэ тэрдював катэ и допхэнав цэнкэнди тай барэнди. Мэ пхэнав качи кода, со пхэнэнас пророкоря и Моисеё.

23 Мэ пхэнав, со лэ Христости трэбуй сас тэ пэрэндярэл грыжка, англунэсти тэ жундёл андай мулэ тай тэроспхэнэл амарэ народости, тай найиудеёнди пала удуд».

24 Кала вов кадя дэлас дума, Фэсто цыписайля.

— Ту на андэ пэстири годи, Павло! Баро ервалимос заандярдя тут годятар!

25 Павло пхэндя:

— Пативало Фэсто, мэ на диллялем, ай кода, со мэ пхэнав исин чячимос и годавимос.

26 Тхагар, англав саво мэ отпхэнрадо дав дума, када вся жанэл. Мэ патяв, со вся када, на сас гаравдо лэстар, кадя сар сас тердо на андо гаравдо тхан.

27 Тхагар Агрипа, ту патяс пророконди? Мэ жанав, со патяс!

28 — Ту кадя сыго камэс тэ терэс ман христианиноса? — пхэндя Агрипа лэ Павлости.

29 Павло пхэндя:

— Скачи када врьяма тэ на авэл, сыго ай лунго, мэ мангав Дэвлэс, кай качи найекх ту, нэ и всаворэ, ко ашунэл ман адес, тэ ашэн, сар мэ, качи билэпунзэ.

30 Тунчи тхагар вшилия, и лэса вшилие баро рай, Берника и всаворэ, ко сас лэнца.

31 Онэ выжылые тай пхэнэнас екх эххэсти:

* **26:14** Пэ греконэндири шыб «тути пхарэс тэ марэл пэрнэнца пэр остро рули». Када рули, савяса пасынаас о ското.

— Кадва мануш на тердя нисо, кай лэс тэ умарэн чи тэ запхандавэн андэ лэпунзэ.

32 — Мэ отмуклем бы лэс, нэ вов мангля сындо кав императоро, — пхэндя Агрипа Фэстости.

27

Павлоско дром андо Римо

1 Кала сас прилито, со амэ плывисараса андэ Италия, тунчи лэ Павлос и аврэн коисавэн барунарэн, пэрэдинэ шэлэнгэсти, савэс акхарэнас Юлиё, андав майбарэско императороско полко.

2 Амэ бэшле по кораблё андав порто Адрамитино, савэсти трэбуй сас тэ плывисарэл андэ порторя Цыкня Азиятиз, тай плывисардэ андо дром. Амэнца сас македонянину Аристархо андай Фесалоника.

3 Пэ авэр дес амэ плывисардэ кав Сидоно. О Юлиё мишто обжаласпэ лэ Павлоса и отмукля лэс, кай вов тэ жал и тэ дикхэллэ пээстирэ амалэнца, кай онэ тэ поможысарэн лэсти.

4 Балвал пхурдэлас пэр амэндэ и амэ упалэ плывисардэ андо море и прожыле о Кипро пай бибальятири риг.

5 Амэ плывисарасас пай море пашай бэрэгоря Киликияко тай Памфилияко и авиле андо Ликияко форо Мира.

6 Котэ шэлэнгэ аракхля кораблё андай Александрия, саво плывисарэлас андэ Италия, и тховдя амэн пэр лэстэ.

7 Коискачи деса амэ поцыра плывисарасас англэ. Сас фартэ пхарэс, нэ амэ еххатив авиле андо Книдо. Ай сар балвал на дэлас амэнди тэ жас англэ, амэ обжыле мысо Салмона и плывисардэ пав Крито бибальятиря ригатар.

8 Амэ барэ пхаримаса плывисарас пашав бэрэго и авиле по тхан, саво акхарэллэ Лашэ Бухторя, найдур лэ форостар Ласея.

9 Амэ хасардэ бут вряза, кай тэ плывисарас майдур сас хасаримаса важ жувимос, колэсти со прожыля постоско дес*. Тунчи Павло пхэндя лэнди:

10 — Мэ дикхав, со дром авэла пхаро и выжала, со амэ хасараса, на качи грузо и кораблё, нэ и амаро жувимос.

11 Нэ о шэлэнгэ на кангеля лэ Павлос, ай кангеля, со пхэндэ лэсти капитано и кораблэско хулай.

12 Кадья бухта на поджалас, кай котэ тэ пэрэвнитярэн, и майбут мануша камле тэ плывисарэ майдур, кай сар-то тэ доплывисарэн кай Финиксо и котэ тэ пэрэвнитярэн. О Финиксо, када бухта по Крито, сави отпхэрнади пэ юго-западо тай северо-западо.

Бари балвал пэ море

13 Пхурдя локхи южно балвал, лэнди сикадиля, со прилинэ кода, со трэбуй. Тунчи морякоря подлинэ о якорё и плывисардэ пашав Критоско бэрэго.

14 Нэ сыго пай островостири ригатар нахукля фартэ бари северо-восточно балвал, сави акхарэллэ Эвракилоно.

15 Балвал подхутилдя о кораблё. Амэндэ на выжалас тэ жас англав балвал. Амэ здинэпэ и балвал андярдя амэн.

16 Амэ подплывисардэ кав цэктноро острово Кавда, саво сас пэ бибальятири риг. Котэ амэ барэ пхаримаса фэрисардэ о чёвно,

17 кала вазгле лэс по кораблё. Тунчи матросоря процырдэ дуря талав кораблё и об phxангле лэс. Онэ даранас, со кораблё бэшэла по тишай андо Сирто, колэсти онэ обмуkle парусо и балвал андярдя амэн майдур.

* **27:9** Иудеёнго свэнко Йом Киппур; лэс свэнтэрэнас андэ палатунэ сентябрёстирэ деса.

18 Бари балвал кадя фартэ шолас о кораблё, со пэ авэр дес амэ ашыле тэ вышас грузо андав кораблё.

19 Ай по трито дес амэ пэстирэ вастэнца вышутэ андо море кораблёско хулаимос.

20 Бут деса на душолас ни о кхам, ни чиргая, ай бари балвал пхурдэлас инке майфартэ. Амэ хасардэ всавори надия пэ фэрисаримос.

21 Мануша бут вряза нисо на ханас. Тунчи Павло вшиля машкар лэндэ и пхэндя:

— Муршалэ! Тумэнди трэбуй сас тэ кандэн ман и тэ на плывисарэн лэ Критостар, тунчи тумэндэ на авэлас грыжа и нисо б на хасавэлас.

22 Нэ икхатар мангав: ваздэнпэ духоса, нико тумэндар на хасавэла, качи розмардёлапэ о кораблё.

23 Кола рятияса мандэ авиля ангело Дэвлэстар, Савэско мэ исин и Савэсти тэлював.

24 Вов пхэндя манди: «Павло, на дара. Тути трэбуй авэла тэ тэрдёс англав императоро, тай о Дэл, пай Пэско мищимос, дя тути всаворэн, ко плывисарэл туса».

25 Муршалэ! Ваздэнпэ духоса! Мэ патяв Дэвлэсти и жанав, со вся авэла кадя, сар Вов манди пхэндя.

26 О кораблё авэла выштоу пэ варисаво острово.

Кораблёско хасаримос

27 Пэ дэшүштартыри рят, кала амэн инке андрэрлас пав Адриатическо море, андэ епашрят матросоря поле, со подладэн кай пхув.

28 Онз ужангле, пробиндэ скачи сас кав дно и ужангле, со сас варикай трянда шов метроря, ай кала прожыля найбут вряза онэ упалэ побиндэ и аракхле, со кав дно сас бишта эхта метроря.

29 Матросоря даранас, кай тэ на арэсэл амэн андэ бара, и змуkle пав палатуно тхан по кораблё штар якоря и мангэнас, кай майсыго тэ авэл дес.

30 Онэ камле тэ нашэн пав кораблё тай линэ тэ змэкэн чёвно по пай, притерэнаспэ, со камэн тэ змукэн пав кораблёско нак якорё.

31 Нэ о Павло пхэндя пхурдэрэсти шэлэн халавдэн и халавдэнди:

— Сар кала мануша на ашэнапэ по кораблё, тунчи тумэ на фэрисавэнапэ.

32 Тунчи халавдэ пэрэшындэ дуря, савэ ритярэнас чёвно, и вов пэля андо море.

33 Ай англав дэнзор Павло мангия манушэн, кай онэ тэ хан.

— Акэ адес дэшүштар дес тумэ ажутярэн дараса и нисо инке на хале, — пхэндя вов.

34 — Ай колэсти мэ тумэн мангав тэ хан, и када поможысарэла тумэнди тэ фэрисавэн. Ни каств тумэндар на пэрэла бал пав шэро.

35 Кала вов када пхэндя, ля о марно, англай всаворэндэ наисардя пала лэстэ лэ Дэвлэс, пхагля лэс и ля тэ хал.

36 Манушэн када подирярдя, и онэ всавор э линэ тэ хан.

37 Всаворэн манушэн, савэ сас по кораблё, сас дуйшэл эхтадэшушов.

38 Кала и мануша чялиле, онэ линэ тэ вышон андав кораблё андэ море о див, кай вов тэ авэл майлокхо.

39 Дэнзор онэ на ужангле пхув, сави сикадиляпэ, нэ удикхле бухта и тишаеско бэрэго, каринг онэ камэнас тэ доплывисарэн пэ кораблё.

40 Тунчи матросоря обшындэ дуря лэ якоренца и ашадэ лэн андэ море, онэ проспхангле рулё, подлинэ цэкно парусо и линэ тэ плывисарэн кав бэрэго.

41 Нэ кораблё нахукля по тишай тай ашыля. Кораблёско нак попэля андо тишай и ашыля, сар ганавдо, ай волноря розмарэнас палатуно тхан по кораблё.

42 Тунчи и халавдэ камле тэ умарэн всаворэн барунарэн, кай лэндар нико тэ на уплывисарэл и тэ на нашэл.

43 Нэ шэлэнгэ камля тэ фэрисарэл лэ Павлос и на домэкля лэн. Вов припхэндя колэнди, ко жанэнас тэ плывисарэн, тэ хукэн андо пай майанглал и тэ плывисарэн кав бэрэго.

44 Ай всаворэнди аврэнди манушэнди трэбуй сас тэ фэрисарэнпэ пэ кашта и пэ вся, со ашыляялэ кораблёстар. Кадя онэ всаворэ мишто доплывисардэ кав бэрэго.

28

Пэ Мальта

1 Кала амэ фэрисардэпэ, тунчи ужангле, со кодва острово акхарэлпэ Мальта.

2 Мануша, савэ жувэнас котэ, фартэ мишто прилинэ амэн. Онэ россхабардэ яг, акхардэ амэн пэстэ, колэсти со сас шудро и жалас брышынд.

3 Кала Павло стида обэрэмко кашта тай ашыля тэ шол андэ яг, лэсти по васт хутилдя дандэнца сап, саво фэрисарэлласпэ лэ ягатар и выгульдя андай кашта.

4 Ай кала мануша, савэ жувэнас котэ, удикхле, со кай васт лэ Павлоско припханглялэ сап, онэ линэ тэ пхэнэн екхэсти:

— Душол кадва мануш варикас умардя: вов фэрисардялэ андав море, нэ чачимос наашавэл лэс жундэса.

5 Нэ Павло шүтүү сапэс пав васт андэ яг, и сап на тердя лэсти нисави бида.

6 Мануша ажутярэнас, со вов шувлёла, пэрэла и мэрэла. Онэ бут время ажутярэнас, нэ кала дикхле, со лэса нисо на терэлпэ, линэ тэ гындон пай авэр, со вов варисаво дэл.

7 Найдур сас пхувьяд, савэ сас лэ пхурэдэрэстирэ пав острово, савэс акхарэнас Публиё. Вов лошаса приля амэн пэстэ, и амэ трин дес самас лэстэ.

8 Кав Публиё сас наасвало дад. Вов пашлёлас пэ пато, сас фартэ пхабардо и лэстэ сас дизентирия. Павло зажыля лэстэ, мангялэ Дэвлэс, тховдя пэр лэстэ васта и састьярдя лэс.

9 Тунчи всаворэ наасвалэ пав острово линэ тэ авэн лэстэ и тэ састьярэнпэ.

10 Онэ баря пативаса обжылэпэ амэнца, ай кала амэнди трэбуй сас тэ плывисарас, онэ динэ амэнди вся, со амэнди трэбуй сас андо дром.

Андо Римо

11 Тунчи кала прожыля трин шон, амэ выжыле андо море по кораблё андай Александрия, саво винтэрэлас по острово. Кадва кораблё проакхардо Дуй Пхрала.*

12 Амэ авилям андэ Сиракуза и сас котэ трин дес.

13 Котар амэ плывисардэ андо море и авиле андэ форо Ригиё. Пэ авэр дес пхурдэлас балвал пав юго, ай пэ дуйто дес амэ авиле андэ Путеолоря.

14 Котэ амэ аракхле пхралэн, онэ мангле амэн тэ авас лэнца эхта деса. Тай акэ амэ авилям андо Римо.

15 Пхрала андо Римо ашундэ пала кода, со амэ авиле, и выжыле, кай тэ дикхэнпэ амэнца пэ Апиёско форо, и андо форо Трин Гостиницоря. Кала Павло удикхля лэн, вов наисардя лэ Дэвлэс тай взаглялэ духоса.

16 Амэ авиле андо Римо, лэ Павлости динэ тэ жувэл ежэнэсти, нэ паша лэстэ жувэлэс халавдо, саво дикхэлас пала лэстэ.

Бути важ о Рай андо Римо

17 Кала прожыле трин деса, Павло акхардя майанглунэн андай иудеёря. Кала онэ стидэпэ, вов пхэндя лэнди:

* **28:11** Пэ греконэндири шыб «Диоскуры». Кадя акхарэнас дуй пхралэн-близнятонэн Кастирос и Полуксос, пэ савэ гындонас, со онэ шавэ Зевсоско. Сар патянас мануша андэ кадья время, калэ пхрала фэрисавэнас колэн, ко плывисарэнас пай моря.

— Пхралалэ! Ман схутилдэ андо Иерусалимо и отдинэ лэ римлян онэнди, нэ мэ на тердэм нисо вырито англав амаро народо и отпхэндювавас колэстар, со прилито амарэ дадэнца.

18 Римляноря розлинэ мэрно рындо и камле ман тэ отмукэн, колэсти со пала мандэ нинай нисаво ужылимос, пала саво ман трэбуй тэ умарэн.

19 Нэ сар иудеёря на камэнас тэ прилэн када, манди трэбуй сас тэ мангав сындо кав император, и тердэм мэ када най кай тэ ужылисарав пэско народо.

20 Колэсти мэ акхардэм тумэн адес, соб тэ дикхавпэ и тэ подав дума тумэнца. Колэсти со кала лэпунзэ пэ мандэ палай надия лэ Израилёстири.

21 Кола, савэ ашунэнас лэ Павлос, пхэндэ:

— Амэнди нико на пиистросардя андай Иудея пала тутэ нисавэ лила, и нико андай пхрала на пхэндя пала тутэ нисо вэрыто.

22 Нэ амэ камас тутар тэ ашунаас, сар ту ежэно гындос, амэ жанас качи кода, со мануша пай всаворз тхана вырито пхэнэн пала кадва сыйтаринос.

23 Онэ допхэндэпэ лэ Павлоса, и андо екх вытидо дес бут мануша авиле андо чер, кай вов жувэлас. Павло пав дэнзор жыкай рят пхэнэлас лэнди пала Дэвлэстиро Тхагаримос и допхэнэлас лэнди палав Иисусо лавэнца андав Законо Моисеёско и пророкоря.

24 Коисавэ патяйле лэстирэ лавэнди, ай коисавэ на патяйле.

25 Онэ линэ тэ ханпэ машкар пэстэ, и сар онэ ашыле тэ ужан, Павло пхэндя кацавэ лава:

— Свэнто Духо чячимос пхэндя тумарэ дадэнди черэз пророко Исая:

26 «Жа кав кадва народо и пхэн:

"Түмэ авэна тэ ашунэн, нэ на полэнэ,
авэна тэ дикхэн, нэ на удикхэнэ.

27 Води калэ народоско ашияла, сар бар,
онэ пхарэс ашунэн канэнца

и яхха пэстирэ затердэ,
соб тэ на дикхэн яххэнца,

соб тэ на ашунэн канэнца

и тэ на полэн водеса

кай тэ обрисавэн,

соб Мэ тэ састярав лэн"».

28-29 Акэ жанэнтэ, со фэрисаримос Дэвлэстиро бишалдо найиудеёнди: онэ и ашунэнна кадва лав![†]

30 Павло жувэлас андо Римо инке дуй бэрш андо чер, саво вов намисардя, и прилэлас всаворэн, ко авэлас лэстэ.

31 Вов бидара кооспхэнэлас палав Тхагаримос Дэвлэско, сыйтэрэлас палав Рай Иисусо Христосо, и лэс нико на тэрдярэлас.

[†] **28:28-29** Андэ коисавэ гречески манускрипторя инке исин кацавэ лава: «Кала вов пхэндя акала лава, иудеёря розжылепэ и фартэ ханастэ машкар пэстэ».